



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.


À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



Vet. fr III B.2332







DV VRAY VSAGE DE LA CROIX DE Iesus-Christ

PAR

GVILLAVME FAREL
fuivi de divers écrits du même
auteur

NISI VT



GENEVE.

Imprimerie de Jules-Guillaume Fick

—
1865





AV LECTEUR.

LORSQUE, il y a trente-cinq ans, l'Eglise de Neuchâtel célébra le troisième jubilé de sa réformation, on grava sur une modeste pierre, dans le temple même où Farel avait prêché tant d'années, cette inscription grande & simple :

GVILLAVME FAREL

REFORMATEVR

1530

GLOIRE A DIEV

C'était la seule qui convint : on rappelait la mémoire du réformateur sans être infidèle à son esprit. Pour nous, en solennisant cette année le trois centième anniversaire de sa

mort, nous avons dû songer à un monument d'un autre genre. Les Eglises fondées par Farel ne connaissent plus de lui que son œuvre & que son nom; nous avons voulu le leur faire connaître lui-même en donnant un recueil de quelques-uns de ses écrits. Plusieurs des ouvrages qu'il a publiés de son vivant sont depuis longtemps perdus; quelques-uns, parvenus jusqu'à nous, mais à un ou deux exemplaires seulement, sont tombés dans une sorte d'oubli & n'ont jamais été réimprimés. Ainsi, au milieu de la riche littérature protestante du XVI^e siècle, remise de nos jours en vogue & en honneur, la place de Farel, un des pères de la Réforme française, se trouve pour ainsi dire vide. On ne connaît guère de lui que quelques fragments peu nombreux, reproduits par les historiens & les biographes.

Nous n'avons point à parler ici de sa vie : M. L. Junod, ancien pasteur de

Serrières, vient d'en tracer un récit auquel nous pouvons nous contenter de renvoyer. Il nous suffira de donner quelques détails sur la composition du recueil que nous offrons au public.

Nous avons tenu, pour faire bien connaître notre réformateur, à reproduire dans toute son étendue un de ses ouvrages principaux. Nous avons choisi à cet effet le *Vray usage de la Croix*, publié en 1560, & nous l'avons placé en tête de ce volume. Nous l'avons fait suivre de quelques autres écrits de moindre étendue & de quelques extraits, disposés par ordre chronologique. En premier lieu, la préface du *Traité sur l'Oraison dominicale* (1524), le plus ancien de tous les ouvrages français de Farel. Puis, l'épître à *tous Seigneurs & Peuples*, écrite de Morat en 1530, & dont Ruchat a donné une grande partie dans son *Histoire de la Réformation de la*

Suisse, mais que nous publions pour la première fois en entier. Nous avons placé à la suite une autre lettre circulaire, écrite de la même ville en 1532, & adressée à *tous les amateurs de la sainte Parolle*, puis la *Confession de foy* que Farel présenta à la république de Genève en 1537, & qui est importante comme expression complète de la foi réformée à son origine; il est intéressant de la comparer à celle de Calvin qui la remplaça en 1559.

Un autre document non moins précieux, & qui le ferait plus encore si on le possédait sous sa forme originale, c'est l'ouvrage de Farel intitulé : *Sommaire d'aucuns lieux fort nécessaires à chacun Chrestien*, dont la composition doit remonter à 1524 ou 1525. En tout cas, il est de plusieurs années antérieur à la première édition de l'*Institution* de Calvin, puisque, comme nous l'apprend l'auteur lui-même, il fut écrit à l'invitation
d'OEco-

d'OEcologampade, qui mourut, comme on fait, en 1531. C'est donc, sans contredit, la première dogmatique réformée. Mais il en fut de l'ouvrage de Farel comme de celui de Calvin : il fut singulièrement augmenté dans une édition subséquente, publiée en 1537 ou 1538, & dont celle de 1552 paraît n'être que la réimpression. Nous ne possédons aujourd'hui que l'édition de 1552, dont un exemplaire, peut-être unique, a été conservé à la bibliothèque Vadiane de Saint-Gall. Ne pouvant reproduire cet ouvrage en entier, à cause de son étendue, nous en avons extrait les chapitres principaux, ceux qui, peut-être, formaient la plus grande partie de l'ouvrage sous sa forme primitive. Ce sont les treize premiers & les deux derniers : ils exposent les points essentiels de la doctrine chrétienne, tandis que les chapitres intermédiaires, que nous n'avons pas reproduits, sont, pour la plupart,

b.

relatifs aux institutions ecclésiastiques & aux abus de l'Eglise romaine¹.

Pour apprécier à sa juste valeur Farel, « le plus entraînant des réformateurs français, » comme l'appelle M. Mignet, il serait nécessaire de connaître quelque chose de sa prédication. C'était là son don spécial. Farel, qui n'était ni un docteur, comme Calvin, ni un écrivain, comme Viret, ni un poète, comme Bèze, fut plus qu'aucun d'eux, un orateur : il avait, pour persuader les autres, toute l'énergie, toute la fougue de sa propre persuasion. Ses contemporains sont unanimes

¹ En voici les titres : *La doctrine & tradition des hommes ; — la sainte Ecriture ; — l'Eglise ; — des Clefs du Royaume des cieux ; — l'Excommunication ; — des faux Pasteurs ; — du bon Pasteur ; — de la puissance des Pasteurs ; — A quoy on est tenu aux vrais Pasteurs, & quelle obéissance & honneur on leur doit ; — des Sacrements ; — la Messe ; — Penitence ; — des bonnes Œuvres ; — Pourquoi doivent estre faites les bonnes œuvres ; — Jusne ; — Priere & oraison ; — Aumosne ; — Adorer Dieu ; — l'Adoration & service des Saints ; — des Festes ; — la Confession envers Dieu, & de la reconciliation envers le prochain, & de la confession faite l'un à l'autre, & de celle qui est faite au prestre ; — Contrition ; — du Pardon & remission des pechez ; — Satisfaction ; — du Glaiue & puissance de justice & superiorité corporelle ; — du Mariage ; — l'Instruction & enseignement des enfans ; — de la Preparation à la mort.*

à reconnaître la puissance, en quelque sorte souveraine, de son éloquence, & voici le souvenir qu'elle avait laissé dans la génération qui le suivit :

Gallica mirata est CALVINUM Ecclesia semper

Quo nemo docuit doctius.

Est quoque te semper mirata, FARELLE, tonantem

• Quo nemo tenuit fortius.

L'effet que produisit la parole de Farel sur Calvin lui-même, suffirait, au reste, pour en attester l'autorité. Malheureusement, on cherche en vain à retrouver quelque chose des discours de Farel : il n'en reste absolument rien. Ce qui, peut-être, en donne le mieux l'idée, ce sont les chaleureuses exhortations & les véhémentes prières contenues dans trois écrits qu'il composa à l'occasion des persécutions de Metz, en 1545, & que nous avons insérées à la suite de nos extraits du *Sommaire* : *A tous cœurs affamez*; — *Aux Eglises du Seigneur*, — & surtout, *Forme d'oraison pour demander à Dieu la sainte prédication*

de l'Evangile & le vray & droit usage des sacremens.

L'écrit polémique de Farel, intitulé *le Glaive de la Parole*, était trop long pour le reproduire dans ce recueil, mais trop célèbre pour ne pas le rappeler : nous en avons donné la Préface ou Epître dédicatoire.

Son *Testament*, fait en mars 1553, environ six ans avant son mariage & plus de douze avant sa mort, fut annulé par le fait de la naissance de son fils.

Les *Lettres* qui terminent ce volume appartiennent aux dernières années de la vie de Farel. Nous devons les quatre premières, ainsi que les notes dont elles sont accompagnées, à l'obligeance de M. Gagnebin, de Neuchâtel, l'un des pasteurs de l'Eglise wallonne d'Amsterdam. Il eût été aisé d'en grossir le nombre, mais M. Herminjard (auquel nous avons emprunté la dernière) est à la veille de publier

un recueil complet des Lettres de nos réformateurs: il nous a donc suffi d'en reproduire quelques-unes, tant latines que françaises, afin que l'on pût se faire une idée du style épistolaire de Farel.

Les armoiries qui figurent au frontispice de ce volume sont attribuées à Farel par un vieil armorial neuchâtelois, & le portrait placé en regard a été gravé d'après un buste du temps, que possède actuellement notre Bibliothèque.

Nous aimerions à espérer que cette publication, en rajeunissant la mémoire de notre grand réformateur, contribuera aussi en quelque mesure à ranimer parmi nous cette foi vivante en Jésus-Christ, à laquelle seule il a dû sa force.

Neuchâtel, septembre 1865.



DV VRAY VSA-

GE DE LA CROIX DE IESUS Christ, & de l'abus & de l'idolatrie commise autour d'icelle: & de l'autorité de la parole de Dieu, & des traditions humaines.

Par Guillaume Farel.

Avec vn aduertissement de Pierre Viret, touchant l'idolatrie & les empeschemens qu'elle baille au salut des hommes.

PAR IEAN RIVERY.

M. D. LX.

Avec Priuilege.





A TRESILLVSTRE PRINCE

*IEAN CONTE DE NASSAV, SAR-
bruk, Niors, & Sacuerden, Seigneur de Lar, &
Molberget &c. Grace, misericorde & paix de
par Dieu nostre Pere, & de par Iesus Christ nostre
Seigneur.*



IEV par sa grande bonté, tres-
illustre Prince, a donné la co-
gnoissance de son trescher Fils
Iesus Christ nostre Seigneur, à
vostre feu frere Monsieur A-
dolph, lequel n'a pas receu en
vain vne si grande grace, mais d'un cœur de
Prince vrayement Chrestien, il s'est employé à ma-
gnifier le nom de Dieu, à ce que le saint Euangile
fust presché, & que ceste seule doctrine eust lieu
en ses terres & seigneuries, lesquelles Dieu luy
auoit données. Et par mesme moyen il a aussi tra-
uailé à ce que tout-ce qui est contraire à la sainte
& seule vraye religion Chrestienne fust chassé. En
quoy il ne s'est pas monstre Prince & pere Chre-
stien, enuers les Allemans & ceus du pays tant
seulement, ayant vn soin paternel de leur salut,,
mais aussi des estrangers, & qui parlent la langue
Françoise, leur pouruoyant de bons & fideles pa-
steurs, qui preschassent purement le saint Euan-

gile, vſant d'une bonté & charité fort grande en les receuant & leur donnant lieu en ſes terres : la quelle choſe il n'a pas faite ſans iugement, & ſans ſauoir quelles gens il receuoit, mais eſtant bien aduerty, ſ'ils eſtoient gens qui vouluſſent ſuyure l'Euangile, & qui ne fuſſent point entachez des erreurs des Anabaptiſtes, & des malins eſprits, comme de Dauid George, & autres ſemblables, qui parlent de Dieu, du ſalut, de la iuſtification, & de la vie à venir, non pas ſelon la ſaincte Eſcriture, & comme l'Euangile contient, mais ſelon leurs reſueries, & comme aucuns en ſongeant en ont parlé. Et ce bon Prince procedoit tellement, que ſi Dieu luy euſt donné vie, il euſt eſté vn vray miroir, auquel on euſt peu voir, comme vn vray Seigneur & pere du peuple ſe doit conduire en tel affaire. Car ſon propos eſtoit de gouuerner & conduire ceus que Dieu luy auoit donnez en charge ſelon la pure parole d'iceluy. Ce qu'ayant entendu, en remerciant Dieu d'un grand cœur, ie deſiroye de m'employer à luy faire ſeruice. Et d'autant qu'il y auoit aucuns de langue François, i'ay taſché à les viſiter & leur preſcher l'Euangile de noſtre Seigneur avec le bon ſeruiteur de Dieu Maïſtre Iean Loquet, qui de preſent preſche en la Seigneurie. Et ſi oncques i'eus ioye, ce fut en voyant ce peuple & ce pays, & de pouuoir là preſcher, & voir que l'Euangile euſt lieu, non ſeulement en la langue Germanique, mais auſſi François. Orayant entendu la mort de ce tant excellent Prince, mon cœur dolent euſt eſté nauré fort griefuement, ſi Dieu

de sa grace ne m'eust consolé & recreé, me faisant entendre comment par sa miséricorde il auoit touché vostre cœur, vous donnant le vouloir, non seulement de maintenir ce qui auoit esté commencé & auancé par l'excellence de Monsieur vostre frere, mais aussi de tascher à plus auancer & parfaire l'œuvre de nostre Seigneur Iesus, laquelle estoit desia si bien commencée, & employer à cela, toute la puissance que nostre Seigneur vous a donnée. Dequoy benissant, louant & magnifiant nostre bon Dieu & Pere, i'ay pris la hardiesse de vous presenter ce petit Traitté de la croix, me confiant, qu'ainsi qu'il est présenté à vostre excellence d'un cœur rond & entier, & qui desire, comme nostre Seigneur le fait & cognoit, tout ce qu'on peut souhaiter à la puissance que Dieu a ordonnée, laquelle il veut estre en recommandation & reuerence à tous ceus qui sont sous icelle, qu'ainsi aussi il sera receu benignement, & qu'il pourra seruir, à fin que les Eglises soyent dressées & entretenues plus purement & qu'il n'y ait rien qui soit receu, sinon selon la parole & ordonnance expresse de Iesus Christ. Car par ce qui est touché en ce liurer, on peut voir comment se sont desbordez, non seulement ceus qui ont esté en ces derniers iours, ou tout estoit plein d'ignorance, & de toute idolatrie, voire de plein reuoltement contre Iesus Christ, la Foy & l'Euangile : la ou les aueugles ont conduit & mené les aueugles : mais aussi on y peut voir comment les plus sages & les plus saincts de tous, ont desia commencé à se foruoyer

de la droite voye enuiron le commencement que les Eglises estoient multipliées apres le temps des Apostres, & qu'on taschoit de les bien dresser, & qu'il y auoit des gens de fort grand sauoir & lesquels on auoit en grande admiration, tant à cause de leur grand sauoir, que de leur sainte vie. Car tout cela n'a peu faire qu'ils n'ayent lourdement failly & pourement escrit, en mettant en auant ce que la parole de Dieu ne contient & n'approuue point, mais le condamne. Et ainsi faisant, ils ont fait & entretenu en l'Eglise ce qu'ils n'auoyent pas de commandement de Iesus Christ. Et combien qu'il peut estre que plusieurs ayent vsé du signe de la croix en liberté, neantmoins chacun peut voir comment puis apres il a esté prins comme vne chose necessaire. Car on en est là venu. Parquoy cecy nous doit faire sages, & nous doit induire à bien regarder que quelque liberté qu'on pretende, quelques sages qu'on nous propose, que nous ne souffrions autre chose, que ce que Dieu a ordonné. Car nous ne pouuons auoir, ne meilleur ordre ne plus honneste, que ce que nous voyons en Iesus Christ, & qu'il a ordonné. Car il est impossible d'auoir meilleure conformité, que celle qui est de la parole de Dieu, & ne pouuons point s'uyure de plus sage, ne de meilleur que Iesus Christ. S'il faut que tout le passé qui a esté en l'Eglise, tant par Moyse que par les Prophetes, quand aus obseruations & à l'ordre, soit-ce en sacrifices, en accoustremens, ou en personnes, donnent lieu à Iesus Christ, & ne peut auoir lieu avec luy, il est facile à iuger, comment ce

qui vient apres pourra auoir lieu. Et pourtant, que ce nous soit assez, que les pasteurs soyent tels comme le Seigneur les ordonne, & la doctrine telle comme il l'a baillée, & que les liens soyent propres, ou le peuple puisse mieus conuenir, & que ceus qui sont de l'Eglise, & receus à la Cene, soyent tels comme porte l'Euangile, & que tout soit fait selon la pureté Euangelique. Si Iesus Christ & l'Euangile purement proposez & receus, n'esmeuent tous à conuenir reueremment, & à se porter comme il faut, qui le fera? Parquoy tres-illustre Prince, au nom du Seigneur Iesus, roy des rois, Princedes princes, & Seigneur des seigneurs, lequel le Pere nous commande d'ouir, ie vous supplie qu'és Eglises que Dieu vous a recommandées, pour en estre nourricier & entreteneur, rien n'y ait lieu, sinon la parole de Dieu, & ce qu'il commande & ordonne : & que rien n'y soit adiousté ny osté. Car lors tout ira bien, quand Iesus Christ seul & ses saintes ordonnances auront lieu en l'Eglise. Le Pere de toute bonté, misericorde & tout puissant, conserue & garde vostre excellence, vous faisant prosperer en tout, vous donnant bonne vie & longue pour seruir à son honneur & gloire, au grand auancement de l'Euangile. De Neufchastel ce premier iour de May, l'an mil cinq cens soixante.

Vostre tres-humble seruiteur en nostre Seigneur,
Guillaume Farel.

Mat. 17. a.


Marc 9. a.

Luc 9. e.





PIERRE VIRET AVS LECTEVRS
FIDELLES, S.



L'est escrit en certaine histoire, qu'en l'entrée d'un certain bain, il y avoit vne pierre à laquelle tous ceus qui y entroyent & qui en sortoyent, alloient heurter : mais il y en eut vn entre les autres, qui voulant là entrer, osta celle pierre & la mit ailleurs. Il y eut vn homme de bon esprit, qui ayant veu cela, dit qu'il n'auoit veu qu'un seul homme en ce bain la, combien qu'il y en eust vne grande multitude d'autres. Cest homme icy estant interrogé pourquoy il parloit ainsi, respondit que c'estoit pour tant qu'il n'estimoit point tous les autres dignes d'estre appelez hommes, sinon celuy la qui auoit osté la pierre, contre laquelle tous les autres auoyent heurté. En quoy il n'auoit pas mauuaise raison. Car ces hommes laissoient la celle pierre, ou par lourdisse d'entendement, ou par malice. S'ils le faisoient par lourdisse, en telle sorte qu'ils n'eussent pas l'entendement de la sauoir oster, veu qu'ils auoyent tous heurté contre icelle & en entrant & en sortant, ils estoient lourdes bestes. S'ils le faisoient par malice, afin que les autres qui viendroyent apres eus y heurtassent aussi comme eus, ils estoient bestes malicieuses. Car les hommes qui sauuent que c'est que de raison & d'humanité, ne prennent point de plaisir au mal des autres, ains taschent à le destourner par tous les moyens qu'ils peuuent. Et pour ce Iob a dit, qu'il a esté l'ail à l'aveugle, & le pied

Iob 29. b.

au boiteus. Ceus qui sont autrement ne sont point dignes d'estre tenus pour hommes, veu qu'ils ont despouillé humanité, & l'ont changée en inhumanité. Car il ne leur peut point reuenir de bien du mal d'autrui non plus qu'àu diable, lequel toutesfois ne laisse pas pour cela, de prendre vn singulier plaisir au mal. Parquoy ceus qui y prennent plaisir, sont de nature vrayement diabolique.

Et si c'est trefmal fait, & chose indigne d'un homme de bien, de ne point mettre peine à ce que les autres ne reçoient aucun dommage, ceus-la meritent bien plus griefue condamnation, qui non contents de destourner le dommage des autres, le procurent eusmesmes, & empeschent ceus qui veulent procurer le bien. Et pource nous deuons considerer qu'il n'est pas escrit en la Loy sans iuste cause : Tu ne mettras point empeschement deuant l'aeugle. Car si c'est mal fait de le mettre deuant celuy qui voit, celuy fait encore pis, qui le met deuant l'aeugle, entant qu'il s'en peut moins garder. Car combien que l'aeugle aura le chemin tout droit & bien facile, encore ne se pourra-il pas bien conduire tout seul. Parquoy il n'a pas besoin qu'on luy mette des empeschemens, pour le faire broncher & trespucher : mais au contraire, il est requis par le droit d'humanité, que ceus qui voyent les empeschemens lesquels il peut rencontrer, les luy ostent de deuant, & qu'ils le conduisent & adressent. Car non seulement celuy se monstre inhumain, qui met empeschement à l'aeugle, mais aussi celuy qui ne l'oste point, quand il le voit, & qu'il a le moyen de l'oster. Car si nous prenons la Loy de Dieu en son droit sens, ceus la sont tenus pour iniurieux & outrageus

outrageus enuers leurs prochains, non seulement qui leur font iniure & outrage, mais ceus la aussi, qui ne leur aident & ne leur secourent pas, selon le pouuoit qu'ils ont, & le commandement que Dieu leur en a donné. Sur quoy nous auons à noter, que ce qui est dit de l'aveugle en la Loy, se doit aussi entendre, de routes simples & rudes gens, & de tous pources ignorans, qui ont besoin d'estre enseignez & adressez & conduits comme pources aveugles, lesquels ne se sauuent pas conduire & gouverner eus-mesmes.

Or s'il est question d'empeschement, routes les choses qui peuuent empeschier le salut des hommes, & qu'ils ne rendent à Dieu l'honneur qui luy est deu, doyuent à bon droit estre tenues pour les plus dangereux empeschemens lesquels les hommes peuuent donner les vns aus autres, & pour ceus lesquels Dieu a en plus grande detestation. Voila pourquoy Iesus Christ a dit: *Malheur à celui par lequel scandale aduient: il seroit trop meilleur pour luy, qu'il eust vne meule de moulin pendue au col, & qu'il fust ietté au profond de la mer.* Quant à ce mot de Scandale, il est pris és saintes Escritures, pour tout empeschement qui fait chopper & choir les hommes en la voye de salut, & qui les destourne & retient d'aller à Dieu. Il est donc bien requis, qu'un chacun aduise diligemment, aus empeschemens qui empeschent aujourd'huy le salut des hommes, & qui les destournent de la droite voye de Dieu.

Mat. 18. 6.

Nous pouuons à bon droit mettre en cerengles images, les idoles, & les reliques qui sont aujourd'huy en la Papisterie comme des principaus empeschemens & des plus dangereux & dommageables à tout le peuple Chrestien.

Car vn chacun peut voir à l'œil, quel abus il y a, & en combien de manieres Dieu y est deshonoré & blasphemé, voire fort vileinement & outrageusement. Ce sont des empeschemens, qui destournent les hommes de Dieu, pour les faire tresbuscher en enfer, contre lesquels nous auons quelquesfois tous heurté & brenché bien lourdement. Et pourtant ceus la ausquels Dieu a ouuert les yeus non seulement pour se sauoir garder d'y aller plus heurter, mais aussi de pouuoir adresser ceus qui ne voyent pas encore si cler qu'eus, doiuent auoir pitié & compassion, quand ils voyent tant de pources aueugles qui non seulement vont là chopper tous les iours, mais heurtent si lourdement que plusieurs y font plus de leur dommage, quant à l'ame, que s'ils se rompoient les iambes & le col. Pour ceste cause Arnobius fort sauant personnage entre les Anciens Chrestiens lequel a esté maistre de Lactance Firmian, fait mention de trois excellens personnages qui auoyent grande amitié ensemble, desquels les deus s'estoyent desia faits Chrestiens: mais le troisieme qui estoit fort sauant homme, estoit encore Payen, & ne pouuoit estre induit à la religion Chrestienne. Il aduint que comme ils alloient deuisant ensemble, ils trouuerent vne statue & image du Dieu Serapis, laquelle ce Payen alla baisser comme le commun peuple superstitieux auoit accoustumé de le faire entre les Payens, comme il se fait aussi auourd'huy entre les Papistes, enuers leurs images. L'un des deus qui estoyent Chrestiens ayant veu cela dit à son autre compagnon qui estoit Chrestien comme luy: Est ce faire l'office d'un homme de bien, de laisser en aueuglissement vn homme qui luy est tant amy & familier,

Arnob. contra
gent. li. 8.

qu'il l'a tousiours à son costé, qu'il endure qu'en plein iour, il aille heurter & chopper contre des pierres? Uray est que ces pierres ont forme & figure, & qu'elles sont oinctes & coronées : mais toutesfois elles sont tousiours pierres.

Ce bon personnage a fort bien pris la chose. Car quand tout est dit, qu'est-ce des images & des idoles, sinon des pierres & des troncs de bois figurez, auxquels les aueugles vont heurter, comme contre des pierres & des fouches lesquelles ils rencontreroient en leur chemin? Mais combien qu'ainsi soit, toutesfois il y a encore vn si grand aueuglissement au monde, que le nombre de ceus est bien petit, qui trauaillent à oster tels empeschemens, à fin que les aueugles n'y aillent plus heurter, au pris de ceus qui trauaillent à les entretenir, & à en mettre encore d'auantage. Car il y a encore si grande ignorance en plusieurs, qu'on ne leur peut faire entendre que les idoles leur soyent en empeschement, pour les destourner du chemin de salut : ains au contraire, ils estiment qu'elles leur seruent de guide & d'adresse, pour les y mener. Voila qui est cause qu'ils n'ostent point ces pierres & ces troncs de bois, contre lesquels ils heurtent tous les iours & y voyent heurter & tresbucher les autres, pource qu'ils n'ont pas des yeus, pour voir ce qu'ils voyent. Car ils ont tant profité avec leurs idoles, & en l'escole d'icelles, lesquelles on appelle les liures des pources ignorans, & leurs maistres muets, qu'ils sont deuenus semblables à icelles : lesquelles ont yeus, comme le Prophete le tesmoigne, & si ne voyent point. Et pourtant, nous pouons dire à bon droit de tels personnages, qu'ils ne sont pas dignes d'e-

Psea. 115. b.
135. d.

estre tenus pour hommes, mais plustost pour bestes brutes du tout abruties, ou vrayement pour vrayes idoles, & que les idoles honorent les idoles.

Et si ceus cy sont indignes d'estre tenus pour hommes, nous pouuons bien iuger quelle estime on doit auoir de ceus la, qui cognoissent bien tels abus, & qui voyent tous les iours combien il y a de personnes qui vont heurter contre ces pierres & ces troncs de bois, voire à leur grand dommage & ruyne, & neantmoins ils n'ont garde de les en aduertir, & encore moins d'oster ces empeschemens contre lesquels ils heurtent. On peut dire de tels personnages à iuste raison, qu'ils sont trop plus mal charitables, & trop plus inhumains, que ceus qui n'ostent point les empeschemens lesquels ils voyent au chemin de l'aveugle. Mais ceus la font encore beaucoup pis qui non contents de ne point oster les pierres du chemin de l'aveugle, non seulement empeschent ceus la qui les en doyuent oster, mais aussi font tous leurs efforts, à en ietter & mettre tousiours d'auantage, à fin qu'on ne puisse pas faire vn pas, qu'on ne heurte, & qu'on ne bronche & tombe, ou deça ou dela. Car il y a des lieux, esquels tout est tant plein d'idoles, qu'on ne scait tourner les yeus de quelque costé que ce soit, qu'on n'en rencontre vne infinité, & principalement de croix: & cecy non seulement es temples, mais aussi par toutes les rues & les carrefours & par les chemins publiques, & tous autres lieux publiques & priuez.

Or si c'est desia vn tresgrand mal, de mettre ainsi empeschement aus aveugles, c'est bien encore le pis, si on pousse les aveugles qui craignent de heurter contre ces pierres, & si on les contraint pour les y faire heur-

ier. Celuy qui poufferoit & qui contraindroit ainſi vn poure aueugle, ne ſeroit-il pas eſtimé fort cruel & inhumain d'un chacun, & digne de la haine publique de tout le monde? Et toutesfois cela ſe fait ordinairement en la Papifterie, non ſeulement enuers les aueugles, mais beaucoup plus enuers ceus qui voyent le plus cler. Car ſi quelcun y paſſe par deuant vne croix ou par deuant quelque autre image & idole, ſans mettre la main au bonnet, & ſans luy faire quelque adoration & reuerence, il ſe rendra ſuſpect d'heréſie, & ſera outragé de ceus qui le verront, & ſe mettra en danger d'eſtre pris comme heretique, & puis apres bruſlé. En quoy la fureur ſe manifeſte encore plus grande. Car quelle contrainte y a-il en cecy? Ce n'eſt pas ſeulement à coups de baſtons, que les hommes ſont contrains d'aller iournellement heurter contre les pierres & les troncs de bois, & autres tels empeschemens, mais y ſont contrains à force de fagots & de feus. Et ſi ceus qu'on mene au feu, ne veulent pas baiſer les croix qu'on porte avec eus, & qu'on leur preſente, comme on le fait ordinairement enuers les criminels, & principalement enuers les ſorciers & les heretiques: les caphars qui les accompagnent pour les retirer de la droite voye & les induire à renoncer Ieſus Chriſt, ne ſe contentent pas d'outrager vilainement de paroles ces pources martyrs, les appellans meſchans, heretiques, damnez, mais auſſi ſouuentſois par grande rage & fureur, comme forcenez, les frappent contre le viſage fort cruellement, de ces croix leſquelles ils portent avec eus en tel affaire. Et qui ſont ceus qui ſont la principale cauſe de cela, ſinon les Prélats & les Paſteurs de l'eſgliſe papale, qui ſe

glorifient d'estre les conducteurs des aueugles? En quoy ils monstrent bien, qu'ils meritent trop plus que les
Mat. 23. b. Scribes & Pharisiens, qu'on leur dise: Malheur sur vous aueugles, conducteurs des aueugles.

Et d'auantage ils declarent assez par leurs œuures, qu'ils ont mal pensé, non seulement à ce commandement, par lequel Dieu defend de mettre empeschement
Leuit. 19. c. à l'aueugle, mais aussi à la malediction laquelle est donnée en la loy, à ceus qui font telles choses, ainsi
Deut. 27. c. qu'il est escrit: Maudit soit celuy qui fait desuoyer l'aueugle en la voye. Et tout le peuple dira: Ainsi soit-il. Voila vne malediction solennelle, qui est bien à craindre. Car elle est terrible & espouuantable. Et pourtant ceus ausquels Dieu a fait la grace de cognoistre sa sainte verité, comme il l'a manifestée en sa parole, lesquels sont menez d'une vraye crainte de Dieu, & d'une vraye affection à la gloire d'iceluy, & au salut de leurs freres, craignans d'encourir vne telle malediction, non seulement se gardent tant qu'ils peuuent, de mettre tels empeschemens aus aueugles: mais aussi travaillent de tout leur pouuoir, à les leur oster, à fin qu'ils rendent la voye bien vnüe, par laquelle Dieu appelle les hommes à soy. Car s'ils faisoient autrement, ils ne pourroyent point estre tenus pour vrais seruiteurs de Dieu, car ils ne s'aquiteroyent pas fidelement
Exech. 3. c. 33. b. de leur office. Parquoy le sang de ceus qui periroyent
Ath. 20. c. f. par leur coulpe, seroit requis de leurs mains, comme s'ils auoyent esté meurtriers des ames, desquelles Dieu les a faits pasteurs. Surquoy non seulement ceus qui portent le nom de pasteurs & de ministres en l'Eglise Chrestienne, doyuent bien considerer, comment ils s'a-

quient de leur office en telle matiere: mais aussi tous les Rois, & tous les Princes & tous les Magistrats, ausquels Dieu a donné la puissance & l'autorité, pour oster tant qu'en eus est, tous les scandales par lesquels l'honneur de Dieu est reculé, & le salut des hommes empesché, autant qu'ils en peuuent estre admonestez & aduertis par la parole de Dieu.

Or nous auons à louer Dieu de ce qu'en ce temps-cy, il a suscité vn assez bon nombre de ses seruiteurs, non seulement entre les ministres de l'Euangile, mais aussi entre les princes & les magistrats Chrestiens, qui ont trauaillé & trauaillent encore fidelement en cest œuure tant louable & tant plaisante à Dieu, & tant desplaisante à Satan & à l'Antechrist. Entre les autres ausquels les fideles doyuent beaucoup, & principalement ceus de nostre langue, il a suscité M. Guillaume Farel, duquel tantost dès le commencement que l'Euangile a commencé d'estre remis en lumiere, Dieu s'est grandement seruy, & par predication & par escrits, pour combattre l'Antechrist, & pour abolir l'idolatrie qui a esté dressée en la Chrestienté par le moyen d'iceluy, & pour oster les empeschemens lesquels ce maudit Antechrist a mis au salut des hommes par l'idolatrie, & par ses inuentions & traditions diaboliques. Entre les autres escrits par lesquels ce bon seruiteur de Dieu a combattu contre ce monstre, il a depuis n'agueres escrit ce Traité de la croix, qui est maintenant mis en lumiere, auquel il deduit les matieres lesquelles il promet au titre d'iceluy. La matiere qu'il traite est bien digne d'estre cogneue & bien declarée. Car il y a fort long temps, que Satan a trouué le moyen, de dresser vne fort grande &

fort detestable idolatrie, sous le nom & le titre de la croix de Iesus Christ, par laquelle il a tant gagné sur les hommes, qu'il les a induits à delaisser Iesus Christ, pour s'arrester non pas à la croix d'iceluy tant seulement, mais aussi aus signes & representations d'icelle.

*Et pour donner plus de couleur à ceste idolatrie, il a trouué le moyene de se servir de plusieurs grans seruiteurs de Dieu, desquels Dieu s'est aussi iadis grandement seruy en son Eglise. Mais ils ont seruy à Satan, en cest endroit, pour luy aider à bastir & dresser le regne de l'Antechrist & de toute superstition & idolatrie, sans s'en donner garde, & sans le penser faire. Et non obstant que selon leur iugement, ils ayent fait à bonne fin & à bonne intention, ce qu'ils ont fait, ce neantmoins on ne les peut pas du tout excuser, qu'ils n'ayent commis de grandes fautes, tant en ceste matiere, qu'en plusieurs autres semblables. Car combien qu'ils ayent porté grande reuerence à la parole de Dieu, toutesfois ils ne l'ont pas eüe du tout en si grand honneur qu'ils deuoyent. Car s'ils luy eussent rendu l'honneur qui luy appartenoit, ils n'eussent iamais rien osé entreprendre, de tant petite importance que la chose peust estre, sans suyure tousiours pas à pas, la reigle laquelle Dieu a donnée aus hommes és saintes Escritures, touchant l'honneur & le seruice diuin qu'il requiert d'iceus. Car si la parole de Dieu reuelée en icelles, est de telle authorité, que selon le tesmoignage de S. Paul, il faut que les Anges mesmes y soyent suiets, & qu'il soit iugé de leur doctrine selon icelle : Il n'y a point de raison, que les hommes entreprennent plus par dessus elle, que les Anges mesmes n'osent & ne peuuent entreprendre. Parquoy il
ne faut*

ne faut pas trouver estrange, si les fideles ministres de Iesus Christ, & tous les vrais Chrestiens, ne peuvent pas adouuer & approuuer, tout ce qui est proposé sous le nom & le titre des anciens docteurs de l'Eglise, tant belle couleur qu'ils puissent auoir. Car tant plus la superstition & l'idolatrie ont beau lustre, & tant plus elles sont dangereuses. Car elles esblouissent plus facilement les yeus, voire des plus sages mesmes. Parquoy tant plus que la superstition & l'idolatrie commise auxour de la croix est ancienne & fardée du fard de l'ancienneté & de la sainteté & autorité des anciens, & tant plus elle merite que ce fard luy soit osté, & qu'elle soit descouuerte, à fin qu'elle soit mieus connue, & qu'un chacun s'en puisse mieus garder & retirer. Car s'il falloit approuuer & recevoir entre les hommes, tout ce qui leur seroit proposé sous le nom & le titre de ceus qui sont tenus entre eus pour les plus anciens, & les plus sages & les plus saints & plus parfaits selon le iugement du monde, il n'y auroit superstition, idolatrie, erreur ny heresie à laquelle on ne peust donner couleur. Et ainsi faisant il n'y auroit iamais fin, & les hommes n'auroient rien de certain à quoy ils se peussent seurement arrester. Et d'autre part l'autorité laquelle Dieu doit auoir par dessus tous, ne luy seroit pas reseruée. Car il luy faut faire cest honneur, que tous se taisent apres qu'il a parlé & cependant qu'il parle, & que tous se tiennent à ce qu'il aura dit, sans y rien changer ou glosier, & sans y rien adioster ou diminuer.

Et pource il est monsté en ce traité, quel abus a esté en l'honneur qui a esté fait à la croix, entre les Chrestiens, & combien Dieu y est deshonoré. Et sem-

blement qui ont esté les personnes & les moyens, par lesquels ceste superstition & idolatrie a esté le plus avancée & autorisée. Car combien que les Payens ayent desja dès long temps reproché aus Chrestiens, qu'ils adoroient & honoroient la croix, toutesfois les bons docteurs anciens, lesquels soustenoyent la cause des Chrestiens, ont nié cela fort & ferme, & notamment Arnobius duquel j'ay desja fait mention. Car les Payens reprochoient aus Chrestiens, que non seulement ils commettoient la mesme faute laquelle ils reprenoyent en la religion des Payens, mais aussi qu'ils faisoient beaucoup pis. Car ils disoient, vous nous condamnez comme idolâtres, pource que nous honorons les images de nos dieux, & cependant vous adorez des gibets, lesquels vous deussiez estre pendus.

A la verité, si en ce temps là, les Chrestiens eussent honoré & adoré les croix, comme elles ont depuis esté honorées & adorées, & le sont encore aujourdhuy entre les Papistes, les bons docteurs Anciens qui defendoyent la cause des Chrestiens, eussent eu la bouche close. Mais depuis ce temps là, ceste superstition & idolatrie est née, & a esté fort avancée, principalement depuis le temps de Constantin, apres que les persecutions des tyrans contre l'Eglise ont cessé, ou pour le moins ont esté diminuées comme il est monstré bien euidentement en ce Traité icy. Et pource que tout cecy est aduenü par faute de s'arrester du tout à la parole de Dieu, comme il estoit requis, il est aussi fort bien remonstré en iceluy, combien il est nécessaire, que tous facent cest honneur à Dieu, qu'en renonçant à toutes inuentions & traditions humaines, qui ne sont point conformes aus saintes

Escritures, vn chacun s'arreste à la seule parole d'iceluy pour se conduire & gouverner selon icelle. Car si les hommes pouuoient faire cest honneur à Dieu, comme de droit ils le luy doyent, & s'accorder par ensemble en cela, il n'y auroit plus aucune diuision ne dissension en tout le monde, à cause de la religion : ains tous viuroient en bon accord & en grande paix les vns avec les autres. Et pource tous ont bien à prier Dieu, qu'il touche le cœur de tous, par son saint Esprit, à fin qu'ils luy facent cest honneur, & qu'ils ne butaillent plus contre luy & contre leur propre salut, comme ils le font, en suyuant les inuentions & les traditions humaines, au lieu de la seule & pure parole de Dieu.

TABLE DES SOMMAIRES ET DES CHAPITRES CONTENVS AV present liure.

C OMMENT la croix de Iesus Christ doit estre considerée, & comment estant separée d'iceluy, elle n'a point de vertu, & ne doit point estre honorée,	cha. 1. page 1.
Des causes pourquoy ce Traité a esté fait: & à quelles gens il peut servir,	cha. 2. pa. 3.
Quels sont les thresors de la bonté de Dieu, qui nous sont presentz en la mort & passion de Iesus Christ,	cha. 3. pa. 5.
Comment les Papistes preferent le signe de la croix à Dieu, & des blasphemés lesquels ils commettent en l'innuocation d'icelle,	cha. 4. pa. 7.
Comment ceux qui abusent du signe de la croix, ne peuuent estre excusés, combien qu'ils soyent ignorans,	cha. 5. pa. 9.
De la vertu laquelle plusieurs des anciens ont attribuée au signe de la croix, & des louanges qu'ils luy ont données,	cha. 6. pa. 10.
Du fondement que la superstition & idolatrie commise autour de la croix, a pris des louanges qui luy ont esté données par les anciens, & de l'honneur qui a esté fait au bois d'icelle,	cha. 7. pa. 15.
De la faute d'Helene enuers son fils Constantin, & de l'inuention de la croix par icelle: & quel fondement peut auoir ce qu'elle en a fait, es saintes Escritures, & es exemples des vrais seruiteurs de Dieu,	cha. 8. pa. 16.
Du tesmoignage d'Ambroise, touchant l'inuention de la croix par Helene, & des louanges lesquelles il luy a données,	cha. 9. pa. 20.
Des louanges qui ont aussi esté données à la croix par Irenée & Chrysostome,	cha. 10. pa. 21.
Des choses qui sont à reprendre en ces louanges données à la croix par les Anciens, & comment S. Paul en a parlé, donnant à tous la reigle comment il en faloit parler,	cha. 11. pa. 27.
Combien il est difficile de pouuoir bien comprendre tout ce que les Anciens ont escrit de la croix, & de l'accorder avec la parole de Dieu,	cha. 12. pa. 29.
De l'autorité qu'on peut donner aus anciens docteurs de l'Eglise: & quelle difference il faut mettre entre leurs escrits & les saintes Escritures,	cha. 13. pag. 31.
De l'autorité qu'on doit attribuer à la parole de Dieu, & du tesmoignage des anciens docteurs à ce propos,	cha. 14. pa. 32.

Comment les Anciens en ce qu'ils ont escrit de la croix, n'ont pas attribué à la parole de Dieu, l'autorité laquelle ils luy deuoyent attribuer selon leur tesmoignage mesme, cha. 15. pa. 35.

Comme il est requis d'alleguer & de prendre les saintes Escritures, selon le vray sens d'icelles, cha. 16. pa. 38.

De l'autorité de verité contre le iugement des hommes, & contre la coustume, cha. 17. pa. 39.

De l'autorité de la parole de Dieu, contre l'autorité des peres & des predecesseurs, cha. 18. pa. 41.

De la reigle donnée par Iesus Christ, tant à ceux ausquels la charge est commise d'annoncer la parole d'iceluy, qu'à ceux qui l'a doyent ouir & recevoir, cha. 19. pa. 43.

De la vertu laquelle Dieu donne par sa parole au miniftre de ses feruiteurs, pour conuaincre les ennemis de Dieu, cha. 20. pa. 45.

Comment l'autorité des saintes Escritures est non seulement par dessus tous les hommes, mais aussi par dessus les Anges, & comment tout erreur procede de ce que les hommes ne se tiennent à la pure parole de Dieu, cha. 21. pa. 47.

Comment les Anciens ont condamné leurs erreurs mesmes, par l'autorité qu'ils ont attribuée aux saintes Escritures : & du besoin que les hommes ont de s'enquerir d'icelles, cha. 22. pa. 51.

Comment ceux qui enseignent ne doyent rien proposer en l'Eglise, dequoy ils n'ayent certain tesmoignage en la parole de Dieu : & combien il est aujour d'huy necessaire de suyure ceste reigle,

cha. 23. pa. 54.

De l'accord qui est entre le vieil & nouveau Testament, & de la doctrine contenue en iceux, & de l'utilité d'icelle, cha. 24. pa. 56.

Du tesmoignage, des docteurs anciens, par lequel il est monstré que les saintes Escritures contiennent suffisamment tout ce qu'il est requis que les hommes sachent & facent pour leur salut, cha. 25. pa. 58.

De la temerité & presumption de ceux qui veulent adiouster à la parole de Dieu, cela que Iesus Christ n'a point dit à ses Apostres,

cha. 26. pa. 61.

Comment il n'y a point d'autre Escriture qui doise estre adioustée aux liures des saintes Escritures, cha. 27. pa. 64.

De l'autorité des Conciles, & d'où ils la prennent, & de la vraye reigle laquelle doit estre gardée & suyvie en iceux,

cha. 28. pa. 65.

Comment ce qui a esté fait par Helene selon que les Anciens en ont escrit, n'a point de bon fondement en la parole de Dieu, ains y est contraire,

cha. 29. pa. 68.

De la bataille de Iesus Christ en Golgotha, & comment il la faut considerer pour en faire son profit, cha. 30. pa. 70.

En quelle maniere Ambroise introduit Helene parlant de l'invention de la croix, & des choses qui sont à reprendre & condamner en cela, cha. 31. pa. 72.

En quel lieu, & par quel moyen il faut chercher le salut des hommes, & de la comparaison qui est faite d'Helene avec la Vierge Marie, & combien elle est à condamner, cha. 32. pa. 76.

De la comparaison des œuvres lesquelles Dieu a faites par le moyen de la vierge Marie, avec celles qui sont escrites d'Helene, & de la vertu que le bois de la croix peut auoir pour le salut des hommes, cha. 33, pa. 78.

De l'idolatrie qui est commise en l'adoration de la croix, & combien elle est contraire à la parole de Dieu, cha. 34. pa. 82.

Comment le grand sauoir & la grande sainteté qui peut estre es plus excellens d'entre les hommes, ne peuuent empescher que leurs fautes ne doyuent estre tenues & condamnées pour fautes, comme aussi leurs fautes ne doyuent empescher que leurs vertus ne soyent louées comme elles en sont dignes, chap. 35. pa. 86.

Quelle reprehension ceus-la meritent qui adionsent plus de foy à ce qu'ils trouuent es liures qui sont hors de la sainte Escriture qu'en ce qui est escrit en icelles, & ceus aussi qui leur veulent donner plus d'autorité par le moyen de tels liures, cha. 36. pa. 88.

De la doctrine à laquelle les Anciens se deuoyent principalement arrester pour l'enseigner aux hommes, cha. 37, pa. 91.

Comment la sainte Escriture parle du benefice de Iesus Christ, sans en rien attribuer au bois de la croix, ny à autre qu'à luy seul, cha. 38. pa. 93.

Quelle couleur on peut donner aux paroles des Anciens touchant la croix, & combien il est requis de parler clairement, & de suyure le langage du S. Esprit, en traitant les matieres de la religion, chap. 39. pa. 94.

De la faute qui est es manieres de parler des Anciens, touchant la croix, là mesme ou ils parlent le plus clairement s'exposans eusmesmes, cha. 40. pa. 96.

Du deshonneur qu'on fait à Dieu en donnant aux creatures l'honneur qui appartient à luy seul, chap. 41. pa. 98.

De la vengeance de Dieu contre l'Antechrist & les ministres d'iceluy, & contre tous les idolatres qui transportent aux creatures, l'honneur qui est deu au seul Dieu, & du fondement & de la couleur que l'idolatrie prend de l'ancienneté, cha. 42. pa. 100.

Comment il faut iuger de toutes choses selon la parole de Dieu, & du danger qu'il y a de suyure les hommes à cause de l'apparence qu'ils ont, cha. 43. pa. 103.

Si la croix peut estre appelée la clef de Paradis sans contrenuoir à Iesus Christ & à l'Euangile, cha. 44. pa. 104.

Conference de la Papeſſe Ieanne avec Helene, & du miniſtere des femmes en l'Egliſe. cha. 45. pa. 106.

Quelles couleurs ceux-la prennent qui veulent aujour d'huy maintenir & suyure les manieres de parler obscures des Anciens, cha. 46. pa. 107.

Comment les Prophetes & les autres vrais ſeruiteurs de Dieu, ont corrigé & repris les fautes de ceux qui ont abuſé de la parole de Dieu & des ordonnances d'iceluy, par fauſſe intelligence, & combien ceſt exemple eſt digne d'eſtre ſuiuy, cha. 47. pa. 108.

Que c'eſt que l'Eſcriture teſmoigne de la croix & de Iesus Christ crucifié, & de la conference de la croix avec la Circoncifion, & de la perfection qui eſt en Iesus Christ & en l'Euangile, cha. 48. pa. 111.

De la malediction de Dieu qui eſt donnée à ceux qui ne ſe tiennent à la pure parole de Dieu: & de la liberté infernale de ceux qui ſe donnent liberté de parler outre les ſainctes Eſcritures, chap. 49. pa. 114.

Quel grand bien c'eſt que de ſe tenir à la pure parole de Dieu, & combien vn chacun doit travailler à cela, cha. 50. pa. 117.

Comment s'il y a iuſte raiſon de reietter le Sacrement d'Extreme onction controuuë par les Papiſtes, il y en a pour le moins bien autant de reietter ce qu'ils attribuent à la croix, cha. 51. pa. 118.

De l'erreur des moderateurs qui condamnent les abus commis autour des idoles, & veulent neantmoins retenir les idoles, cha. 52. pa. 120.

De l'exemple d'Ezechias à ce propos, & de la faute de ceux qui ne ſuyuent l'exemple d'iceluy, en la reformation de l'Egliſe, chap. 53. pa. 122.

De l'office des Princes Chreſtiens touchant l'abolition de l'idolatrie & des idoles, à l'imitation d'Ezechias, & du vray uſage, & de l'abus de la liberté Chreſtienne, chap. 54. pa. 124.

De l'erreur de ceux qui veulent qu'on tiennes les images pour liures des pources gens, chap. 55. p. 127.

Du fait & de l'exemple de Faber Stapulenſis touchant l'image d'Iſis, & de la vertu que les idoles ont à eſmouuoir & entretenir les hommes en idolatrie, chap. 56. pa. 129.

Comment il se conuient garder d'abolir ce qui est ordonné de Dieu, à cause des abus qui y ont esté commis par les pratiques du diable, chap. 57. pa. 132.

De ceus qui se sont bien declarez en ce qu'ils ont escrit de la croix : & de la superstition qui a esté en ceus qui se sont amusez apres les choses qui ont quelque forme de croix : & du signe du fils de l'homme qui doit apparoirre au ciel, chap. 58. pa. 134.

De la superstition de ceus qui cherchent le signe de la croix és lettres, & notamment en T, & de ceus qui ont esté signez au front, chap. 59. pa. 137.

De la vraye marque de l'Eglise, & du vray signe duquel les fideles doyuent estre signez, chap. 60. pa. 139.

D'ou la croix peut prendre la vertu qui luy est attribuée par les superstitieux & idolatres, & de la comparaison de la croix avec la couronne de Iesus Christ, chap. 61. pa. 141.

Des clous de Iesus Christ, & de la comparaison d'iceus avec la croix, chap. 62. pa. 143.

Des proprietex attribuées à aucunes croix, par la superstition & idolatrie des Papistes, & du tesmoignage des prestres en cela, chap. 63. pa. 145.

D'aucuns miracles touchant aucunes croix, selon le tesmoignage des prestres, & des illusions du diable en telles choses, chap. 64. pa. 147.

Comment Dieu ne veut point qu'on suyue autre reigle au seruice diuin, sinon celle que luy-mesme a donnée par sa parole : & de la vengeance de Dieu contre ceus qui font au contraire, chap. 65. p. 152.

Comparaison de la captiuité du peuple d'Israel sous les Babylo-niens, & de celle des Chrestiens sous l'Antechrist, chap. 66. pa. 154.

De la vraye restauration & reformation de l'Eglise, chap. 67. pa. 156.

D V . V R A Y V S A G E D E
L A C R O I X D E I E S V S C H R I S T ,
& de l'abus & de l'idolatrie commise autour
d'icelle : & de l'autorité de la parole de Dieu,
& des traditions humaines.

*Comment la croix de Iesus Christ doit estre con-
siderée, & comment estant séparée d'iceluy, elle n'a point
de vertu, & ne doit point estre honorée. CHAP. I.*



'IL est ainsi que la parole de
Dieu coniointe avec les saincts
Sacremens, donne estre à iceus,
& les fait & rend saincts, & de
grande vertu & efficace, en ceus
qui croient en la parole de vie,
& qui les reçoient selon icelle : il est facile à
iuger que c'est que nous pouons dire de la saincte
croix de Iesus Christ, quand il y est attaché, &
qu'il a parfait en icelle l'œuvre de nostre salut,
& qu'en mourant en icelle pour nous, il rend l'o-
beissance pleine & parfaite à Dieu son Pere, par
laquelle non seulement le mal qui est adueni par
la desobeissance d'Adam, est osté & destruit, mais
tout bien & toute benediction nous aduient. Cer-
tainement nous ne pouons sinon magnifier gran-
dement ceste croix ainsi reuestue de Iesus Christ,
& l'auoir en singuliere recommandation, entant
que Iesus Christ y est. Mais selon la raison & la
nature des Sacremens, esquels nous regardons la

A.

parole, entant qu'elle y est, & qu'on en vse selon icelle, il faut aussi que nous regardions la croix de Iesus Christ, entant qu'il y est, & que nous la prenions avec & selon Iesus Christ: ou, parlant plus proprement, nous devons regarder, prendre & recevoir Iesus Christ par vraye foy, lequel a enduré vne passion & vne mort tant amere pour nous. Et comme aussi tenir l'eau, le pain & le vin pour Sacremens, quand la parole n'y est point coniointe, & en vser & faire autrement que ne porte la pure parole de Dieu, & autrement que Iesus Christ ne commande, c'est vn abus & vn peché fort grief deuant Dieu, & est plus lascheté d'enchanterie & de charmerie, que chose de Dieu ne Chrestienne. Pareillement de regarder la croix auant que Iesus Christ y soit, ou apres quand il n'y est plus, ou plustost de regarder autre chose que Iesus Christ, cela ne peut auoir lieu aucunement avec la parole de Dieu, ny estre tenu que pour vne pure superstition & idolatrie, & du tout contraire au deuoir des Chrestiens. Parquoy, comme à bon droict ie prise & magnifie les Sacremens lesquels Iesus Christ a ordonnez, & l'vsage d'iceus, selon la sainte ordonnance d'iceluy: & comme i'ay en detestation tout ce qui est fait & dit autrement: ainsi aussi ie prise la croix, entant que Iesus Christ besongne & souffre en icelle: c'est à dire, cependant que Iesus Christ endure en la croix pour nous: & aussi ie deteste ce qui est dit & fait de la croix, pour la magnifier sans Iesus Christ, auant que Iesus Christ y soit mis, ou apres qu'il en est

osté. Voire mesme i'ay en detestation si on veut priser & honorer autre que Iesus Christ crucifié, & faire ou dire autre chose qu'en l'honneur & gloire de ce grand Sauueur qui est mort en la croix pour nous, & autrement que sa sainte parole ne porte.

Des causes pourquoy ce Traité a esté fait : & à quelles gens il peut seruir. CHAP. II.

O R i'ay veu par experience, que le bois seul, sans que Iesus Christ y soit plus, & que mesme celuy auquel Iesus Christ n'a iamais esté, voire d'auantage le signe du bois, est en telle estime enuers tous, que ce qui appartient à Iesus Christ seul, est baillé tant à ce bois de la croix, qu'au signe d'icelle. En quoy grande idolatrie est commise. Parquoy il n'y a que superstition damnable, d'ainsi tenir la croix, & aussi le signe d'icelle, & l'auoir en telle reputation, comme moy-mesme l'ay eu, cependant que ie pensoye bien chasser le diable, en me signant d'iceluy : & en ce me iugeoye estre vn vray Chrestien, là ou i'estoye plus esloigné de Iesus Christ, & de la vraye & droite foy Chrestienne, que le ciel n'est loin de la terre. Car i'estoye tellement souillé de borbier & fiente papale, & tant profondement abyssé en icelle, que tout ce qui est au ciel & en la terre ne m'en eust peu retirer, si ce bon Dieu, & ce doux & amiable Sauueur Iesus Christ, de sa grande grace ne m'en eust retiré, en m'attirant à son Euangile, qui est la doctrine de salut. D'autant donc que ceste idolatrie

est la plus commune & la plus ancienne qui ait gueres esté introduite en la Chrestienté, & qu'elle a plus d'apparence, & plus difficilement se desracine du cœur des gens, avec l'aide de Dieu (qui m'a retiré de si griesue mort papistique, & m'a mené à la vie Chrestienne, & m'a deliuré de si dangereuse & incurable maladie de superstition, en me donnant la garison & santé de la parole) i'ay bien voulu aider & donner conseil du bien que Dieu m'a communiqué, à tous ceus qui sont abusez comme ie l'ay esté, à fin qu'ils n'ayent autre que Iesus Christ seul, comme la saincte doctrine Euangelique nous monstre & nous enseigne que nous le deuons faire. Cependant, que personne ne pense que ie face cecy comme n'ayant autre chose à faire, ou comme estant esmeu par aucune legereté, comme plusieurs qui ne se peuuent contenir, mais par vne affection par trop desbordée enragent d'escrire & mettre leur nom en auant. Car iulques à present cela ne m'est point aduenu. Car ie n'ay rien escrit que par grande contrainte : & mesme quand i'ay escrit, ie ne vouloye point que mon nom y fust mis. Car ie desiroye plus que point d'autre chose, que ce que i'escriroye fust bien consideré en soy, & que pour mon nom il n'en fust ne plus ne moins. Et si au demeurant (comme Dieu le fait & cognoist) i'ay pesé ce que ie mettoye en auant, craignant de dire aucune chose contre la verité de Dieu, & contre le bien & l'edification du prochain : & si i'ay bien regardé de ne point mespriser mon prochain & de

ne point faire qu'aucun ait occasion de mépriser la tressalutaire mort & passion de Iesus Christ: i'ay aussi icy voulu tascher d'obuier à la superstition, voire à l'idolatrie qui est du tout contraire à la vraye adoration de Dieu, qui est en esprit & ve-
Jean 4. c.
 rité. l'ay bien veu que ceus qui sans raison se dressent contre verité pour abolir l'Euangile, se trauaillent tant & plus à amener tout ce qu'ils peuuent, voire ils controuuent, & feignent & inuentent ce qu'il leur plaist, pour colorer erreur & fausseté. Tels personnages ont icy autant ou plus ce qu'ils cherchent pour se maintenir, qu'en point d'autre chose. Car la superstition & l'idolatrie contre laquelle i'ay fait ce Traitté, est des plus anciennes & des plus enracinées és cœurs des hommes que point d'autre, entant qu'elle a plus d'auteurs en apparence pour la faire valoir, que point d'autre que ie sache. Mais avec l'aide de Dieu, tous pourront entendre que selon Dieu elle doit estre chassée, & que ce que ie propose au nom du Seigneur, doit estre receu & approuué.

Quels sont les thresors de la bonté de Dieu, qui nous sont presentez en la mort & passion de Iesus Christ. CHAP. III.

PREMIEREMENT, si nous considerons diligemment la mort & la passion de Iesus Christ, il n'y a point de doute que nous ne recognoissions à la verité, qu'en icelle tous les thresors de la bonté & misericorde du Pere, doyuent estre magnifiez,

Jeau 3. b. prizez & exaltez tresgrandement, & que tous les
 poures pecheurs doyuent estre inuitez & incitez à
 venir à ce bon Pere tant charitable, qui a tant aimé
 le monde, qu'il n'a espargné son seul fils, mais l'a
 donné pour sauuer le monde. En apres, nous se-
 rons asseurez en icelle, que tous doyuent estre in-
 citez tresardemment à venir au Fils, duquel la char-
 rité est si grande, qu'il donne sa vie, son corps &
 son sang pour sacrifice parfait de la rançon de tous
 ceus qui croiront en luy. Car c'est celuy qui ap-
 pelle tous ceus qui sont chargez & trauaillez, &
 leur promet qu'il les soulagera. C'est luy qui tant
 amiablement exauça le miserable brigand, luy
Mat. 11. d. donnant paradis, disant, le te dy en verité, qu'au-
 iourd'huy tu seras avec moy en paradis. C'est ce-
 luy finalement, qui ayant pitié & compassion de
 ses ennemis mortels, prie pour eus Dieu son Pere,
Luc 23. f. disant, Pere, pardonne leur: car ils ne sauent
 qu'ils font. Tellement que nous ne trouuerons rien
 en ceste mort de Iesus Christ, qui ne nous doyue
 esmouuoir & inciter à recourir à luy, & le prier
 & requerir en toutes nos necessitez. D'auantage,
 nous serons contrains de recognoistre que le S.
 Esprit ne se monstra iamais plus fauorable aus po-
 ures pecheurs, qu'en ce qu'il a esmeu & conduit
 Iesus Christ en la sainte humanité à se donner &
 offrir pour sacrifice en reconciliation pour les pe-
 cheurs: & en ce qu'en ceste tant alpre mort &
 passion, il besongne si viuement au cœur de ce mal-
 heureux brigand, pour l'inciter à se retourner à
 Iesus Christ: & en ce qu'il a contraint ces mes-

chans & execrables souldars Italiens, & aussi leur capitaine, à se retourner, frappans leurs poitrines, & confessans que Iesus Christ estoit iuste & vray fils de Dieu, & condannans tout ce qui auoit esté fait contre luy. Finalement, si nous considerons diligemment ceste mort & passion de Iesus Christ, nous verrons bien clairement, comment en icelle le voile du temple s'est rompu depuis le plus haut iusqu'au bas, à fin que tout ce qui estoit caché, & cela ou personne n'osoit entrer, soit reuelé par la mort de Iesus Christ, & que tous fideles y ayent acces & entrée, voire en pleine hardiesse de foy, venans au throne de grace, pour obtenir pleinement misericorde.

Comment les Papistes preferent le signe de la croix à Dieu, & des blasphemes lesquels ils commettent en l'inuocation d'icelle. CHAP. IIII.

O R combien que toutes ces choses soyent manifestées en la passion de Iesus Christ, neantmoins ces miserables escriuains & prescheurs de la Papisterie, en la predication de la mort & passion de Iesus Christ, proposent au poure peuple, que durant le temps de la passion il n'y a aucun ordre d'aller au Pere pour le prier, veu qu'il n'a pas voulu ouir ny exaucer la priere de son propre fils, combien qu'il se iettast en terre, priant longuement & par plusieurs fois d'une affection tres-ardente, voire iusques à suer le sang & l'eau. Ils disent aussi qu'il ne faut prier le Fils, pourtant

Luc 22. 42.

qu'il est pressé de prier pour soy-mesme, & n'obtient rien pour soy, & encore moins peut-il obtenir pour les autres. Quant est du S. Esprit, ils disent qu'il ne le faut demander en aide, ny requérir la grace, d'autant que son chef d'œuvre est destruit & mis à mort, à sauoir Iesus Christ, qui a esté conçu du S. Esprit. Parquoy ces miserables se destournans de Dieu le Pere, du Fils, & du S. Esprit, disent qu'il ne reste autre que la croix à laquelle il faut recourir en ce temps de la passion : & disent & admonestent de dire avec eus, *le te salue, ô croix, la seule esperance, en ce temps de souffrance augmente la iustice à ceus qui aiment & craignent Dieu, & fay mercy aus coupables*. Puis que sous la couleur de la croix, ces malheureux non seulement desgorgent, mais aussi escriuent des propos tant estranges, & tant contraires à toute la doctrine de Dieu, & qu'au lieu d'enseigner comment il faut recourir à Dieu, qui seul est nostre esperance, qui seul nous iustifie, qui seul nous pardonne nos pechez, voire pour l'amour de soy-mesme, ils disent qu'il ne faut aller à Dieu : & que d'autant que la porte nous est fermée enuers iceluy, la croix est nostre seule esperance : & que la croix fait ce que Dieu en ce temps de la passion ne veut faire : & osent bien affermer que la croix fait ce que le Pere ne veut, que le Fils ne peut, & que le S. Esprit ne daigné faire. Oyant tels blasphemes, me pourray ie taire ? Seray-ie si desloyal à Dieu, n'ayant aucun esgard à son honneur, qui est icy du tout foulé aus pieds ? Seray-ie si inhu-

main

main & cruel enuers mes freres, que ie souffre qu'ils soyent ainsi empoisonnez, & qu'ils meurent si malheureusement, là ou ie puis crier qu'ils se gardent de telle poison ? O cruels & inhumains chefs de peuple, qui forcenez & enragez, & qui vous enyurez du bruuage de la grande prostituée de Babylone, qui meurtrissez & tuez tout ce qui ne sert à l'Antechrist, qui bruslez tous les escrits qui sont contraires à la peruerse doctrine d'iceluy, que direz & respondrez-vous deuant Dieu, lequel vous souffrez estre si horriblement blasphemé, & endurez tels escrits auoir lieu, & tels blasphemes estre preschez ? O terre qui portes & souffres tels monstres que tu en souffriras !

Comment ceus qui abusent du signe de la croix, ne peuuent estre excusés, combien qu'ils soyent ignorans.
CHAP. V.

MAIS on me dira que ce que i'ay amené ne merité point qu'on en face mention : car ceus qui preschent ou escriuent ainsi, ne sont tels qu'il en faille tenir conte, veu qu'ils sont gens fort ignorans : & que ceus qui tiennent tels propos sont loin des sauans, & que tels liures ne sont es mains des sauans. D'auantage on dira que si aucun sauant personnage vse de tels propos, c'est pour plus esmouuoir le peuple à ouir la passion en grande reuerence : & que pour ceste cause il faut tout prendre en la meilleure part, & regarder plus l'intention que les paroles, & ce qui s'ensuit d'i-

A. i.

celles. Poures blanchisseurs de murailles vieilles, & des sepulchres infects, iugez-vous icy selon les personnes, & non selon le faict? Le fauoir ne l'ignorance ne fait pas la chose estre bonne, & la bonté ne se prend de l'homme, & ne vient de l'homme, mais de Dieu, de sa parole, & de son Esprit. Et d'autant que tout nostre salut, nostre bien, & nostre vie gist & est en Iesus Christ crucifié, qui est mort pour nos pechez, & ressuscité pour nostre iustification, si nous voulons excuser ou approuuer chose quelconque, faisons-le entant que Dieu l'excuse & l'approuue, entant qu'elle est contenue en sa parole, & entant que ceus qui la font, font selon Dieu, suyuant sa parole en vraye foy, & estans conduits par le S. Esprit. Car autrement l'homme ne peut rien faire ne dire qui ne soit peché, d'autant qu'il n'a pas la parole de Dieu, par laquelle il croit en verité qu'il doit ainsi faire & dire. Or quelle chose peut estre plus hors de raison, que de mettre mensonge & fausse doctrine au lieu de ce ou gist tout nostre salut, comme font tels poures errans?

De la vertu laquelle plusieurs des anciens ont attribuée au signe de la croix, & des louanges qu'ils luy ont données. CHAP. VI.

MAIS il y a bien d'auantage que ce que nous auons amené de la croix, & il y a bien d'autres personnages de grande apparence, qui se sont abusez autour d'icelle: & l'vsage du signe de la

croix n'a pas esté mis en auant ny aujourd'huy ny hier, mais est si ancien qu'on seroit bien empesché de dire quand il a commencé, apres la mort du Seigneur. Car S. Augustin, qui est l'un des plus excellens d'entre les anciens, dit que si ce signe n'est fait, soit au front des croyans, ou à l'eau de laquelle ils sont regenez, ou à l'huile de laquelle par onction ils sont oints, ou au sacrifice duquel ils sont nourris, il n'y a rien qui soit fait à droit. Et en un autre lieu il dit ainsi, que par le signe de la croix par l'imposition des mains, ceus qui sont baptisez reçoivent les dons des graces, & qu'universellement tous les Sacremens de l'Eglise sont parfaits en la vertu d'iceluy. D'auantage il dit autre part, Toutes choses qui sont sanctifiées, sont consacrées par ce signe de la croix du Seigneur. Et encore en un autre lieu il dit, Quand le signe de la croix est mis en honneur, les peuples qui estoient ennemis sont adoucis: l'ennemy qui traualle à fermer le passage est surmonté, quand Moysse estend ses mains en signe de la croix du Seigneur. Les peuples sont signez au front, du signe de la passion du Seigneur, pour defense de salut. Le laisse ce qu'il dit autre part, Tout courant à aucune mauuaise œuvre, s'il hurte du pied, il signe sa bouche, & ne fait point qu'il enclost plus tost le diable dedans, qu'il ne le chasse dehors. Enquoy on voit clairement comment ce bon personnage ne pense pas quelle faute il commet, en ce qu'il dit touchant d'enclorre ou de chasser le diable. Car il faut bien autre chose pour chasser

Augu. in Io.
tract. 158. de
annunciat. do.
ser. 3.

De tempore ser.
181. in vigil.
Paulus de expo.
symb. ser. 1.

Contra Faust II.
12. c. 30.

Lib. 50. homil.
hom. 21.

Tertul. contr.
Mar. li. 3.

De coro. militis
ad uxorem li. 2.
Cyprian. ad Iuba-
num de hæret.
baptif.

Lact. diuinarum
instit. li. 4. c. 26.
27.

Ambr. sermo.
de cruce 56.

vn tel ennemy, que les croix materielles, ou signes d'icelles, ou chose quelconque que l'homme puisse faire. Et Tertulian qui est plus ancien qu'Augustin, dit, que nostre T, espece de croix, signifioit qu'il aduiendrait qu'elle seroit en nos fronts, en la vraye & catholique Ierusalem. En outre il dit, Nous signons le front du signe (entendant de la croix) à tout outrepassement, & à tout auancement, à toute entrée & yssue, au vestement & chaussement, aus beins & estuues, aus tables, aus lumieres, aus liëts, aus sieges, en quelque part que nous nous trouuions. Il dit aussi autre part, Seras-tu cachée quand tu signeras le petit liëst, & ton petit corps, & qu'en soufflant tu craches aucune chose mal nette? le me deporté de ce que Cyprian, qui n'est pas des moindres entre les anciens, escrit de ceus qu'on baptise, Qu'ils soyent presentez, à fin que par nostre priere, & par l'imposition des mains ils obtiennent le S. Esprit, & soyent consommez par le signe du Seigneur. Lactance en parle comment il deuoit aduenir que grand peuple de toutes langues & lignées receuroit ce tref-grand & haut signe en leurs fronts, & que les malins esprits sont chasséz par le signe de la passion: & que quand on fait les sacrifices aus dieus des idolatres, si aucun qui ait le front signé est present, ils ne peuuent rien faire, & ne peut-on auoir response. Ambroise qui a aussi esté grand personnage, escrit que par ce signe le monde mesme est sauué: & que par ce signe du Seigneur, la mer est coupée, la terre est labourée, le ciel est gouverné, &

les hommes sont conseruez : car par ce signe du Seigneur les enfers sont ouuers. Et S. Hierome à bon droit condamne ceus qui au lieu d'auoir la loy de Dieu en leurs cœurs, l'ont escrite & la portent en leur teste, monstrant qu'il ne sert de rien de la porter au corps : autrement les armoires & arches n'auront rien moins que les hommes : car ils ont les liures, mais ils n'ont pas la cognoissance de Dieu. Et par ainsi il reprend & condamne la superstition des femmes qui font la pareille, en portant des petis Euangiles, du bois de la croix, & semblables choses. Et combien qu'il parle ainsi contre ceste superstition, neantmoins il louë le signe fait sur la bouche & sur la poitrine, pour adoucir la douleur par le signe de la croix. Et dit, Celle qui ayant le doigt à la bouche, faisoit le signe de la croix es leures, &c. Pourtant il commande à la vierge, Ta main face le signe de la croix en toute action & en tout marchement. Et en autre lieu il dit, Garny souuent ton front du signe de la croix, à fin que le destructeur d'Egypte ne trouue lieu en toy. Chrysostome, qui pareillement a esté homme de grand renom, en escrit ainsi, Portons, dit-il, par tout de cœur ioyeus la croix de Christ : car toutes choses qui profitent à nostre salut sont consommées par icelle. Car quand nous sommes regenez, la croix y est presente : quand nous sommes nourris de la tressacrée viande : quand nous sommes pour estre consacrez en l'ordre, par tout & tousiours ce signe de victoire y est present. Et pourtant mettons dedans en grande diligence la

Hieron. in 23
cap. Matt. di-
laet. phylact.

Ad Eustoch.
epith. pente.

Ad Eustoch. de
custod. virg.
Ad Demetr. de
virgine seruan-
da.

Chryso. in 16. c.
Mat. homil. 55.

croix aus plus secrets lieux de la maison, aus parois, & aussi au front, & en l'entendement: car c'est le signe de nostre salut, de la liberté commune, de la douceur & humilité du Seigneur. Quand donc tu te signes de la croix, pense en toy toute la cause de la croix. Il dit encore, Le signe iadis, & en nostre temps a ouuert les portes fermées: il a esteint la vertu des venins: il a reprimé les bestes furieuses: il a guery les morsures mortelles des serpens. Certainement s'il a rompu les portes d'enfer, s'il a ouuert les portes du ciel, s'il a renouuelé l'entrée de paradis, s'il a couppé les nerfs du diable, est ce de merueille s'il a surmonté les venins pestilentieus, les bestes cruelles, & semblables choses? Et en vn autre lieu non seulement il parle du signe de la croix, mais il dit, Les diables seulement oyans le nom de la croix, s'enfuyent. Iceluy mesme dit en vn autre lieu, Ceste enseigne du dernier supplice, à sauoir la croix, est faite plus excellente que les diademes & coronnes. Car la teste n'est pas si bien ornée de la couronne royale, comme de la croix, qui est plus digne que tout parement: & tous desirent la figure d'icelle, laquelle tous au parauant auoyent en horreur: tellement que par tout elle est trouuée chez les princes, chez les suiets, chez les femmes, chez les hommes, chez les vierges, chez les mariées, chez les serfs, chez les francs, souuentefois tous seignent d'icelle, la tirans à nostre tres-noble membre: elle est formée vn chacun iour en nostre front, comme en vne colomne. Ainsi en la table sacrée,

De laudibus
Pauli, homil. 4.
Aduersus gentil.
Demonst. Quod
Christus est
Deus.

és ordonnances des administrations des choses sacrées, derechef aussi elle reluit avec le corps de Christ, és Cenes contenant les secrets mystiques.

Du fondement que la superstition & idolatrie commise autour de la croix, a pris des louanges qui luy ont esté données par les anciens, & de l'honneur qui a esté fait au bois d'icelle. CHAP. VII.

VOILA comment les anciens docteurs ont exalté le signe mesme de la croix. Mais outre tout cela, n'est-il pas dit au grand Constantin, Tu vaincras par ce signe? Puis que tels personnages ont ainsi parlé du signe de la croix, ceus qui sont venus apres, luy ont tant & plus attribué, & singulièrement pour chasser les diables, & les empescher de pouuoir approcher & nuire à ce qui est signé du signe d'icelle, comme aucuns sermons qui sont escrits en rendent tesmoignage, avec ce qui communément est dit, Voicy le signe de la croix, fuyez vous en, parties contraires. Et aussi ce qu'on dit, Par le signe de la sainte croix, nostre Dieu nous deliure de nos ennemis. Or ie ne scay qui pourroit raconter ce qui est dit & escrit auoir esté fait en la vertu du signe de la croix : comme il est dit de saint Laurens, & de tant d'autres. Mais combien qu'on ait tant attribué au signe de la croix, neantmoins ce n'est rien au pris de ce qu'on a dit & escrit de la croix & du bois d'icelle : tellement que ie m'estonne d'aucuns personnages qui en ont parlé de telle sorte qu'ils se sont oubliez

Hist. Eccles.
lib. 9. c. 9.
Tripart. lib. 1.
c. 4.

ens-mesmes, & ont fait & dit en ceste matiere tout au contraire de ce qu'ils ont presché & escrit en autre part. Il est tout clair que deuant l'Empire du grand Constantin, il n'estoit aucune mention du bois auquel le Seigneur auoit esté mis, ny personne qui ait esté, soit du temps des Apostres, ny apres, n'en parloit pour l'honorer, ne pour faire aucun seruice à ce bois : mais seulement on prisoit Iesus Christ, en magnifiant sa mort & passion, & ce qu'il auoit enduré en la croix : comme aussi cela est plus que necessaire, & tres-grandement vtile à tous, à sauoir de seruir, magnifier, priser, & honorer celuy qui est mort pour nous, comme contient l'Euangile, & aussi declarer cela en oyant la parole de l'Euangile, en s'assemblant & se trouuant en la sainte assemblée des fideles, & avec eus oyant la doctrine celeste, & participant aus saints Sacremens, & de faict, de parole, & de vie monstrant qu'on est à Iesus Christ : car cela est le deuoir de tous les vrais Chrestiens.

De la faute d'Helene enuers son fils Constantin, & de l'inuention de la croix par icelle : & quel fondement peut auoir ce qu'elle en a fait, és saintes Escriures, & és exemples des vrais seruiteurs de Dieu.
CHAP. VIII.

HELENE mere de l'Empereur Constantin, pour s'acquitter du deuoir d'une femme Chrestienne & craignant Dieu, deuoit auant toutes choses travailler que son fils (lequel sembloit estre vn Ange,
à com-

à comparaifon des ennemis de Dieu qui auoyent eſte empereurs deuant luy) fiſt vne ouuerte confeſſion de Chreſtien, puis qu'il ſe diſoit croire en Ieſus Chriſt. Puis apres ayant fait vne telle confeſſion, elle le deuoit enſeigner à faire commel'Eunuque de la Royne Candace, lequel ayant eſté enſeigné par Philippe, incontinent qu'il fut pres d'une fontaine, il demanda d'eſtre baptizé. Et comme ſainct Pierre qui ayant annoncé l'Euangile à Cornile & aus ſiens, & voyant que le ſainct Eſprit eſtoit deſcendu ſur eus, dit, Pourroit aucun defendre l'eau, à ce que ceus-cy ne ſoyent baptiſez, leſquels ont receu le ſainct Eſprit comme nous? Et commanda qu'ils fuſſent baptiſez au nom du Seigneur. Auffi Conſtantin de ſon coſté ſe deuoit declarer vrayement Chreſtien, & receuoir les ſaincts Sacremens, à ſauoir le Bapteſme & la Cene. Laquelle choſe il n'appert par aucune hiſtoire qu'il ait faite, veu meſmes qu'il n'a eſté baptiſé qu'en ſes derniers iours, en la ville de Nicomedie, là ou il eſt mort. Enquoy eſt manifeſte la Chreſtienté d'iceluy, & le ſoin que ſa mere en a eu, & ceus qui eſtoyent de ſon temps qui le deuoyent inciter à cela par la parole de Dieu. Mais Helene au lieu de faire cela, fit tout au contraire. Car (comme on en eſcrit) ayant ſongé & veu vne viſion, elle s'en va en Ieruſalem, pour chercher la croix en terre, au lieu qu'elle deuoit chercher Ieſus Chriſt au ciel, ayant vraye foy en luy. Les vns diſent qu'elle beſongne en Golgotha, au lieu ou Ieſus Chriſt a eſté crucifié: les autres au ſepulchre, & qu'elle trouue

AA. 8. f. g.

AA. 10. g.

Ambroſ. in oratio. de exitu Theodo. li. 5. epiſt. part. 3.

Hist. ecclē. li.
10. c. 8.
Tripart. li. 2.
c. 18.

trois croix pareilles l'une à l'autre : mais recourant à l'Evangile, elle entend que le titre a esté mis à la croix de Iesus Christ, estant tel, *Iesus de Nazareth, Roy des Iuifs*. Aucuns estiment que l'Euesque de Ierusalem a fait, pour sauoir au vray qui est la croix de Iesus Christ, qu'une femme fort malade la touche : laquelle ayant touché la croix de Iesus Christ, soudainement est guerie. Les autres disent que cela n'a pas esté fait en la personne d'une femme malade, mais d'une femme morte. Et les autres disent que c'estoit vn homme mort, non pas une femme. Voila le bon accord qui est entre ces tesmoins. Et pour donner plus de lustre à cest affaire, la priere de cest Euesque y est adiointe, & couchée par escrit. Et pour certain si une telle œuvre est de Dieu, & sert à la foy de l'Evangile, que peut on dire des Apostres, & de toute l'Eglise qui a esté en Ierusalem, & mesme de Nicodeme, & de Ioseph d'Arimatee, qu'ils n'ayent eu aucun soin de retirer la croix, ou de la demander aussi bien que le corps de Iesus ? N'y a-il eu aucun personnage qui ait eu tant de l'esprit de Dieu, pour chercher la croix comme Helene ? A-elle aucun commandement expres, de faire ce qu'elle a fait ? Y a-il quelque passage de la sainte Escriture, ny quelque prophetie qui parle de ce fait ? Et ceus qui ont tant loué Helene, de ce que d'un des clous de la croix, elle a fait faire vn mors au cheual de son fils Constantin, & qu'elle a mis l'autre en son heaume, & a ietté le tiers en la mer, pour l'appaiser, que n'ont-ils trouué quel-

que prophetie de ceste inuention de la croix, & de ce qu'elle a fait, comme ils disent qu'il y en a du mors du cheual? Sainct Paul qui a eu de grandes reuelations, & qui a beaucoup trauaillé pour l'E-uangile, & a grandement magnifié la croix, à fa- uoir le Sauueur Iesus Christ crucifié, disant qu'il ne fauoit autre chose sinon Iesus Christ crucifié. Iceluy a escrit à Timothée, qu'il luy apportast les parchemins & le manteau, c'est à dire, certaine robe & certains liures & escrits, desquels il auoit besoin. C'est bien merueille qu'il n'a plustost de- mandé que le bois de la croix luy fust apporté. Cela n'estoit-il pas plus necessaire, suyuant ce qui est escrit d'Helene? Est-il surmonté en reuelation par vne femme? Luy qui a repris si aigrement la simulation de saint Pierre, & tous ceus qui ont voulu introduire la Circoncision, comment ne re- prend-il ceus qui laissent pourrir la croix en terre? Et qui ne voit en cecy que la ioye que tels per- sonnages ont de Constantin & de Helene, pour la faueur qu'ils ont portée aus Chrestiens, les fait re- garder plus ce qu'ils font pour le louer & approu- per; que bien examiner tout selon la parole de Dieu? comme aussi cecy se monstre en Nathan enuers Dauid, si Dieu ne luy eust monstre autre- ment. Car ne consentoit-il pas que Dauid edifiast le Temple?

1. Cor. 2. a.

2. Tim. 4. c.

Gal. 2. c.

2. Sam. 7. a.

Du tesmoignage d'Ambroise, touchant l'inuention de la croix par Helene, & des louanges lesquelles il luy a données. CHAP. IX.

Ambro. part. 3.
li. 5. in oratio. de
exitu Theodos.

O R touchant le fait d'Helene, voyons qu'en dit Ambroise. Helene, dit-il, commença à reuoir les saints lieux. L'esprit l'inspira à chercher le bois de la croix. Elle est allée en Golgotha, & a dir, Voicy le lieu de la bataille: & ou est la victoire? le cherche à tout le moins l'enseigne de salut, & ne la trouue pas. le suis és royaumes, & la croix du Seigneur est en la poudre. le suis és cours royales, & le triomphe de Christ est és ruines. Iceluy est encore caché, & la palme de la vie eternelle est cachée. Comment me puis-je iuger estre rachetée, si la rançon n'est veüe? O diable, ie voy ce que tu as fait, à fin que le glaive duquel tu as esté tué fust bouché: mais Isaac a osté la matiere dequoy les puits estoyent bouchez, & n'a pas souffert que l'eau fust cachée. Donc que la ruine soit ostée, à fin que la vie apparaisse. Que le glaive duquel là teste du vray Goliath a esté couppee soit tiré hors. La terre soit ouuerte: à fin que le salut reluyse. O diable, qu'as-tu fait autre chose en cachant le bois, sinon que tu sois derechef vaincu? Marie t'a vaincu, laquelle a engendré le triomphateur, & a enfanté, sans que la virginité ait esté amoindrie, celui qui ayant esté crucifié te vaincroit, & qui ayant esté mort, te mettroit sous le ioug. Aujourd'huy tu seras vaincu, en ce que la

femme surprenne tes embusches. Icelle comme sainte, a porté le Seigneur. le chercheray sa croix. Icelle l'a monsté engendré, & moy ie le monstrey resuscité. Icelle a fait que Dieu fust veu entre les hommes : ie leuery des ruines l'estendart diuin, en remede des pechez. Et en besongnant, apres que la terre a esté fouye, elle trouue trois croix, tellement qu'elle ne peut cognoistre qui est celle de Iesus. Sainct Ambroise ayant ainsi escrit de ceste matiere, adioust encore que la dite Helene se tourne à la lecture de l'Euangile, & trouue qu'au milieu du gibet de la croix, estoit premis le titre, *Iesus de Nazareth, Roy des Iuifs*. De ce la verité a esté recueillie. Par le titre, la croix de salut a esté cognue. Marie a esté visitée pour deliurer Eue : Helene a esté visitée, à fin que les Empereurs fussent rachetez. Helene a fait sagement, qui a esleué la croix en la teste des Rois, & l'a logée en icelle, à fin que la croix fust adorée en la personne des Rois. Il dit encore, L'homme par l'arbre de concupiscence a esté deceu en paradis, maintenant iceluy par le bois de l'arbre est sauué : & la mesme matiere qui a esté cause de mort, est remede de salut.

*Idem de cruce,
ser. 55.*

*Des louanges qui ont aussi esté données à la croix
par Irenée & Chrysostome. CHAP. X.*

IRENEE auoit dit au parauant, comme par le bois nous estions faits debteurs à Dieu, qu'ainsi par le bois nous receuions la quittance de nostre

*Iren. lib. 5. cont.
hæres. Valent.*

Chrysof. tomo 2. hom. 33. de cruce.
 Idem, tomo 4. de laudibus Pauli, homil. 4.
 Idem, tomo. 2. homil. 15. de diuite.
 Idem, de cruce & latrone, hom. 31.
 Idem, tomo 2. homil. 33. de cruce domini.

debte. A quoy s'accorde ce que Chrysostome dit, Ainsi que la preuarication est par le bois, aussi le salut est par le bois. Et dit autre part, Parauenture la croix semble estre chose excellente & noble, mais tout au contraire, c'est vne mort vileine & execrable : car elle est de punition, & du tout tres-cruelle, & est maudite entre les Iuifs, & est abominable entre les Gentils. D'ou vient donc que les diables la redoutent, sinon de la vertu du crucifié ? Si ie veus amener tout ce que cestuy-cy dit de la croix, ie ne say quand i'auray fait. Car il la dit estre la clef de paradis, qui a ouuert paradis : la croix nous est cause de toute felicité. Elle nous a deliurez de l'aeuglissement d'erreur : elle nous a menez de tenebres à la lumiere : elle a mis en repos les vaincus : elle a conioint à Dieu les estrangers : elle a mis tres pres ceus qui estoyent loin : elle declare les estrangers estre bourgeois : elle coupe les discors : elle est la fermeté de paix : elle est la largesse de tout bien. Et en vn autre lieu ce mesme auteur dit, La croix est l'esperance des Chrestiens : la croix est la resurreccion des morts, la conduite des aueugles, la voye des desesperez, le baston des boiteus, la consolation des pources, le refrain des riches, la destruction des orgueilleus, la peine des mal-viuans, le triomphe contre les diables, la victoire contre le diable, le pedagogue des ieunes fils, l'entretènement des pources, l'esperoir des desesperez, le gouuernail des nauigeans, le port de ceus qui sont en danger, la muraille des affligez, le pere des orphelins, le defendeur des vesues, le conseil-

ler des iustes, le repos des troublez, le gardien des petis, le chef des hommes, la fin des anciens, la lumiere de ceus qui sont assis en tenebres, la magnificence des rois, le bouclier continuel, la sagesse des fols, la liberré des serfs, la philosophie des empereurs, la loy des infideles, le cry des Prophetes, l'annonciation des Apostres, ce dequoy se glorifient les Martyrs, l'abstinence des solitaires, la chasteté des vierges, la ioye des Sacrificateurs, le fondement de l'Eglise, la pouruoyance de la rondeur de la terre, la destruction des temples, le repoussement des images, l'esclandre des luifs, la perdition des infideles, la vertu des foibles, le medecin de ceus qui sont malades, le nettoiyement des ladres, le repos des paralytiques, le pain de ceus qui ont faim, la fontaine de ceus qui ont soif, la protection des nuds. D'auantage il dit en vn autre lieu, Les Rois laissans les diademes, prennent la croix, enseigne de mort: la croix est és pourpres & diademes, la croix est és prieres, és armes: la croix est en la table sacrée, la croix est par tout le monde, la croix reluit par dessus le soleil. Deuant la croix, les choses estoient en dueil: apres que Iesus Christ a esté tué & mort (à fin que tu apprennes qu'il n'est point seulement homme), non seulement les choses qui luy appartiennent ne sont point perdues, mais ont esté faites plus claires & plus excellentes. Car deuant la croix le principal des Apostres n'a peu porter les menaces d'une portiere: & apres vn si grand sauoir, il disoit qu'il ne sauoit qu'il estoit: mais apres la croix le monde

Tomo 5. idem
quod Christus
est Deus.

est venu à la foy : & vn peuple qu'on ne sauroit conter des Martyrs, a esté mis à mort, aimant mieus mourir que dire ce qu'a dit le principal Apostre, craignant les menaces d'une portiere. Nous preschons le crucifié en tout pays, en toute cité, en lieu solitaire, en toute part du monde propre pour habiter, ou mal propre. Et apres aucuns propos il dit encore d'auantage de la croix, Qu'on la voit estre prisee & honorée par tout, és maisons, au marché, au desert, és chemins, és montagnes, és montagnettes, és vallées, en la mer, és nauires, és Isles, és liëts, és robes, aus armes, és chambres, és couches, és banquetts, en la vaisselle d'or & d'argent, és marguerites & peintures des murs, és corps malades des bestes brutes, és corps possédez des diables, és guerres, en la paix, aus iours, aus nuicts, és danſes des addonnez à delices, és ordres des moines : tant qu'à l'enuie tous rauissent, ce don merueilleus. Ceste grace est merueilleuse, nul ne se trouble, nul n'a honte pensant qu'elle a esté l'enseigne d'une mort maudite : mais tous sont plus parez d'icelle que des coronnes, des diademes, ou des ioyaus & chaines garnies de pierreries. Et non seulement on ne la fuit point, mais encore on l'aime & desire, & tous en sont songneus. Elle reluit par tout, & est semée par les murailles des maisons, & faistes du toict, és liures, és citez & bourgades, és lieux ou on habite, & en ceus ou personne n'habite. le voudroye ouir du Payen, d'ou vient que l'enseigne de la mort tant maudite du supplice est tant desirable à tous, si ce n'est la
grand' vertu

grand' vertu du Crucifix. Mais si tu penſes que ce n'eſt rien, & ſi tu demeures encore tant effronté, & te mets contre la vérité, & és eſblouy en la clarté, appren par autre argument que cecy eſt, & de quelle vertu. Les bourreaux ont pluſieurs ſortes de tormens, bois, eſcorgées, ongles de fer, le plomb dont ils tormentent les corps, & deſchirent & tirent deçà & delà les membres : & qui eſt celuy qui voudroit porter ces choſes en ſa maiſon ? qui les voudroit toucher de la main ? ou qui voudroit s'approcher de plus pres des bourreaux, quand ils font ces choſes, pour les voir ? La plus part ne les a-elle point en telle abomination, qu'ils n'en peuuent porter la veüë ne l'attouchement ? Aucuns vomiffent, & tiennent cela pour choſe portant malheur, & s'en fuyent loin, & en deſtournent la veüë. Certainement auparauant la croix eſtoit telle, & plus faſcheuſe, comme ie l'ay dit cy deſſus. Car elle n'eſt point ſeulement enſeigne de mort, mais auſſi de mort maudite. Di moy donc, d'ou vient ceſte grande affection & ſoin d'icelle à tous, qu'elle eſt tant deſirée de tous, voire plus que toutes choſes ? Pourquoi taſche tout le monde d'auoir ce meſme bois auquel le ſainct corps du Seigneur a eſte mis & crucifié, tellement que ceus qui en peuuent auoir vne petite piece, l'enchaſſent en or, ſoit homme ou femme, & la mettent en leur col, eſtans de ce fort honorez, magnifiez, garnis & gardez, combien qu'il ait eſté bois de condamnation ? Mais celuy qui fait & appreſte tout, & qui transporte le monde d'un ſi grand pe-

ché, & fait la terre & le ciel, a esleué ceste chose sur les cieux, combien qu'elle fust mesprisée, & plus vileine que toutes les morts. Ceste enseigne de mort est cause de beaucoup de benedictions, vne muraille de toute seureté, la propre playe du diable, le frain des diables, vne bride des puissances contraires. Elle a osté la mort, elle a rompu les portes d'erain, elle a brisé les barres de fer: elle a pris par force la forteresse du diable, elle a couppé les nerfs de peché, elle a deliuré tout le monde suiet à condamnation, elle a fait cesser la playe enuoyée de Dieu contre nostre nature. La croix a peu, non point en vne gent, mais par tout le monde, ce que n'a peu la mer quand elle estoit diuisée, ne les pierres quand elles estoient rompues, ne l'air quand il estoit changé, ne la manne quand elle estoit donnée par quarante ans à tant de mille personnes, ne la Loy, & autres signes faits tant au desert, qu'en Palestine. La croix estant enseigne de malediction, laquelle tous fuyoyent, de qui tous se defendoyent, laquelle tous tenoyent tres-infame, a pris vne telle & si grande vertu apres la mort du crucifié. Et en vn autre lieu il dit, Ayes tousiours la croix du Seigneur iettant ses rays deuant tes yeus, & en ce temps t'en iras pur des pechez. Car ainsi que la colonne de la nuée, figure de nostre croix, gardoit la multitude des Hebreus, qu'ils ne souffrissent point de mal des Egyptiens: ainsi aussi la croix, quand elle est veüe deuant les yeus, incontinent elle dechasse toute mauuaïse volupré: car elle est le salut de l'ame,

Tom. 5.
sermone de
continentia.

& vn remede donnant santé des vileines concupiscences.

Des choses qui sont à reprendre en ces louanges données à la croix par les Anciens, & comment S. Paul en a parlé, donnant à tous la reigle comment il en faloit parler. CHAP. XI.

PAR cecy chacun peut clairement voir combien ces personnages ont attribué à la croix, voire au signe mesme de la croix. Et combien qu'en aucuns lieux ils en parlent rapportans tout à Iesus Christ crucifié, & qu'ils prennent la croix pour Iesus Christ crucifié, neantmoins personne ne peut nier qu'ils ne parlent le plus souuent de la croix en elle mesme, quand il est question de parler des pieces de la croix, & du bois & signe d'icelle, en conferant quel il estoit deuant & apres la mort de Iesus Christ. Or est-il clair que Iesus Christ n'estoit pas en la croix auant sa mort: comme apres sa mort il n'y est plus, & cela qu'il y a esté ne fait pas qu'il y soit encores, tout ainsi qu'apres la resurrection il n'est plus au sepulchre, comme l'Ange a dit qu'il estoit ressuscité, & n'estoit plus là ou on l'auoit mis. Quant au signe de la croix, la chose est trop claire. Parquoy ie ne veus pas faire comme aucuns, qui craignans de deroguer contre l'autorité des Peres, aiment mieus par subtilitez s'efforcer de donner à entendre qu'ils ont autrement senty que leurs escrits ne portent. Et ceus qui ont quelque iugement, voyent bien qu'il va autrement. Et

pourtant au lieu de profiter quand ils oyent & li-
 sent telles subtilitez, ils empirent à cause de telle
 procedure: & par ce moyen ils s'arrestent plus, &
 attribuent plus qu'il ne faut aus anciens, en ce
 qu'ils voyent qu'ils sont mis au reng de la sainte
 Escriture, là ou il vaut trop mieus prendre leur
 dire, comme on voit qu'ils ont entendu, & qu'ils
 ont voulu dire à la verité & droitement: & sur ce
 il conuient leur bailler ce qu'on leur peut & qu'on
 leur doit bailler selon Dieu, & ce qu'eus-mesmes
 demandent, à fauoir d'auoir lieu en leur dire &
 escrits, en ce qu'ils ont baillé la reigle de tout
 examiner par la parole de Dieu, & que tout soit
 iugé par la sainte Escriture. Quant est de la verité
 pure, S. Paul a escrit qu'elle doit estre cognue de
 tous Chrestiens, quand il escrit, Quant à moy, ia
 n'aduienne que ie me glorifie sinon en la croix du
 Seigneur Iesus Christ. Le sens est tout clair à ceus
 qui ont leu ce saint Apostre, qu'il ne veut dire
 autre chose, sinon que toute sa gloire est en Iesus
 Christ crucifié, en celuy qui a esté pendu au gibet de
 la croix, comme il le declare bien en parlant de la
 parole de la croix qui est folie à ceus qui perissent,
 quand il dit, Nous preschons Iesus Christ crucifié:
 disant d'auantage, qu'il n'a point eu en estime de
 fauoir aucune chose que Iesus Christ crucifié. Par-
 quoy ayant monstre que tout est de celuy qui nous
 est fait sagesse, iustice, sanctification & redemp-
 tion, tellement que tout nostre bien est en Iesus
 Christ, & que nous l'auons en luy & de luy, &
 non en autre ne par autre. Et par ainsi il faut que

Gal. 6. d.

1 Cor. 1. c.

1 Cor. 2. a.

1 Cor. 1. d.

celuy qui se glorifie, se glorifie au Seigneur. Et mesme de ce. qu'il dit que tres-volontiers il se glorifiera en ses infirmitéz, qui ne voit que tout cela se rapporte à Iesus Christ crucifié, d'autant que telles souffrances & infirmitéz sont vne conformité à Iesus Christ, & qu'elles appartiennent aus Chrestiens, qui sont vnis à Iesus Christ, à ce que les membres de Iesus Christ souffrent & soyent participans des afflictions d'iceluy, comme cy apres ils seront participans des consolations?

2 Cor. 12. c.

Rom. 8. c. d.

2 Tim. 2. b.

Combien il est difficile de pouuoir bien comprendre tout ce que les Anciens ont escrit de la croix, & de l'accorder avec la parole de Dieu. CHAP. XII.

IE desireroye bien pouuoir entendre en si saine intelligence ce qui a esté dit des Anciens (si Dieu leur eust donné la grace de parler tousiours si purement comme les saincts Apostres, & le donner à entendre à ceus qui font si mal leur profit du dire des Anciens) comme ie puis entendre tels passages de la sainte Escriture. Vray est que ie pourroye bien amener quelque chose pour donner quelque couleur, comme de celuy qui monstrant que Iesus Christ est le vray Dieu, amene tout plein de ce qu'auons touché de la croix, du bois, ou du signe de la croix, ou il y a grande apparence qu'il veut que tout soit rapporté à Iesus Christ. Mais puis que ce qu'il dit, n'est point vraye parole de Dieu, ne ce qu'il escrit n'est pas sainte Escriture, & que personne ne pourroit monstrer que ses propos fus-

Mat. 16. d.

Rom. 8. c. d.

2 Tim. 2. b.

sent fondez en l'Eſcriture, à quoy pourroit ſeruir la peine de baſtir ce qui ſe ruine de ſoy-meſme? & monſtrer eſtre vray ce qui par ceus meſmes qui parlent, eſt conuaincu eſtre faus? Car qui pourroit monſtrer par l'Eſcriture ſaincte, que la croix, ou le ſigne de la croix doyue eſtre aus danſes des delicats, ou aus beſtes malades, & és murailles, comme il eſt tout facile de monſtrer que les afflictions qu'on porte pour leſus Chriſt, ſont la croix laquelle il faut porter en le ſuyuant, & que ſi on ſouffre pour leſus Chriſt, & avec luy, on regnera avec luy? Ou monſtrera-on l'enchaſſement des pieces de la croix, & qu'il les faille porter comme bagues d'honneur, en pierreries & vaiſſelles, comme de prendre ioyeuſement, & porter patiemment les afflictions, pour la cauſe de leſus Chriſt? Par quelle Eſcriture ſe pourra-il prouuer que le ſigne de la croix ſe doit faire au front? que rien ne ſe fait en tout ce qui ſe fait en l'Egliſe, que le ſigne de la croix n'y ſoit fait? que le ſigne & le nom de la croix chaſſe les diables, & deliure de mal? Il eſt tout clair que tout ce qui eſt fait en l'Egliſe, doit eſtre fait ſelon la parole, & par la parole de Dieu: & que pour reſiſter au diable, il faut auoir le glaïue de l'Eſprit, qui eſt la parole, & le chaſſer par la foy, & eſtre armé comme ſainct Paul l'enſeigne. Mais de ce que les Anciens diſent de la croix & du ſigne d'icelle, tant s'en faut que i'en puiſſe reſpondre à Dieu, me demandant, Qui a requis cecy de vos mains? que meſme au plus petit qui ſoit qui m'en demandast raiſon, ie ne pourroye aucu-

nement respondre en bonne conscience, en parlant par la parole de Dieu : & mesme il n'y a personne qui puisse amener en cecy ouuert commandement de Dieu.

De l'autorité qu'on peut donner aus anciens docteurs de l'Eglise : & quelle difference il faut mettre entre leurs escrits & les saintes Escritures. CHAP. XIII.

VEV donc que l'Ecriture ne me peut icy assister, & que ie ne puis par icelle satisfaire selon Dieu à mon cœur, ny en bonne conscience en respondre à aucun autre, pourquoy tascheray-ie à blanchir ce qui est noir, parlant contre mon deuoir, deshonorant Dieu, renuersant sa verité, & trahissant mon frere, pour lequel Iesus Christ est mort, en luy disant vne, & en pensant vne autre? A Dieu ne plaise que cela m'aduienne: car i'aimeroye mieus n'estre iamais venu au monde, ou qu'incontinent ie fusse mort. Parquoy ie prie tous ceus qui aiment Iesus Christ qui est la vraye verité, qu'ils ne prennent pas autrement qu'il faut, si ie ne mets les Anciens au rang de la sainte Ecriture, & de ceus par qui nostre Seigneur veut que nous l'ayons par escrit: & si ie ne prise pas tant l'autorité d'iceus en ce qu'ils ont escrit, que celle des saints Prophetes & Apostres: & si ie regarde diligemment, si ce qu'ils ont dit est selon la verité de la sainte Ecriture ou non. Car ie n'ay icy autre but, comme Dieu le fait, sinon de suyure

la droite verité de Iesus Christ, & que tous auffi l'ensuyuent. Et tant s'en faut que ie voulusse contreuenir aus grans & saincts personnages disans verité, que mesme le plus petit, & le moindre qui soit, & de moins d'estime, parlant verité, m'est en telle reputation, que pour rien qui soit ie ne luy voudroye contredire en ce qu'il dit vray. Or la verité qu'on dit & tient, doit estre manifestée & maintenue par la sainte Escriture, & à cause de ce qu'elle y est contenue.

De l'autorité qu'on doit attribuer à la parole de Dieu, & du tesmoignage des anciens docteurs à ce propos. CHcAP. XIII.

August. contra
Faust. li. 23. c. 9.

Hiero. super
Matth. c. 23. vt
veni. sup. vos
omnis sanguis.

POVRTANT S. Augustin, auquel à bon droit la louange est baillée d'auoir mieus veu & entendu la verité, & mieus en auoir escrit, dit ainsi, Qu'il monstre non point par quelques lettres qui soyent, mais par celles de l'Eglise, canoniques & catholiques: car les autres enuers nous en cecy n'ont point aucun pris d'autorité. Pour ceste cause Hierome pareillement renuoyant tous à la sainte Escriture, & declarant que parler sans icelle, & n'auoir fondement d'icelle, ne doit estre tenu, dit, Que ce qui n'a autorité des Escritures, aussi facilement est mesprisé comme prouué. Parquoy, puis qu'ainsi est que ce qui n'est montré & prouué par les saintes Escritures, n'a point d'autorité, qui ait pois, ne dequoy on doyue tenir conte: & puis qu'on n'est tenu de croire à ce qui est amené sans

la sainte Escriture, & sans fondement d'icelle, mais est loisible de le mespriser & reietter: si i'oy dire qu'il faut faire le signe de la croix par tout ce qu'on fait, qu'il faut s'armer d'icelle, & autres propos qui sont touchez cy dessus, qui m'empeschera de dire, Prouuez & monstrez cela par la sainte Escriture? Car autres lettres ne raisons n'auront poix, & facilement ie mespriseray ce que vous dites, si vous n'alleguez la sainte Escriture. Et si ie respon à ceus qui me veulent presser qu'il faut croire à ceus qui escriuent ainsi, pour les raisons qu'ils amenant, & leur dy, le croy que Iesus Christ est mort en la croix, & qu'il en a esté osté, comme il y a esté attaché & cloué, pource que nous le lisons ainsi ès saintes Escritures: mais qu'on doye faire le signe de la croix en tout, & que par tout il faut auoir des croix, & tant de propos que tant de gens en disent, nous ne le croyons point, pourtant que nous ne les lisons point: ceste response n'est-elle pas bonne? comme tres-bien a respondu Hierome lequel a bien & saintement maintenu la virginité de la vierge excellente Marie, disant ainsi: Comme nous ne nions point les choses qui sont escrites, ainsi aussi nous nions celles qui ne sont point escrites. Nous croyons que Dieu est nay de la vierge, pourtant que nous le lisons: mais que Marie apres son enfantement se soit mariée, nous ne le croyons pas, pource que nous ne le lisons point. Pourtant le Seigneur pour estre seruy & honoré par les siens, leur a tousiours donné reigle tres-certaine, de ce qu'ils doyent tenir & croire,

Hiero. cont.
Heluidium.

Orig. in Iſa.
homil. 7.

1 Pier. 4. c

Rom. 14. d

laquelle il a de plus en plus confirmée, ſingulierement parlant par Moyſe, & par les autres Prophetes qui ont confirmé la doctrine d'iceluy : mais le Seigneur l'a declarée tout pleinement quand il s'eſt manifeſté en chair, à ſauoir quand Ieſus Chriſt eſt venu parlant de ſa propre bouche, & enſeignant ſes Apoſtres. Laquelle choſe entendant Origene, dit, Nulle parole apres la parole de Moyſe & des Prophetes, mais encore beaucoup moins apres la parole de Ieſus Chriſt & de ſes Apoſtres. Car ſi Moyſe & les Prophetes deſendent de rien mettre en auant, que ce que noſtre Seigneur commande par iceux, & qu'on ne face ce qui ſemble bon, mais ce qu'ils commandent de la part de Dieu, combien plus faut-il garder cela ſous Ieſus Chriſt, & en la manifeſtation de l'Euangile, comme ce meſme perſonnage le dit, & eſt contraint de le dire? Et cecy à bon droit: car ce qu'on dit en l'Egliſe de noſtre Seigneur, ne doit-il point eſtre la parole de Dieu? comme dit le S. Apoſtre S. Pierre, Si aucun parle, qu'il parle comme la parole de Dieu. Car il ne faut pas que noſtre croire ne la foy ayent leur fondement ſur le parler ne le dire de l'homme, mais ſur la vraye & tres-certaine parole de Dieu, par l'ouir de laquelle la foy eſt, & vient. Et s'il eſtoit ainſi que le croyant ne s'arreſtaſt & fuſt fondé ſur la parole de Dieu, en ce qu'il croit & fait, & ſon croire & ſon faire ſeroit peché, veu qu'il feroit tout ſans foy: & que tout ce qui n'eſt de la foy, eſt peché. Or quelle foy puis-ie ſentir & auoir en mon cœur, que ie ſoye tenu de

me signer, & que le signe de la croix chassera l'ennemy, & que ie seray victorieux, & surmonteray la tentation, & aussi que ie doyue auoir des croix chez moy, veu que ie n'ay aucune parole de Dieu de tout cecy? Et si ie n'en puis auoir certaine foy pour moy, en quelle foy le pourray-ie dire ny enseigner aus autres?

Comment les Anciens en ce qu'ils ont escrit de la croix, n'ont pas attribué à la parole de Dieu, l'autorité laquelle ils luy deuoyent attribuer selon leur tesmoignage mesme. CHAP. XV.

O N voit en cecy comment les Anciens se sont oubliez eus-mesmes, & qu'ayans la parole trescertaine & toute claire, ils ne s'y sont pas du tout arrestez. Car n'auons-nous pas bonnes & fortes armures pour resister à Satan, comme contient la sainte Escriture, à sauoir la foy par laquelle nous luy deuons puissamment resister? N'auons-nous point les armures spirituelles, singulierement le glaue de l'esprit, la parole de Dieu, la sainte priere? De cecy ne doit-on point auoir foy, & le bien croire fermement? Ne le peut-on aussi enseigner seurement, veu que Iesus Christ parle ainsi de sa propre bouche, & commande à ses saints Apostres de prescher & enseigner ainsi? Puis que Dieu nostre Pere nous commande tant expressement d'ouir son fils Iesus Christ, veu qu'il est le

Mat. 17. a.

seul Maistre duquel nous deuons tous apprendre, & estre ses disciples. Ambroise luy a rendu l'hon-

Ambros. de
virg. li. 3.

Idem in 1. ad
Cor. c. 4.

Idem de
incarn. dom.
sacramento.

Heb. 4. c.

Hieron. in
Hagg. c. 1.

neur qui luy appartient, en ce qu'il a tres-bien dit en ceste maniere. Nous condamnons à bon droit toutes choses nouvelles que Iesus Christ n'a point enseignées : car Iesus Christ est la voye aus fideles. Si donc Iesus Christ n'a pas enseigné ce que nous enseignons, nous aussi iugeons cela estre detestable. Et en vn autre lieu il dit aussi, Tout ce qui n'a esté enseigné par les Apostres est plein de meschancetez. Il dit encore en autre part, Ce que i'ay leu (parlant de l'Escripture sainte) ie ne le nie point, mais en vse volontiers. Ce que ie n'ay point leu, ie n'en doy point vsfer. En quoy il declare ouuertement qu'il ne faut point mettre en auant que ce qui est contenu en la sainte Escripture, & qui par icelle peut estre prouué, & que ce qui est pris hors de l'Escripture, doit estre reietté. Si Ambroise & tous les autres anciens, eussent tousiours bien suyuy celle reigle, ils n'eussent pas parlé de la croix comme ils en ont parlé, & n'eussent pas donné occasion à tant de gens de se desuoyer de la pureté de la parole de Dieu, comme ils s'en sont desuoyez. Par quoy tout cela qu'ils ont fait hors de ceste reigle, comme choses controuuées, & n'ayant aucun fondement és saintes Escriptures, est frappé par le glaiue de Dieu. Car la parole de Dieu est viuante, efficace & aigue, plus que tout glaiue trenchant des deus costez, comme aussi saint Hierome en escrit, parlant de ceus qui s'esleuent contre la science de Dieu, & de l'huile qu'il appelle les promesses des choses celestes, duquel ils oignent les disciples, ausquels ils promettent le loyer des

labeurs. Ce que le Prophete deteste, disant, L'huile du pecheur n'engraisse point mon chef. Et conclud ce mesme personnage, que le glaiue de Dieu frappe cecy, & aussi les autres choses lesquelles telles gens trouuent & controuuent sans l'autorité & tesmoignage des Escritures, comme par la tradition & enseignement des Apostres. Et en ce il monstre que combien qu'on dise, Cecy est venu des Apostres, & est vne chose bonne, de laquelle vient tant de bien : & combien qu'on face tout plein de promesses, neantmoins si cela n'est approuué par l'autorité & tesmoignage des saintes Escritures, tout sera frappé du glaiue de Dieu. Je vous prie, peut aucun viuant monstre par l'autorité & tesmoignage de la sainte Escri-
ture, que le signe de la croix, ne le bois d'icelle, ne les croix qu'on fait, ayent telle vertu & effi-
cace comme l'on dit, & comme l'on a dit & es-
crit? Les premiers qui ont ainsi parlé, par quelle autorité, par quel tesmoignage de la sainte Es-
criture l'ont-ils prouué & monstre? Qui ne voit donc que le glaiue de Dieu frappe vne telle do-
ctrine, comme vne presumption & arrogance par laquelle l'homme s'esleue contre la science de Dieu, laquelle nous est testifiée és saintes Escritures, par les saints Prophetes & Apostres? Qu'on regarde bien si ce grand & saint personnage, en ce qu'il dit & escrit ainsi, ne condamne pas l'inuention de la doctrine du signe de la croix, & du bois, tant en luy comme és autres : & comme dès lors qu'on commençoit de mettre en auant telle doctrine,

puis que Iesus Christ ne l'auoit point enseignée, elle deuoit estre condamnée & iugée estre detestable. Et puis que les saincts Apostres n'ont baillé telle doctrine, ne faut-il pas qu'elle soit pleine de meschancetez? comme bien escriuent ces grans personnages.

Comme il est requis d'alleguer & de prendre les saintes Escritures, selon le vray sens d'icelles. CHAP. XVI.

*Mat. 4. a. b.
Luc. 4. a. b.*

Hieron. commen. in Ierem. li. 5. c. 29

O R ce n'est pas assez d'amener la sainte Escriture, mais il faut qu'elle soit prise en son propre sens. Car Satan a bien pris l'Escriture pour prouuer ce qu'il disoit à nostre Seigneur, mais en autre sens qu'il ne faut. Et ceus qui prennent autrement les paroles des Escritures, que le saint Esprit ne signifie, sont tenus pour faus prophetes: comme aussi les deuins sont pris pour ceus qui prononcent les coniectures de leur teste, & qui predisent sans l'autorité de la parole de Dieu, que les choses incertaines aduiendront comme si elles estoyent veritables. En quoy ce grand personnage monstre bien en quelle crainte & reuerence doit estre prise la sainte Escriture, sans la tirer hors de son propre sens, à fin qu'on ne soit faus-prophete, & que le iugement de faus-prophete ne vienne sur celuy qui prend mal la parole de Dieu. Il se faut aussi garder de rien prendre & mettre en auant sans l'autorité de la sainte Escriture: autrement ceus qui le font seront griefuement condamnez

comme devins & enchanteurs. Combien donc sont tenus de regarder à cecy, ceus qui oyent les docteurs qui enseignent, à fin que au lieu d'ouir ceus-la par lesquels Iesus Christ parle, ils n'oyent des faus prophetes, & des devins & enchanteurs? laquelle chose nostre Seigneur Iesus a defendue tant & plus. Et s'il estoit tant defendu sous la loy de Moyse, combien plus en l'Evangile & sous Iesus Christ? Et ne faut point icy amener ne le temps, ne les personnes, ne leurs escrits, si l'approbation n'y est par la sainte Escriture. Car tout cela ne sert de rien à prouver & asseurer que ce qu'on veut enseigner soit vray, & qu'il doye estre tenu, si l'escriture du vieil & nouveau Testament ne le prouve & afferme: car elle seule a ceste prerogative, que tout ce qu'elle contient est vray, & doit estre receu sans contredit, & sans aucune doute. Car l'Escriture est tres-ferme, & ne dit rien qui ne soit vray, & que chacun ne doye recevoir & tenir: mais tout le demeurant sans l'Escriture ne doit avoir lieu, pois ny autorité, és choses qui touchent au service de Dieu.

De l'autorité de verité contre le iugement des hommes, & contre la coustume. CHAP. XVII.

SAINCT Augustin a bien entendu cecy, quand il dit, Pourtant cy apres que personne ne me demande mon aduis: mais plustost oyons ce que Dieu a dit, & soumettons nos petites raisons aus paroles de Dieu. En quoy il declare bien qu'il ne

*Augu. de moribus Ecclesiam
li. 1. c. 7.*

Tertul. de virg.
vel.

Cypri. ad Pom-
peium contra
epist. Steph.

faut pas suyure le iugement ne la sentence de l'homme: & que tout ce que la raison humaine monstre, doit estre mis bas: & qu'il faut seulement suyure la parole de Dieu. Et au parauant Tertulien auoit escrit que les espaces des temps, ne la defense des personnes, ne le priuilege des pays, ne peuuent mettre prescription à verité: car l'Escriture prenant commencement de ces choses, sortant d'aucune ignorance ou simpleesse par succession, se fortifie en vsage, & par ainsi elle se defend contre verité. En quoy il est tout clair que ne la coustume, ne le long temps, ne la maintenance des personnes ne nous doit esmouuoir, mais la seule verité de Dieu, & sa seule parole. De là vient ce que Cyprian a dit, que coustume sans verité est vieillesse d'erreur, ou ancienne erreur. Parquoy il dit que Iesus Christ nous montrant en son Euan-gile la verité, dit, le suis la verité. Et montrant comme il est facile aus esprits simples & craignans Dieu, de trouuer & mettre en lumiere la verité, il dit, Si nous retournons au commencement & à la source de la doctrine de Dieu, l'erreur humaine cesse: & ayant bien regardé la cause des mysteres celestes, tout ce qui estoit caché sous l'obscurité & nuées de tenebres, est ouuert par la lumiere de verité. En quoy il monstre bien qu'il faut chercher la verité en la lumiere de la doctrine & parole de Dieu. A cause de quoy il dit encore, parlant des hommes, voire des seruiteurs de Dieu, qui par maniere de parler, doutent encore de la verité, l'attribuant à verité, comme il faut faire:

Si la

Si la verité, dit-il, branfle & chancelle, retournons à la diuine source du Seigneur, & à la doctrine Euangelique & Apostolique, & de là soit dressée la maniere de nos faicts, d'ou est dressé l'ordre & la source. Et en vn autre lieu il dit ainsi, Et quant à ce que Christ seul doit estre ouy, le Pere aussi le tesmoigne grandement du ciel, disant, C'est-cy mon fils tres-aimé, auquel i'ay pris mon bon plaisir, escoutez-le. Parquoy si Christ seul doit estre ouy, nous ne deuons point regarder que c'est qu'aucun a pensé deuant nous qu'on deust faire, mais que c'est que Christ qui est sur tous, a premier fait. Car il ne faut point suyure la coustume de l'homme, mais la verité de Dieu: veu que Dieu parle & dit par le Prophete Isaie, En vain ils me seruent, enseignans les commandemens & doctrines des hommes. Et derechef le Seigneur en l'Euangile resume ce mesme propos, disant: Vous reiettez le commandement de Dieu, pour establir vostre doctrine. Voila les paroles de ce bon personnage.

*Idem li. 2. epist.
3. ad Cæcilium.*

Mat. 17. a.

Isa. 29. d.

Mat. 15. a.

Mat. 7. a. b.

De l'autorité de la parole de Dieu, contre l'autorité des peres & des predecesseurs. CHAP. XVIII.

O R s'il y auoit personne qui eust autorité pour nous conduire, & à qui nous deussions obeir és choses de Dieu, ce seroyent les peres qui nous enseignent & nous commandent: mais le saint Esprit nous commande tout ouuertement que nous nous arrestions aus saints commandemens de Dieu,

D.

Ezech. 20. c.

*Iere. 9. d. c. 14.
c. d.*

*Hieron. in Iere.
c. 9. li. 2.*

disant, Ne cheminez point aus ordonnances de vos peres, & ne gardez leurs droicts, & ne soyez souille-
lez en leurs idolatries. le suis le Seigneur vostre
Dieu, cheminez en mes ordonnances, & gardez
mes droicts, si les faites. Et en autre part il monstre
pourquoy la vengeance du Seigneur est venue, à
fauoir pource que les hommes ont delaissé la loy
du Seigneur, & n'ont pas ouy la voix d'iceluy, ne
cheminé en icelle, mais ont suyuy les entreprin-
ses de leurs cœurs, & sont allez apres Baalim, ce qu'ils
ont apprins de leurs peres. Sur quoy Hierome dit,
Donc l'erreur des peres ne des ancestres ne doit
estre suyue, mais l'autorité de l'Escripture, & le
commandement de Dieu qui nous enseigne. Il y a
tant de passages qui monstrent que ne le temps,
ne la longue coustume ne doit auoir lieu contre
verité: qu'il n'y auroit point de fin, si on les vou-
loit tous amener. Les personnes aussi ne peuuent
& ne doyuent aucunement porter preiudice, qu'au-
cun soit astraint à croire ne tenir autre chose que
ce que Dieu nous a reuelé & ordonné par ses sain-
ctes Escriptures. Et bien a esté touché par ce bon
personnage, que Christ est la verité, & qu'iceluy
seul doit estre ouy, & qu'il ne faut auoir esgard à
autre, quoy qu'il die ou qu'il face, mais que seu-
lement on doit suyure Iesus Christ. Et si on doute
que Iesus Christ ait ainsi parlé ou ordonné, nous
sommes renuoyez aus saintes Escriptures, comme
à la source du Seigneur, d'ou il veut que nous
puissions toute verité, à fauoir ce qui est de Iesus
Christ, & que selon iceluy nous deuons tenir,

croire & faire, voire sans y adiouster ou diminuer, sans tirer ne çà ne là, à dextre ou à fenestre, mais seulement suyure ce qu'il ordonne. Car il ne faut pas moins estimer de Iesus Christ, mais beaucoup plus, que de Moÿse: d'autant que le Maistre & le Seigneur surmonte le valet & le seruiteur. Car Moÿse a esté donné de Dieu au peuple qui estoit sous la charge d'iceluy, pour l'entretenir comme encore petit & moindre d'aage, iusques à la venue de Iesus Christ, laquelle est l'aage pour estre hors des elemens & de la curatelle, & pour estre en la maison, non pas comme serfs, mais comme enfans & heritiers, en ouuerte manifestation de l'esprit d'adoption, par lequel nous appelons franchement Dieu nostre Pere, & auons l'entrée ouuerte au throne de sa grace.

Heb. 3. a. b.

Rom. 8. c.

De la reigle donnée par Iesus Christ, tant à ceus ausquels la charge est commise d'annoncer la parole d'iceluy, qu'à ceus qui la doyuent ouïr & receuoir.
CHAP. XIX.

SI donc Moÿse par l'ordonnance de Dieu a cela, qu'il doit tellement estre receu qu'il se faut assuietir simplement aus ordonnances qu'il a baillees, sans varier ne changer, corriger, adiouster ou diminuer, que doit-on dire de nostre Sauueur Iesus Christ, qui enuoyant ses saints Apostres pour prescher à tout le monde, leur commande qu'ils enseignent toutes gens de garder tout ce qu'il leur a commandé? Et comme ce seroit vn horrible sa-

Mat. 23. d.

crilege de retenir aucune chose qui soit commandée & ordonnée de Iesus Christ, & n'en faire participans tous, mais en desrober aucune chose, & la cacher à ceus auxquels Iesus Christ ordonne & commande qu'elle soit preschée : pareillement c'est vne presumption tres-diabolique, de dire qu'on est enuoyé comme ambassadeur & seruiteur de Iesus Christ pour parler en son nom, & cependant dire & proposer aucune chose, laquelle il n'a pas commandée, & de laquelle l'instruction ne soit pleine, veritable & tres-certaine, & que celuy qui se glorifie d'auoir telle commission, ne puisse tres-clairement monstrier que ce qu'il dit est de Iesus Christ & qu'il en a pleine commission & charge. Il faut aussi que tous ceus qui reçoquent la doctrine de Iesus Christ, & qui sont Chrestiens, sachent en verité que Iesus Christ a ordonné, dit & commandé tout ce qu'ils tiennent & croient, & que personne ne les puisse tirer hors de telle foy & assurance, ne rien barbouiller pour les tirer çà & là, & faire estre comme roseaus demenez à tous vents, mais qu'ils soyent fermes en Iesus Christ, sachans & estans bien asseurez qu'ils ont la parole d'iceluy, & qu'ils la sauent & cognoissent pour s'y arrester, demeurans fermes, estans bien edifiez sur la ferme pierre Iesus, tellement que les portes d'enfer ne puissent rien contr'eus. Cecy est necessairement requis à tous Chrestiens, & à vn chacun, pour estre vray Chrestien & du corps de Iesus Christ, de son Eglise, & brebis de ce bon Pasteur. Et celuy qui ne fait que c'est qu'il doit croire, ny à

qui, ne comment, & ne met difference entre la voix de Iesus, & celle des autres, ne sachant cognoistre la voix du Pasteur & la voix de l'estranger, iceluy n'est point encore à Iesus Christ, ny en Iesus Christ. Et n'est pas assez de dire, Que dès long temps on a accoustumé de croire & enseigner ainsi, & (comme plusieurs disent) nos pasteurs & conducteurs parlent & enseignent ainsi. Car la coustume sans verité ne profite rien. Car Dieu iamais n'approuue & n'approuuera rien que verité, & iugera en icelle. Il faut que le pasteur & conducteur voye en la parole de Dieu seule, & que d'icelle il païsse le troupeau : autrement s'il est aueugle & conduit les aueugles, tous tomberont en la fosse. Et puis qu'ainsi est que tout n'est que poison, fors le pain celeste qui est la parole de Dieu : il est tout certain que quiconque est repeu d'autre viande, est empoisonné, & qu'il mourra.

Mat. 15. 6.

De la vertu laquelle Dieu donne par sa parole au ministere de ses seruiteurs, pour conuaincre les ennemis de Dieu. CHAP. XX.

DIEU par sa grace nous a rendu certain témoignage de sa parole. Car cè qu'il a reuelé par Moyse, comment est-il approuué? Certes il est approuué par si grandes vertus & œuvres si euidentes, que personne qui les regardera & considerera, ne pourra nier que Dieu n'ait parlé par luy. Et ce qu'il a reuelé à Moyse, il l'a puis apres continué par ses Prophetes. Mais quand il s'est

Exod. 8. 4.

manifesté en chair, & qu'il nous a parlé en son Fils, qui peut douter que veritablement tout ce que Iesus Christ a dit, ne soit vraye & droite parole de Dieu? Tous ceus qui se sont efforcez & qui ont fait violence à eus-mesmes, & à leurs propres consciences pour y resister & contredire, tant s'en faut qu'ils ayent tant peu faire qu'ils ayent amené leur conscience à iuger autrement, que mesmes tant plus ils ont trauaillé, & tant plus ils se sont confondus : & estans conuaincus, ils ont senty trop plus que c'estoit parole & commission de Dieu, que les enchanteurs qui ont resisté à Moysé estans contrains de confesser, c'est le doigt de Dieu. Et combien qu'ils ont senty que Moysé besongnoit & parloit en la vertu de Dieu, neantmoins ils ont senty la verité & vertu de la parole commise à Moysé : comme ceus qui resistent à l'Euangile sentent, veulent-ils ou non, la vertu de la parole de Iesus Christ. Et combien que Satan par l'iniquité des meschans, les ait tant & plus aueuglez, & fait blasphemer la doctrine & la parole de Iesus Christ, si ont-ils neantmoins esté conuaincus & confondus en leurs cœurs, comme tant clairement il appert en l'histoire Euangelique, & en ce qui a esté fait contre les Apostres apres la mort de Iesus Christ, & comme mesme aujourd'huy il est tout manifeste qu'en ceus qui purement portent la parole de Dieu, & qui souffrent griefs tourmens & morts cruelles pour l'Euangile (entant qu'ils ne mettent en auant autre chose que ce qui est contenu en la sainte Escriture, au vieil & nou-

ueau Testament) la vertu de la parole de Dieu se declare tout ouuertement, à la confusion de tous ceus qui bataillent au contraire. Et icy ie ne veus autres tesmoins pour conuaincre les plus grans aduersaires, que leurs consciences mesmes. Et les anciens conuiennent tous d'un accord à cela, que toute verité est contenue en la sainte Escriture, & que tout doit estre prouué par icelle : & qu'il n'y a escrit ny autorité qui ne luy doye ceder & luy donner lieu : mais icelle ne doit estre ny en egale, & encore moins en moindre autorité que les autres escrits, mais doit estre par dessus tout.

Comment l'autorité des saintes Escritures est non seulement par dessus tous les hommes, mais aussi par dessus les Anges, & comment tout erreur procede de ce que les hommes ne se tiennent à la pure parole de Dieu. CHAP. XXI.

SAINCT Augustin qui a esté fort exercité par les heretiques, dit, Il n'y a cause aucune pourquoy nous ne croyons à icelles lettres qui sont de si grande autorité. Et pour vray c'est la principale cause pourquoy nous anathematisons ceus qui annoncent autre chose. Et en vn autre lieu il escrit : Pourtant en ce qui touche de Christ & de son Eglise, ou de quelque autre chose qui appartient à la foy, ou à nostre bien, ie ne dy pas si nous qui ne sommes pas pour estre comparez à S. Paul qui a dit, Encore que nous, mais ie dy tout ce qu'il a adiousté puis apres, Encore qu'un

August. to. 6.
cont. Faust. li. 28
c. 5.

Idem. to. 7. cont
litteras Petilian
li. 3. c. 6.

Gal. 1. 6.

Ange du ciel vous annonçast outre ce que vous auez receu és escritures de la Loy, & és escritures Euangeliques, qu'il soit en execration. Que ceste sentence est bien digne que tous l'ayent bien engraüée en leurs cœurs, comme estant vrayment de Dieu qui a parlé ainfi par le S. Apostre, & est ouuertement contenue en la sainte Escriture. Et ce bon personnage est pressé d'ainfi parler par la malignité des heretiques, qui osent affermer ce qu'ils ne peuuent prouuer par les saintes Escritures, & veulent que leurs raisons & opinions, & ce qui sert à leurs opinions ait lieu, combien que la sainte Escriture n'en face point ouuerte & claire mention. Et veritablement de ce vient la ruine & perdition des hommes, qui ont tousiours osé faire ou plus ou moins que ne portoit la parole de Dieu, & la reigle qu'il a baillée. On voit comment au temps du S. Apostre, les sedueteurs ne se contentans point de la verité & de la grace, laquelle auoit esté pleinement & suffisamment preschée par le saint Apostre, contreuenoyent laschement & meschamment à la verité, & à la grande benediction de Dieu, combien qu'ils approuoyent la predication faite de Iesus Christ comme bonne, neantmoins ils vouloyent adiouster ce que Dieu ne commandoit point, & n'auoit iamais commandé à ce peuple qui a receu Iesus Christ, mais seulement l'auoit ordonné aus enfans d'Israel. Vray est que ces sedueteurs auoyent quelque couleur d'enfeigner qu'il falloit garder les ceremonies de Moyse, d'autant que Dieu a parlé à Moyse, & que ce que
Moyse

Moyse a ordonné, a esté ordonné par le commandement de Dieu : & d'autant que la premiere Eglise qui a esté dressée, & les excellens Pasteurs, voire les Apostres mesmes tenoyent ces ceremonies. Mais le S. Apostre, & Dieu parlant par la bouche d'iceluy, n'aduouë & ne reçoit aucunement les raisons de ces seducteurs, & ne veut admettre que Moyse qui n'a point eu charge des Gentils, soit mis au rang de Iesus Christ, ne qu'il soit adiousté à luy, pour donner salut ne vie. Car mesme il faut qu'il cede & donne lieu à la perfection de Iesus Christ, & de l'Euangile, de laquelle la Loy & les Prophetes rendent tesmoinage. Et mesme tant s'en faut que le S. Apostre admette que Moyse ait lieu avec ses sacrifices & autres obseruations, pour estre tenues comme choses necessaires, & qui seruent & profitent pour obtenir salut, & pour paruenir à la vie eternelle, qu'au contraire il maudit, deteste, anathematise, & met en toute execration, non seulement tels miserables troubleurs, lesquels sont defauuez de toute l'Eglise de Ierusalem, & principalement par les Apostres, mais, qui plus est, il commande que si aucun autre, quiconque ce soit, voire mesmes le plus excellent Ange du ciel, venoit pour prescher & annoncer autre chose que ce qu'il a annoncé, qu'il soit en execration. Car il ne faut rien adiouter ou diminuer, mais purement & entierement tenir & garder ceste tant sainte & parfaite doctrine. Or puis que ce S. Apostre a presché Iesus Christ, & ce qu'il a fait selon les saintes Escritu-

Gal. 1. b.

D. i.

1. *Cor.* 15. *a.*
2. *Tim.* 3. *d.*

res, comme il est escrit en la premiere epistre aus Corinthiens, & puis qu'il testifie que toute Escriture estant diuinement inspirée, est vtile pour doctrine, pour reprehension, pour correction, pour instruction qui est en iustice, à fin que l'homme de Dieu soit entier, appareillé à toute bonne œuvre: ce saint personnage duquel nous auons tantost fait mention, bataillant contre les heretiques, qui par leurs diuerses doctrines faisoient des sectes, & mettoient separation & diuision en l'Eglise, enseignant & proposant choses lesquelles ils ne pouuoient maintenir ne prouuer par la sainte Escriture, vse bien proprement de la maniere de parler du S. Apostre, & condamne toute doctrine qui contient & enseigné autre chose que ce qui est contenu en la sainte Escriture, és saints liures du vieil & nouveau Testament, lesquels il appelle les Escritures de la Loy, & les Escritures Euangeliques. Si tous pouuoient receuoir ceste pure verité, & bailler l'honneur à Iesus Christ qui luy appartient, & si les anciens eussent en tout & par tout tenu ceste reigle, tant s'en faut qu'il eust falu escrire contre les peruerses doctrines, & auoir tant de peine d'arracher du cœur des hommes ce qui y est tant enraciné, que mesme chacun auroit en detestation tout ce qui n'a vray fondement, & qui n'est contenu ouuertement és saintes Escritures. Et au lieu que les anciens ont escrit de telle affection du signe de la croix & du bois d'icelle, & autres choses semblables, lesquelles on ne pourroit & ne sauroit monstrier ne prouuer par la sainte

Escriture, ils s'y fussent opposez, & eussent puissamment resisté à telles doctrines. Mais par faute de s'estre tenus à ceste reigle tres-certaine, incontinent que quelcun d'entre les anciens qui auoit apparence de grand sauoir & de grande bonté, a commencé à se desuoyer du droit chemin, vn autre l'a suyuy qui a encore pis fait : & par ce moyen beaucoup de choses pources & meschantes ont esté mises en auant.

Comment les Anciens ont condamné leurs erreurs mesmes, par l'autorité qu'ils ont attribuée aux saintes Escritures : & du besoin que les hommes ont de s'enquerir d'icelles. CHAP. XXII.

MAIS Dieu par sa grace a fait que les Anciens mesmes, ou en exposant ou traittant aucuns passages des Escritures, ou estans esueillez par les heretiques, sont contrains de dire des sentences saintes & bonnes non seulement contre les heretiques qui estoient de leur temps, & contre tous leurs semblables, en les condamnant par la parole de Dieu, mais aussi contre tout ce qu'eus-mesmes & tous les autres mettent en auant contre la parole de Dieu, & outre ce qu'elle contient. Or si nous venons à considerer quelle est l'autorité des saintes Escritures, nous trouuerons que nostre Seigneur & souuerain Maistre Iesus Christ, combien qu'il soit la verité mesme, & qu'il ne puisse aucunement faillir, & que de sa bouche iamais ne sortit mensonge, toutesfois il conferme son dire par

Matt. 23. c. d.
Iean 5. f. g.
Luc 24. f. g.

les saintes Escritures, qui pour lors estoient, & par icelles reprend ceus qui errent & qui contredisent à sa doctrine. D'avantage il les declare à ses Apostres, à fin qu'ils entendent qu'elles contiennent nommément touchant nostre salut, & touchant son aduenement; sa passion & sa resurrection, laquelle les saints Apostres ne pouuoient lors croire. En apres les Saints Apostres remplis du S. Esprit, ayans tant de dons & de graces approuuent par la sainte Escriture, ce que le S. Esprit leur fait parler. Cecy appert bien clairement par

AB. 15. b. c. d. e. cela qui est escrit és Actes des Apostres touchant la pesante question qui fut esmue contre la vraye & tres-certaine verité qui se preschoit & tenoit entre les Gentils qui auoyent receu l'Euangile, lors que presque tous ceus de l'Eglise au parauant iugeoyent que les aduersaires de S. Paul auoyent droit, & qu'on deuoit suyure la doctrine qu'ils enseignoyent. Car pour mettre fin à ce grand different, la sainte Escriture est amenée, & conclusion y est faite selon le contenu d'icelle. Et mesmes ce qui a esté conclu, mandé & arresté en l'assemblée des Apostres en Ierusalem touchant ceste question, n'est point aujourd'huy tenu des Eglises & des Chrestiens, sinon autant que la sainte Escriture le contient : comme il appert par ce qu'il estoit commandé de s'abstenir du sang, & des choses estouffées. Car cela n'est pas obserué maintenant en l'Eglise de Iesus Christ. Finalement ceus de Berroé sont grandement louez de ce qu'ayans ouy S. Paul, ce grand vaisseau & instrument de Dieu,

AB. 17. c.

ils regardoyent & s'enqueroient diligemment des S. Escritures s'il estoit ainſi comme S. Paul auoit preſché, combien que lors ils n'euffent que les Escritures du vieil Testament. Puis qu'ainſi eſt, que doyuent maintenant faire ceus qui enseignent & preſchent, ayans charge du peuple Chreſtien, & ceus auſſi qui ſont enseignez ? La neceſſité n'y eſt-elle pas plus grande ? Car ceus qui enseignent, que peuuent ils amener autre choſe que la ſaincte Eſcriture, pour eſtre tenus veritables ? Les grandes vertus qui ont eſté és Apoſtres, & les miracles ceſſent. Il faut donc que pour cecy l'autorité de l'Eſcriture ſoit amenée, & qu'elle ſupplée & ſerue au lieu des miracles. Car auſſi elle eſt trop plus certaine que tous ſignes & miracles. D'autre part combien ſont loin de l'excellence & de la perfection de Ieſus Chriſt tous ceus qui ſont de preſent & qui ont eſté apres luy, veu qu'ils ſont tant inferieurs aus Apoſtres, & beaucoup moindres qu'eus ? Parquoy non ſeulement pour donner autorité à ce qu'ils enseignent, mais pour ſe garder de faillir, ils ſe doyuent bien garder de mettre rien en auant qui ne ſoit clairement & ouuertement contenu en la ſaincte Eſcriture, & par icelle tres-bien prouué & conſermé.

Comment ceus qui enseignent ne doyuent rien proposer en l'Eglise, dequoy ils n'ayent certain tesmoignage en la parole de Dieu : & combien il est au-iourd'huy necessaire de suyure ceste reigle. CHAP. XXIII.

Origen. in epist.
ad Rom. c. 3.

Quid ergo præ-
cel. eos.

ORIGENE entre les anciens a bien cognu ce que i'ay dit, en parlant du S. Apostre, & disant : que S. Paul selon sa coustume veut confermer ce qu'il auoit dit, & avec ce il baille exemple à ceus de l'Eglise qui enseignent, que ce qu'ils disent au peuple ils ne le mettent en auant presumans de leurs propres opinions, mais estans fortifiez par les tesmoignages de Dieu. Car si luy estant tel & si grand Apostre, pense que l'autorité de ses dicts ne suffit point, s'il ne monstre que ce qu'il a dit, est escrit en la loy & és Prophetes : combien plus nous qui sommes tres-petis devons nous garder cecy, à sauoir que quand nous enseignons nous ne mettions en auant nos opinions, mais celles du S. Esprit ? Qui ne voit qu'il est plus que necessaire, que tous ceus qui veulent enseigner en l'Eglise doyuent prouuer leur dire par la sainte Escriture, & qu'ils ne doyuent estre creus, sinon entant-que l'Escriture approuue & conferme ce qu'ils disent ? Parquoy il faut qu'ils soyent continuels apres la sainte Escriture. Qui eurent iamais tant de besoin de regarder aus saintes Escritures, comme ceus qui vivent auourd'huy, veu qu'il y a tant & tant de seducteurs, & que le

monde ne s'employe sinon à renuerfer la verité de Dieu, & peruertir toute la doctrine de Iesus Christ? N'est-ce pas donc vne ingratitude & vn mespris qui ne peut & ne doit estre souffert, de ne regarder l'Escripture, & de ne se tenir à icelle? Si les Apostres se sont seruis des estincelles, & des claires estoilles des Escriptures du vieil Testament, c'est à dire, de ce que Moyse & les Prophetes ont escrit, & si le peuple y a diligemment regardé, & en ce sont grandement louez d'auoir diligemment cherché les sainctes Escriptures, & la verité de ce qu'ils auoyent ouy : comment peut-on porter & endurer que nous les mesprisions, & ne les facions seruir pour entendre ce que Dieu nous a manifesté de sa verité? Certainement nous serons du tout inexcusables si nous ne conioignons avec ce que les Apostres lisoient és liures du vieil Testament, la tres-grande clarté & manifestation du tres-beau & tres-clair soleil de iustice Iesus Christ, qui nous est pleinement manifesté par les écrits des Euan-gelistes & Apostres, lesquels sont contenus en ces tant excellens liures du nouueau Testament, lequel est si accordant avec le vieil, que tous ensemble rendent vne grande clarté, & en iceus reluir Iesus Christ qui est le soleil de iustice, duquel toute la sainte Escripture parle. Et pourtant nous ne deuons sentir, ne croire, ne parler, sinon comme ceste sainte Escripture porte, ne de la Foy, ne de la vie Chrestienne, comme il a desia esté touché.

De l'accord qui est entre le vieil & nouveau Testament, & de la doctrine convenue en iceux, & de l'utilité d'icelle. CHAP. XXIII.

August. to. 1.
de morib. eccl.
li. 1. c. 18.

Deut. 4. a.

Eodem 24.

CECY est la cause pourquoy i'oy volontiers ce que dit S. Augustin, lequel a plus d'occasion d'inciter tous à aller apres ce que nous auons par escrit és saintes Escritures, & d'admonester qu'on ne face auant ny arriere que ce qui est contenu en icelles, que Moyse n'en auoit, lequel commande qu'on ensuyue & qu'on tienne ce qu'il a baillé disant, que c'est leur sagesse & autres choses qu'il dit en sa pedagogie, pour mener à Iesus. Dont saint Augustin dit, Voyez la concorde des deus testamens. Et pour mieus inciter vn chacun à y regarder, il adiousté puis apres, Le salut de l'ame & la voye de la vie bien-heureuse, est monstrée par la paix des deus Escritures : donnant à entendre que le vieil & nouveau Testament s'accordent tres-bien ensemble : & que Moyse, les Prophetes, les Apostres & les Euangelistes en leurs escrits sont d'un droit accord, pour nous monstrer & testifier & manifester le salut de nos ames, & la voye que nous deuons suyure & tenir pour y paruenir : voire qu'autrement nous ne pouuons & ne deuons chercher, demander, ne penser, auoir ne tenir, sinon ainsi que contient ceste sainte Escriture. Et parlant de la reigle de iustice, pour se porter comme il faut en obeissant à Dieu, il dit, Que la reigle de viure est affermie par l'autorité des deus

deus Testamens. Et puis apres il parle de ce ou git le bien de l'homme, à sauoir en l'amour de Dieu, à ce qu'il ne soit point corrompu, & qu'aucuns maus ne le rompent, & qu'il ne serue à autre qu'à Dieu, & qu'il ne soit deceu par dol ne fallace aucune : surquoy il dit : Ceste perfection de l'homme laquelle seule obtient qu'il puisse totalement iouyr de la pureté de verité, nous est chantée d'un accord par les deus Testamens : à ceste nous sommes induits d'une part & d'autre. Il entend par les deus Testamens le vieil & le nouveau. Et encore parlant de la doctrine par laquelle la santé de l'ame est restaurée, il dit qu'elle est la medecine de l'ame, & que Dieu nous a donné la reigle de doctrine és deus Testamens, à sauoir au vieil & nouveau. Puis donc que la reigle de doctrine est donnée au vieil & nouveau Testament, & que pour se garder de tromperie, & pour iouyr pleinement de la pure verité, & auoir la reigle de viure ferme & certaine, il faut auoir l'autorité de l'Escripture, & cela nous est monstre par l'Escripture du vieil & nouveau Testament, & n'est faite mention d'autre que de ceste autorité. Il appert donc bien que tout le demourant ne sert point à prouuer, reigler, ne maintenir. Or il faut que tout ce qu'on enseigne en l'Eglise de Dieu, & tout ce dequoy vn chacun selon Dieu doit instruire son prochain, soit ferme, bien prouué, certain & seur, & bien reiglé, tellement que nul ne puisse rien au contraire, non point mesme les portes, & toute la puissance d'enfer. La Chrestienté est appelée de
D. ij.

c. 25.

c. 28.



Christ, qui est la verité trescertaine : & tous les vrais Chrestiens sont en droite verité, & sont appelez fils de verité. Parquoy il est plus que necessaire qu'ils se tiennent en verité, & qu'ils ne reçoivent rien que la trescertaine verité.

Du tesmoignage, des docteurs anciens, par lequel il est monstre que les saintes Escritures contiennent suffisamment tout ce qu'il est requis que les hommes sachent & facent pour leur salut. CHAP. XXV.

ET si aucun veut estre si temeraire qu'il ose dire, combien que la sainte Escriture soit trescertaine, tres-veritable, & tout ce que nous en auons touché & monstre par les anciens, que neantmoins elle ne contient point tout ce que nous deuons tenir & croire : par ce qui a esté monstre, il faut necessairement conclure, voire selon le iugement des anciens, que tout y est contenu. Autrement qui pourroit tout prouuer ce qu'il enseigne par le tesmoignage des saintes Escritures, si elles ne comprenoyent & contenoient ce qu'on doit prouuer par icelles? Neantmoins ie leur veus satisfaire par l'autorité & le tesmoignage des anciens. Car premierement Augustin, qui est l'un des principaus, parle clairement ainsi, disant que l'Escriture de Dieu n'a point teü les choses qui appartiennent à chercher & tenir la vraye religion. Il monstre par cela que la sainte Escriture contient & dit tout ce qu'il faut chercher en la chrestienté, qui est la seule religion, en la-

quelle seulement Dieu est seruy & craint en verité : parquoy tout le demeurant n'est que superstition & faus seruice de Dieu, & crainte vaine, & vraye idolatrie. Il monstre aussi que la sainte Escriture contient non seulement tout ce qu'il faut chercher & demander en la vraye religion, mais aussi tout ce qu'il y faut tenir, croire & ensuyure : d'autant que la vraye religion & la droite Chrestienté est fondée en la foy, voire de la pure parole de Dieu, tant ce qu'un chacun doit croire du iugement des meschans & du salut des bons, que ce qu'il faut faire en croyant. Ce bon personnage parlant des hauts mysteres de la foy, & montrant quelle elle est, & d'ou elle se prend icy, & d'ou elle est cueillie, dit ainsi, Nostre foy, à sauoir la vraye foy, la droite foy, la foy vniuerselle qu'on appelle catholique est cueillie non point d'opinion presumptueuse, ou de presumption, mais par le témoignage de la lecture : non point incertaine par temerité heretique, mais fondée par la verité apostolique. Et en un autre lieu il dit, que Dieu a mis es saintes Escritures la voye du salut des hommes. Et pour confirmer cela, il escrit en vne autre part, Combien que le Seigneur Iesus eust fait plusieurs choses, ainsi que le saint Euangeliste le testifie disant, que le Seigneur auoit dit & fait plusieurs choses qui ne sont point escrites, neantmoins celles qui deuoyent estre escrites ont esté choisies, lesquelles ont esté iugées deuoir suffire au salut des croyans. Puis donc que la sainte Escriture contient ce qu'il suffit au salut, que veut-on d'avan-

*Idem de verb.
do. in euang. f.
Io. ser. 63.*

*Idem. li. 7.
confes. c. 7.*

*Super Io. tract.
49. c. 11.*

Iean 20. g. 21. d.

Chrysoſt. in 2.
cap. Gen. ho. 14

In opere imperf.
hom. 41. in. 22.
c. Matt.

tage, veu que Dieu qui ſurpaſſe tout s'appelle noſtre ſalut, & puis que l'Eſcriture nous ſuffit, & que nous ne deuons autrement enquerir ne demander de Dieu, ſinon ſelon la ſaincte Eſcriture, qui eſt celuy qui en voudra & cherchera d'auantage & meſmes hors de l'Eſcriture. En apres Chryſoſtome pour mettre bride aus hommes, quand il eſt queſtion de ce qui touche au ſalut & à l'ame, dit : Qu'on ſache ſeulement les choſes contenues és ſainctes Eſcritures. Et à fin que cela profite à ceus qui ſauent & aus autres, il adiouſte : Et que vous enſeigniez & puiſſiez admoner les autres. Et ſous le nom d'iceluy meſme on lit en autre part : Tout ce qu'on demande pour le ſalut eſt deſia accompli és Eſcritures. Celuy qui eſt ignorant trouuera ce qu'il luy faut apprendre : celuy qui eſt opiniatre & pecheur y trouuera les fouets du iugement aduenir, leſquels il doit craindre : celuy qui trauaille y trouuera les gloires & prouèſſes de la vie eternelle, pour eſtre plus eſueillé à l'œuure en les maniant. Celuy qui eſt de petit courage & foible y trouuera les viandes moyennes de iuſtice, leſquelles ſi ne ſont graſſe l'ame, neantmoins elles ne permettent point qu'elle meure : celuy qui eſt de grand cœur & fidele y trouuera les viandes ſpirituelles de vie plus continente, qui le menent pres de la nature des Anges : celuy qui eſt frappé du diable, & eſt nauré en peché y trouuera les viandes medicinales, leſquelles par penitence le rappellent à ſalut.

De la temerité & presumption de ceus qui veulent adioufter à la parole de Dieu, cela que Iesus Christ n'a point dit à ses Apostres. CHAP. XXVI.

OR les hommes sont si temeraires & presomp-
tueux qu'ils ne se peuuent arrester à ce que
Dieu a ordonné, mais veulent tousiours entrepren-
dre plus qu'il ne leur est loysible, & pour mainte-
nir leurs opinions, ils tirent la sainte Escriture à
leur plaisir. Cecy est bien euident par ce passage
ou Iesus Christ dit, le vous ay à dire encore plu-
sieurs choses, lesquelles vous ne pouuez porter
maintenant. Car par cela plusieurs se veulent esle-
uer, & faire plus que Iesus Christ n'a commandé,
& presument de dire ce que Iesus Christ n'a pas
dit à ses disciples, & osent entreprendre de vou-
loir affermer, qu'il a laissé à dire telle & telle
chose. Mais saint Augustin detestant vne telle ar-
rogance reprend & condamne bien & viuement
ceste tresgrande folie & lascheté, disant, Voicy
donnons leur qu'il soit ainsi que maintenant apres
que le saint Esprit a esté enuoyé, plusieurs peu-
uent porter ces choses, lesquelles les disciples ne
pouuoient lors porter, quand le saint Esprit n'a-
uoit pas encore esté enuoyé : sauons-nous pour-
tant que c'est, & quelles sont les choses qu'il n'a
pas voulu dire, lesquelles nous saurions lors, si
nous les lisions auoir esté dites de luy, ou si nous
les auions ouyes? Car c'est autre chose sauoir si
nous ou vous les pouuons porter, & autre chose,

Iean 16. b.

*August. in Ioh.
tract. 96. c. 16.*

fauoir quelles choses ce sont, soit qu'on les puisse, ou qu'on ne les puisse porter. Veu donc qu'il l'a teu, qui nous dira ce sont ces choses cy ou celles-la? Et s'il l'ose dire, d'ou le prouuera-il! Car qui est tant vain ou tant temeraire, que mesme disant vray, à qui il voudra, & telles choses qu'il voudra, ose affermer sans aucun tesmoignage de Dieu, que ce soyent les choses lesquelles le Seigneur n'a pas voulu dire lors? Qui de nous fera cecy n'ayant point excellemment l'autorité des Prophetes ne des Apostres, qui n'encoure vne tresgrande coulpe de temerité? Car pour certain si nous auions leu quelque cas de ces choses, aus liures qui ont fermé d'autorité canonique, lesquels ont esté écrits apres l'ascension du Seigneur, ce seroit peu d'auoir leu que cela est des choses que Iesus Christ auoit à dire, s'il n'estoit leu en ce mesme liure, que cela est des choses lesquelles le Seigneur ne voulut pas lors dire à ses disciples, pourtant qu'ils ne les pouuoient porter. Ce bon personnage presse bien l'arrogance temeraire de ceus qui presument tant. Car si Iesus Christ n'a pas dit ce qu'il auoit à dire aus Apostres, pourtant qu'ils ne le pouuoient porter: comment saura aucun que ceus-la ausquels il voudra dire cela que Iesus Christ n'a pas dit, soyent plus suffisans pour le pouuoir porter que n'ont esté les Apostres? Et combien que la suffisance y seroit: la suffisance des auditeurs feroit-elle pourtant que nous seussions quelles choses Iesus Christ auoit à dire? Car pour les fauoir il faudroit que nous eussions leu, ou ouy, que ce

sont ces choses, veu qu'il y a grande difference entre la capacité ou incapacité de nous & d'autres, & de sauoir si ce sont les choses que Iesus Christ auoit à dire. Or Iesus Christ n'a point dit, quelles choses il auoit à dire : quelle presumption est-ce donc d'estre si arrogant d'oser dire telle ou telle chose est de ce que Iesus Christ auoit à dire ? comme aucuns disent de la messe, & semblables choses, comme sont consecrations d'autels & de temples, & comme on diroit de la croix, de la faire porter & de s'en signer, & autres choses desquelles il n'y a commandement ny escrit, comment le peuvent-ils prouuer ? Et quand bien tout cecy se trouueroit és saintes Escritures, encore ne seroit-ce pas assez, pour se seruir de ce passage, si l'Escriture ne contient que telles choses fussent de celles que nostre Seigneur auoit à dire. Parquoy toute la Papauté est defarmée de ce passage, par cela que monstre tant bien ce bon personnage. Et monstre bien que tant s'en faut qu'il puisse seruir pour donner lustre à leurs mensonges & faussetez, comme ils taschent à faire, que mêmes les choses vrayes ne peuvent estre prouuées & montrées estre telles par ce passage, & que de soy mesme ce passage sert à confondre ceus qui presumant le prendre pour prouuer, cecy ou cela est des choses que les Apostres ne pouuoient porter, & que Iesus Christ leur auoit à dire. Et bien est besoin, voire plus qu'on ne sauroit dire, que ceste presumption soit bridée. Car s'il est vne fois loysible à l'homme quel qu'il soit de dire & ordonner ce qu'il luy

- plaira, qu'est-ce qu'il n'osera affermer estre de Dieu, & auoir commandement de Dieu, s'il n'y a reigle pour cognoistre & iuger ce qui est de Dieu & ce qui n'en est point?

Comment il n'y a point d'autre Escriture qui doieue estre adioustée aus liures des saintes Escritures.
CHAP. XXVII.

Orig. homi. 5.
in Leuit. cap. 7.

v. 7.

1. Cor. 13. c.

POURTANT ces choses ont pressé les anciens de renuoyer les hommes aus saintes Escritures, d'ou Origene parlant de ce qui restoit de la chair du sacrifice aus tiers iour, qui deuoit estre brulé, dit: le pense que les deus Testamens sont entendus, ausquels il est loisible de chercher, & resoudre toute parole qui appartient à Dieu: car cela est le sacrifice, & d'iceus prendre la science de toutes choses. Et si aucune chose reste que l'Escriture de Dieu ne determine, ne faut receuoir aucune escriture tierce pour autorité de science, car c'est le iour qu'on appelle tiers: mais mettons au feu ce qui reste, c'est à dire reseruons-la à Dieu. Car Dieu n'a pas voulu que nous seussions toutes choses en ceste vie, principalement attendu que l'Apostre dit, Nous cognoissons en partie, & prophetisons en partie, mais quand la perfection sera venue, les choses qui sont en partie seront abolies. C'est donc le feu à qui nous deuous garder les choses qui sont de reste au tiers iour: & par vne temerité presomptueuse ne nous attribuer point la science de toutes choses ensemble: à fin que nous ne soyons

ne soyons pas du nombre de ceus desquels le S. Apostre parle, quand il dit d'aucuns qui estoient de son temps, à sauoir qu'ils n'entendent pas les choses qu'ils disent, ne desquelles ils afferment. A fin donc qu'il n'aduienne que nostre sacrifice ne soit point agreable: & ce mesme que nous desirons receuoir science des Escritures de Dieu, ne nous soit tourné en peché: gardons les mesures que la loy spirituelle nous a proferé par le legislateur. Dieu par sa grace ouure les yeus au poure monde, à fin qu'on ne cherche rien pour mettre en auant qu'on doyue croire, faire, tenir, & suyure hors de la sainte Escriture du vieil & nouveau Testament: & qu'il nous fuffise de sauoir ainsi que l'Escriture contient, & tenir la mesure qui nous est là donnée: car autrement tout seroit incertain, & faudroit de iour en iour tout changer, s'il y auoit autre reigle que la pure parole de Dieu, qui est comprinse en la sainte Escriture.

De l'autorité des Conciles, & d'ou ils la prennent, & de la vraye reigle laquelle doit estre gardée & suyue en iceus. CHAP. XXVIII.

S'IL y a rien qui doyue auoir autorité icy apres la sainte Escriture, ce seront les Conciles: car quasi tous ont cela en la bouche: que pour corriger, & pour reformer ce qui est de besoin à l'Eglise, & pour vuider tous differens, & faire vn arrest lequel tous doyuent tenir & suyure, qu'il faudroit vn Concile: ce qui seroit certes fort vtile & à desirer:

E.

mais nostre Seigneur de sa grace y a pourueu, tant pour proceder au Concile comme il faut, qu'és personnes, & aussi pour l'autorité que doyuent auoir les Conciles. Car la saincte assemblée qui a esté faite en Ierusalem, n'a pas esté des Antechrists de Papes, ny des Cardinaus princes de Sodome, ne des Euesques Gomorréens, ny aussi des Abbez de Bela. Car ceus cy ne seruent de rien au monde sinon qu'ils admonestent assez vn chacun par leur meschante doctrine & vie abominable, qu'on se garde de les ensuyure ny en leur vie ny en leur doctrine. Mais ceus qui ont esté en ce premier Concile de Ierusalem ont esté les plus excellens en dons & graces de Dieu qui iamais ayent esté au monde, lesquels auoyent charge, voire de Dieu. Car ils estoient Apostres & vrais seruiteurs de Dieu, pour maintenir la doctrine du Seigneur, non pas par l'espée, par le feu materiel, & en cachette: mais tout ouuertement par le glaue & le feu spirituel de la pure parole de Dieu. Les parties sont ouyes en tout ce qu'elles peuuent & sauent amener. L'affaire est regardé & resolu par la saincte Escriture. Et combien que tout ce qu'on sauroit demander au plus excellent Concile soit tenu & gardé en ce premier Concile de Ierusalem, & que tout ce qui y est ordonné soit mesme enregistré en la saincte Escriture: neantmoins chacun voit clairement, que tout ce qui y est conclu, n'a lieu, ny autorité, sinon d'autant que la saincte Escriture & le commandement de Dieu le porte. Car pour vray celuy introduiroit la doctrine des dia-

bles, qui voudroit defendre de manger du sang & des choses estouffées, en pressant les consciences, là ou maintenant il est loysible d'en vser sans scandale : & au lieu de suyure l'Esprit de Iesus Christ, il suyuroit l'esprit d'erreur, autant que ceus qui vouloyent que les Gentils fussent circoncis. Parquoy ce tant excellent Concile nous doit ouurir les yeus pour prendre & tenir des autres Conciles, tout ce qu'il en faut tenir & prendre. Et pour plus grande confirmation de ce que ie dy, i'ameneray vn des principaus Anciens, à sauoir Augustin, lequel se pouuoit bien armer d'vn des plus excellens Conciles, auquel sainctement & duëment Arrius auoit esté condamné. Car luy ayant à disputer contre vn Euesque Arrien, il declare qu'il ne doit pas defendre sa cause par l'autorité des Conciles, disant ainsi, Or maintenant ie ne doy mettre en auant le Concile de Nicée, ne toy celuy d'Arimin, comme chose qui apporte preiudice par ce d'ou la cause ne doit estre cognue : car ie ne suis obligé par l'autorité de cestuy-cy, ne toy par l'autorité de celuy là, sinon par l'autorité des Escritures, & non point par ce qui est propre à qui que ce soit, mais par tesmoins qui sont communs à l'vn & à l'autre : que l'affaire combatte avec l'affaire, & la cause avec la cause. Il monstre clairement en cecy, qu'il n'y a rien qui nous doye presser que l'autorité de la sainte Escriture : & ceus qui veulent autrement faire, font grand tort à la maiesté & autorité des Escritures, baillans à autre ce qui appartient seulement à icelles, & aussi

August. cont.
Maximum epist
ll. 3. c. 14.

font tort aux creatures de Dieu, leur mettant vne suietion plus grande que celle que Dieu a ordonné qu'elles ayent. Car outre l'Escripture, & le saint commandement de Dieu, il ne faut point presser les consciences, esquelles Dieu seul doit regner & dominer par le sceptre de sa sainte parole, comme à luy seul appartient.

Comment ce qui a esté fait par Helene selon que les Anciens en ont escrit, n'a point de bon fondement en la parole de Dieu, ains y est contraire. CHAP. XXIX.

Ioan 4. c.

MAIS voyons ce que les Anciens ont escrit, s'il y a chose qui soit selon Dieu, & qui puisse estre dite sans meschanceté comme chose enseignée par Iesus Christ & ses Apostres. Premièrement quant à Ambroise qui dit qu'Helene commença à reuoir les saints lieux, ie voudroye bien qu'il prouuast son dire par la parole de Dieu, en prouuant qu'il y ait vn lieu plus saint que les autres. Car quand Iesus Christ dit qu'on n'adoreroit plus le pere en ceste montagne, ny en Ierusalem, mais que les vrais adoreteurs l'adoreront en Esprit & verité : par cela il nous oste la difference des lieux, comme aussi la difference des iours est ostée. Puis apres touchant ce qu'il dit, que l'Esprit inspira Helene à chercher le bois de la croix, encore pourra-il moins prouuer cela par la sainte Escripture, sinon qu'il l'entende du mauuais Esprit. Car le S. Esprit n'a iamais plus inspiré personne & pure creature, &

n'inspirera, qu'il a inspiré les saints Apostres, auxquels il n'a iamais inspiré autre chose, que ce que Iesus Christ leur auoit dit au parauant, & qui auoit esté prophetisé par Moyse & les autres Prophetes. Et de dire que le S. Esprit pousse & inspire à chercher le bois de la croix, & autre chose semblable, cela est contre sa nature, qui est de rauer nos cœurs des choses visibles & terriennes, pour les tirer aus choses celestes & inuisibles. Et pourtant il a esté fait par la vertu du S. Esprit, que personne n'a peu sauoir le sepulchre de Moyse, à fin que personne n'allast apres le corps, os, ou chair de ce grand seruiteur de Dieu : mais seulement qu'on regarde diligemment ce que Moyse a escrit. Et autant en a esté fait d'Helie, lequel a esté rauy au ciel, en sorte qu'il n'a plus esté veu icy. Or nul ne peut nier que ces deus personnages n'ayent esté grans seruiteurs de Dieu en ceste vie, & qu'ils ne se soyent employez de bon cœur & de droite volonté à seruir Dieu saintement & purement, & qu'ils ne soyent apparus en plus grande gloire, que iamais personne ait esté veuë, à sauoir en la transfiguration de Iesus Christ. Nul ne peut pareillement nier qu'en la moindre partie de leur corps qui sera en gloire eternelle, il n'y ait plus de dignité & d'excellence qu'en tous les bois morts, comme est celuy de la croix, & qu'en tout ce qui est sur la terre, qui n'est point capable de la vie eternelle. Et combien qu'ainsi soit, ce neantmoins le S. Esprit n'inspira iamais personne pour chercher les corps de ces saints personnages : comment

Mat. 17. a.

Marc 9. a.

Luc 9 d.

pourroit donc estre du saint Esprit cela qui est escrit d'Helene, veu que le precieus corps de Iesus Christ, qui passe tout ce qui est tant au ciel comme en la terre, nous a esté osté de ceste terre & de ce monde? Et pourquoy a ce esté fait, sinon à fin que personne ne le cherche sur la terre icy bas : mais que le desirans grandement nous le cerchions là ou il est au plus haur du ciel à la dextre du Pere? Ainsi nous enseigne & nous inspire le saint Esprit. Mais reuenons à ce qu'Ambroise a encore escrit d'Helene. Elle est allée, dit-il, à Golgotha. Bon Pere ie vous prie qui luy a commandé d'y aller, comme d'aller aussi en Ierusalem? Si vous disiez, elle est allée ouyr la parole de Dieu, & est allée avec les fideles ouyr l'Euangile quand on le prechoit, & receuoir la sainte Cene de nostre Seigneur, & prier & louer Dieu en la sainte assemblée, ou visiter les malades, ie ne vous voudroye point demander qui luy a commandé cela : car la parole de Dieu est toute claire en telle chose, mais de ce que vous dites, vous n'en pourriez monstrier aucun commandement, ne qu'elle ait esté enseignée par les Apostres. Parquoy selon que vous auez bien dit en autre part, tout ce qu'elle fait, & ce que vous en dites est plein de meschanceté.

De la bataille de Iesus Christ en Golgotha, & comment il la faut considerer pour en faire son profit.
CHAP. XXX.

CE qui s'ensuit qu'elle dit, Voicy le lieu de la bataille, & ou est la victoire? Si l'on decla-

roit quelle a esté la bataille, & comment elle a esté faite, il n'e faudroit pas parler ainsi. Car combien qu'en verité Iesus Christ ait esté crucifié, & soit vrayement mort, en telle sorte que l'ame a esté separée du corps d'iceluy, au lieu appelé Golgotha: neantmoins la bataille n'a pas esté charnelle ne du monde. Car Iesus Christ n'est point venu pour batailler contre Pilate ny contre les Iuifs, & autres semblables, comme se font les batailles corporelles, mais est venu batailler contre Satan & enfer, & contre la mort, le peché, la damnation & la malediction. Ce seroit vne tresbonne chose si l'œil de la foy, regardant Iesus Christ mort pour nos pechez, & ressusçité pour nostre iustification, consideroit bien la grande obeissance, sainteté, pureté, & innocence, & la tresardente charité qu'il a eu enuers nous, qui estions morts par nos pechez: & comment ce bon sauueur a bataillé contre nostre desobeissance, & contre tout le mal qui estoit en nous, en destruisant & brisant la teste de nostre plus que mortel ennemy. Item comment Iesus Christ a engloury la mort par sa mort tant amere, laquelle par maniere de dire il a comme mangée & aualée, en mourant selon le commandement du Pere, pour oster tout ce qui s'ensuit du manger d'Adam plein de rebellion, voire en ceus qui croient en Iesus Christ, & puis comment il a triomphé, ressusçant en immortalité, & comment triomphamment il est monté és cieus, & est assis à la dextre de la maiesté du Pere, il a donné grans dons de victoire, & les excellen-

tes graces du saint Esprit, & puis comment il en a enrichy son Eglise, qui est son corps, par le saint ministere & dons singuliers, pour iceluy saint ministere : à fin que l'Eglise entende & sache les biens inestimables qu'elle a en Iesus Christ & de Iesus Christ par la predication pure du saint Euangile, & par la confirmation des saints Sacremens. Qui sauroit bien tout cecy, il ne faudroit demander ou est la victoire, ne tirer à Golgotha ne autre part. Mais quoy ? L'affection que nous portons à Constantin, à cause de la faueur qu'il auoit & portoit à la Chrestienté, fait que tout est approuué & loué, & que la sainte Escriture n'est pas regardée comme il faut. Enquoy nous voyons que tels personages ayans telles faueurs & menez d'affection pour priser ceus qui leur fauorisoyent, n'ont pas regardé si diligemment les saintes Escritures comme il falloit. Et en cela on voit que les heretiques ont plus seruy & profité à plusieurs grans & bons personages, que ceus qui leur ont fauorisé, autant que les heretiques ont esté cause qu'ils ont plus diligemment regardé les saintes Escritures.

En quelle maniere Ambroise introduit Helene parlant de l'inuention de la croix, & des choses qui sont à reprendre & condamner en cela. CHAP. XXXI.

AMBROISE pourfuyuant ce mesme propos, introduit Helene parlant encore plus solement. Car à la verité si elle eust ainsi parlé, on luy diroit à bon droit qu'elle se teust, & qu'elle ne parlât pas comme

pas comme vne sottie. Or voicy comment Ambroise l'introduit parlant ainsi. le cherche, à tout le moins, l'enseigne de salut, & ie ne la trouue pas. le suis és royaumes, & la croix du Seigneur est en la poudre : ie suis és cours royales, & le triomphe de Christ est és ruines : iceluy est encore caché, & la palme de vie est cachée. Comment me puis-ie iuger estre rachetée, si la rançon n'est veüe? Que chacun considere diligemment ces paroles, & il verra facilement quelle faute il y a en ceste femme. Iesus Christ seul ne luy doit-il pas suffire ainsi comme il est présenté & communiqué à tous croyans par le saint Euangile, & comme aussi les saints Sacremens le presentent? Quelle enseigne de salut demande-elle d'auantage? Que cherche-elle autre que Iesus Christ? Qui luy a commandé de chercher autre? Si elle est és royaumes droitement & selon Dieu, qu'elle face son office selon Dieu. Dequoy se rompt-elle la teste pour du bois qui a seruy en son temps, quand il a esté mis en besongne? Les corps des plus grans seruiteurs de Dieu qui resusciteront, voire ceus-la mesmes qui sont en la poudre sont bien plus à estimer que du bois : mais toutesfois il n'y eut onques seruiteur de Dieu qui les en ait tirez pour dire qu'ils fussent mal, & qu'il faudroit les mettre en lieu ou ils ne fussent pas en la poudre. Si la croix de Iesus Christ se prend pour Iesus Christ crucifié, comme elle est prinse en l'Escripture, ceste femme blaspheme : car iamais Iesus Christ n'a esté en la poudre, & n'y est, & n'y sera pas, mais

en toute gloire & magnificence, & en vie eternelle & immortalité. Et de dire aussi que le triomphe de Iesus Christ soit és ruynes, c'est vn trop grand outrage, comme aussi qu'il soit caché, veu qu'il n'y a rien plus mis en lumiere és cieus, que le triomphe de Iesus Christ, & la vie eternelle. Et en la terre iamais n'y eut rien qui eust esté tant mis en auant que le triomphe de Iesus Christ, & la victoire de la vie eternelle. Car par l'Euangile il est presché par tout le monde, & tout en crie tant par liures que par voix. Parquoy ceste femme ne fait qu'elle dit, & encore moins, de ce qu'elle dit encore apres du iugement, d'estre rachetée si elle ne voit la rançon. Ha la pource sorte, pense elle voir la rançon par le bois ? Certes elle est despourueë de sens si elle la pense ainsi voir. Car il faut voir ceste rançon par l'Euangile, & par la pure predication de la viue parole de Dieu, & par la communication des saincts Sacremens, & par cela iuger en verité qu'on est racheté, & voir de l'œil de la foy par la clarté de la parole du saint Euangile, la rançon qui a esté payée pour nous. En apres elle parle au diable, comme s'il eust bouché le glaiue duquel il a esté tué : & parle des puits qu'Isaac caua, lesquels les Philisthins auoyent remplis, & qu'en ostant les ruines la vie apparaisse : & que la terre estant ouuerte le salut reuiuise, & que le diable soit derechef vaincu. Et puis elle se compare à la vierge Marie disant, que comme la vierge a vaincu le diable, ainsi la femme le vaincra en surprenant ses embusches. Et comme

la vierge a porté le Seigneur, & l'a montré engendré, & a fait que Dieu a esté veu entre les hommes : ainsi elle cherchera la croix, elle le monstrera reffuscité, elle leuera des ruines l'estendard diuin en remede des pechez. Et apres il est dit, que Marie a esté visitée pour deliurer Eue : Helene a esté visitée à fin que les Empereurs fussent rachetez. Finalement elle est louée d'auoir mis la croix à la teste des Roys, & d'auoir fait qu'elle fust adorée en la personne des Roys. Bref, il y a tant de choses si lourdes, que i'en suis estonné. Car quelle bestise est-ce d'appeler le bois le glayue duquel le diable a esté tué ? Le bois materiel, & qui est sans vie, & sans ame, estant corruptible & sans sens, aura-il la puissance de tuer le diable qui est esprit ? Il faut bien autre glaiue que de bois. Mais ou voit-on plus le diable viuant, que là ou sont les glaiues de ceste Helene, à sauoir le bois de la croix ? Le Pape qui porte la croix de trois croisons, & de qui la coronne en est toute pleine, & qui est semé de croix iusqu'à sa pantoufle, peut-il estre vn diable plus viuant qu'il est ? Et la Messe n'a elle point plus de croix que tout le demeurant de la papisterie ? Et ou est le diable plus viuant, regnant & triomphant que là ? le me deporté des charmeurs & enchanteurs, & des croix qu'ils font. Au reste quant à l'allegorie des puits lesquels Isaac purge & caue, elle viendroit trop mieus à propos, si on le prenoit pour ceus qui repurgent le seruice & la doctrine de Dieu de la terre & ordure, laquelle y a esté iettée par les ennemis de

nostre salut, comme sont le Pape vray Antechrist, & tous meschans heretiques, lesquels sont que rien ne puisse seruir ne profiter, & qu'au lieu de l'eau vive, pure & nette, on n'ait que de la poudre seiche, ou du boubier. Les saints Prophetes & les bons Rois & luges ont fait vn tel purgement du seruice de Dieu & de sa doctrine. Mais de fouyr la terre pour auoir du bois mort, c'est vne chose mal prinse & qui n'a aucune raison, oomme aussi il n'y a point de raison de dire que la vie apparaisse, & que le salut reuiue quand les ruines sont ostées, & les pierres & la terre qui y sont, & quand la terre est ouuerte.

En quel lieu, & par quel moyen il faut chercher le salut des hommes, & de la comparaison qui est faite d'Helene avec la Vierge Marie, & combien elle est à condamner. CHAP. XXXII.

Luc 24. a.

PVIS donc qu'ainsi est, il ne faut pas qu'Helene nous apprenne à chercher la vie des Chrestiens és ruines de la terre. Qu'on ouure la terre iusques au plus profond des abysses, le salut n'en fera rien plus reluyfant. Mais comme disoyent les Anges aus femmes, que cherchez vous le viuant avec les morts? Ainsi on peut dire à Helene, que cherche tu la vie és choses mortes, & le salut celestiel en l'ouuerture de la terre? Iesus est la vie, il le faut chercher par foy là ou il est. Le salut reluit par la lumiere de l'Euangile. Que le salut soit donc ouuert par la pure predication de l'Euangile,

& qu'il soit entendu & creu par l'inspiration & don du S. Esprit, lors il reluyra. Quelle comparaison y a-il entre la vierge Marie & Helene? La vierge Marie a conceu & enfanté Iesus Christ, de laquelle conception elle auoit au 'parauant esté auertie par l'Ange, & aussi Ioseph en fut admonesté par vn Ange : d'auantage les Prophetes l'ont predit. Mais touchant Helene quelle chose y a-il de semblable? Car ou est l'Ange qui a parlé à elle? ou est l'Euangeliste qui en rend tesmoignage? Qui est celuy qui estant pareil à Ioseph en ait esté admonesté? Ou sont les Prophetes qui ayent predit cela? Certainement c'est trop se permettre & se iouer, non seulement du fait d'Isaac, mais aussi de Iesus Christ & de sa mere. Que chacun à qui Dieu donne iugement & cognoissance pense à cecy : & que ma petiteffe ne soit point cause, que par la grandeur de celuy qui a ainsi escrit, la gloire de Dieu soit amoindrie. Car ie say en verité que les propos de ce grand personnage sont en cest endroit hors de verité, & que ce que ie touche est trop plus selon Dieu. Car de comparer si grandes choses de Iesus Christ, & de sa digne mere, aus sorties d'Helene & de son bois, c'est trop faillir. l'oseroy trop plus hardiment affermer qu'Helene qui a ouuert l'huis à toute idolatrie avec son inuention de la croix, est maudite entre toutes les femmes, que de dire qu'elle approche d'estre benite entre les femmes, & par dessus toutes les femmes. Et qu'au contraire que le Seigneur estoit avec la sainte vierge Marie, laquelle a trouué grace

*Luc 1. c.**Matt. 1. d.**Isa. 7. c.*

cnuers Dieu & que le mauuais esprit estoit avec Helene, & qu'elle a droitement acquesté l'ire de Dieu. Et d'autant que la vierge est bien-heureuse d'auoir creu à la parole de Dieu, en soumettant son sens, raison & iugement à icelle : Helene est malheureuse, si elle est morte ainsi, ne s'arrestant à ce qui est dit en l'Euangile des vrais adorateurs, mais fuyuant son iugement & sa fantasie.

De la comparaison des œuures lesquelles Dieu a faites par le moyen de la vierge Marie, avec celles qui sont escrites d'Helene, & de la vertu que le bois de la croix peut auoir pour le salut des hommes.
CHAP. XXXIII.

MAIS qui est le cœur Chrestien qui puisse porter que ceste Helene avec des pionniers qui tirent du bois de la terre, face vne chose plus grande que la vierge Marie, laquelle a monsté Iesus Christ engendré, & qu'Helene l'a monsté ressusçité? le vous prie tous de regarder bien que porte la resurrection de Iesus Christ, laquelle est vn des principaus articles de la foy, sans laquelle tout le demourant seroit vain & sans effect, mais depuis que la resurrection est establee, tout ce qui a esté au parauant est compris, à sauoir la conception, la natiuité, la mort & la passion, voire la remission de nos pechez, & la vie eternelle, laquelle est asseurée non seulement à Iesus Christ, quant à son humanité, lequel est nostre chef : mais aussi à nous qui sommes ses membres. Si la resur-

rection n'est tenue & manifestée, vous n'avez rien, & tout le reste n'est rien, tant qu'il touche au salut s'il n'est rapporté à ceste resurrection. Puis donc qu'ainsi est, qui est celuy qui ne seroit estonné de ces propos qui sont attribuez à Helene? La vierge Marie a plus senty & demonstté en son endroit de la resurrection de son vray Fils, qu'un million d'Helenes n'ont fait. Parquoy ie suis esbahy comment les personnages qui ont escrit telles choses d'Helene, n'ont eu vne bonne & bien seuerere censure d'aucuns des Anciens, comme ils l'auoyent bien merit . Car quelle comparaison y a-il de la vierge Marie avec Helene? le suis bien certain que ceste sainte Vierge a receu le saint Esprit autrement qu'Helene ne l'a receu en tout ce qui est pour elle, & qui la magnifie en ceste inuention de la croix, laquelle en verit  est vne inuention diabolique qui est pourement & fausement propos e en remede des pechez. Car il n'y a n'Helene ne tout ce qu'elle sauroit faire ne penser, qui soit & qui puisse estre en remede des pechez. Il n'y a que le precieus sang de Iesus Christ qui a est e espendu pour nos pechez : iceluy est le vray remede qui nous nettoye de tous nos pechez, & qui nous est propos e par le saint Euangile. Parquoy quand nous croyons en luy, nous auons la vie eternelle. Mais ce n'est pas encore assez de ce qui a desia est e dit, mais il a fallu proceder plus outre. Il a fallu qu'Helene ait encore est e compar e   la sainte vierge mere de Iesus Christ, & que la vierge ait ce qu'elle a est e visit e pour

deliurer Eue, laquelle chose vaut autant comme qui diroit que la vierge estant visitée, n'a seruy que pour la deliurance d'une pource femmelette, à savoir Eue. Je pense qu'on entend que c'est d'autant que Iesus Christ est venu de la vierge, & qu'en souffrant il a deliuré Eue : car autrement la vierge ne voudroit point qu'on luy donnast la louange qui appartient à son seul Fils. Et ie desire qu'en parlant de la sainte vierge, & de ce que Dieu l'a visitée, on en parle tellement que ce qui appartient à Iesus Christ seul, ne soit point transporté à la vierge ny à sa visitation, comme est la deliurance d'Eue : à laquelle est comparée la rançon des Empereurs, en ce qu'Ambroise dit, Helene a esté visitée, à fin que les Empereurs fussent rachetez. Je ne puis comprendre qu'on n'entende par cecy que plus grande chose a esté faite par Helene & par sa visitation, que par la vierge & sa visitation, veu que les Empereurs sont opposez à Eue, & que leur rançon est opposée à la deliurance d'Eue. Je voudroye bien que tous les Papistes me donnassent à entendre, voire par la sainte Escriture, quelle chose a esté faite en Helene, ou venue d'icelle, parquoy les Empereurs soyent rachetez, ou s'il y a une autre deliurance d'Eue que le rachat des Empereurs. Il est tout clair & tout certain qu'il n'y a rien parquoy Eue soit deliurée, que tous ses enfans qui sont participans de cela mesme, & qui le reçoivent par foy, comme elle l'a fait, n'en soyent aussi deliurez, soyent ils porchers, ou Empereurs, ou de quelque autre sorte qu'ils soyent.

Et pourtant

Et pourtant ie ne say pas quelle raison il y a en ceste conference de la mere du Fils de Dieu avec Helene, & de la visitation qu'elle a eüe quand elle a esté choisie pour seruir à de si grandes choses, lesquelles ont esté prophetisées parauant, & faites par le S. Esprit avec la visitation qu'on attribue à Helene. Car au lieu que la vierge Marie a conçu & enfanté le Fils de Dieu, Helene a esté mere d'un prince pecheur, lequel n'a pas tant baillé d'honneur ne d'obeissance à Iesus Christ, & à son Euangile, comme il a desia esté touché, qu'il ait receu le saint Baptisme iusques à son dernier iour : dont il s'enfuit bien, qu'il n'a iamais receu la sainte Cene de Iesus Christ, laquelle neantmoins ne pourroit assez souuent estre receüe, si les cœurs de tous estoient touchez comme il conuiendroit, & comme il seroit bien requis. Mais ceste pource Helene qui a conçu & enfanté son fils Constantin en peché & iniquité, quelle visitation a elle eu, dont les Empereurs soyent rachetez ? Est-ce le bois qu'elle a trouué ? Il faut pour vray autre chose pour racheter les hommes que ce bois de la croix, & que tous les bois qui iamais furent, & qui sont & seront, soyent ils viuans, & croyssans, & verds, & fructifians ou morts & secs, lesquels ne peuuent rien porter ne fructifier non plus que ce bois de la croix qu'Helene a trouué. Car cecy, à sauoir de racheter les hommes appartient au seul sauueur Iesus Christ, vray Dieu & vray homme.

De l'idolatrie qui est commise en l'adoration de la croix, & combien elle est contraire à la parole de Dieu. CHAP. XXXIIII.

PAR TANT qu'Helene avec son bois s'en voise cacher comme vne sorte, veu qu'elle n'a ne commandement ne prophetie de rien qu'elle ait fait & trouué aupres de son bois. Mais que la saincte Vierge, & tous les vrais Chrestiens viennent en auant qui croient & reçoient ce bon sauueur Iesus Christ pour leur redempteur & deliurance par la foy qu'ils ont en l'Euangile d'iceluy, & qu'ils louent & remercient ce bon Pere qui nous donne vn tel & vn si grand & si excellent sauueur & redempteur, auquel nous nous arrestons & nous fions, & n'auons que faire du bois de la croix non plus que de Iudas, ne de Pilate ny d'autres qui se soyent employez à tormenter ce bon sauueur, ne ceus-la mesme qui l'ont fait d'vn grand & ardent vouloir, mais qui toutesfois a esté meschant & plein de pechez, lequel vouloir ne nous donne point d'occasion que nous les estimions d'auantage, mais au contraire nous les detestons plus que le bois de la croix, lequel n'a seu ne voulu ce qui a esté fait en luy, & par luy: car il n'a seruy sinon comme vne chose morte. Doncques quand ce tant grand personnage louë tant Helene, de ce qu'elle a esleué la croix en la teste des roys, à fin que la croix fust adorée en eus, comme aussi il la louë de ce qui a esté dit auparauant, certes toute sa louange est

tournée à deshonneur. Parquoy à bon droit elle
 est plus à mespriser qu'à louer, comme ayant fait
 follement, & estant cause d'une fort grande &
 maudite idolatrie. Car la pource presompueuse &
 ignorante l'a fait contre le saint commandement
 de Dieu, en attribuant tant grande vertu & don-
 nant tant de louange au bois de la croix, se dres-
 sant en cela contre la doctrine du S. Esprit. En
 quoy aussi elle fait contrevenir à iceluy tous ceus
 qui courent apres la croix, & qui l'adorent: vcu
 que le S. Esprit enseigne les Chrestiens qui sont
 morts à peché, & qui sont entez en Iesus Christ,
 & ressuscitez à vne vie nouvelle, qu'estans ainsi
 ressuscitez, ils cherchent les choses qui sont d'en
 haut, ou Iesus Christ est assis à la dextre de Dieu,
 & qu'ils pensent aus choses qui sont du ciel, non
 point à celles qui sont sur la terre, ausquelles ceste
 pource Helene a tiré, laquelle est cause de tant de
 maus: car elle a tiré les hommes à la terre, & les
 a induits à chercher ce qui estoit en terre, voire
 dedans la terre: en laquelle chose elle a donné
 occasion aus autres, de faire comme elle a fait,
 tirans aus choses terriennes, comme elle. Mais la
 chose est trop enorme de dire que la croix soit
 adorée. le demande à ceus-la qui sont ainsi affe-
 ctionnez, qui pensent servir Dieu & l'honorer en
 ce qu'ils iugent, ou que les autres iugent estre en
 l'honneur d'iceluy, & qui ne regardent point la
 sainte Escriture, ne le commandement de Dieu,
 à sauoir lequel est le plus digne d'estre honoré
 par adoration, ou vn excellent Ange, ou vn tronc

Rom. 6. a.

1 Cor. 6. c.

Col. 3. a.

Mat. 17. f.

de bois mort & sec, c'est à dire, celuy qui est Esprit, & qui par nature & par creation est le plus semblable à Dieu, ou ce qui en est le plus loin. Qui peut estre plus loin de Dieu qu'une chose sans vie, & sans mouvement ne sentiment comme la parole de Dieu le reproche aus idolatres, lesquels ont accomparé Dieu à vne chose tant eslongnée de la nature d'iceluy, comme le bois, les pierres, l'or & l'argent, & autres choses semblables qui n'ont ne vie ne sentiment? Le commandement de Dieu, Tu adoreras le Seigneur ton Dieu, par lequel il est conclu qu'autre que Dieu ne doit estre adoré: n'est-il point amené contre l'adoration de l'Ange, lequel n'a point voulu estre adoré par S. lean, comme il le tesmoigne en son Apocalypse? Car ce commandement lequel afferme que Dieu doit estre adoré, & qui le commande aussi nie & defend quant & quant qu'autreque Dieu soit adoré. Et ne faut pas icy estimer que ceste responce ait esté faite d'un mauuais Ange, veu qu'il defend à S. lean ce saint personnage qui le vouloit adorer, de ne le point adorer, voire comme Ange & non comme Dieu. Et ne faut point douter que Dieu n'ait ainsi fait parler cest Ange, à fin que la distinction diabolique de l'adoration de Dieu, laquelle les Papistes appellent Latrerie, & de celle des creatures, laquelle ils appellent Dulie, ne soit point amenée ne mise en auant. Et pourtant l'Ange qui parle au nom de Dieu dit, Garde toy de le faire, mais adore Dieu, laquelle chose l'Ange ne pouvoit defendre si Dieu ne l'auoit premierement de-

Apoc. 19. b.

fendue. Mais le mauuais Ange qui est le diable eust bien voulu cela, car c'est ce qu'il desire sur toutes choses, c'est à sauoir qu'il soit adoré au lieu de Dieu. Parquoy il faut que ce commandement d'adorer Dieu ait vne defense enclose en soy mesme, c'est à sauoir de n'adorer autre que Dieu. Et cependant, que tous les hommes estriuent tant qu'ils pourront & sauront pour maintenir Helene, & l'adoration de la croix, ils ne peuuent pourtant eschapper qu'il ne faille confesser que telle adoration est peché contre Dieu. Que tous les viuans s'efforcent tant qu'ils pourront, & se mettent tous ensemble, ils ne peuuent amener aucun commandement de Dieu ny aucun lieu de la sainte Escriture, pour monstrier qu'il faille adorer la croix, ne les Anges mesmes. Parquoy telle adoration n'ayant parole ne commandement de Dieu ne peut estre faite en foy, d'où s'ensuit necessairement qu'elle est peché. Je ne m'arreste pas icy à ce que les Roys ayent du bois de la croix és croix qu'ils ont en leurs coronnes, ou qu'ils n'en ayent pas: car tout cela n'y sert de rien, veu que ce n'est que chose morte & qui ne peut & ne doit estre adorée sans transgresser le commandement de Dieu, & commettre vne tresgrande iniquité, voire horrible, à sauoir idolatrie detestable.

Comment le grand sauoir & la grande sainteté qui peut estre és plus excellens d'entre les hommes, ne peuuent empescher que leurs fautes ne doyuent estre tenues & condannées pour fautes, comme aussi leurs fautes

*ne doyuent empeschier que leurs vertus ne soyent louées
comme elles en sont dignes. CHAP. XXXV.*

QV'EN cecy donc personne ne die : comment vn si excellent tant sainct & tant sauant personnage a il failly si lourdement ? mais que plustost tous donnent gloire & honneur à Dieu, à sa parole, & à ses saincts commandemens, & disons tous : Seigneur tu es seul qui ne faus point. Il n'y a rien en ta parole que verité & droiture : tes commandemens sont bons, purs, & parfaits : rien ne peut estre bon sinon ce qui est fait selon ta sainte parole, & tes saincts commandemens. Et que l'on condamne par la parole de Dieu ce enquoy les plus grans, les plus sages, & les plus saincts ont failly sans auoir esgard à rien qui soit ne qui ait esté en eus. Car maintenant que nous auons vne telle lumiere du saint Euangile, comment ne ferions-nous cela ? Car si nous deuons à iuste raison condamner les plus excellens qui ont esté sous la charge de Moyse, à sauoir sous la loy & les ombres obscures d'icelle en ce en quoy ils ont failly, nous ne pouuons pas à iuste & bonne raison maintenir & supporter ceus-la qui sont beaucoup moindres qu'eus, en ce en quoy ils auront failly, & principalement en la matiere de la religion. Car ils sont moins excusables & plus intolerables, entant que Dieu leur a manifesté par l'Euangile, vne lumiere plus grande sans comparaison, que celle qui a esté reuelée parmy les ombres obscures de la loy. Aduisons, qui est celuy qui veut excuser le

peché de Daud. Qui est celuy qui ne condamne l'idolatrie de Salomon? La sagesse d'iceluy ne nous doit point empescher que nous ne detestions son péché: comme la grande saincteté & bonté de Daud n'en peut empescher qu'on ne die qu'il a péché. Et les excellentes vertus qui ont esté en saint Pierre, ont elles empesché qu'il n'ait esté condamné en ce qu'il a commis contre Iesus Christ? Parquoy il faut que quand mesmes nous serions (s'il le pouuoit faire) comme vrais Anges de Dieu, neantmoins nous ne nous laschions iamais la bride en ce que nous voulons faire & dire, ne mesme penser: que nous regardions diligemment si nostre pensée, ou dire, ou faire est selon le commandement & la parole de Dieu: car autrement nous tomberons tres-laschement. Et ne nous promettons point, & ne nous faisons point à croire que nous soyons tant habiles, que nous ferons le bien & nous garderons du mal, sans tenir ceste reigle de la parole de Dieu, & sans guider & reigler tout par icelle. D'auantage il ne faut pas aussi que pour les fautes faites en aucun endroit, & pour auoir mal parlé en vne part, on reiette tout le demourant, comme estant mal dit, mais que par vn saint iugement prins de la parole de Dieu, on prenne ce qui est bon, & qu'on reiette ce qui est mauuais: & que nous deuons bien louer Dieu qui de sa grace nous a donné la reigle, la parole & l'Escripture, ou il n'y a rien à reietter, & ne reste fors que l'entendre, croire & ensuyure. Et combien qu'en tout le demourant, il faille diligem-

ment regarder, voire par ceste reigle, si tout est bien dit, & separer le mal & le reietter, & eslire le bien & le choisir. Toutesfois en la parole de Dieu & en la sainte Escriture il n'y a rien que tout ne soit vray, pur & saint, & tout doit estre tenu, creu & gardé ainsi qu'il est là contenu.

Quelle reprehension ceus-la meritent qui adioustent plus de foy à ce qu'ils trouuent es liures qui sont hors de la sainte Escriture qu'en ce qui est escrit en icelles, & ceus aussi qui leur veulent donner plus d'authorité par le moyen de tels liures. CHAP. XXXVI.

OR pour reuenir à ce qui est escrit d'Helene touchant l'inuention de la croix: premiere-ment quant au lieu auquel on dit qu'elle l'a trouuée: aucuns escriuent que c'estoit Golgotha, les autres le sepulchre. La chose est toute claire que c'estoyent deus diuers lieux. Et apres auoir trouué trois croix pour sauoir laquelle estoit de Iesus: celui qui est de plus grande reputation escrit qu'Helene se retourne à l'Euangile, comme il a desia esté touché au parauant, & puis qu'il est escrit que Pilate auoit mis le titre sur la croix de Iesus Christ, regardant & trouuant la croix qui auoit le titre, elle cognoit celle qui est de Iesus. Et d'autres disent que combien qu'elle ait trouué la croix avec le titre, qu'encore elle n'est point assez certaine, mais que l'Euesque de Ierusalem appelé Maquaire fit venir vne femme fort malade, & luy fit toucher vne croix, puis l'autre, puis la croix de Iesus, & que

& que incontinent qu'elle l'eut touchée, elle fut guerie. Il y en a des autres qui disent que ceste experience a esté faite par vn corps mort, & que le mort est resuscité. Je ne leur demanderay point d'ou vient qu'ils trouuent seulement trois croix & non plus ne moins. Car puis que le lieu ou nostre Seigneur a esté crucifié, est le lieu ou on execute les criminels iugéz à mort, il faut bien entendre qu'ils en ont crucifié des autres: & principalement sous vn tel executeur comme a esté Pilate, & en vn tel peuple tant rebelle, & tant seditieux. Je laisse à penser si par l'espace de trois cens ans le titre & l'escriture de Pilate, qu'il a fait attacher à la croix, a esté conserué qu'on l'ait peu lire, & que les croix & clous se soyent tant bien gardez, comme ces escriuains en ont escrit. Or il est aduenü en ceste matiere aus Anciens; ce qui est aduenü à Iosephe & à plusieurs autres, qui ont esté menez de semblable esprit. Car pour dire vray, ie voy en Iosephe vne tres-grande lascheté, & vne meschante affection de vouloir suyure les Historiens prophanes, & qu'il tasche de parler & d'escire comme iceus, ayant honte de parler & escire la verité comme Moyse, & comme la sainte Escriture contient: & est tellement transporté, qu'il touche plus songneusement les mensonges & fables, que la droite verité. Et Sabellique a encores pis fait de nostre temps n'escruiant comme rien à droit de ce qui est contenu en la sainte Escriture. Et comme ceus-cy ont fait ainsi, on voit que les Anciens ont grandement failly en semblable affaire, car les vns

ont contrefait les lettres de Pilate qui estoient autant latines comme le langage Limosin est naïf françois. Il y en a eu des autres qui ont ainsi contrefait les lettres d'aucuns autres. Et Dieu sait comment ces contrefaiseurs de lettres les ont couchées par escrit. Il y en a eu plusieurs, ausquels il a semblé qu'ils ont trouué vn grand thresor, s'ils ont trouué en escrit quelque chose de Iesus Christ, ou des siens hors de la sainte Escriture & prennent & mettent cela pour grande approbation de la foy. Et ceus-cy pensans faire grandes choses, ont fait comme plusieurs refueurs & fantastiques, qui au iourd'huy se mocquans de Dieu & de sa parole, ont voulu mettre en auant vn Proton Euangelion & vn Abdias, & autres semblables songes & refueries, lesquels pour vray ne sont que mocqueurs de Dieu, & de sa parole. le me deportte des Anciens & de ceus de maintenant qui attribuent tant aus Sybilles qu'ils se monstrent tant enragez, & hors de sens & de sain iugement, qu'ils les osent comparer à la grande excellence des saintes Escritures. Et qui bien regardera & considerera ce qu'ils en disent quant à l'euidence, il appert assez qu'ils preferent aus lettres diuines tels escrits qui sont autant loin des saints Escrits reuelez par l'Esprit de Dieu, comme la chair est loin de l'Esprit, ce neantmoins ces docteurs tant enterrez en terre, & tant charnels donnent assez à entendre par leurs propos qu'ils les preferent à la sainte Escriture. Et en verité tels personnages me semblent faire tout ainsi comme s'ils accoustroyent & ornoyent

l'or ou les pierres precieuses de fange & d'ordure. Car si la verité de Dieu nous est monstrée en sa pureté, comme elle est contenue és saintes Escritures, elle est semblable à vne pierre precieuse enchassée en or precieus.

De la doctrine à laquelle les Anciens se deuoyent principalement arrester pour l'enseigner aus hommes.
CHAP. XXXVII.

ET pourtant il eust esté fort bon que les Anciens eussent trauaillé à enseigner les hommes par la seule pureté de la sainte Escriture : comme Iesus Christ & ses Apostres l'ont fait auant que les liures du nouueau Testament fussent escrits. C'estoit cela qu'ils deuoyent faire, & principalement là ou si grande lumiere nous est donnée, & tant euidente, tant pleine, & tant suffisante, sans aller rien chercher en autre part, voire sans controuuer & mettre tant de choses en auant sans iugement & sans profit. S'ils eussent fait cela, nous n'aurions pas tant de troubles & de tenebres que nous auons. Mais la vanité de l'homme ne se peut contenir en la verité de Dieu. Et pource ie dy, que ces grans personages eussent beaucoup mieus fait, qu'ils n'ont fait, s'ils eussent autant pris de peine à monstres la pureté de l'homme, en quel estat il vient en ce monde, & comment il y continue & prend fin, & là ou il va, comme la parole de Dieu le porte, & pareillement le bien & le salut qu'on a en Iesus, & comment ce bien est receu

& gardé, qui sont les promesses qui en ont esté faites, quand elles ont esté accomplies, & comment elles s'accomplissent, & comment il se faut conduire pour faire son profit d'un tel bien, & d'une telle benediction, sans y mettre rien autre, que cela que Dieu demande. Voyla ou ils se deuoient principalement occuper, & à viuement declarer ces choses par la pure parole de Dieu & par les saintes Escritures, sans tant meller de songes des hommes, avec la pure doctrine de Dieu : car c'est ainsi qu'on deuoit proceder en l'Eglise de nostre Seigneur. Mais quand au lieu des choses bonnes & necessaires d'estre cognues, on s'est ietté apres les Helenes, & les bois, & qu'on a amené des choses hors de la sainte Escriture, proposant ce qui ne se peut prouuer par icelle, lors on a fait des choses grandement dommageables, & tant & plus nuisantes à l'Eglise du Seigneur. Et ainsi on a esté cause d'une tres-grande ruyne & destruction, qui est suruenue au pource monde. Et comme celuy qui ne le voit est bien aueuglé, ainsi celuy est fort lasche & meschant qui veut entretenir les autres en la confusion en laquelle nous sommes venus, & qui ne veut pource receuoir la benediction, & la grace que nostre Seigneur nous presente, & nous donne par son saint Euan-gile.

Comment la sainte Escriture parle du benefice de Iesus Christ, sans en rien attribuer au bois de la croix, ny à autre qu'à luy seul. CHAP. XXXVIII.

AV SVRPLVS le personnage duquel ie parle maintenant dit aussi que la mesme matiere qui a esté cause de mort, est remede de salut. Il dit cela le rapportant au bois de la croix, & au bois de l'arbre de science de bien & de mal, au fruit duquel l'homme a esté desobeissant. En quoy ce bon personnage se donne trop de licence, ce qui ne se doit aucunement permettre, principalement en choses si grandes. Il est vray que l'homme a peché par sa desobeissance, en mangeant du fruit de l'arbre qui luy auoit esté defendu. Mais Iesus Christ ne prend rien de l'arbre pour nous sauuer. Il seroit donc trop mieus seant de parler selon la sainte Escriture & de dire : Comme par la desobeissance d'Adam nous sommes pecheurs & perdus, ainsi aussi par l'obeissance de Iesus Christ, nous sommes iustes & sauuez. Ou comme par l'homme nous sommes en condamnation & mort, ainsi par l'homme nous auons salut & vie. Car cecy, & ce qui est escrit du premier & du vieil homme, & du second & du nouveau, est vne mesme matiere : car Iesus Christ est vrayement de chair, d'os & de sang, & d'ame raisonnable, comme Adam quant à sa nature humaine. Et pourtant il est escrit qu'il est en tout fait semblable *Heb. 2. d. 4. d.* à nous excepté peché. Cecy estant touché & pro-

Gen. 3. b.

*Rom. 5. d.
1 Cor. 15. c.*

posé selon l'Eſcriture, eſt trop meilleur que de regarder au bois & d'attribuer au bois, qui de ſa nature ne fait ne froid ne chaud, cela qui vient de l'homme, & qui eſt fait de l'homme, & non pas du bois ny au bois. Autant en faut-il dire à celui qui eſt encore plus ancien, lequel met la dette par le bois, & la quittance par le bois. Car il ne faut pas ainſi charger le bois, ne luy tant attribuer, ny en mal ny en bien. La ſaincte Eſcriture parle bien autrement, à ſauoir que la deſobeiſſance & le peché nous fait redeuables de la mort eternelle, mais l'obeiſſance de Ieſus Chriſt nous apporte pleine quittance, grace & remiſſion. Il nous faut donc prendre la remiſſion des pechez au ſang & par le ſang de Ieſus Chriſt, & non pas és bois.

Quelle couleur on peut donner aus paroles des Anciens touchant la croix, & combien il eſt requis de parler clairement, & de ſuyure le langage du S. Eſprit, en traittant les matieres de la religion. CHAP. XXXIX.

IE ſay bien que pluſieurs diront que le bois n'eſt pas icy prins, ſinon pour la mort & paſſion de Ieſus Chriſt : & que ces Anciens docteurs l'ont ainſi entendu. Si tous le prenoyent ainſi, & qu'il n'y euſt rien qui ſeruſt à ſuperſtition & à idolatrie, & qu'on ne ſe deſtournast pas tant de la pureté de la ſaincte Eſcriture, & que moymeſme n'y euſſe pas eſté au parauant tant ſeduit, ie n'en parleroye pas comme i'en parle. Mais on voit tout eui-

demment que la plus grand'part en abuse, & qu'en la plus grand'part du parler duquel les Anciens ont vſé, on ne peut prendre leurs paroles autrement sans leur faire violence. D'autre-part on voit aussi que ceux qui sont abusez en superstition & idolatrie, ne veulent recevoir telle declaration. Parquoy i'aime mieus monſtrer que le naif sens des paroles des Anciens n'est pas selon l'Eſcriture, que trauailler beaucoup à les colorer, pour les excuſer, & pour faire à croire qu'ils n'ont pas dit, ce qu'ils ont dit. Et pour vray ceus qui eſcriuent ne ſe doyent pas permettre d'vſer de tant de figures, & de ces façons de parler tant obſcures & tant difficiles à entendre, & ſingulierement en ce temps cy de la manifeſtation de Ieſus Chriſt, auquel nous auons vne telle lumiere de l'Euangile, & auquel les figures precedentes qui eſtoient ſous le vieil Teſtament eſuanouiſſent, & s'en vont quand la choſe qui auoit eſté figurée par icelleſt venue & accomplie. Parquoy nous deuons aussi faire le ſemblable en noſtre parler. Et pourtant tout ainſi que l'Euangile parle de la pure adoration, & du vray ſacrifice de Ieſus Chriſt, par paroles tant pleines, & tant claires, & le plus ſans figure : nous aussi deuons bien enſuyure telle maniere de parler, declarant naiſuement, & en vraye propriété de langage, ce que nous diſons de Ieſus Chriſt, & du ſalut, lequel il nous a apporté. Surquoy ie puis bien dire, que ſi les Anciens n'eufſent tant prins de plaifir aus paroles deſquelles l'vſage a eſté ſous la loy au vieil Teſtament, ains

qu'ils eussent plustost parlé selon le langage de Iesus Christ & des Apostres & Euangelistes, ils n'eussent pas donné occasion & matiere de tant d'erreurs à ceus lesquels sont venus apres eus. Je prendray pour exemples ces mots icy, desquels ils vsent tant souuent, à sauoir autels, sacrifices, immolations, & tant d'autres manieres de parler, lesquelles sont tant frequentes en tous leurs liures, pource qu'ils ont mieus aymé ainsi parler par figures, que simplement, comme il eust esté beaucoup meilleur & de plus grande edification. S'ils eussent vsé d'une telle simplicité de langage, ils n'eussent pas baillé tant de matiere à ce meschant Antechrist de se dresser contre Dieu en sa messe tant diabolique, & és autres abominations, desquelles il a tout remply & gasté.

De la faute qui est és manieres de parler des Anciens, touchant la croix, là mesme ou ils parlent le plus clairement s'exposans eusmesmes. CHAP. XL.

OR depuis qu'on a commencé à parler ainsi du bois, les autres qui ont puis apres suyuy, sans regarder l'Escripture, ne ce qui s'ensuit de leur maniere de dire, ont pareillement suyuy ce stile, & sont venus à dire : que la preuarication est par le bois, & le salut aussi par le bois. Et ainsi faïsans ils ont mis la croix au lieu de Dieu, & tout ce qui appartient à Dieu, est attribué à la croix. Il est vray qu'il y a aucunes manieres de parler, lesquelles monstrent assez que tels propos ne regardent pas

dent pas à la croix, & au bois, mais à Iesus Christ, & à sa mort. Je prendray pour exemple ce qu'un de ceus, lesquels j'ay allegué par cy-deuant, demande, si la croix est chose excellente & noble : & puis il respond, mais c'est vne mort vileine & execrable. Mais quand il adioust, comment le seul nom de la croix, estant ouy, fait fuir les diables, & que les diables la redoutent, combien qu'il expose puis apres son dire, toutesfois on ne le peut encore excuser en ce qu'il dit de la croix, parlant en ceste maniere : d'ou vient cela, dit il, sinon de la vertu du crucifié ? Il est vray qu'il parle icy plus clairement. Car il discerne le crucifié d'auec la croix. Mais il y a encore vne grande faute en ceste distinction, en cela qu'il ne donne & ne met pas le tout au Seigneur, qui a esté crucifié, mais en fait participant le bois & la croix. En quoy il desroge autant à la maiesté de Dieu : & par ainsi au lieu de vrayes louanges, esquelles Dieu doit estre honoré, les choses qu'il dit sont vrayement blasphemés, par lesquels Dieu & son saint nom est grandement deshonoré. Car ie vous prie au nom du Seigneur qu'un chacun considere quel propos il y a de dire, que la croix est l'esperance des Chrestiens, si cela n'est entendu de Iesus Christ qui a esté crucifié, comme l'Apostre le prend. Mais quand ce personnage duquel ie parle maintenant, met la croix és coronnes & és diademes, & és accoustremens d'escarlate & semblables, qui peut entendre que la croix se prenne pour Iesus Christ ? Car Iesus Christ n'est pas és

Jean 14. b.

accoustremens n'en chose mondaine. Et pour estre en nous, & avec ceus qui sont assemblez en son nom, il faut que nous ne soyons plus du monde, mais que nous soyons nouvelles creatures. Et de dire que Iesus Christ soit és coronnes, ou és vestemens, ou en autre chose qui soit du monde, c'est le dementir, & nier l'article de la foy Chrestienne, en ce qu'il a dit, qu'il laissoit le monde, & s'en alloit au Pere, & pareillement ce qui est contenu en l'article de la Foy, auquel il est dit que Iesus Christ est monté au ciel, & se sied à la dextre de Dieu son Pere.

Du deshonneur qu'on fait à Dieu en donnant aux creatures l'honneur qui appartient à luy seul. CHAP. XLI.

CES façons & manieres de parler, ont donné grande hardiesse à l'Antechrist, en dressant ses nouveaux services diuins aus trespassez, sous le nom des saints & des saintes, d'vser aussi de beaucoup de manieres de langages, pleines de grans blasphemés, comme quand il appelle la vierge Marie, nostre esperance, nostre salut, nostre vie. Les Theologiens refuseurs, pour soutenir leur fausse doctrine, disent que la croix, comme signe, doit auoir l'honneur & l'adoration de la chose, laquelle il signifie. Dont il s'ensuit, suyuant leur doctrine, que puis que la croix est signe de Iesus Christ, elle a vne eminente adoration. Or quoy qu'ils disent, la verité est toute claire, qu'il y a

trop plus de dignité en la vierge Marie, voire au moindre des esleus & des enfans de Dieu, qu'en tout ce qu'on sauroit monstrier de la croix, & de toute autre chose morte. Car la vierge est vray temple de Dieu, vraye fille & heritiere de Dieu, acquestée par le sang de Iesus Christ, dequoy la croix n'a non plus, que la plus pource pierre ou bois qui soit, & la moindre chose qui puisse estre au monde. Parquoy, c'est trop blasphemer Dieu, & trop contreuenir à sa souueraine maiesté, de bailler des titres tant excellens à vne chose morte, sans auoir ouuerte parole de Dieu. Or c'est vne chose toute certaine, qu'en les attribuant à la vierge Marie, Dieu y est grandement offensé, & qu'on fait vne iniure fort grande à la sainte vierge, d'ainsi abuser de son nom, pour desroguer à la maiesté de Dieu, qui a dit par sa bouche, qu'il ne donnera point son honneur à autre quel qu'il soit, car il en est ialous, & ne veut point qu'il soit communiqué à autre, mais qu'il demeure à luy seul. Puis donc qu'ainsi est, vn chacun peut facilement iuger, combien Dieu peut estre offensé & blasphémé, en baillant aus bois, aus croix, aus suaires, & à autres telles choses, l'honneur qui à luy seul appartient, comme contre la parole de Dieu, on en parle & chante és Eglises de l'Antechrist. Nous pouons dire le semblable de l'honneur qu'ils donnent aussi à ceus lesquels ils appellent saints & saintes, comme à Claude, & autres semblables.

Isaie 42. b.

De la vengeance de Dieu contre l'Antechrist & les ministres d'iceluy, & contre tous les idolatres qui transportent aus creatures, l'honneur qui est deu au seul Dieu, & du fondement & de la couleur que l'idolatrie prend de l'ancienneté. CHAP. XLII.

OR il ne faut point douter que la vengeance ne soit sur la teste des moynes, des prestres, des papes, & des euesques, & de tous autres qui en leurs offices diuins, qui sont vrais enchantemens plustost que prieres enuers Dieu, vsent de telles paroles, appelans les vns lumiere, les autres esperance, voire salut de ceus qui esperent en iceus, & aussi resurrection des morts, ce qui ne peut appartenir à autre qu'à Iesus Christ seul. Et non seulement tous ces malheureus officiers de l'Antechrist, ont desia leur iugement, suyuant lequel ils sentiront vne main de Dieu importable, mais aussi tous ceus qui sont menez & conduits par eus. Car ceste idolatrie crie vengeance deuant Dieu, comme vn peché tresexecrable: & ne sert icy rien d'amener les Anciens, & les grans, & les sages, & d'alleguer que Dieu mesme a besongné par eus, & fait en iceus de grandes choses. Tout cela ne sert de rien pour les iniques & les abusez, & ne peut empeschier la vengeance de Dieu. Salomon a esté bien sage, & a dressé vne maison à Dieu, tant excellente, qu'il n'en fut onc vne semblable. En laquelle chose, plus a esté ottroyé à Salomon qu'à Dauid. Et quant au seruice de Dieu,

il a plus fleury au temps de Salomon qu'il n'auoit iamais fait au parauant & qu'il n'a fait apres luy. Si on regarde l'ordre, le temps, la paix & tout l'estat qui a esté en l'Eglise d'Israel du temps d'iceluy, il sera facile à iuger à tous, qu'il est ainsi que ie le dy. Et neantmoins l'idolatrie de Salomon a esté cause de la vengeance de Dieu, voire iusques à estre cause de la ruine de la ville, du temple, du pays, du royaume, & de tout le peuple. Il sembloit bien quand il se desbaucha en idolatrie, qu'il n'y faisoit que toucher & passer fort legerement, comme qui feroit vne chose sans y penser : & que tout pouuoit estre bien prins & excusé. Mais sa faute a esté telle qu'elle a mené à toute ruine & perdition tous ceus qui l'ont ensuyue. Et ne faut point douter que l'autorité de Salomon & des gens sages qui estoient avec luy : qui estoient personnages de grande reputation & autorité, n'ait esté vne grande couuerture aus autres rois qui sont venus apres Salomon, & qui ont cheminé en idolatrie, suyuant l'exemple d'iceluy. Elle a pareillement seruy de grande couuerture à tous les faus Prophetes, & aus meschans princes & seigneurs, pour dresser & entretenir idolatrie. Il en est autant aduenue touchant Ieroboam, auquel il a esté déclaré par le S. Prophete Ahia qu'il deuoit regner sur les dis lignées d'Israel. Sur quoy grandes promesses luy sont faites s'il chemine selon les commandemens de Dieu. Mais luy faisant du sage, comme entendant que la maiesté de Dieu ne peut estre comprise ny enclose en aucun lieu : & qu'il

1. Rois 11. f.

n'estoit point de besoin que le peuple prinst tant
1. Rois 12. f. g. de peine d'aller adorer Dieu en Ierusalem, il a
cautement & finement dressé des veaus d'or, l'un
en Dan, & l'autre en Bethel, & a aposté des sacri-
ficateurs, & des prophetes, & autres pour là faire
le seruice diuin, non pas selon la Loy de Dieu,
mais à sa volonté. Et nonobstant qu'il ait prins telles
couleurs, toutesfois il a fait tout cela, pour son
profit, prenant couleur de l'honneur de Dieu, &
de l'aide & soulagement du peuple, pensant mieus
establis son regne par tel moyen. Et de l'iniquité
que Ieroboam auoit commise, tous ont puis apres
esté empoisonnez : & au lieu d'amender la faute
d'iceluy, tous les autres qui l'ont suyuy, ont tou-
siours empiré l'œuvre. Et s'il y a eu quelcun qui
ait tasché d'oster l'idolatrie, comme Iehu l'a fait,
iamais ne s'en est trouué vn qui ait abattu les
veaus d'or pendant le temps que le regne d'Israel
a duré. Ainsi est-il aujourd'huy de l'idolatrie an-
cienne, qui est à present entre les Chrestiens. Car
pource qu'elle a apparence d'estre venue de gens
sages, & de grans personnages, elle ne peut estre
arrachée, mais croist tousiours de plus en plus.
Et les meschans qui la veulent soustenir s'arment
de ceste ancienneté & apparence, contre ceus qui
veulent rien dire au contraire. Et le plus souuent
ceus-la mesme qui desirent que Dieu soit pure-
ment seruy, n'osent parler contre le dire des An-
ciens, pourtant qu'ils les tiennent comme s'ils
auoyent acquis vne autorité à laquelle nul ne
doit contredire ne contreuenir. Et tout cecy se fait

sous la couleur qu'ils ont bien regardé à ce qu'ils ont dit & escrit veu qu'ils ont esté si sages, si bons & si saints.

Comment il faut iuger de toutes choses selon la parole de Dieu, & du danger qu'il y a de suyure les hommes à cause de l'apparence qu'ils ont. CHAP. XLIII.

OR pour euitier tous les dangers qui peuuent estre en telles matieres, il ne se faut point arrester à cecy, ains est requis que sans temerité ne desir de contredire, mais en vne sainte affection de vouloir suyure & maintenir verité, vn chacun regarde diligemment la sainte Escriture, & que par icelle tout soit iugé & approuué ou defendu & condamné, ainsi que l'Escriture le contient, & comme elle le condamne ou approuue. Car il n'y a rien plus dangereux que de s'arrester à autre chose qu'à la pure parole de Dieu, contenue és saintes Escritures. Et les hommes sont grandement dangereux, qui ont grande apparence de sauoir, de bonté & de sainteté, quand ils parlent & disent autre chose, que ce qui est contenu en la sainte Escriture. Parquoy si grans dons & graces que tels personnages ayent receus de Dieu, ils doyuent tousiours bien regarder que c'est qu'ils disent & qu'ils escriuent. Car ce n'est pas assez de dire & de mettre en auant beaucoup de choses. Certainement il est trop meilleur de dire & proposer tant moins, & ne passer point outre ce qu'on

fait & qu'on cognoit bien estre de la parole de Dieu, & dequoy on est bien asseuré en verité, que de parler selon qu'il semble le meilleur par la raison & le discours que l'homme fait, sans auoir pleine assurance de la parole de Dieu. Car de là est venue toute meschanceté, tout erreur, toute tromperie, & toute seduction. Et si les Anciens eussent tenu ceste reigle, tant en l'exposition de la sainte Escriture, comme és autres choses qu'ils ont mises en auant: & que selon icelle, toutes leurs œuures eussent esté bien examinées, & qu'on eust prins seulement ce qu'il falloit, & que les Eglises eussent ainsi marché sans rien prendre ny admettre fors ce qui est tout ouuertement contenu en la sainte Escriture, nous ne fussions pas en tels abysses d'erreur, d'idolatrie & de superstition, que la Chrestienté est aujourd'huy, lesquels surmontent tous ceus qui furent iamais.

Si la croix peut estre appelée la clef de Paradis sans contreuenir à Iesus Christ & à l'Euangile. CHAP. XLIIII.

PAR QVOY les Anciens ont esté cause d'un grand peruertissement de la sainte Escriture, quand estans esmeus à louer la croix, ils l'ont appelée la clef de Paradis, & la cause de toute felicité, & quand ils ont dit qu'elle deliure d'aveuglement, d'erreur, & qu'elle mene des tenebres à la lumiere, & qu'elle a mis en paix les vaincus, & a conioint à Dieu les estranges, faisant estre bien
pres ceus

pres ceus qui estoient loin; & autres telles choses qu'ils disent. Quand donc ils viennent au bois de la croix (comme nous auons desia monsté) & aus paremens, & aus figures & aus signes, & graueures, & aus choses qui ne peuuent estre dites de Iesus, & qui ne luy appartiennent point, certes en parlant ainsi ils corrompent grandement la parole de Dieu, laquelle baille à Iesus Christ seul, tout ce qui est de reconciliation de paix, & de vraye vnion entre Dieu & les hommes, & non pas à la croix & à autres telles choses. Le saint Apostre auoit ouuertement monsté tout cecy au lieu d'ou les Anciens prennent ce qu'ils transportent à la croix. Mais que diront cependant icy les Papistes, qui veulent que S. Pierre seul ait les clefs de Paradis? Et pourtant le Pape, qui se dit estre successeur de S. Pierre, se glorifie aussi d'auoir les clefs de S. Pierre. Mais si la croix est la clef de Paradis, celle clef a esté cachée en terre, & perdue iusqu'au temps de l'inuention de la croix. Doncques S. Pierre ne l'a point eüe: & ne l'ayant point eüe, il ne l'a peu donner au Pape, ains faudra donner cest honneur à Helene. Car ayant trouué la croix, & l'ayant en sa puissance, elle a aussi trouué & a eu la clef de Paradis: & tous ceus qui y ont part, l'ont par elle & d'elle comme son fils & la couronne d'iceluy.

Conference de la Papeſſe Ieanne avec Helene, & du miniſtere des femmes en l'Egliſe. CHAP. XLV.

SI noſtre tres ſaincte mere & dame Ieanne d'Angleterre la Papeſſe huitieme de ce nom, ſe fuſt haſtée pour venir prendre les clefs de Paradis des mains d'Helene, les affaires de la Papauté auroient grand luſtre ſelon le dire de ceus qui ſont de la croix les clefs de Paradis. Car par ce moyen l'Egliſe Papale ſeroit droitement feminine & auroit puissance par les femmes & ſucceſſion de femme en femme. Et pour faire meilleure conference d'Helene & de la Papeſſe Ieanne, & pour donner encore plus grand luſtre à ce que ie dy, nous auons à noter qu'Helene a eſté approuvée de tous, & auſſi ce qu'elle a cerché & l'inuention faite par elle. Car quant à moy, ie n'ouy onques perſonne qui ait dit, ny ouy dire, ne qui ait dit, qu'il euſt leu, comme auſſi ie n'ay iamais leu, qu'Helene ait mal fait, mais a eu louange de tous. Par le ſemblable Ieanne a auſſi eſté eſleuè Papeſſe par la voye du ſainct eſprit de Rome, par l'accord de tous, & a eſté en grande admiration à tous en ſa Papauté, iuſques à ſon enfantement. Ie dy cecy à fin qu'on ne penſe point que ceſt eſprit de l'Egliſe Romaine duquel ie parle, ſoit le S. Eſprit, qui a parlé, par les Apoſtres. Car le ſainct Eſprit ne permet point que la femme parle en l'Egliſe & en l'aſſemblée des Chreſtiens, tant s'en faut qu'il ordonne vne femme pour eſtre Paſteur & chef de

1. Cor. 14. g.

1. Tim. 2. d.

l'Eglise. l'ay bien voulu toucher ces choses à cause des Papistes qui sur tous autres taschent à tirer les hommes hors de l'Ecriture, & faire qu'on s'arreste à eus, au lieu de s'arrester à icelle. Et pourtant ils magnifient tant les Anciens, combien qu'on leur remonstre, qu'en beaucoup de lieux les Anciens se sont destournez de la pure verité des saintes Escriptions, comme tous le peuvent voir, s'ils ne veulent volontairement estre aueugles. Et par mesme moyen, on peut voir comment la Papauté se condamne elle-mesme, & comment elle monstre vraiment qu'elle est menée par l'esprit d'erreur, & qu'elle fait par iceluy ce qu'elle attribue à l'Esprit de Dieu, & ce qu'elle se dit faire par la voye du saint Esprit. Et quand nous n'aurions autres témoignages que ceus des Anciens, il est tout certain qu'iceus mesmes ruynent l'Eglise Papale, si on regarde ce qu'ils ont escrit de l'autorité laquelle ils attribuent eus-mesmes à la parole de Dieu.

Quelles couleurs ceus-la prennent qui veulent au iourd'huy maintenir & suyure les manieres de parler obscures des Anciens. CHAP. XLVI.

DONQVES si toutes ces choses sont bien considérées, il ne faut point qu'aucun se dresse pour maintenir le dire des Anciens, comme aussi il y en a qui taschent de maintenir les façons estranges de parler que plusieurs tiennent aujourd'huy, tant des Sacremens que d'autres choses, prenans

couleur sur des manieres de parler desquelles Moyse & les Prophetes ont souuentefois vsé, quand ils ont parlé tant de l'Arche de l'alliance, que du Propiciatoire, & des Cherubins, & des sacrifices, & des autels, & d'autres choses semblables. Aquoy ils adioustent pareillement celles desquelles les Apostres mesmes ont aussi vsé, singulierement en parlant de la croix. Surquoy ils pourroyent dire qu'il ne faut pas presser si estroitement la liberté des Anciens, & condamner tant rigoureusement leurs manieres de parler desquelles il a esté fait mention cy-dessus. le supplie à tous de regarder en cecy, à l'honneur & à la gloire de Dieu, & à la pureté & dignité de l'Euangile, & à quoy les Chrestiens sont appelez, & semblablement à ce qui sert à l'edification, pour l'entretenement & la conseruation & le bien de nostre prochain, voire de toute l'Eglise. Quel besoin est il d'amener telles couuertures, quand nous voyons que tant de maledictions sont aduenues sur la terre par tels propos & telles manieres de parler des Anciens, & que Dieu y est tant deshonoré, & que tout est peruersty & renuersé?

Comment les Prophetes & les autres vrais seruiteurs de Dieu, ont corrigé & repris les fautes de ceus qui ont abusé de la parole de Dieu & des ordonnances d'iceluy, par fausse intelligence, & combien cest exemple est digne d'estre suiuy. CHAP. XLVII.

REGARDONS sans affection de chair la sainte Escriture. Regardons comment les Prophetes

ont besongné de leur temps. Ils ont fort magnifié ce qui auoit esté ordonné de Dieu pour le temps qui estoit pour lors. Mais quand ils ont veu qu'au lieu de regarder à Dieu, les faus Prophetes, & les sacrificateurs, ensemble le peuple ont prisé les choses materielles plus qu'ils ne deuoyent, comment ont ils crié? Isaie le monstre assez quand il condamne tout le seruice diuin, tous les sacrifices, & les encensemens, & les prieres de tels personnages. Et Ieremie en a-il moins fait quand il a appelé la maison de Dieu, vne cauerne & fosse de brigans? Qui est celuy qui voudroit maintenant faire aucune mention de l'Arche de l'aliance, en luy attribuant les grans titres, qu'elle a eu au parauant, veu que nous auons Iesus Christ? Or il est ainsi, qu'au retour & en la deliurance de la captiuité de Babylone, comme Ieremie l'auoit predit, il n'est plus fait mention de l'Arche pour adorer Dieu, comme l'ayant ordonnée: mais il est dit qu'au temple qui a esté derechef redifié, le peuple doit adorer Dieu qui les a retirez de captiuité. Que doit-on donc dire au temps de Iesus Christ? Doit-on autrement adorer Dieu, sinon comme Pere de nostre Seigneur Iesus Christ, par la mort duquel il nous a rachetez? D'autre part ie ne nie pas qu'il n'y ait quelques mots és saintes Escritures qui semblent sonner & parler en la louange de la croix. Mais ils sont faciles à entendre. Car les Apostres monstrent tout clairement ce qu'ils veulent qu'on entende par leurs paroles. Parquoy nul n'y peut estre deceu, s'il regarde pourquoy ces pa-

*Isai. 66. a.**Iere. 7. a.*

roles sont dites, & s'il considere ce qui va deuant icelles, & ce qui s'ensuit. Puis donc qu'ainfi est, faut-il que pour deus ou trois mots qu'on trouuera de la croix és saintes Escritures, que tels fatras & tels monceaux de paroles tant enueloppées, dites & escrites par les Anciens, soyent receuës comme celles des Apostres? Car estans couchées par escrit, comme elles le sont, se peuuent elles entendre de Iesus Christ crucifié, comme celles des Apostres? Ne semblent elles pas plustost dire tout au contraire? Ne sont elles pas plus loin de telle intelligence que le ciel n'est loin de la terre? Comment donc cela peut-il estre porté? le vous demande, quand Dieu auroit ordonné d'estre seruy par la croix, & que les croix fussent dressées par toutes les Eglises, & qu'il les auroit appelées croix de salut, seroit-il pourtant loisible d'en parler ainsi, comme les Anciens en ont parlé, & d'en faire comme on a fait, & comme on en fait encore? Mais il n'y a rien de tout cela. Il n'y en a ne parole ne commandement de Dieu. Et toutesfois tout le monde se desborde par toute idolatrie apres la croix : car chacun l'adore. Tous se fient que s'ils ont la croix aupres d'eus, & sur tout en leur trespas, ils auront victoire contre le diable. De la parole de Dieu, de l'Euangile, de la vraye foy en Iesus Christ, tout cela est heresie. Il n'est nulle mention de viure comme Iesus Christ a enseigné. Il faut brusler les liures & couper les langues qui touchent ce qui est de Iesus Christ. Puis donc qu'ainfi est ne puis-je pas bien dire à tous avec

Isaïe: Qui a demandé cecy de vos mains? oſtez tout cecy, dit le Seigneur, ie ne le puis porter. Et d'autant que la preſtraille fait idolatrer le peuple & le deſrobe à Dieu par tels ſeruices de la croix inuentez des hommes, ne puis-ie pas bien dire de la croix, la prenant comme les Papistes la prennent, ce que Ieremie a dit de ſon temps du temple de Dieu qui eſtoit en Ieruſalem? Ne vous fiez point, dit-il, aus paroles de menſonge, diſans, Le temple du Seigneur, le temple du Seigneur, le temple du Seigneur, le temple du Seigneur: car vous en auez fait vne cauerne de brigans. Ne puis-ie pas bien dire, le gibet de ſalut, le gibet de ſalut, la croix de ſalut, la croix de ſalut, vous en auez fait vn gibet & vne croix de meurtriers & de brigans? Regardez les paſſages & leur donnez le pois qu'ils doyuent auoir maintenant, vous trouuerez qu'il n'y a aucun ſeruice ordonné de Dieu pour le faire à la croix, & qu'il n'eſt point commandé à aucun, de dreſſer les croix. Et pourtant qui peut, & qui doit moins porter vne telle & tant eſpouuantable idolatrie, que les vrays ſeruiteurs de Dieu?

Iſaïe 1. a.

Iere. 7. a.

Que c'eſt que l'Eſcriture teſmoigne de la croix & de Ieſus Chriſt crucifié, & de la conſerence de la croix avec la Circoncision, & de la perfection qui eſt en Ieſus Chriſt & en l'Euangile. CHAP. XLVIII.

D'AVANTAGE ie demande qu'on me monſtre en la ſaincte Eſcriture, que iamais il ait eſté commandé de faire la croix, ou le ſigne d'icelle,

& que ceus qui n'ont point eu de croix, ou qui n'en ont esté signez, foyent blasmez en l'Escripture. Il est certain qu'on ne peut rien monstrier comme il a assez esté dit : & qui n'y a autre chose sinon que Iesus Christ nostre sauueur a esté mis en ce bois, lequel a esté dressé par gens diaboliques, & y a esté mis par la furie de ceus lesquels Satan a conduits. Autre chose ne peut on amener du bois. Car le bien est tout en Iesus qui a enduré tout patiemment, & en souffrant a obey à son Pere pour nous & pour nostre salut. Iamais nostre sauueur Iesus ne se fust mis en la croix luy mesme, non plus que les vrais Martyrs d'iceluy se ietteroyent au feu, ou se tueroient de glaives, si les meschans ne les y mettoient, & ne les tuoient. Mais les meschans ont mis Iesus Christ en la croix : dont il a esté osté par gens de bien & par vrais seruiteurs de Dieu, qui ont desnudé la croix de tout ce qui est seul bon, sainct, pur & à priser. Mais à fin qu'un chacun puisse encore mieus iuger de ce que ie dy, considerons comment les saintes Escriptures parlent de la Circoncision, & puis en faisons conference & comparaizon avec ce qui est aussi escrit de la croix en icelles. Considerons premierement quelle louange est donnée à la Circoncision, & quel blasme c'est de n'estre point circoncy. Considerons aussi le commandement qui en a esté donné de Dieu, & comment elle a esté obseruée & faite par Abraham le pere des croyans, & gardée tant par luy que par ses succeffeurs. Et d'auantage Iesus Christ
mesme

Gen. 17. b.

mesme a-il peu honoré la Circoncision ? Car depuis le huitieme iour apres sa natiuité, n'a il pas porté la Circoncision imprimée en son corps toute sa vie ? Et n'a-il pas monstré que ce vray corps circoncy est ressuscité en verité, & non autre, ny d'autre essence, & qu'il est monté au plus haut des cieus ? Et combien qu'ainsi soit, ce neantmoins ceste gloire de la Circoncision (à laquelle ie ne say que ie puisse comparer des choses qui sont faites en ce monde) n'a pas peu faire, que pour la gloire de Iesus Christ qui a esté circoncy, la Circoncision ne soit esuanouye pour donner lieu à Iesus Christ seul & à son Euangile. Car quand il est question de Iesus Christ & de l'Euangile, ce qui au parauant a esté en gloire & lumiere, ne peut plus estre tenu comme ayant gloire & lumiere : mais faut que cela soit obscurcy par la grande gloire & lumiere de Iesus Christ, qui est la droite verité de tout ce qui a precedé auant sa venue. Et mesme ce qui a esté trouué ayant gloire sous la Loy, ne l'a eue sinon d'autant que Iesus Christ y estoit figuré. Parquoy si on veut mesler avec Iesus Christ & l'Euangile, cela mesme qui a esté en gloire sous le vieil Testament, c'est faire Iesus Christ vain & insuffisant. Parquoy le saint Apostre considerant ces choses est contraint de crier : Si vous estes circoncis, Christ ne vous profite rien. Et il n'y a rien du passé ne du present, quoy qu'on face & qu'on tienne, soit ce en Ierusalem ou autre part, & quiconque que ce soit, soit Apostre ou autre, qui empesche S. Paul de
H.

*Luc 2. c. d.**Gal. 5. a.*

crier ainsi hautement & clairement. Qui m'empêchera donc à l'exemple d'iceluy, de crier contre tous ceus qui veulent avec Iesus Christ & avec l'Euangile, mesler la croix, & autres telles choses non ordonnées ne commandées de Dieu, & tant de ceremonies? N'auray-ie pas iuste raison, entant qu'ils tiennent & disent, telles ceremonies estre necessaires, pour conduire & contenir le peuple en son office & enseigner les hommes à salut, comme la raison des hommes en iuge? Car il y a de fort excellens personnages qui ont ainsi dit & escrit: & ceus qui les ensuyuent & tiennent ainsi, voire plus estroitement que l'Euangile, & iugent que ce sont choses fort necessaires. Mais ceus qui cognoissent vrayement Iesus Christ, en iugent autrement: veu que Iesus Christ est seul suffisant à salut, & que l'Euangile a pleine suffisance en soy, pour tout ce qui est necessaire au peuple. Parquoy il n'est ia besoin que rien y soit adiousté. Car l'Euangile a toute perfection, de doctrine, & de tout ce que nous deuons & pouuons desirer & demander.

De la malediction de Dieu qui est donnée à ceus qui ne se tiennent à la pure parole de Dieu: & de la liberté infernale de ceus qui se donnent liberté de parler outre les saintes Escritures. CHAP. XLIX.

PVIS donc qu'ainsi est ne crieray-ie pas à bon droit, contre ceus qui iugent & qui enseignent que les croix sont necessaires au salut des

Chrestiens : Si vous auez des croix, Christ ne vous profite rien ? Il a pleu à Dieu que i'aye presché Iesus Christ son Fils selon la sainte Escriture, & l'Euangile en la pureté que Dieu l'a promise en la Loy & és Prophetes, comme les saints Apostres l'ont preschée & en ont rendu tesmoignage par leurs escrits. Parquoy nul ne doit estre esbahy, si ie ne puis endurer qu'aucun messe avec Iesus Christ & son Euangile des images des croix, des fatras, des messes & des puantes ceremonies non ordonnées de Dieu, & qu'on presche qu'il faut les auoir & tenir, & qu'on mette autres propos en auant qui ne sont point en l'Euangile ne de l'Euangile, & qu'on lie & mette le salut & la grace en choses de ce monde, & non en Iesus Christ seul, ainsi que contient la pure parole de Dieu. Qui me pourra iustement condamner en cecy, si ie dy qu'il n'y a point d'autre Euangile, ny d'autre annunciation de salut, sinon en Iesus Christ ? Car aussi ie ne le puis dire en verité. Parquoy quand ces tant grans personnages, desquels i'ay parlé, voire mesmes les Anges du ciel viendroyent & annonceroyent autre Euangile, ne puis-je pas toujours dire avec S. Paul qu'ils soyent en execration ? Iesus Christ & son Euangile sont-ce choses humaines, ausquelles il faille mesler les inuentions des hommes, & ce que les hommes iugent estre beau & bon ? Certainement la liberté que tels personnages prennent pour entretenir & garder en l'Eglise ce qui n'est point de Iesus Christ ne de l'Euangile, est vne liberté forgée au fons d'enfer.

Gal. 1. 8.

C'est vne liberté pour nous affranchir & deliurer de la subietion & du seruice de Iesus Christ, & de iustice, pour nous faire vrais esclaves de Satan & d'iniquité. Soyons par l'Evangile serfs de Dieu & de l'Evangile, & affranchis de tout ce que Iesus Christ ne nous a point ordonné, & que l'Evangile ne contient point, de sorte que tout cela soit loin de nous, & qu'il n'ait ne lieu ne puissance en nous : mais que Iesus Christ seul & son Evangile y regne & y ait lieu. Le Seigneur par sa grace nous doint à tous vn droit cœur & vn si vray sentiment, & vne si pleine intelligence, & vn si excellent don de son saint Esprit, comme il a donné au saint Apostre S. Paul, pour empêcher que rien ne soit meslé ne tenu ne gardé és Eglises de Iesus Christ, sinon cela qu'il a ordonné, & qu'il luy plaise faire qu'il n'y ait que la pure & nette predication du saint Evangile, & le droit & pur vsage des saints Sacremens, & l'ordre pur & droit des saintes corrections & admonitions, pour admettre ce qu'il faut admettre, & reietter ce qu'il faut reietter, & comme il le faut, à fin que rien ne soit fait ne dit, que tout ne soit purement selon la parole de Dieu, en laquelle & par laquelle tout soit conduit, soumis & gouverné : & qu'icelle seule ait toute l'autorité en l'Eglise sans y rien adiouster ne diminuer, & sans y rien changer ne varier.

Quel grand bien c'est que de se tenir à la pure parole de Dieu, & combien vn chacun doit trauailler à cela. CHAP. L.

AINSI faisant Dieu fera vrayement seruy comme il le commande. Il sera prisé & honoré, quand ce qu'il a dit sera seulement tenu, & que chacun sera ainsi comme il doit estre. Celuy qui parle parlera bien, ne sortant point hors de l'Escriture sainte. Celuy qui oit orra ce qu'il doit tenir & croire. Il n'aura point la bride laschée à mal, mais il entendra par la parole, comment il doit aller, sans estre plus pressé que nostre Seigneur le commande. Et ne faut pas entendre que Dieu domine & commande, & qu'il gouuerne autrement entre les siens, & qu'il ait autre sceptre pour les regir que sa pure parole. Parquoy ceus qui entant qu'en eus est, ne veulent pas le royaume de Dieu qui est le royaume de salut & de vie, & qui craignent d'introduire la tyrannie de peché, qui est en perdition & mort, voire eternelle, qu'ils se gardent bien de mettre en auant autre chose que la seule parole de Dieu. Et ceus qui se veulent tenir sous Dieu & n'estre en la tyrannie de Satan, se doyuent aussi garder de prendre & tenir autre doctrine, que la pure parole de Dieu. Qu'il nous souuienne des premiers qui ont esté chassez de Paradis. Car cependant qu'ils se sont tenus à la parole de Dieu, ils s'en sont fort bien trouuez, & ont esté au royaume de Dieu : mais si tost

Gen. 3. d.

qu'ils ont creu à autre, & prins autre parole, ils ont esté tres-mal, & du toût ruinez suiets à l'enemy.

Comment s'il y a iuste raison de reietter le Sacrement d'Extreme onction controué par les Papistes, il y en a pour le moins bien autant de reietter ce qu'ils attribuent à la croix. CHAP. LI.

Marc 6. b.

Iaq. 5. c.

IL y a eu plusieurs bons & sauans personnages de nostre temps qui par la grace de Dieu ont à bon droit & sainctement condamné l'Extreme onction qui est faussement appelée sacrement, laquelle a esté instituée par les Papes. Ces bons personnages ont monstre par droits argumens, que le fait des Apostres qui oignoient d'huile les malades & les guerissoient, duquel les Papistes s'arment, n'est point à imiter, puis que l'effet de telle onction n'est plus tel qu'il a esté du temps des Apostres, & que les dons de guerison, qui au parauant ont esté en confirmation de l'Euangile donnez aus Apostres, ne sont plus à present. Car en vain seroit faite l'onction, qui est pour la guerison, si l'effet d'icelle ne s'en ensuit. Nous pouuons dire le semblable de ce qui est escrit par S. Iaques d'oindre les malades. Car par ce que le don de guerison est defaillly, il est bien monstre que ce que S. Iaques a escrit de telle onction ne peut de rien seruir à l'onction Papale, laquelle ils appellent derniere & extreme onction. Car en ce passage le saint Esprit n'enseigne autre chose, par

ceste onction coniointe avec la priere, & la parole de consolation, sinon la guerison laquelle estoit donnée en l'Eglise, par les Ministres d'icelle, cependant que ce don miraculeus leur a esté donné. Mais depuis qu'il a cessé, celle exhortation nous admoneste maintenant de ce qui de nostre part doit estre fait pour le malade, à fin que l'aide & l'assistance qu'on luy peut faire luy soit faite. Car la chose est toute claire, qu'en Judée, comme aussi au pays d'Orient, l'usage de l'huile & des onctions est fort commun pour soulager les malades, & routes personnes qui sont trauaillées, comme nous vsons des confitures & d'autres semblables choses enuers telles gens. Doncques telle Onction Papale est à bon droit reietée comme n'ayant rien de commun avec celle des Apostres, & avec cela dequoy S. laques parle. Parquoy combien que les Papistes peruertissent & corrompent les saintes Escritures, toutesfois ils n'empeschent point qu'on ne condamne & reiette à bon droit leur Onction. Et n'y a ne temps ny autorité de gens qui empesche que tout cela ne soit iustement condamné. Si ainsi est, pourquoy ne sera aussi condamnée la charmerie & tout l'usage de la croix, tant du bois que d'autre matiere, & le signe d'icelle, tant plein de forcelerie, de superstition & d'idolatrie? Car il n'y a aucun exemple des Apostres ny aucune Escriture sainte qui ait rien de couleur pour telle forcelerie de la croix, au pris de l'huile sur lequel les Papistes ont fondé leur sacrement d'extreme Onction. Et d'autant

que les superstitieux & idolatres pechent trop plus tant au bois qu'au signe, & que l'idolatrie commise autour d'iceus est quasi en tous, & tant plus ils demeurent sans y regarder, & sans en iuger par la sainte Escriture. Et toutesfois c'est là ou il faut plus estre diligens, & ou il faut plus regarder, à fin que cela enquoy plusieurs pechent soit chassé & reietté plus loin.

De l'erreur des modérateurs qui condamnent les abus commis autour des idoles, & veulent neantmoins retenir les idoles. CHAP. LII.

ET d'autant que tels bois & telles figures ne sont point choses qui soyent commandées par la parole de Dieu, ny ordonnées d'estre faites, & que telle idolatrie y a esté commise, comme és autres choses, qui tant ont seruy à ruine & perdition : ie ne puis approuuer l'aduis de ceus qui reputent estre assez, de condamner l'abus & le peché qui a esté commis autour & à l'occasion de telles choses, & d'enseigner cependant qu'on s'en garde par cy-apres, mais tellement qu'on souffre tousiours la matiere d'erreur & d'idolatrie, & les instrumens qui ont seruy à icelle. Car telle moderation condamne la sagesse de Dieu, & ce qu'ont fait ses fideles seruiteurs menez par le S. Esprit. Ceus qui ne veulent pas que cela soit osté du tout, pensent bien peu à la condition & nature des hommes. Car on a beau dire, & qu'on crie tant qu'on voudra, si les choses ne sont ordonnées de Dieu

de Dieu, & si elles ne sont introduites selon la parole d'iceluy, ains sont controuuées par Satan, & ne seruent à autre fin que pour tirer à superstition & idolatrie : il est tout certain que si on les laisse tousiours, Satan aura tousiours moyen de s'en seruir. Et d'autrepart l'inclination naturelle, laquelle tire tousiours à mal, comme elle est vrayement mauuaise, tousiours fera que telles choses seruiront & induiront les hommes à mal. Regardons comment nostre Seigneur a ordonné de ce qui a seruy à mal; & ou idolatrie a esté commise contre Dieu, voire mesmes des choses qui autrement de leur nature estoient bonnes : comme il est adueni touchant le serpent d'erain & autres choses semblables contre l'intention pour laquelle Dieu les a ordonnées. S'il y a vn lieu ou vne ville ou les gens se soyent destournez du vray seruice de Dieu, & ou le peuple, delaisant Dieu & son seruice, dresse idolatrie & vn autre seruice que celui qui a esté ordonné de Dieu : nostre Seigneur ne dit point seulement, vous dechasserez de ce lieu l'idolatrie, & direz au peuple qu'il ne commette plus idolatrie, mais au reste laissez tout comme au parauant, c'est assez que ceus qui enseignent, monstrent l'abus & le peché. Le lieu qui a esté donné de Dieu au peuple, & qui sert pour reduire en memoire les biens que Dieu luy a faits luy donnant la terre en heritage, comme il auoit promis, ce bon Dieu tant dous & amiable, tant sage & parfait, sachant mieus ce qui nous est expedient que tous les plus sages qui ont esté & qui seront

2. Rois 18. 2.

H. i.

Deut. 19. c.

2. Rois 10. f.

iamais, commande pour le bien de tous que grande execution soit faite, voire sur le lieu mesme ou telle iniquité a esté commise, & qu'il soit du tout exterminé, & que iamais plus ne soit habité ne de bestes ne de gens : à fin que tous craignent Dieu & se gardent de toute idolatrie. Il ne baille en cela aucune moderation. Combien que lehu n'a eu le cœur à suyure nostre Seigneur, fors qu'en aucune chose, comme il a bien monsté laissant les veaus d'or : toutesfois se contente-il de l'exécution des faus prophetes & des meschans sacrificeurs de Baal ? Laisse-il le temple & l'idole ? N'a-il point tout destruit ? Et quant au lieu, ne l'a-il point tourné en retrais pour le rendre abominable ? Et les Prophetes qui l'ont incité à faire ce qu'il a fait & n'ont peu obtenir d'auantage, eussent bien voulu encore d'auantage, à sauoir qu'il eust encore abattu les veaus d'or. Qu'est-il besoin d'amener les autres qui ont abattu & ruiné tous les hauts lieux, sans espargner ceus-la mesme de Salomon, ne rien des images qui y estoient ? L'Escripture en rend assez de tesmoignage.

De l'exemple d'Ezechias à ce propos, & de la faute de ceus qui ne suyuent l'exemple d'iceluy, en la reformation de l'Eglise. CHAP. LIII.

MAIS le fait du bon Roy Ezechias, combien condamne-il tous ceus qui ne font point leur deuoir pour l'honneur de Dieu, pour l'excellence de l'Euangile, & pour le bien de tous ? Car iceluy

a ruiné, destruit & abattu du tout, toutes les abominations & toute l'idolatrie, beaucoup plus que personne qui ait esté auant luy. Et ne s'est pas contenté de faire comme le bon Roy Iosaphat : mais d'auantage, voyant que le peuple faisoit honneur & seruice diuin au serpent d'erain qui auoit esté dressé, par le grand seruiteur de Dieu Moyse, selon le commandement de Dieu, il n'a point fait de difficulté ne de conscience de l'abattre & de le briser & deffaire du tout, à fin que iamais personne ne s'y abusast puis apres. Et toutesfois ce serpent d'erain a esté comme vn grand & excellent Sacrement, auquel Dieu non seulement monstre vne œuvre fort excellente, mais aussi par iceluy donne à entendre la plus grande œuvre qui iamais fut & sera, à sauoir la passion de Iesus Christ, qui est mort pour nous. Laquelle mort est de telle vertu, que qui croit en Iesus Christ, qui a esté esleué en la croix, comme le serpent d'erain a esté esleué au desert, iceluy est deliuré de la mort eternelle, comme ceus qui ont regardé le serpent d'erain, ont esté deliurez de la mort corporelle. Puis donc que cela que le peuple faisoit autour de ce serpent, du temps d'Ezechias, n'estoit pas contenu en la Loy de Dieu; le Roy ne s'est pas contenté de faire prescher, qu'on ne fist plus ainsi, mais par vn saint zele de la Loy, il a brisé ce serpent, & l'a nommé par mespris & vitupere Nehustan qui signifie chose d'erain. Et il ne l'a pas voulu reseruer comme vne chose sainte, faite par vn grand seruiteur de Dieu, non point mesme comme vne

*2. Rois 18. a.**Nombre 21. b.**Jeau 3. b.*

chose indifferente, mais l'a dû tout destruite & abolie, comme pernicieuse, & qui portoit grand dommage. Or combien est l'Euangile plus excellent que la Loy? Et l'adoration qui est faite en esprit & verité, combien est-elle plus pure & plus digne que celle qui est faite en la montagne ou en Ierusalem? Parquoy tous les vrais seruiteurs de Dieu sont beaucoup plus tenus de crier contre toutes les choses qui sont faites ou dites contre la pureté de l'Euangile, & contre tout ce qui est inuenté & introduit hors de ceste doctrine Euangelique, qu'Ezechias n'a esté tenu de faire tout ce qu'il a fait, tant enuers le serpent d'eraïn, qu'en toutes les autres superstitions & idolatries lesquelles il a abatuës.

De l'office des Princes Chrestiens touchant l'abolition de l'idolatrie & des idoles, à l'imitation d'Ezechias, & du vray vsage, & de l'abus de la liberté Chrestienne. CHAP. LIIII.

IE puis dire le semblable de tous les Princes Chrestiens. Parquoy ils ne doyuent rien souffrir és sainctes assemblées, qui y ait lieu, fors ce qui est selon la pureté Euangelique. Et ne faut point icy faire tant des sages & tant s'enfler comme aucuns le font, pour dire, cela n'est rien : ce n'est pas chose qui puisse porter grand dommage. Mais quand nous voyons comment Dieu y a esté deshonoré, & comment les assemblées de l'Eglise ont esté pollues de superstition & d'idolatrie par tels

moyens, & que nous voyons le grand esclandre qui est donné tant aus Iuifs qu'aus Turcs, & comment le nom de Dieu y a esté blasphemé, & la doctrine Chrestienne toute infectée comme si elle estoit mere d'idolatrie : certes si toutes ces choses estoient bien considerées, tous deuroient non seulement detester l'idolatrie qui a esté commise, mais aussi ce qui en a esté la matiere & l'occasion, soit-ce croix, image, ou autre telle chose. Doncques tous les Princes Chrestiens doyent & sont tenus d'oster tous les babouins faits des peintres, soyent-ils de bois ou de pierre, enuers lesquels le peuple ait fait aucun seruice, inclination & honneur. Aussi toutes croix, & autres telles idoles, lesquelles ils doyent hardiment & à bon droit appeler satras, pierres, troncs de bois, ou bois mort. Car si nous voulons bailler vne liberté plus grande au seruice de Iesus Christ par dessus l'Euangile, que ceus qui estoient au ministère de Moysé ne l'ont eüe par dessus la Loy, cela seroit faire l'Euangile plus imparfait & plus suiet aus hommes que la Loy. Et toutesfois la chose doit aller tout autrement, veu qu'au contraire tant de façons de faire estoient loisibles ou permises en la Loy, lesquelles nous ne pouuons & ne deuons faire ne tenir. Je prendray pour le premier, le mariage pour exemple de ce que ie dy. Considerons qui est si enragé qu'il vueille estendre la liberté Euangelique iusques à auoir plusieurs femmes à la fois, comme plusieurs l'ont fait anciennement : mesme entre les Israelites. Item qui veut donner la liberté à l'homme de re-

Matt. 5. 4. 19. a. pudier sa femme, sinon en cas de paillardise, comme Iesus Christ l'a enseigné? Que les hommes disent & escriuent tout ce qu'ils voudront, & que les Magistrats en facent selon la persuasion de qui que ce soit, ce neantmoins cecy demeure tousiours ferme, & les esclandres qui sont aduenus, ont monstré par effect, que c'est de presumer sur la parole de Iesus Christ. Laquelle chose m'a tousiours depleu tant & plus. En apres qui a liberté de presser par vsure plus vn Turc qu'un autre? N'auons-nous pas le commandement d'aymer vn chacun, voire nos ennemis mesmes? La liberté Chrestienne s'estend à autre fin qu'à deshonnorer Dieu, & à faire blasphemer son saint nom, & estre cause de la ruine de nostre frere pour lequel Iesus Christ est mort. Satan a icy besongné par vne grande finesse & cautelle. Il est aduenu de nostre temps qu'il a suscitè aucuns comme il a fait en France & ailleurs, & notamment les prestres, les induisant à rompre les images, à fin que des pierres ils en fissent des reliquaires puis apres, & que tous y courussent avec offrandes, ou à fin qu'ils esmeussent quelque persecution contre ceus qui ont quelque peu de cognoissance de Dieu, comme il est aduenu par plusieurs fois. Par le semblable, il s'en est trouué, qui par orgueil estans conduits & menez d'un mauuais esprit, ont voulu abattre des images & autres telles abominations. Et pource que plusieurs en ont esté scandalisez, il s'est trouué des personnages ayans grans dons de Dieu lesquels regardans plus les personnes que le

fait, se sont iettez à vne autre extremité, en sorte qu'ils sont venus à vouloir maintenir ce qui de soy-mesme se ruine. Et au lieu de regarder les saints commandemens de Dieu, & ce que la sainte Escriture contient, ils regardent ce que les sens de l'homme iugent, & ce qui a esté dit d'un des grans ruineurs de l'Evangile, & des plus grans raconteurs de fables qui ait point esté auant luy, à sauoir que les images sont les liures des simples gens.

De l'erreur de ceus qui veulent qu'on tienne les images pour liures des pources gens. CHAP. LV.

CELA est prins par dessus tous les commandemens de Dieu. Et toute la sainte Escriture, laquelle crie au contraire, n'a point de lieu en cecy. Et pour maintenir telle doctrine, il faut qu'un des bons Conciles qui ont iadis esté celebrez, soit tenu pour heretique, & qu'un des plus heretiques soit tenu & réputé pour bon Concile, combien qu'il soit tout contraire à la parole de Dieu, en cest endroit. Quand on donne tels liures aus simples gens, nous pouuons bien dire: O maudits liures & tous ceus qui les composent, comme bien le monstre la sainte Escriture. Ha Seigneur Iesus ou est ton Evangile, ta doctrine tant sainte, tant pure, tant excellente, & tant parfaite, que tu commandes estre preschée à tous? Bon Seigneur Iesus, celuy qui a escrit de toy, à sauoir ton seruiteur Moïse, a bien voulu par ton commandement, que

Deut. 6. a.

1. Cor. 14. g.

1. Tim. 3. d.

la Loy fust en autre reputation, que d'estre enseignée par des babouins, des images & des painctures: car il veut qu'on y pense qu'on l'enseigne, & qu'on l'escrive. Et ton Euangile, ta sainte doctrine, Seigneur, ne sera elle point en aussi grande recommandation? Ne sera-elle point annoncée de vois viue & par l'Escripture, comme tu as voulu qu'elle fust ouye, gardée, leuë & tenue, mais par babouins & idoles? Et quant & quant sera elle iouée par basteleurs & ioueurs; & mocquée en telle & par telle sortie & vanité? A quoy vient le pource homme quand il se lasche la bride à parler & penser hors de l'Escripture? Les femmes rachetées du precieus sang de Iesus Christ, tant grande cognoissance qu'elles ayent de l'Euangile, toutes-fois elles n'ont point lieu de parler ne d'enseigner en l'Eglise, & és assemblées, & les babouins & les troncs de bois & les peintures auront par nos refueries ceste prerogatiue, & aussi les mocqueurs & les ioueurs de farces, contrefaisant ce qu'ils ne sont point. Il faut qu'on iuge bien beste & fonce & tronc de bois, les peuples que Iesus Christ a rachetez, auxquels on donne tels liures & enseignemens, & qu'on se mocque bien d'iceus en les enseignant ainsi par des images de bois, ou par des autres choses semblables qui ne sont point ordonnées de Dieu. L'Euangile de Iesus Christ & sa doctrine, ne peut-elle estre enseignée, tenue & gardée sans le bois & les signes de la croix? Ne se peut-elle passer d'images? Le bois de la croix, le signe & les images & peintures, & toutes choses qu'on

qu'on a introduites és Eglises, & tous ceus qui les veulent maintenir, ont ils aucune chose du commandement de Dieu? En ont elles tant ou plus que le serpent d'erain ordonné de Dieu? L'adoration pure de Dieu en esprit & verité, ne requiert-elle pas vne telle pureté que celle qui estoit en la Loy? Iesus Christ ne nous a-il point autant & plus suffisamment enseigné, comme au parauant Moysé l'auoit fait? Quelle chose nous doit empescher que nous ne dechassions, ostions & du tout abolissions, ce en quoy le seruice de Dieu a esté renuersé & tourné en idolatrie? voire le seruice non figuratif, apres lequel nous n'en pouuons point attendre d'autre. Car c'est le seruice de Dieu parfait & Euangelique. Certainement nous faisons trop des philosophes en chambre, & nous enflons trop en nostre sauoir, sans droitement regarder l'honneur de Dieu & le bien & l'edification du prochain.

Num. 21. b.

Du fait & de l'exemple de Faber Stapulensis touchant l'image d'Isis, & de la vertu que les idoles ont à esmouuoir & entretenir les hommes en idolatrie.
CHAP. LVI.

IE puis dire en verité du bon homme laques Faber Stapulensis, qu'auant la manifestation de l'Euangile, laquelle nous auons eüe de nostre temps, ie n'ay point cognu de tel personnage, & ie crie mercy à Dieu, de ce que lors i'ay tant tasché à l'ensuyure. Mais combien que ce bon personnage

fust du tout plongé en idolatrie, neantmoins voyant qu'aucunes femmes avec chandelles allumées faisoient leur priere devant l'image de la déesse Isis, il obtint que celle image fust ostée, & qu'une croix noire fust mise au lieu d'icelle, tant auoit ce bon personnage son prochain en recommandation, le voyant offenser Dieu, en ce qu'il n'eust iamais pensé, & en cela mesme qu'il n'auoit iamais regardé qu'en detestation. Car Isis a esté le nom d'une déesse & d'une idole des Payens, sous le nom de laquelle le diable a esté honoré par eus. Or ce bon personnage fit cela que ie vien de dire, cependant qu'il estoit encore en si grosse ignorance que nous auons tous esté en la Papauté. Et combien qu'en ce qu'il faisoit, il changeoit une idolatrie en une autre: toutesfois il a déclaré par son fait, qu'on ne deuoit pas entretenir les idoles, lesquelles on cognoissoit estre contre Dieu, sur tout quand on voyoit que les pources ignorans s'y abusoient, ains qu'on les deuoit oster. Et quant à ce qu'il fit mettre une croix au lieu de celle image d'Isis, ce fut pourtant qu'il pensoit beaucoup mieus faire à cause qu'il n'entendoit pas encore pour lors, ce qu'il a bien entendu puis apres, touchant l'idolatrie qui a esté commise autour de la croix. Or si ce bon homme a fait cela que i'ay dit du temps de son ignorance & des tenebres qui estoient si grandes & si espesses par toute la Chrestienté: faut-il aujourd'huy qu'en une telle lumiere de l'E-uangile, les choses tant detestables, & par lesquelles nous auons tant offensé nostre Dieu soyent

encore soustenues? Car puis que nous l'auons offensé en telles choses estans pources ignorans, puis que nous pouuons maintenant facilement voir & sauoir comment tant & tant de gens offensent Dieu en ces mesmes choses, comme nous l'auons offensé, pourquoy ne trauaillons-nous de tout nostre pouuoir, qu'elles soyent ostées? Dieu par sa grace nous doint plus pleine cognoissance de sa sainte volonté comme il nous la manifeste par sa parole, pour nous ranger pleinement par icelle: à fin que nous ne regardions pas tant comment nous pourrions defendre cecy ou cela, & monstrier comment il est loisible, mais que nous regardions seulement ce qui edifie ou ruine: car tous n'ont pas tant de sauoir les vns que les autres. l'ay touché au doigt, & veu tout clairement ce que ie dy, voire en cęs-la mesmes qui auoyent receu l'Euangile, & qui auoyent en detestation l'idolatrie. Les vns avec ioye & louange de Dieu voyoyent la ruine des images, & les autres en auoyent pitié, & comme estans reprins ont confessé que la veuë les esmouuoit tellement, comme si les images eussent quelque sentiment. Parquoy puis apres ils ont confessé par ce qu'ils auoyent senty eus-mesmes, qu'il est necessaire de ruiner telles abominations. Car telles puantises qui ont seruy à Satan, ont tousiours quelque chose à esmouuoir à idolatrie, par le moyen de Satan qui les a introduites. Quoy? à Polignac, combien qu'on ait fait vne estable du lieu ou est l'idole d'Apollo, ce nonobstant aucuns se trouuent qui taschent d'y entrer, & se mettre à ge-

nous deuant celle meschante idole : & pour l'estable & fumier qui est autour, ils ne se gardent de l'honorer.

Comment il se conuient garder d'abolir ce qui est ordonné de Dieu, à cause des abus qui y ont esté commis par les pratiques du diable. CHAP. LVII.

OR combien que tant d'idolatries ayent esté commises à cause des croix & des images, & toutes autres telles choses, & que ie desire que tout cela soit osté, toutesfois ie ne voudroye pas que personne se desbordast, comme i'en ay veu desborder plusieurs, qui à cause des abus commis en la predication, & és Sacremens, & en la lecture de la sainte Escriture, & en l'exposition d'icelle, ont esté si hors du sens, & tant destournez de tout bien, par l'instigation de Satan, qu'ils ont voulu que tout fust osté. Et n'a pas tenu à eus que tout le ministration de l'Euangile n'ait esté du tout aboly en l'Eglise Chrestienne. Car tant s'en faut qu'il le faille ainsi faire, que mesme rien ne doit estre osté de tout cela, mais doit seulement estre remis & tenu en sa vraye pureté. Car combien que les plus grans seruiteurs de Dieu, pour le zeile qu'ils ont eu à la gloire d'iceluy, ayent fait abbatre tout ce qui n'estoit point ordonné pour le seruice d'iceluy, & qu'ils ayent fait tout deuoir de n'en laisser rien, toutesfois ils n'ont iamais rien osté de ce que Dieu auoit ordonné. En quoy nous les deuons suyure, tant en destruisant d'un bon zeile, ce qui est mau-

uais, qu'en receuant ce qui est bon & de Dieu. Car cela est la vraye reigle, laquelle il conuient suyure en toute vraye reformation de l'Eglise & de la vraye religion. Nous voyons à propos de ce que ie dy, que nul des seruiteurs de Dieu n'a iamais tasché à destruire le temple edifié par le commandement de Dieu, ne chose qui fust commandée de Dieu, pour auoir lieu en ce temple, soit ce sacrifices ou autres telles choses. Iamais aucun d'iceus ne defendit de lire la Loy & de prescher, mais seulement ont nettoiyé le temple, & osté tout ce qui estoit contre l'ordonnance de Dieu, commandans qu'on sacrifiait selon que Dieu l'auoit commandé, & que la Loy fust purement preschée. Ainsi en la lumiere de l'Euangile, en ostant tout ce qui n'est pas purement de l'Euangile, il faut trauailler non point à oster la predication de l'Euangile, mais qu'on regarde seulement que la predication soit pure & droitement Euangelique, voire ayant plus de lieu que iamais. Et quant aus Sacrements aussi, qu'on aduise de les auoir tous purs & nets, n'ayans que ce qui est de l'Euangile, & qu'ils soyent plus sainctement frequentez que iamais, & que la saincte Escriture soit plus leuë, & soit plus déclarée que iamais elle ne le fut.

De ceus qui se sont bien declarez en ce qu'ils ont escrit de la croix : & de la superstition qui a esté en ceus qui se sont amusez apres les choses qui ont quelque forme de croix : & du signe du fils de l'homme qui doit apparoirstre au ciel. CHCAP. LVIII.

Chrysost. in
epist. ad Gal.
cap. 6. To. I.

IL n'est ia besoin que i'expose plus amplement le demeurant que les Anciens ont dit de la croix, à sauoir comment aucuns l'ont appelée le fondement de l'Eglise, & luy ont baillé tous les titres, & tout ce qui appartient à Iesus Christ, entant qu'il nous sauue & nous conduit & gouuerne. Ie desire-roye grandement que tous ceus qui en parlent ainsi, se declarassent comme Chrysostome s'est déclaré, quand il dit du saint Apostre, Qu'est ce qu'il se glorifie de la croix? C'est que Christ a pris pour moy la forme d'un serf, & a souffert pour moy ce qu'il a enduré, voire pour moy qui estoie serf, ennemy, ingrat : mais il m'a tellement aymé, qu'il s'est donné pour moy. Il est icy tout clair qu'il ne parle & ne rapporte pas le nom de la croix, ny au bois, ny au signe, ny à la figure, ny à autre chose, sinon à Iesus Christ. Et si tout ce que les Anciens ont dit de la croix, se pouuoit aussi bien & si facilement entendre de Iesus Christ crucifié, comme cecy, ie ne voudroye point ouurir la bouche sinon pour louer & priser tout ce qu'ils en ont dit. Mais quand ie voy qu'ils tirent au bois & aus pieces d'iceluy, & à la figure, & qu'ils regardent tout ce qui a quelque figure de la croix, ie ne les puis

louer ny approuuer. Car ils s'arrestent à ceste figure, en toutes les choses esquelles il semble qu'il y ait quelque semblance & forme de croix, soit ce és charrettes, charues, araires, nauires, au ciel, ou en la figure de l'homme, voire és idoles. Et à cause de cela ils disent que par la croix la terre est labourée, le ciel est gouuerné, la mer est diuisée, & tant d'autres semblables propos, qui sentent trop plus vn sot mathematicien, qui ne se contente point de faire seruir les figures és choses à quoy elles sont ordonnées, qu'un bon theologien qui applique les choses comme il les faut appliquer selon Dieu. Car ils veulent deifier les choses insensibles, & par icelles parler des choses qui ne peuuent estre cognues, & ne doyuent estre touchées, sinon par ce qui est reuelé és saintes Escriures. Et pource ie dy à bon droict, qu'ils ressemblent plus non seulement à des mathematiciens fantastiques, mais aussi à des magiciens, qu'à des droits theologiens. Car il ne se faut pas ainsi permettre en l'Eglise du Seigneur, ne quand nous parlons de luy, tout ce qui nous vient en fantasie. Et à mon iugement, il me semble qu'en ce passage de l'Escripture, auquel il est dit, que lors que Iesus Christ viendra en iugement, le signe du fils de l'homme apparoiſtra au ciel, n'est pas mal déclaré par celuy qui reprend ceus qui pensant que la croix de Christ sera monstrée au ciel. Sur quoy il dit, que c'est plus au vray d'entendre que ce sera Iesus Christ luy-mesme en son corps, ayant les tesmoignages de sa passion. Ce bon personnage qui ex-

Mat. 24. c.

*In opere imperfecto in cap. 24.
Matth.*

*Marc 13. c.
Luc 21. f.*

pose ainsi ce passage, est assez ancien. Car combien que le nom d'iceluy ne soit pas exprimé en l'œuvre qu'il a fait, appelé L'œuvre imparfait sur S. Marthieu, il appert toutesfois par ses escrits, qu'il a esté fort homme de bien, & plus pur en doctrine que Chrysostome mesme, auquel cest œuvre est communément attribué, comme s'il en estoit l'auteur, & aussi que plusieurs autres des Anciens; qui neantmoins sont fort renommez tant entre les Grecs qu'entre les Latins. Et quant au propos sur lequel nous sommes à present, nous pouuons encore alleguer pour confirmation de ce qui a esté dit, que les autres Euangelistes, en amenant ce qui est icy dit, mettent qu'on verra le fils de l'homme venant és nuées du ciel. Et la droite voye d'exposer l'Ecriture, est de declarer vn des passages par l'autre, en conferant vn lieu avec l'autre. Et là ou nous ne pouuons donner exposition d'vn passage par l'Ecriture, il ne nous faut point auoir vergongne & honte, de dire que nous ne sauons & n'entendons pas ce passage. Ceus qui sont autrement sont fort temeraires, singulierement és lieux & passages esquels ceus qui taschent à les exposer, les tournent à autre sens qu'il ne faut : & par tel sens qu'ils leur baillent, ils n'ont point de honte de contreuenir à l'honneur de Dieu, & au salut du prochain. En quoy il y en a tant qui ne regardent rien, sinon de dire & escrire comment que ce soit.

De la

De la superstition de ceus qui cherchent le signe de la croix és lettres, & notamment en T, & de ceus qui ont esté signez au front. CHAP. LIX.

AINSI donc que plusieurs des Anciens, par l'affection qu'ils ont eüe de magnifier la croix, ont regardé tout ce qui en auoit la figure, & sur ce ils ont parlé comme chacun le peut voir, & aussi les fruits qui en sont venus, ils ont aussi fait le mesme sur les lettres. Car ayans cela en leurs testes, ils ont regardé s'ils pourroyent trouuer aucune escriture, qui seruist à cela : & ont tiré des passages, Dieu fait comment, qui a esté vne lascheté tresgrande. Car combien que cela soit fort bon, de regarder d'une chose, si elle est selon Dieu & bonne, en bien examinant sur cela la sainte Esriture, si elle l'approuue ou condamne : neantmoins c'est vne chose vrayement diabolique, de faire violence à la sainte Esriture, pour affermer ce qu'elle ne contient point, & à quoy elle ne peut seruir : comme nous voyons & en auons l'exemple en la tentation de Satan, tentant nostre Seigneur Iesus Christ. Car nous voyons là comment Satan abuse de l'Esriture, à fin que Iesus Christ delaisast les moyens ordonnez du Pere, & qu'il tentast Dieu, se iettant du haut en bas : & luy promet qu'ainfi faisant, il sentira l'aide & l'assistance du Pere, qui commandera aus Anges de le garder. En quoy il peruertit la sainte Esriture, laquelle ne contient rien moins que ce à quoy Satan la veut

Mat. 4. a. b.

Luc 4. a.

faire seruir, c'est d'estre aidé de Dieu en faisant contre son commandement, en le tentant, & se iettant hors de la voye laquelle il a ordonnée. Ainsi pour vray ie voy qu'il a esté fait de plusieurs pour magnifier le signe de la croix. Car il y a vn lieu *Ezech. 9. b. c.* en Ezechiel, auquel il est commandé que tous ceus qui gemissent & souspirent à cause des abominations de Hierusalem, soyent signez en leurs fronts.

*Tertul. aduers.
Marcio. li 3.*

Vn des anciens, à sauoir Tertulian, dit que pour vray ce signe est la lettre des Grecs, appelée Tau, & que c'est aussi nostre T, figure de la croix, laquelle donnoit à entendre qu'elle seroit par cy apres en nos fronts, en la vraye & catholique Hierusalem. Et en cecy, d'un signe il en fait vne lettre, ou clairement on voit que le Prophete escrit, Tu signeras vn signe. Et quand'on prendra ce signe, pour la lettre derniere des Hebrieus, quel propos y a il de dire que ce soit vne lettre Grecque, & de s'arrester sur la figure de la lettre Grecque, qui est du tout differente à la lettre Hebraique, quant à la figure? combien qu'il y ait quelque peu de conuenance quant au son: mais on n'en parle point en telle matiere à cause du son, mais à cause de la figure, qui en Hebrieu est telle, n, & en Grec telle, τ. Parquoy chacun peut voir comment celuy qui amene ce passage parlant du τ Grec, au lieu du n Hebraique, fait qu'à bon droit on se mocque de luy, comme de celuy qui n'a veu ny entendu le passage, & qui parle temerairement, sans sauoir ce qu'il dit. Car si nous suyons ce que la lettre contient, il est seulement dit, qu'un signe

soit signé au front. Puis donc que le Prophete qui a la reuelation & la vision de Dieu, ne dit point quel signe doit estre signé és fronts, quelle folie est ce de dire, voire de sa teste, sans auoir aucun passage de la sainte Escriture, ce que le saint Esprit n'a pas dit par le Prophete? Auons nous peur & honte de confesser que nous ne sauons en la sainte Escriture, ce que le saint Esprit ne nous y apprend & ne nous y enseigne point? Certainement ceste arrogance est trop desbordée & trop lasche, d'entreprendre ainsi sur la sainte Escriture, sur les Prophetes & Apostres. Et m'estonne grandement de la bestise & asnerie tant orgueilleuse & outrecuidée de ces temeraires, qui osent affermer que le rauissement de saint Paul, & les paroles secretes lesquelles il n'est licite à l'homme de dire, 2. Co. 12. 4. ont esté reuelées à aucuns refueurs, qui ont parlé de ce qu'ils ne sauoyent que c'estoit, ne dequoy ils parloyent, ne se contentans point de dire ce qui appartient à nostre salut, ce que le saint Apostre dit, qu'il a tout manifesté, & qu'il n'a rien laissé 45. 20. f. qu'il n'ait reuelé tout le conseil de Dieu.

De la vraye marque de l'Eglise, & du vray signe duquel les fideles doyuent estre signez. CHAP. LX.

OMAVDITE presumption des hommes. Car il est bien vray-semblable qu'en la vraye & catholique Hierusalem, il y ait d'autres marques que celles que nostre Seigneur Iesus Christ a si euidemment commandées & ordonnées: comme est la

*Ezech. 11. d.
36. f.*

saincte predication de sa vraye, pure & droite parole, laquelle ses brebis oyent, & aussi le saint Baptesme & la sainte Cene. Ces personnages desquels i'ay parlé, auroyent beaucoup plus d'apparence qu'ils n'ont, s'ils eussent regardé à ce qu'aucuns ont dit, à sauoir que par ce n'est donné à entendre תורה Thorah, qui signifie la doctrine, voire la pure doctrine de Dieu, en laquelle ceus la pensent nuit & iour, qui sont separez de toutes autres doctrines. Ce que nostre Seigneur a promis de faire, en ostant le cœur de pierre & endurcy, & donnant vn cœur nouveau de chair, auquel il escrira sa doctrine, faisant qu'on le craindra & le seruira. S'ils eussent pris les paroles du Prophete en ce sens, sans vouloir astraindre personne à le receuoir comme le vray sens de ce passage, mais l'eussent seulement proposé comme doctrine qui est vraye, leur doctrine seroit à supporter. Car cela vaudroit autant comme s'ils disoyent que ceus qui ont la doctrine de l'Euangile engrauee & imprimée en leurs consciences, par vraye foy & par le saint Esprit, ne seront point frappez à la mort, mais en seront deliurez : certes personne ne pourroit parler contre vne telle doctrine. Et vne telle exposition n'a que faire de la figure de la lettre grecque. Car elle se prouue assez par des autres passages de la sainte Escriture : & bien respond que la figure soit escrite au front, qui signifie la principale partie de l'ame & de la conscience, laquelle est lors bien rangée, quand elle est conduite par la doctrine de Dieu : comme aussi le

cœur est bien gouverné, quand il est conduit par la parole de Dieu.

D'ou la croix peut prendre la vertu qui luy est attribuée par les superstitieux & idolatres, & de la comparaison de la croix avec la coronne de Iesus Christ.
CHAP. LXI.

ABON droict on peut demander d'ou viennent tant de louanges, & qu'on a tant attribué au bois de la croix, & à toutes les pieces d'icelle, & aus autres bois faits en forme de croix & à toutes autres sortes de croix, voire mesme au signe de la croix qui sera seulement fait en l'air, en remuant la main. D'ou vient aussi cela, que tant les Anciens, que ceus qui sont venus apres eus, ont plus baillé & attribué à la croix & au signe d'icelle, qu'à point d'autre chose, voire iusques à dire qu'elle doit estre adorée de la mesme adoration que Iesus Christ? Car de dire que cela est à cause de la figure qui a ceste vertu, ce seroit plus enchanterie, & vraye charmerie (comme telle doctrine de la vertu de la croix est) que doctrine de Dieu. Et s'il est question de la figure, la corone d'épines deuroit auoir plus de vertu, & le signe d'icelle deuroit estre plus puissant. Car la figure est plus grande & plus parfaite, comme la raison en iuge, que celle de la croix. Et de dire que ce n'est pas de la figure, mais de la vertu de celuy qui est mort en la croix, d'autant que la croix a touché ce precieus corps : voicy vne theologie bien papale, pour

nous destourner & empescher de tirer au ciel, & de chercher Iesus Christ là ou il est, pour en estre participans en la vertu du saint Esprit, pour lequel nous enuoyer il a falu que Iesus Christ soit monté au ciel, & qu'il ait laissé le monde, à fin de retirer nos cœurs du monde & des choses corruptibles. Puis donc qu'ainsi est, quelle raison y a-il que nous soyons amusez par telle doctrine papale, à tout ce qui aura touché Iesus Christ, voire à ce qui luy aura donné douleur, torment & angoisse, & singulierement en sa passion? Et par ceste raison la couronne de Iesus Christ, & le signe d'icelle doit auoir plus de vertu pour chasser les diables & pour nous garder, que la croix. Car la couronne a touché Iesus Christ de plus pres, & en la partie, la plus excellente de son corps, & plustost, & a plus longuement tormenté Iesus Christ, & y a plus demeuré que le bois de la croix. Car la couronne a percé le chef de Iesus Christ, auant qu'il ait esté condamné & mis en la croix. Et le corps de Iesus Christ a plustost esté retiré de la croix, que la couronne n'a esté ostée du chef d'iceluy. Partant la couronne doit plus auoir de vertu & d'efficace que la croix. Parquoy au lieu de signer de la croix le front, le corps, les lits, & toutes autres choses, il faudroit faire le signe de la couronne, tant en la teste, comme les moines & les Euesques le portent, qu'au corps & aus autres choses.

Des clous de Iesus Christ, & de la comparaison d'iceus avec la croix. CHAP. LXII.

ET qu'est ce qu'on ne dira des clous? Car non seulement ils sont entrez en vne partie du corps de Iesus Christ, & l'ont touché, & ont seruy aus douleurs tres-griefues lesquelles il a endurées, mais aussi en perçant pieds & mains, ont plus tormenté ce precieus corps que tout le reste. Car ils ont esté fourrez en la chair & és os d'iceluy, & ont esté trempéz au precieus sang de Iesus Christ. Il s'ensuyuroit donc par telles raisons, qu'on deuroit plus vser des clous en toutes choses, & faire le signe d'iceus par tout, que celuy de la croix. Et ceus qui louent tant Helene sans raison, au lieu de la condamner iustement, & de la reprendre amerelement, n'ont point laissé en arriere les clous desquels Constantin (comme ils escriuent) a fait faire des mors de cheual. Ceus-cy mesmes font seruir la prophetie en laquelle il est parlé des colliers & des bardes des cheuaus, qui seront dediez à Dieu pour tels mors de cheuaus. Et des autres clous qui sont demeurez de reste, ils disent qu'il en a armé son heaume pour la guerre. Et ainsi tout auroit esté employé. Et vn autre dit que par vne puissance inuisible, ces clous tormentent les diables : voulant monstrier que non seulement la croix a esté en honneur par ce que Helene a fait, mais aussi les clous, l'vn estant mis au mors du cheual, & l'autre en la coronne de Constantin : & le tiers fut ietté dedans

la mer Adriatique, pour l'appaiser. Que ceus qui sauront & pourront, ioignent ces pieces ensemble, avec ce qu'on tient des clous en tant de parts, tant en France qu'en Italie & Allemagne. Car on trouue tant de clous qu'on fait adorer, comme estans de ceus desquels le corps de Iesus Christ a esté percé, qu'il y en a assez pour ferrer & clouer vne grande quantité de charrettes. Mais quelque chose qu'il y ait, ne les clous, ne le signe d'iceus, ne sont point paruenus en telle estime comme la croix & le signe d'icelle. Et toutesfois ie ne voy rien qu'on puisse amener de la croix & du signe d'icelle, qui n'ait autant & plus de lieu és clous. Et comme ie puis entendre, il ne tient point à la diligence, ny à l'auarice de ceus qui ont escrit comment les clous ont esté employez, & qui en ont forgé d'autres pour les faire baisser & honorer. Ce qu'ils ont fait contreuenans non seulement au pur commandement de Dieu, par lequel il est defendu de proposer aucune chose pour y dresser seruice de Dieu sans sa parole, comme il est aussi en la croix, mais contreuenans aussi aus histoires & aus Anciens. Et ne faut pas laisser en arriere celuy d'Aix, en Allemagne, qui sert à percer les pieces d'or & d'argent, à fin qu'on ne pense que les prestres d'Allemagne soyent sans esprit. Car ce clou en transportant & donnant grande vertu (comme ils disent) par l'attouchement qui en est fait, à la piece d'or & d'argent, il fait qu'une partie de la piece demeure aus prestres: tellement que iamais clou ne crochet ne seruit mieus pour auoir argent.

Mais

Plat. in vita Syl-
uest.
Sabell. Ennea.
7. li. 8.

Mais ne nous arrêtons pas à conferer la croix & le signe d'icelle, à autre chose qui semble auoir plus d'apparence d'estre plus prisee & honorée que la croix: mais regardons de tout par la pure parole de Dieu, & n'en parlons & n'en tenons autrement que contient la parole de verité, sans en faire ne dire ou penser autrement que ceste parole de salut contient.

Des proprietéz attribuées à aucunes croix, par la superstition & idolatrie des Papistes, & du tesmoignage des prestres en cela. CHAP. LXIII.

IL seroit expedient pour plus esueiller le monde tant endurcy en toute superstition & idolatrie, & és tenebres d'erreur, de mettre en auant comment on vse du signe de la croix, tant en le faisant de la main, qu'en le tirant en escrit & en portraiture, & à quoy & comment on le fait seruir. Il seroit pareillement expedient de faire le semblable des croix qu'on a faites, & du seruice diuin qu'on a dressé en l'honneur d'icelles, & des fondations des Messes, & des prieres lesquelles ils appellent Heures, & des festes, des vogues, des assemblées, des adorations, des autels, des chapelles, des temples, des conuents, des sectes, lesquelles ils appellent Religions. Mais qui trouueroit fin en cecy, & qui le pourroit croire? Il n'y a personne qui ait quelque peu de iugement, qui ne s'estonne, oyant parler de l'idolatrie des anciens qui estoient auant l'aduenement de Iesus Christ: & à bon droit.

K.

Mais qui regardera bien le Pape & les siens, & ou ils nous ont menez, il verra tout clairement, & touchera de ses mains, s'il veut, combien nous auons surmonté tous ceus qui onques furent, & cognoistra manifestement que iamais ne fut si grande idolatrie, ne si sorte, ne tant contre Dieu, que celle de la papisterie. Et quand ie pense bien là ou i'en ay esté moy-mesme au parauant, horreur me prend, veu les Heures, les prieres & les seruices diuins que i'ay faits & fait faire à la croix, & à autres telles choses, contre le commandement de Dieu. Et si lors Satan ne m'eust du tout creué les yeus, ce que ie faisoie & que ie voyoye me deuoit bien monstrier & faire cognoistre combien i'estoye hors du droit chemin. La premiere notable idolatrie de laquelle il me souuienne, & le premier pelerinage auquel i'ay esté, a esté à la sainte croix qui est en vne montagne aupres de Tallard, au diocese de Gap, laquelle (comme on dit) sert à recouurer la veuë: & le lieu a le nom de la croix, comme plusieurs autres: & dit-on qu'elle est du propre bois de la croix en laquelle Iesus Christ a esté crucifié. Et le bois d'icelle croix est de couleur de cendres, & est vn bois tout rude, lequel n'est rien applany: & est du tout contraire à la croix que i'ay adorée & baisée à Paris, au lieu qu'on appelle, La sainte chapelle: & aussi à ce qu'on m'a monsté en des autres lieux: & ne pense point qu'il y ait vn seul des bois que i'ay veus, qu'on dit estre de la croix, qui ressemble à l'autre, & qui soit d'une mesme espee de bois. Ceste

croix de laquelle i'ay tantost parlé, & le bois d'icelle, est garny de cuyure, & est lié avec vn fil d'archal, tout rudement, sans aucun artifice: & tout cela (comme ils disent) sert à la saincteté. Car si le bois est sainct, le cuyure aussi l'est, selon le dire des prestres: car ils disent qu'il est du bassin de quoy nostre Seigneur laua les pieds à ses Apostres. Mais le fil d'archal ne conuient point, combien qu'au bois & au cuyure il y ait grande ceçure, comme dit le prestre. Car combien qu'on ait voulu transporter icelle croix en autre lieu, & bien enfermer, neantmoins elle retourne tousiours en son lieu. Mais ie me confie qu'on verra en brief d'auantage sur ceste idole de laquelle ie parle, que ce que i'ay veu touchant nostre dame de grace de Geneue, & nostre dame de Lausanne, & la saincte croix, qui (comme on disoit) faisoient tant de miracles.

D'aucuns miracles touchant aucunes croix, selon le tesmoignage des prestres, & des illusions du diable en telles choses. CHAP. LXIII.

OR suyuant ce que i'ay commencé à dire, touchant celle croix qui estoit au diocese de Gap: le prestre nous disoit que quand aucun mauuais temps venoit, toute la croix fremissoit: mais sur tout cela aduenoit à vn petit crucifix mal en ordre. qui estoit en la croix, tiré & pourtrait comme par mocquerie. Ce crucifix, comme le prestre le disoit, se mouuoit tellement, qu'il sembloit qu'il se deust

destacher de la croix, comme voulant cotrir contre le diable. Et d'auantage il disoit que ce crucifix iettoit des estincelles de feu, affermant que si cela ne se faisoit, il ne demeureroit rien sur la terre, que tout ne fust gasté. Et là nous aduint, pour plus estre entretenus & maintenus en idolatrie, voicy vne ieune femme, ayant autre deuotion que la croix, laquelle portoit son petit enfant couuert d'un linceul, & puis voicy le prestre qui vint au deuant à tout la croix, & vous prend la femme avec l'enfant, & les mene dedans la chapelle. l'ose bien dire que onques danseur ne print femme, & ne la ména faisant meilleure mine que ces deus faisoient, mais l'aveuglement estoit tel, que ne le regard de l'un & de l'autre, & mesmes quand ils eussent fait des attouchemens tout puans, tout nous eut esté bon & sainct. Car lors tout estoit saincteté, tout estoit miracle tresgrand. De s'en enquerir, si hardy : car nous eussions tous esté damnez. C'estoit trop que la femme & mon galant de prestre sauoyent bien le miracle, & auoyent la belle couuerture de leur uisitation. Mais il y auoit bien vne autre chose, où Satan auoit besongné, par le moyen d'un homme qui seruoit grandement à telle idolatrie, lequel Satan auoit touché en ses deus yeus, par maille blanche. Iceluy estant en ce lieu, pouuoit bien voir tant que le territoire dure, mais en sortant il ne voyoit goutte, comme il disoit. A le voir il faisoit frayeur. Car on voyoit les mailles blanches sur les deus prunelles des yeus, soit qu'elles y fussent en verité, ou que Satan les

fist apparoiſtre, comme les enchanteurs ſont apparoiſtre ce qui n'eſt pas. Tout cecy nous eſtoit vn grand miracle. Et ceſt homme eſtant coquin en ce lieu-la, auoit tant fait, tant par beliftrerie que autrement, qu'il auoit acqueſté plus que homme qui y fuſt, & eſtoit tres-bien d'accord avec le preſtre: & ne fit pas comme l'aveugle de ſainct Renaud fit à Paris; lequel gaſta tout: & auſſi il n'y auoit pas alors gens pour deſcouvrir les aſtuces & tromperies de Satan. De moy i'eſtoye fort petit, & à peine ie ſauoye lire. Mon pere & ma mere croyoyent tout. Et le plus ſauant qui aſtoit la charge de l'eſcole, eſtoit auſſi habile comme Reiolis. De ſauoir qui ſont les vrais miracles, & à quoy ils ſont faits, & qui ſont les faus, & à quoy ils ſeruent, nous y entendions tous autant que des pources beſtes. Car ſi Ieſus Chriſt & ſes Apoſtres euſſent fait tels miracles, & qu'ils n'eueſſent autre euidence, & qu'ils euſſent ſeruy à autre qu'à induire les hommes à croire à l'Euangile, pour vray tous euſſent eſté faus, comme ſont tous ceus qui ſont faits à ceſte croix, & tous autres qui ſont amenez par l'Antechriſt & les ſiens, à fin que la ſaincte Eſcriture ſoit accomplie en luy, de la ſeduction faite par faus miracles & ſignes. Car à ce ſont ordonnez & faits tous vrais miracles. Le preſtre forgeoit les menſonges, & ce coquin les emmanchoit, & faiſoit qu'ils pouuoient ſeruir. Les gens par ce pays craignent les tempeſtes & tonnerres. Or il n'y a lieu ou la tempeſte & le tonnerre face plus de mal, & ou il tombe plus ſouuent qu'en ces lieux-la: & le

2. Theſ. 2. 2.

prestre afferme que ceste croix mene bruit, & que ce crucifix iette des estincelles de feu contre le mauuais temps. Et nous oyans cela, & pensans pour lors que les diables fissent la tempeste, & les gresles, & les foudres, comme on le dit des forciers, ne regardions & ne pensions point que selon le dire du prestre, il falloit conclurre que le diable estoit plus puissant, & qu'il auoit plus de vertu que celle tant sainte croix, & qu'il la faisoit bien mieus sentir. Ceste croix, selon le dire du prestre, fremissoit dedans l'armaire, mais personne n'en fauoit & n'en voyoit rien, sinon le prestre, comme il le disoit luy-mesme, & aussi son forcier qui disoit ouy. Et si le diable tonnoit, & que ce ne fust point Dieu par sa vertu, comme il est, non seulement vn prestre avec son compagnon l'orroyent, mais (comme il aduient ordinairement) il faut que tous l'oyent, vueillent-ils ou non, & mesme que les plus endormis en soyent esueillez. Le prestre dit aussi que ceste croix, quelque fermeture qu'on y mette, s'en sort pour venir en son lieu. Mais cela se fait paraenture, pource qu'elle aime les montagnes, pour estre mieus assuree de la Durance, qui est vn fleuve fort impetuëus. Si ainsi est, comment ne sort-elle de l'armaire, pour combattre contre le diable, & pour le chasser? Dequoy sert-il qu'elle se tormente & fremisse en l'armaire? Et ce Crucifix qui iette le feu, dequoy sert-il de laisser ainsi tempester & foudroyer ce pource pays? Car là ou il n'y a point de sonnement de cloches, ny de coniureurs de temps, ne saint ne sainte,

ne croix ny autre chose pour garder le temps, il n'y a comme point de tempestes, au pris des lieux qui sont pres de ceste sainte croix: & ne doute point que tout ce que ce prestre en dit, soit autre chose que mensonge. Et si nous pouuions entendre que ce Crucifix iettoit du feu contre le mauuais temps, comme resistant aus puissances de l'air, si son iettement estoit de Dieu & miraculeus, il seroit trop plus euident, & de plus grande efficace, que ce qu'ils disent estre des malins esprits, d'autant & plus que les signes de Moyse ont surmonté les enchanteurs, & que les miracles de Iesus & de ses Apostres surmontent les mensonges & les faussetez du Pape, des prestres, & de toute la papisterie, qui par tous moyens taschent à ruiner toute verité, & à renuerfer tout par mensonge. Mais encore ils sont à croire de ce qui se fait par medecine, que ce sont miracles: comme les miracles qu'on dit de saint Main, & de saint Antoine, sont miracles des medecins. Et ces meschans s'aidans de la medecine, qui est vn don de Dieu, meslent l'idolatrie parmy, à fin que le don de Dieu serue au diable & à idolatrie. Car le regime qu'ils donnent sur le viure, & le ius des herbes, seruent à recouurer la santé. Et autant en y a en ce qu'on fait à saint Hubert, & autres semblables: mais ie laisse cela aus medecins, qui ne doyuent point souffrir qu'un tel don de Dieu soit ainsi souillé ny administré par idolatrie: mais le doyuent faire seruir à Dieu, & au bien & au profit du prochain, qui estant secouru par les bonnes creatures de Dieu,

en loue; serue & prise Dieu, luy rendant graces, sans commettre aucune idolatrie.

Comment Dieu ne veut point qu'on suyue autre reigle au service diuin, sinon celle que luy-mesme a donnée par sa parole : & de la vengeance de Dieu contre ceus qui font au contraire. CHAP. LXV.

IL reste donc que nous qui sommes tant pources creatures considerions bien qui nous sommes, veu que nous n'auons aucun estre, vouloir, sauoir ne pouuoir, s'il ne nous est donné de Dieu, & qui apres auoir receu de Dieu, s'il luy plaist nous donner aucun bon vouloir, & nous donner sauoir & pouuoir, encore nous sommes tant pources & si maladroits, & tant corrompus de nostre nature, que si Dieu de sa grace ne nous conduit & gouerne, il n'y a rien que nous ne peruertissions & n'employions contre Dieu, contre son honneur & gloire, à nostre grand dommage, à la ruine & grand esclandre des autres. Parquoy entendans & cognoissans cecy, il reste que nous ne suyuios plus nous-mesmes, & que nous ne facions rien de nostre teste, ne suyans la teste d'autrui. Et d'autrepart considerons la grandeur, la hautesse & maiesté de Dieu, à laquelle il n'y a aucune simple & pure creature qui puisse respondre. Car tout est trop bas entre les creatures pour pouuoir tirer si haut. Pourtant la grandeur treseminente de Dieu, n'a iamais laissé en la liberté de la creature, de se gouverner au seruice de Dieu, comme il luy sembleroit: mais a
toufours

toufiours donné loy & reigle par laquelle il veut eſtre ſeruy. Car il veut eſtre obey & ſeruy par ſon commandement, qui ſoit fait & tenu en vraye foy. Et pource il a toufiours condamné, & condamne, & condamnera tous ceus qui l'ont ſeruy, & qui le ſeruiront par autre doctrine, & par autre obſeruation que celle qu'il a commandée. Et ne doutons point que tant plus Dieu ſe manifeſte à ſes creatures, & tant plus il demande cecy d'icelles. Parquoy il ne faut point douter que tant plus il ne demande en la tres-claire manifeſtation de ſon propre fils Ieſus Chriſt, en la reuelation de l'Euangile, que tous luy rendent obeiffance ſelon l'Euangile. Et ſ'il y a des grans tonnerres & merueilleux foudroyemens ſur les faus-prophetes, & ſur les peuples & princes qui ont delaiſſé la pureté de la loy de Dieu, & ont ſuyuy leurs fantasies & inuentions, & ſi groſſes vengeanceſ en ſont aduenues ſur tous, il n'y a point de doute que la tranſgreſſion, le meſpris & rompement de l'Euangile n'a rien moins, mais beaucoup plus, ſi on regarde de pres ſur les eſpouuantables malediſtions qui ſont iettées ſur les faus-prophetes, ſur les faus-chriſts, ſur l'Antechriſt, ſur tous ſeducſeurs, & ſur tous ceus qui croyent en eus: & ſi on regarde la vengeance qui a eſté ſur toute la terre, & tant & ſi long temps. Et d'autant que Ieſus Chriſt eſt le roy de miſericorde, de douceur, de benignité & de verité, & qu'il eſt roy ſpirituel, celeſte & eternal, le monde incontinent ſe reuoltant de ce bon roy de juſtice, s'eſt ſoumis au fils de perdition, à ſauoir

au Pape, comme il est aduenü à l'Euangile, és pays ou nous sommes, comme les autres en ont pris d'autres, esquels Satan a besongné: mais il a ouuré en eminence au Pape, comme au vray & droit fils de perdition, en l'homme de peché: & par ce aucteur d'ire, de cruauté, & de toute malignité, n'estant que mensonge & seduction, vn droit & cruel tyran spirituel, qui sous le nom & le titre de Iesus, prend & vsurpe tout en la Chrestienté, gastant & ruinant tout. Et iamais telle & si longue vengeance ne vint sur la terre.

Comparaison de la captiuité du peuple d'Israel sous les Babyloniens, & de celle des Chrestiens sous l'Antechrist. CHAP. LXVI.

ET tant plus l'ame surmonte le corps, & les choses spirituelles surmontent les corporelles, & tant plus ceste vengeance surmonte toutes les autres. Car quels meurtres d'ames a fait l'armée de l'Antechrist, & par combien de temps? Qu'on regarde tout ce qui est aduenü à Israel & à Ierusalem, par tous ceus qui sont venus contr'eus, s'ils ont iamais esté ainsi ruinez ny exterminiez, ne si tost, ne si longuement tenus en captiuité comme la plus part de la Chrestienté. Considerons la plus grande desolation qui ait esté entre le peuple d'Israel, de laquelle les Prophetes, regardans plus à l'Antechrist qu'à icelle, ont prophetisé par menaces tant ameres, à sauoir la captiuité de Babylone. Mais quoy? Elle n'a duré que 70. ans. Mais la

grande, horrible, & espouuantable captiuité papale, combien a-elle duré? En quel estat a esté la Chrestienté, & en quel estat est-elle encores à present? Et maintenant qu'il plaist au Seigneur Iesus se manifester par l'Euangile, regardons quel langage on parle. Regardons s'il est langage vrayement du peuple de Dieu, & s'il est Chrestien & Euangelique. Si on y regarde bien, on y trouuera tant de la barbarie papistique, & tant meslé de la doctrine charnelle & humaine, que le plus souvent nous oyons parler des prestres & des moines papistes, qui tiennent tant de la peruerse doctrine de l'Antechrist, qu'ils sont plus seducteurs papistiques, que purs prescheurs Euangeliques. Les Baptesmes & les Cenes sont entre aucuns tant brouillez, qu'ils tiennent plus des enchanteurs & charmeurs du Pape, & de toutes leurs diableries, de Messes & renoncement de Dieu, qu'ils ne tiennent de la sainte institution d'iceluy, & de la pureté en laquelle Iesus Christ a receu le saint Baptesme, & en laquelle saint Iean & les Apostres l'ont administré, & que les escrits d'iceus ne contiennent: & que la sainte Cene n'a esté instituée comme la sainte Escriture le contient. Car au lieu de regarder à Dieu & à sa parole, on regarde à soy-mesme, à sa raison, & à ce qu'on iuge que ainsi seruir Dieu, sera plus en edification. Car (comme il nous semble) nous voyons mieus ce qui sert à edification, que Dieu mesme. Car selon nostre aduis, l'ordonnance de Dieu gardée purement, ruinera tout: mais nostre prudence par dessus Dieu, edifiera.

De la vraye restauration & reformation de l'Eglise.
CHAP. LXVII.

D'OV vient cela qu'on ne procede si purement à la restauration du temple & de la sainte cité, comme il faut, en chassant tout ce qu'il faut chasser, & maintenant seulement ce qu'il y faut mettre? Qui est la cause que ceus qui doyuent icy trauailler, n'y besongnent comme il conuient, mais sont apres eus, & leurs affaires, laissant l'œuvre de Dieu, disans qu'il n'est pas encore le temps? Nous voyons qu'il en reste tant qui n'ont aucun lieu en l'Eglise du Seigneur. Pourquoi est-ce donc que nous ne bastissons, & que nous ne edifions les viues pierres comme il faut, en sorte qu'on ne voye du tout rien en ce saint temple de Dieu, & en son Eglise, des abominations de Babylone, mais seulement ce que Iesus Christ a ordonné & institué? Car ce n'est pas chose de petit pris, que ceste maison. Il n'y faut rien dequoy on ne puisse rendre raison que le Seigneur l'a ordonné. Et pour tant chassons toutes charmeries & enchanteries d'eaus, d'huiles, d'images, d'habits, & de tout ce qui n'est point ordonné de Dieu. Que la pure parole de Dieu, & ses saints Sacremens soyent traitez & administrez en toute pureté & en toute simplicité, comme il appartient. Ne soyons pas si fols ne si sots, ne tant arrogans & temeraires, que nous taschions de rendre la parole de Dieu & ses saints Sacremens plus dignes & mieus ornez & qui ayent

plus de grace & d'efficace par aucune chose qui y ait esté adiqustée, ne par chose que nous y puissions faire. Car la parole de Dieu & ses saints Sacremens, ont leur beauté, dignité, pris, honneur, vertu & efficace de luy qui les a ordonnez & instituez & comme d'estre, & d'avoir lieu en son Eglise. Car en cela nous n'y pouvons rien, fors que tout gaster & pervertir de nostre invention. Mais nous devons prendre de la parole & des saintes ordonnances de Dieu, beauté, bonté, excellence, dignité, si nous croyons, comme la parole de Dieu le contient, si nous obeissons à icelle, si nous receuons ce que les Sacremens nous proposent, & si nous tirons là ou ils sont ordonnez de nous mener : & que l'Eglise soit ornée & parée de Iesus Christ & de sa parole Euangelique & des saints Sacremens. Ce grand soleil de iustice Iesus Christ & sa lumiere Euangelique, n'ont point affaire de nos flambes fumantes, & de nos cierges & chandelles. Que la vraye predication ordonnée de Dieu, la nous manifeste, & les saints Sacremens en leur simplicité, & que cela nous serue de toute magnificence. L'Antechrist, qui n'a que toute vilenie, & infection, tenebres & corruption, qu'il cherche & mette tout ce qu'il pourra pour donner lustre à ses diableries. Iesus & sa verité reiette tout cela. C'est assez de luy & de ses ordonnances, sans prendre rien d'autre. Le sauueur Iesus, lequel on cognoit par l'Euangile, par les saintes Escritures, & duquel on est participant, en la vertu du saint Esprit, ouurant par les Sacremens, est le vray

Christ, lequel estant ainsi cognu on ne nie point, on n'en veut point d'autre. Mais celuy qui est cognu par les images, par les croix, & par les signes des croix, n'est point le vray Christ, & n'empesche point de renier Christ, & de recevoir & seruir l'Antechrist. Car toutes ces choses sont vaines, voire maudites, entant qu'on les veut auoir pour seruice de Dieu, comme toutes autres choses lesquelles Dieu n'a point ordonnées. Donc que tel brouillement n'ait aucun lieu en la pureté qui doit estre seule entre les Chrestiens és Eglises de nostre Seigneur, le vray sauueur & redempteur, qui de l'esprit de sa bouche abbat & a desia abbatu, & du tout abbatra soudain ce meschant & maudit Antechrist, & abolira quant & quant toutes les abominations de ceste tant puante paillarde de Babylone, mere de toute confusion. Et pource prions ce bon Seigneur Iesus, qu'il face de tous vne Eglise pure, sainte, & purgée de toute vilenie papale, & de tout ce qu'il n'a pas ordonné: tellement qu'on n'y voye autre que Iesus, & cela seulement qu'il a ordonné, & qu'on le voye simplement & purement comme il a ordonné, tellement qu'estans tous purement en luy, & luy en nous, par la vraye foy, nous seruions & honorions tous ce bon Dieu & Pere, qui vit & regne eternellement avec son Fils & le saint Esprit. Amen.



PREFACE DV TRAITE SVR l'Oraison Dominicale.

Ce traité fut imprimé à Bâle au mois d'août 1524. La première partie de la Préface a été insérée presque textuellement dans un ouvrage publié à Paris en 1524 ou en 1525, sous le titre suivant : *Brefue admonition de la maniere de prier : selon la doctrine de Iesuchrist. Avec une brefue explication du Pater noster. Extraict des paraphrases de Erasme : sur saint Matthieu & sur saint Luc.*

PARREL AVX LECTEVRS.

LE tres-misericordieux Dieu par son infinie bonté nous a montré par plusieurs messaigiers, tant patriarches que prophètes, plains de saint Esprit, sa sainte volenté, pour paruenir à Luy. Et finalement, au temps de la reuelation du tres-grand & tres-hault mystere, qui a esté occulté par temps eternels, il nous a enuoyé son tres-chier filz, vray Dieu & vray homme, Iesus Christ, nostre salueur vnique & seul mediateur, pour abolir tous noz pecchés & nous confermer par sa sainte doctrine en la foy vraye & vifue, plaine de bonnes ceuures.

Et pourtant que la foy ne regarde que l'abyssme de la bonté de Dieu, pendente du tout de la misericorde & benignité de Dieu, vng des plus nobles fructz qu'elle produise, c'est orayson & ele-

uation d'esperit & en entendement à Dieu. Mais pour ce que nous ne sçauons que nous deuons prier, ne comment, comme il est escript aux Romains, le bon Iesus, qui tant s'est humilié pour nous, a voulu nous monstrier la forme & la maniere comment nous deuons prier, nous commandant, que, quant nous voudrons prier, nous prions ainſy : « Nostre pere, qui, &c. » Et pour ce tous Chrestiens en priant ilz doiuent dire ceste orayſon avec vne tres-grande reuerence & humilité de cuer, & vne tres-grande ferueur d'esperit, en pesant tous les motz qui ſont en la dicte orayſon, pour l'honneur de Celluy que l'on prie & qui nous a baillé la forme d'ainſy prier.

Et, iuſques à ces iours, les pources brebis de Dieu ont esté tres-mal inſtruiſtes en la maniere de prier, par la grand' negligence des pasteurs, que les deuoient inſtruire de prier en langaige qu'on entendist, & non pas ainſy ſeulement barboter des leures, ſans rien entendre. Car, comme dit ſainct Paul, ſi ie prie de langue, mon entendement eſt ſans fruit; & pourtant il commande, que tout ce qu'on dit en la congregation des fideles, qui eſt l'eſgliſe, qu'on le die en langaige que tous l'entendent; autrement, qu'on ſe rayſe. Laquelle choſe ſi on euſt obſeruée, iamais ſi grandes tenebres ne fuſſent aduenues; car on prieroit le Pere en foy, ès cieulx, en esperit & verité, & non pas ès creatures, en la terre, chair, & vanité.

Pourtant, affin que vng cheſcun puiſſe prier en ſorte qu'il entende ce qu'il dit, en ce petit Liuret,

urer, que facilement on pourra porter en la main, est l'orayson dominicale & les articles de la foy contenus au Credo, avec familiere exposition de tous deux pour les simples, que ne sont point exercités en la sainte Escripiture, nonobstant qu'il n'aye rien que ne soit tiré de la sainte Escripiture: affin que plus facilement on 'aye intelligence de tous deux, & aussy aucun accès à la sainte Escripiture, que doit estre la table en laquelle tout Chrestien doit prendre sa refection & se regler selon ycelle.

Pourtant, (que) chescun deuotement prie l'infinie misericorde de Dieu, qu'il soit son plaisir nous ouurir le royaume des cieulx par la vraye intelligence des Escripures, laquelle Luy seul donne, & non autre, affin que en tout & partout soions menés & conduictz par Luy, & non autre. Et ainsy nous paruiendrons à la terre de promesse, en la cité de Hierusalem celestiele, avec tous les bienheureux.



EPISTRE A TOVS SEIGNEVRS,

ET PEVPLES ET PASTEVRS A QVI

le Seigneur m'a donné accez, qui m'ont aidé
& assisté en l'œuvre de nostre Seigneur Iesus,
& enuers lesquels Dieu s'est seruy de moy, en
la predication de son saint Euangile, grace,
paix, salut & vie vous soit données.



NOVS deuons grandement louer
& magnifier nostre bon Dieu &
pere, de sa grace plus qu'inesti-
mable, qu'il nous a faite nous
retirant des abismes infernaux
esquels nous estions du tout plon-
gez & enfoncez, tellement qu'il estoit impossible
de penser seulement d'en sortir, car toutes les cho-
ses qui sont pour du tout embouscher vne pource
conscience, afin qu'elle ne voye aucune issue, non
seulement estoient en ceste sedition, mais aussy
tout ce qui peut seruir à y vouloir demeurer, afin
qu'on tienne vne chose bonne, saine & de Dieu,
& qu'on y veuille perseuerer, tout y estoit, & ainsy
il n'y auoit ne pouuoir, ne sçauoir, ne vouloir
aussy de s'en retirer, & tant plus i'y pense, tant
plus ie m'estonne de ceste tant grande deception,
& de l'affection qu'on y a eu. Parquoy l'œuvre
de Dieu est de tant plus grande & admirable, que

l'homme, sans dire autre chose, car assés porte le nom de l'homme, de maux & pouretez, sorte de tels gouffres, & ayant esté tant aueugle, mort & destruiet, qu'il recoiue veüe, qu'il viue & soit remis en estat, qu'il deteste & ait en horreur ce qu'il auoit en si gros prix, & ce qu'il ne pouuoit & n'osoit penser estre sinon digne de tout honneur & le tenir comme chose de Dieu, & de cecy ie n'en parle point comme eleue d'armes, & sçay aussy que vous quant est de vostre part en pouuez rendre bon & fidele tesmoignage deuant Dieu & tous autres, qu'ainsi l'avez senti, & de moy ie l'ay senti en plusieurs qui tant estoient fourrez auant en la papauté & abominations papales, que le commencement de la manifestation des abus du pape a esté sy amer, tant desplaisant & importable que si ne fut la douceur du salut & verité de Iesus Christ auant mise & en apres declairée, certainement il eust fallu que la mort soudainement s'en fut suiue ou vne rage & pleine alienation d'entendement. Mais Dieu de sa grace a fait que tant & plus de ceux qui estoient venus comme loups enragez, & qui autresfois grinçoient des dents & qui comme demoniaques oyoyent parler du pape & de ses erreurs, tant seulement auoir entendu qu'il estoit ainsy & qu'il falloit se retourner à Iesus Christ & à luy seul se tenir, ont esté tellement changez, qu'au lieu du cœur meurtrier, enragé & addonné à toute diablerie, qu'ils auoyent auant la cognoissance de Iesus cogneu, s'en sont retournez comme agneaux doux & amiables, ayans

le cœur du tout retiré du pape & addonné à Iesus Christ. Mais que faut il que ie mette en auant, ce que i'ay veu & autres? Moy, puis ie penser que tous les diables d'enfer ayent plus peu enforcer, ny enchanter vn poure cœur que le mien a esté? Pour vray la papauté n'estoit & n'est tant papale que mon cœur l'a esté, & si n'estoit ce point pour vne affection & desir de vouloir maintenir aucune lascheté ne meschanceté, & que ie prinse plaisir à gens mal viuans en icelle, quand il les pouuoie cognoistre, mais le diable se transfigurant en ange de lumiere me desuoyoit tant & plus de Dieu, de toute verité de la droicte voye, foy & doctrine chrestienne, pour me faire renoncer Dieu & abandonner tous ses principaux commandemens, me faisant prendre, & tenir son seruice diabolique, & y estre tant fourré & enraciné que rien plus, & ce afin que iamais ie n'en peusse sortir. Car tellement il auoit aueuglé mes yeux & peruersti tout en moy, que s'il y auoit personnage qui fut approuué selon le pape, il m'estoit comme Dieu; si quelqu'un faisoit ou disoit quelque chose, d'ou le pape & son estat en fut en quelque mespris, i'eusse voulu qu'un tel, & tout ce qui ne seruoit à la papauté & au pape pour entretenir tout ce qu'il a ordonné en l'Eglise, & tout ce qui tant peu soit contreuenoit au pape fut du tout abbatu, ruiné & destruit. Quoy? Dieu, la mort & passion de Iesus & aucune chose des Apostres & de la sainte Escripiture ne me fut esté rien sinon de tant que le pape en proposoit quelque chose, comme finement

il regarde de prendre en general des sentences & propos tres excellens & tres veritables, afin que puis apres comme le serpent il iette son venin, tuant tout tant qu'il est en luy, & cecy que ie dis, ie le cognoy maintenant non seulement par ce que i'ay creu, tant de la vierge Marie, comme portent les chançons qu'on chante en la papauté, & des autres aussy, singulierement par ce que i'ay creu & iugé des puans corps de plusieurs, desquels l'on peut bien dire, que les ames de telles charongnes sont tourmentees en enfer, & neantmoins on chante qu'ils sont la lumiere des aueugles, la voye des errans, & le salut de tous ceux qui ont esperance en iceux, ce qui seulement appartient à nostre vray Sauueur & Redempteur Iesus, & à nul autre. Mais tres clairement le vois & sens, par ce que i'ay creu de la croix, de ses pelerinages, images, vœux, os, & tant d'autres diableries, esquelles i'ay esté plongé iusques aux abismes de toute iniquité, idolatrie, malediction plus qu'on ne pourroit dire. Mais quand il est question de l'idolatrie de la messe ie ne puis autrement iuger fors que legions innombrables des diables d'enfer, ne m'ayent du tout saisi & rai à eux, pour renoncer plus qu'on ne scauroit dire tout ce qui est de Dieu, tout ce que la sainte Escripiture en contient & commande qu'on tienne & croye, croyant ce que le prestre tenoit en ses mains, & qu'il mettoit en la boite qu'il enfermoit, mangeoit & donnoit à manger, que c'estoit mon seul vray Dieu, & qu'il n'y en auoit point d'autre qu'iceluy ny au ciel, ny en la

terre, pouuois ie plus ouuertement renoncer Dieu, & prendre le diable pour maistre, ne plus contreuenir à toute la parole de Dieu, qu'estant ainsy seduit, endiablé & sy hors de la foy de tenir pour mon Dieu vne chose charmée, & faite tout au contraire de ce que porte la pure parole de Dieu? O que i'ay horreur de moy & de mes fautes, quand ie y pense! Car enfer ne pouuoit plus faire, dire, ne penser contre Dieu que porte ceste abomination pour laquelle, comme vn vray seruiteur du diable, i'ay tant fait, tant souffert en ame, en corps, en bien. O Seigneur, sy mon ame t'eust serui, prié & honoré en vraye & viue foy, en verité de ta parole, comme tu l'as commandé & comme tes seruiteurs fideles ont fait, comme i'ay mis tant & plus mon cœur à la messe, à servir ce morceau enchanté, luy donnant tout honneur, iugeant que ta bonté, sagesse & verité approuuast vne si grande meschanceté, rage & damnable menterie pensant suiure ta droicte foy, combien que ie fusse autant loin d'icelle comme ce Dieu de paste est loin de toy, & en ce ne suiuant que la doctrine diabolique du pape, & faisant tout ce que le diable par luy commande, & comme tous seruiteurs endiablez faisoient, & plusieurs encor font, ie me plaisoye & me tenoye pour ton droict seruiteur, & ceux qui comme moy erroient me voyant en tel estat à cause de telle idolatrie, ils m'aimoyent & m'auoyent en prix & estime, me tenant pour vn personnage du tout addonné à toy & qui bien te seruoit comme ie pensoye estre, en te renonçant &

seruant le diable d'enfer, iugeant que i'estoye bien digne, & que tu m'estois bien tenu, voire mesme à cause de ma diablerie, de mon idolatrie & renoncement, que pourtant ie deuoye auoir tout à souhait & non seulement ie deuoye auoir tout bien de toy comme l'ayant bien gagné & acquis, mais encor ie deuois ayder, à ceux que i'auoye en souuenance. Ainsy Satan auoit logé le pape, sa papauté, tout ce qui est de luy en mon cœur, de sorte que le pape mesme comme ie croy n'en auoit point tant en soy ne les siens aussy, comme il y en auoit en moy. Car comme ie puis entendre, le pape & les siens ont plus de souci & cherchent plus la gloire & aise du monde, qu'ils n'ont de souci de sçauoir & penser si les choses qu'ils font & font faire si elles sont bonnes, saintes & en l'honneur de Dieu, comme ie l'ay pensé; & pourtant souuent ils ont quelque regret, & ne pensent tant d'eux mesmes, ne de leurs faicts comme i'ay fait, & si Dieu ne m'eust fait la grace qu'en vn tel enfer, à cause que le pape tout ouuertement ne nie point Iesus Christ combien qu'il en retire cent millions de fois plus que ceux qui vouloyent introduire la circoncision, & avec ce qu'il n'a osé nier la sainte Escripiture, & qu'il souffre qu'on appelle les liures du Viel & Nouueau Testament la Sainte Bible, qui a esté en partie cause que ie l'ay leüe avec plus de foy & de reuerence, comme aussy ce m'a serui à ouir parler de Iesus, & y auoir quelque foy. Et sans ce qu'eust il esté de moy, car tout estoit tant retiré de la doctrine de Dieu, que rien n'estoit

demeuré sain que la Bible. Mais quoy, auoir leüe la Bible, me trouuant fort esbahi, & voyant tout au contraire sur la terre en vie & doctrine & que tout estoit autrement que ne porte la sainte Escripiture qui estoit vn grand moyen pour venir à quelque cognoissance, & pour sortir d'une si damnable abusïon, tant s'en faut que pour lors cela m'ait retiré que ie suis demeuré autant seduit & abusé que parauant, & n'ay rien laissé de toutes les abominations papales, ne cheminer autant contre Dieu comme iamais i'aye fait, profitant de mal en pis. Car sur l'estonnement aduenü, & le iugement qui deuoit suivre la lecture de la sainte Escripiture, Satan soudain est suruenü afin qu'il ne perdît sa possession & a besogné en moy selon sa coustume; car parauant me faisant seruir à ses commandemens d'un grand cœur & ardemment sans aucune crainte, & sans enquerir si ie faisoie mal, & me faisant croire sans douter que ses commandemens, & ce qu'il auoit dit par le pape estoit vne chose bonne & parfaicte puis que le pape & son Eglise ainsy le tenoit & ordonnoit, comme donc en mal faisant & renonceant Dieu selon le pape, il m'ostoit la crainte & toute doute, icy c'est ennemi par sa malice & sedïction là ou ie deuoye prendre la parole de Dieu sans aucune doute, assureé qu'icelle ne peut mentir, & qu'en l'ensuiuant on ne peut mal faire, il me baille toute crainte & doute, me faisant entendre que ie ne prenoye & n'entendoye point bien comme telles choses sont commandemens, & que ce n'estoit le sens, & qu'il
ne les

ne les falloit prendre ainſy comme ie iugeoye ſelon les commandemens que i'auoye leus, entant qu'ils commandoyent de ſeruir purement à Dieu & ne faire autrement qu'il n'a commandé, & que ie me gardaſſe bien de ſuiure mon aduis & iugement, mais que ie me teinſſe à l'ordonnance & intelligence de l'Egliſe, voire papale, car ie ne cognoiſſoye point d'autre. Ayant ainſy oui, preſcher Satan & les ſiens ie me tenoye tout comme parauant, quoy ſoubs la tyrannie du diable, & de ſon premier nay chef de toute iniquité, le pape, cuidant eſtre tresbien ſi ie ſuiuoye comme parauant. Et auant ce aucun docteur, comme celuy qui par l'exemple des autres me vouloit retirer de lire la ſaincte Eſcripture, me dit qu'aucun qui n'auoit fait ſon cours'es Arts auoit eſté reprints de lire la ſaincte Eſcripture auant auoir apprins la Philoſophie, mais ie luy ſatiſfis par ce que Satan fait enſeigner & tenir en la papauté, c'eſt que ie me ſoubmettoye au iugement du pape & des ſiens, car ainſy eſtoye apprins de prendre tout ſelon que croit, tient & enſeigne l'Egliſe du pape, lequel garde bien de laiſſer ſortir aucun de ſes lacqs, ne ſouffrant rien eſtre enſeigné ne tenu, que cela qu'il a approuué. Et ainſy ie perſeuere, ayant mon pantheon en mon cœur & tant d'aduocats, tant de ſauueurs, tant de dieux que rien plus trauaillant & regardant particulièrement de ſeruir vn chacun de ſes dieux plus que ie ne pouuoye, & tous en general, tellement que ie pouuoye bien eſtre tenu pour vn regiſtre papal, pour martyrologe, & tout

ce qu'il faut en toute l'idolatrie & diablerie papale, en laquelle n'ai cogneu aucun qui m'ait vaincu, tellement qu'à bon droit entre ceux que i'ay cogneu, i'auoye bien gagné la courronne de malediction, de tourment, de mort & de damnation, car du tout ie m'employoye iour & nuict pour seruir au diable selon l'homme de peché, le pape, & sur cecy Dieu de sa grace en grand patience, voyant vn tant espouuantable pecheur & infame idolatre, fait que ie trouue vn qui passoit tous les autres, car iamais ie n'auois veu chanteur de messe qui en plus grande reuerence la chantaist, combien que par toutes les parts ie les aye cerchez iusques au plus profond des chartreux, & autres moines, car ie ne demandoye fors que les plus excellens idolatres, & auoye en horreur ceux qui ne faisoient rien en l'Eglise papale sans tres grande reuerence. Cestuy, afin que ie le nomme, s'appelloit maistre laques Faber, qui faisoit les plus grandes reuerences aux images qu'autre personnage que i'aye cogneu, & demeurant longuement à genoux il prioit & disoit ses heures deuant icelles, à quoy souuent ie luy ay tenu compagnie, fort ioyeux d'auoir accez à vn tel homme qui, combien qu'il fut es lacqs du pape, & qu'il teint les choses plus detestables de la papauté, comme est la messe, & toute l'idolatrie papale, neantmoins souuentefois me disoit que Dieu renouelleroit le monde, & que ie le verroye, ce que long temps apres quand il m'incitoit à prescher, & à pourfuiure comme i'auoye commencé, ie luy remis

au deuant : Voicy par la grace de Dieu, le commencement de ce qu'autrefois m'avez dit du renouvellement du monde, dequoy le bon personnage pour lors fugitif de France en remercioit Dieu, luy priant de parfaire ce qu'il auoit veu commencer pour lors à Strasbourg. Et combien que ce bon ancien sentit qu'il falloit que le monde fut renouvelé, & qu'il estoit impossible qu'il demeurast en la meschanceté qu'il estoit, combien que au prix de ce qui est aduenü depuis en France, c'estoit le temps d'or, comme l'on dit, car lors regnoit Louis douzieme, voyant cela & ainsy parlant, ce personnage neantmoins demeuroid en sa vieillesse papale, & faisoit que i'y fusse d'auantage enragé & que ie me plongasse plus profond en toute idolatrie. Mais d'autant qu'il auoit du sçauoir beaucoup plus que tous les docteurs de Paris, & qu'il estoit persecute par iceux, ie commencay par cela voir la lascheté des theologiens, & ne les eus en telle estime comme parauant, & auec ce comme ce pauvre idolatre par sa vie fit que l'estime des docteurs fut abbatue en mon cœur, aussy par sa parole me retira de la fausse opinion du merite & m'enseigna que nous n'auions point de merites, mais que tout venoit de grace, & par la seule misericorde de Dieu, sans qu'aucun l'aic merité. Ce que ie creu, si tost qu'il me fust dit, ce qui aduint à cause d'aucunes conclusions que i'auoye faites de l'oraïson, ou ie parloye du merite d'icelle. Apres ce par vn à qui Dieu fasse grace me fut proposée la pure inuocation de Dieu, voire par vne

maniere de grande persuasion, tant par le commandement de Dieu comme par les anciennes prieres faites es dimanches, mais de tant que ie fus facile à receuoir qu'il n'y auoit point de merites que le seul merite de Iesus, & qu'en outre, qu'en luy seul ne s'en peut point trouuer, tant & plus ie fus difficile à receuoir la pure inuocation de Dieu, pourtant que i'auoye tant de confiance en la vierge Marie, & es Sainctes & Sainctes, desquelles ie ne faisoie que barbonner heures, prieres & suffrages iour & nuict fort apres leurs legendes, apres lesquelles ce bon Faber auoit trauaillé & desfia deux mois de martirs estoient imprimez, car il auoit deliberé de mettre tout ce qu'il en pouuoit trouuer, & le iour & l'année de tous. Mais ayant entendu la grosse idolatrie qui estoit es prieres des Sainctes, & que ces legendes y seruent comme de soulfhre à allumer le feu, il laissa tout & se mit du tout apres la sainte Escriture, d'autant que i'auoye tant d'estime des Sainctes & de Faber que ie n'en pouuoie sortir; mais à la fin apres toute resistance qui m'estoit amere, ny en reiettant l'Escriture, ny en mespris d'iceluy qui me parloit, mais en crainte de faillir, Dieu me donne à cognoistre qu'il le faut seul inuoyer, & que toute l'inuocation des trespassez, & de tous ceux qui sont hors de ce monde, par laquelle les absens sont priez comme presens, & tout seruice est vraye idolatrie, là fut du tout esbranlée la papauté en mon cœur, & lors ie commençay à la detester comme diabolique, estant marry d'auoir esté sy longuement de-

ce par icelle, & la sainte parole de Dieu commença auoir le premier lieu en mon cœur, & en general ie cogneu & commençay à iuger & tenir que tout ce qui n'estoit selon la parole de Dieu, tout estoit peché, meschant & maudit, & que les loix & traditions humaines qui chargent les consciences estoient toutes abominables. Lors i'entendis que le canon voire de la messe deuoit faire place à la parole de Dieu, & qu'il estoit digne de toute execration, mais cependant combien que ie sceusse que tous les prestres font mal de tenir leur messe pour sacrifice pour les pechez & de manger seuls, & qu'en ce qu'ils mettent la messe au lieu de la Cene de Iesus, il y deuroit auoir communion, car en l'ordonnance de Iesus est contenu que tous doiuent manger d'un mesme pain & boire d'un mesme vin. Et pourtant qu'il estoit fait tout autrement en la messe, à bon droit elle estoit execrable & detestable, puis qu'elle estoit sans communion, & combien que i'eusse telle cognoissance de la messe, neantmoins encores demouroit vne grosse racine de l'enchantement de Satan, tellement que ie ne pouuoie reietter ceste messe, mais i'estoye encor tant enforcé d'icelle que ie pensoye, quelque chose que ie y cogneusse de mal & quelque gouffre de malediction que y fusse, neantmoins il y auoit beaucoup de biens & benediction, & ce d'autant que ceux qui m'en deuoient retirer m'y fourroyent plus auant, & craignoient que ie n'en parlasse, mais surtout la seduction m'a longuement aueuglé, à cause de l'adoration du pain & du vin,

& de ce que i'ai creu que le corps & sang de Iesus Christ y estoit au lieu du pain & du vin, ou ie ne sçay par quel meslinge, car à vn tel songe inuenté des hommes, n'ayant aucun fondement en l'Escripture & qui ne peut auoir lieu selon que le nom & l'estre du sacrement porte, ie me suis fait violence comme il faut qu'aux choses qui surmontent tant l'entendement, que nous nous abbaissions & soubmettions nostre iugement à la pure verité de Dieu qui ne peut mentir, & qui est toute certaine, & que nous croyions ce qu'elle contient. Ainsy ay ie fait à ce songe papal du Dieu de paste seule baillant l'honneur qui appartient à la verité de Dieu aux mensonges humains, sans m'en vouloir enquerir si la chose estoit de Dieu ou non. l'ai esté fort long temps en ceste seduction, mais ce bon pere de toute misericorde à la fin m'a retiré d'une sy dangereuse idolatrie & abusion, & ce sans aucun mespris de la pure ordonnance de nostre Seigneur Iesus Christ, sans doubter de la vraye presence, reception & communion que les fideles ont & reçoient en la sainte Cene, car d'autant que i'ay en horreur & detestation la messe, & toute l'enchanterie diabolique en laquelle i'ay esté abusé & seduit, & de tant que ie cognoy que Satan se fourre en telle abomination & s'y fait adorer, & que Dieu estant abandonné de ceux qui suiuent telles diableries, il les abandonne aussy autant & plus, i'ay en honneur, prix & reuerence la sainte & pure ordonnance de Iesus, la sainte Cene, ainsy comme il l'a faite & ordonnée & suis asseuré que

Dieu l'a pour agreable, quand elle est faite en vraye foy comme nostre Seigneur commande qu'on la fasse, & que veritablement nostre Seigneur Iesus selon sa promesse y est present, rauissant les cœurs à soy faisant qu'on est avec luy, & luy avec nous. Ce que j'ay volontiers touché afin que l'œuvre de Dieu soit manifeste, car ie n'estoye point fourré en la papauté, pour chose qui fut de ce monde, assavoir pour aucun bien, honneur, gloire ne profit terrien, mais par seduction horrible, come sy la papauté fut esté vrayement de Dieu & sainte & bonne, & que fut pour le salut de mon ame, & n'en ay rien laissé par haine du pape, ne des siens, ne pour auoir rien de ce monde, & le iugement & affection humaine ne m'en ont point retiré, & n'ay point prins plaisir d'en laisser tant soit peu, ne desir avec de rien changer, mais ay esté pressé par la pure parole de Dieu, par son expres commandement. Et aussi n'ay laissé, lescrites abominations papales tout à vn coup, mais il a fallu que petit à petit la papauté soit tombée de mon cœur, car par le premier esbranlement elle n'est venue bas, & sy j'ay eu beaucoup de deffauts à venir à la cognoissance generale de la dignité de la parole de Dieu, de luy donner tout, & iuger que tout ce qui n'estoit selon icelle estoit du tout execrable, j'ay eu trop plus de peine a cognoistre par le menu, cecy se doit tenir, il faut laisser cela, & encore plus de mettre hors de mon cœur où tant estoit enraciné. Et pour vray j'ay experimenté, & croy aussi que plusieurs l'ont senty en eux mesmes, que

tout ainſy que les vaches qui tiroient l'arche du Seigneur, elles vont droict ſans tirer ne ça ne là, mais ſuiuent le droict chemin & ne s'arreſtent point, & neantmoins du deſir qu'elles ont, & de l'affection & du regret de leurs veaux, elles beellent & crient. Ainſy il eſt aduenü, car en eſtant bien au commencement de Dieu, & mis au chemin de la parole Euangelique, faiſant & marchant comme elle commande, les choſes que le pape a ordonnées, qui eſtoient tant cheres & tant à cœur ne ſe pouoyent laiſſer ſans gros regret, car ſ'il leur eut eſté poſſible de les mener quant & quant elles euſſent eſté fort agreables. Et meſmes nous voyons aucuns fort excellens perſonnages qui n'ont heu la poiſſance de laiſſer leurs veaux, & combien qu'ils leur donnent des coups comme ſ'ils les vouloyent aſſommer, & ſemble qu'ils les chaeſſent rudement, neantmoins ils les ont retenus avec vn gros dommage des Eglifeſ. Et quand aucun les a voulu chaeſſer, il ſembloit que tout fut perdu, & auiourd'hui on voit le monde enragé apres ces veaux, non des vaches, ains du grand Ieroboan, drefſez par vn tant poiſſant Roy, qui eſt le premier qui a diuiſé, le royaume de Salomon & retiré du vray ſeruice de Dieu, veu que leſdits veaux ſont ſi beaux, de ſi excellente matiere, mis en lieux tant eminens en Berhel, & en Dan, qu'ils ont eſté ſy long temps adorez & de tant de Rois & peuples, & ce meſchant Roy Ieroboan, qui s'eſt drefſé contre la maiſon de ſon Maiſtre a eſté ſy fin & cauteleux qu'il a baillé toute la couleur qu'il faut
pour

pour tromper le peuple, pour l'entretenir en l'idolatrie & retirer du vray seruice de Dieu. Ce bon Dieu & pere suscite vn bon Iosias qui ruine du tout ses maudits veaux & leurs autels, & ceux là où nostre tresmisericordieux pere a repurgé son Eglise, y faisant son œuvre par toute esperance & par moyens que iamais n'eussent esté pensez, se seruant de ceux qui ont esté les plus abîmez en toute idolatrie & malediction papale, les retirant des infections tant puantes, pour porter l'œuvre de vie, en chassant l'ennemi auteur du peché & de mort, combien doiuent ils louer Dieu d'une sy grande & inestimable grace, & s'employer que la sainte predication du saint Euangile, par laquelle tout ce bien a esté présenté & donné, soit entretenue purement & administrée par vrais seruiteurs de Dieu ? Or puis que par la predication du saint Euangile, & par les saints Sacremens, nostre Seigneur Iesus s'est tellement approché de ses Eglises, de tous les fideles qui ont receu sa parole, & qui en foy recoiuent les saints Sacremens, qu'il est vrayement conioinct & vni à eux, & les nourrit par sa parole, & par ses saintes ordonnances & en icelles de son vray corps & sang, & de tant que Iesus est plus present, tant plus Satan, le pape & toute leur tromperie sont chassez loin, pour l'honneur de ce bon Sauueur qui tant nous fait de biens, trauaillons tous à recognoistre ceste grande benediction, & prions ce bon pere qu'il l'entretienne en nous, & en tous ceux qu'il a fait voir telle grace, & cheminons tellement que nous hon-

norions Dieu, & sa sainte doctrine, que aucune lascheté ne se trouue en nous, que chacun fasse son deuoir, mais que les pasteurs s'employent en vie & en doctrine, pour bien executer leurs charges, qu'ils se gardent bien de tenir rien de la vie papale, & moins encores de la presumption qui a esté de peruertir toute l'Ecriture, mais qu'en toute pureté ils suiuent Iesus & sa sainte doctrine, car combien que le iugement horrible soit sur le pape & les siens, neantmoins d'autant que le iugement sera plus grief sur le pape que sur tous autres qui ont esté deuant luy, autant & plus sera il plus aigre & plus horrible sur les meschans prescheurs & maudits pasteurs qui se glorifient de l'Euangile, & de vie & de doctrine font tout au contraire de ceste tant saine doctrine, & Dieu glorifiant son saint nom, declare soudain sa vengeance, comme tels diables l'ont desserui, en ce qu'ils se sont fourrez parmi nous, pour batailler plus meschamment contre Iesus, & qu'il leur seroit trop mieux d'estre pourris en la papisterie, & en leurs monasteres. Que les seigneurs en rendent droicte obeissance à nostre Seigneur honorant sa sainte doctrine, maintenant tout ce qui est de Dieu & n'espargnant personne qui marche autrement qu'on ne doit, & singulierement en ceux qui doiuent enseigner les auteurs, car il n'y a nuls tant dignes de punition, ne qui fassent plus de mal, comme le bien qui vient de bien executer vne telle charge, n'est possible de le dire, parquoy grandement la puissance des seigneurs s'y doit employer à vn

tel bien. Et que le peuple fasse son deuoir, en s'arangeant par la parole de Dieu, & ne demande des flatteurs & que fassent tout comme l'on demande, mais soit aise d'auoir gens qui ne regardent que Dieu, & qui taschent de faire tout selon sa parole, & en reduisant en memoire en quel estat nous auons tous esté, & pensons bien à la grace & misericorde que Dieu nous fait, rendons en graces à Dieu, & de tout nostre cœur le louons & benissons.

• Sy donc tous le deuons grandement louer & magnifier, que doy ie faire? Ne seroye ie point merueilleusement ingrat & mesconnoissant si iour & nuict si ne pensoye à vn sy grand bien, si continuellement ie ne remercioye Dieu de tout mon cœur, sy ie ne m'employe à tascher que tous soyent participans de tel & si grand bien, en trauaillant que le mal auquel i'ay tant esté detenu soit chassé & que tous en soyent deliurez, pour louer, seruir & inuocquer purement Dieu? Et d'autant que plusieurs, voire de ceux qui doiuent conduire les autres, qui au lieu de suiure saint Paul qui non seulement ne souffrit point aux fideles de tenir aucune chose des idolastres & d'y viure & conuerser en faisant aucune chose qui soit contre le saint commandement de Dieu, mais encor qui ne peut aucunement souffrir qu'aucun prenne rien que le pur Euangile, car combien que la circoncision ait esté ordonnee de Dieu, & que tant de vrais seruiteurs de Dieu l'ayent prinse & tenue, voire le chef de tous Iesus nostre Sauueur ait esté circoncis &

tous les Apostres & toute l'Eglise sainte qui estoit en Ierusalem, neantmoins ce bon seruiteur de Dieu crie hautement que nul ne soit circoncis, & ne veut que personne mange aucune viande qui ait esté immolée & offerte aux images, si tant seulement aucun dit que telle viande y a esté offerte, tant s'en faut qu'il puisse souffrir qu'aucun se trouue aux sacrifices des idoles & encor moins qu'on offre & fasse semblant d'offrir à l'image. Mais ces meschans conducteurs, ennemis de Dieu & de sa verité, traistres à l'Evangile & aux Eglises chrestiennes conseillent qu'on fasse comme les autres, qu'on oye la messe, & tout ce qui est fait selon l'ordonnance du pape, qu'on fasse honneur aux images & bref tout ce qui est ordonné en la papauté, qu'on le fasse tout ainsy comme si de cœur on estoit vray papiste & conformement que c'est vne folie de laisser son pais pour fuir l'idolatrie, & n'ont horreur de mettre leurs enfans au plus profond des abominations desquelles ne les peuuent iamais retirer. Et sont sy lasches & meschans qu'ils condamnent les enfans de nostre Seigneur qui cherchent de viure en l'Eglise chrestienne & taschent de les desuoyer du saint propos qu'ils ont à Iesus, & en seduissent plusieurs, d'autant que leurs raisons sont plaisantes à la chair qui se trouue trop mieux là où le diable regne du tout, là où sont les pots de chair, & les autres viandes d'Egipte, desquelles la souuenance est fort pressante les cœurs des vrays moines, qui ne sont icy entre nous que regretter le passé: car quelque collomne

qu'il y ait de feu pour la nuit, & de nuee pour le iour, conduisant le peuple, quelque douceur que la manne ait, ceux ci ne se peuuent contenter, mais murmurent & font murmurer le peuple contre Iesus & sa sainte doctrine. Et si tels fallient si laschement, que peuuent faire tant de patures simples personnages qui les oyent, tellement que tout ainſy que tels miserables ne se fians en Dieu, & ne s'arrestans purement à sa sainte parole, seroyent tous prests à donner quelque couleur à l'abomination de la messe, comme aussi ils tascheroient à l'alcoran de Mahomer, ainſy qu'ils n'ont en detestation l'interin tant contraire à la doctrine chrestienne. Afin doncques que tels ventres ny autre pareillement ne puissent plus embaboiner personne, & qu'il n'y ait si simple qu'il ne voye & cognoisse l'infection papale, & comment il la faut detester, & que les abominations plus que diaboliques du pape, qui ne peuuent plaire qu'à ceux qui droictement sont endiablez & du tout enforcelez, soyent du tout dehors du cœur de tous, & que de fait tous les abandonnent, & afin qu'on cognoisse que personne qui les cognoist & entend, ne s'y peut trouuer qu'il ne se declare vray ennemy de Dieu, & fauorifant au diable, & tout ainſy que Satan & son premier fils le pape nous doiuent estre en horreur & detestation, ainſy aussi toutes leurs abominations.

I'ay regardé la plus ancienne ordonnance papale que i'ay peu trouuer là où il y a loy faite, & que l'usage est receu plus communement en la-

quelle est ce qu'il faut pour tromper les simples: premierement quant'à celuy qui l'a ordonné, il est des premiers euesques de Rome qui amaine la sainte Escriture, voire comme Arius & les papistes apres luy ont perseueré, il ne parle comme l'on dit que de Dieu. Il n'y a priere qu'à Dieu seul, on ne demande, comme il semble, que chose bonne & sainte, il n'y a icy inuocation d'aucuns saints qui soyent trespassez, non pas mesme des Anges, il n'est parlé de purgatoire, d'images, de messes, ne sacrifices pour les viuans & trespassez. Somme, il semble que ce bon pape, dira aucun papiste, ait tresbien & sainement ordonné: il n'y a point d'idolatrie, ce semble, car on ne regarde que l'vsage de ceste eau, il n'y a point de conscience de la toucher, ne cela sur quoy elle est iettée, veu que franchement on marche là où elle est iettée, & combien qu'on l'apelle eau benite & comme sacrée, neantmoins on l'emploie sans en faire aucune conscience presque à toute chose, & ie ne pense point que parauant l'vsage en fut tant grand comme maintenant, car on s'en sert à tous endroicts, & enuers le ciel & la terre, en toutes choses, on la iette aux viuans, aux trespassez, elle est iettée en maladie, en santé, on la fait seruir aux bestes, aux gens, il n'y a rien à quoy ceste eau ne soit appliquée, car ain sy comme les prestres ont benedictions papales de toutes choses, ain sy aussy ceste eau est appliquée à tout & au moyen d'icelle lesdits prestres ont entrée partout, mesmes aucuns coquins qui ont ce priuilege d'auoir eau benite, peuuent

entrer en toutes maisons & servir à plusieurs affaires. Et pour certain si elle devoit avoir l'efficace que toute l'Eglise papale demande & prie, c'est de chasser toute tromperie, comme ils disent du diable, puis qu'ils crient que tous ceux qui n'ont ceste eau en honneur, comme chose sainte & tout ce qui est du pape, qu'il soit en la seduction du diable, il faudroit bien qu'elle monstrest sa vertu à chasser tout cecy, afin qu'ils perseverassent en leur estat d'honneur papal : comme aussi sy l'inuocation de la vierge Marie estoit vne chose ordonnée de Dieu & qu'il fut vray, ainsi qu'ils en chantent, qu'icelle seule a mis bas & tué toutes les heresies par l'universel monde, ils se deuroient bien contenter de demander la vierge en aide, & la prier qu'elle se gardast cest honneur, & la laisser faire elle seule, pour abbattre toutes les heresies & sectes. Mais ces tresmiserables seducteurs ne se contentans point de prendre contre Dieu l'eau qui est bonne creature de Dieu, pour tascher à la faire servir autrement que Dieu n'a ordonné, par vne lascheté trop plus grande abusent du nom de la tresexcellente vierge Marie, pour la faire servir autrement que son trescher fils ne nous commande, aussi comme ces seducteurs ne se contentent point, & n'attendent point que leur eau charmée chasse les heresies qu'ils appellent, mais au lieu de l'eau & du sel, ils crient & demandent le feu & le soulfre, aussi ils n'ont garde de croire à ce qu'ils disent de la vierge Marie, qu'elle seule chasse toute heresie, & ne se tiennent à elle, mais la pluspart

- d'eux ont trop plus de fiance aux plus meschantes
..... adulteres qu'ils entretiennent, & aux-
quelles ils font de gros presens, afin qu'elles en-
flambent leurs maris à condamner les innocens,
pour les exterminer du tout comme heretiques.
Afin donc que par vne chose tant facile & com-
mune à tous, & que ouuertement se fait, & se
chante haut & clair, & ne reste fors que la mettre
en langue cogneüe de tous, & qui a richement
tout ce que les prestres peuuent amener d'ancien-
neté d'vsage & autre chose, chacun sçache que ce
pape qui a ordonné ceste eau, & ordonné vn en-
chantement de sorcellerie en l'Eglise, & que ceste
ordonnance ne peut estre tenue ne gardée, sinon
en renuerfant la parole de Dieu, en ostant à Iesus
ce qu'à luy seul appartient, ie l'ay voulu exposer
& mettre en auant tout ce que contient ladite or-
donnance du pape & ce que dit & fait le prestre,
& me confie en nostre Seigneur que de sa grace il
fera que tous entendront ceste tant euidente magie,
& enchanterie, & donnera le cœur de laisser le
pape & toute sa sorcellerie, & que tous prendront
cœur pour venir à Iesus, & que ceux qui legere-
ment passent les choses papales, ne iugeant point
qu'il y eut grand mal, en voyant ce que contient
ce charme papal, ils y regarderont plus pres, &
les auront en telle horreur qu'ils doiuent auoir, &
ne feront sy petit cas d'estre parmy les papistes en
leurs enchanteries, & ne tiendront que ce soit chose
legere, ou il n'y a tel peché qu'on n'en doie faire
estime, comme aussy tels ne reputent le seruice de
Dieu,

Dieu, qui est en oyant sa parole en foy, & la confessant ouuertement en la sainte assemblée des fideles partout, mais que voyant le mal papistique, ils auront plus en estime le bien chrestien. A quoy nous faut tirer principalement, c'est que tous ayent vn singullier soin de ne prendre & ne recevoir autre que nostre bon Sauueur & Redempteur Iesus, & ce qu'il a ordonné afin que fermement chacun se tienne en luy, & qu'on ait en horreur & detestation Satan & ses cautelles quelque couleur qu'il baille, & qu'on le fuye & tout ce qui est de luy, & voyant la poureté & seduction du monde qu'on ait pitié & compassion de ceux qui sont detenus en sy grande poureté, & qu'on prie Dieu pour eux, qu'on tasche de les retirer en toute bonté, & charité. Et singullierement que tous s'employent, que personne ne se iette en vne telle malediction, qu'il n'y ait personne qui abandonne l'Euangile ni chose qui soit ordonnée de nostre Seigneur Iesus, pour tenir ne faire semblant de consentir à rien qui soit de l'ennemi de Dieu, du pape, qu'on ne tienne rien de ses ordonnances qu'il a inuentées. Veillons à cecy & soyons sobres, & nous donnons bien garde que ne tombions de la foy & pleine assurance de l'Euangile & qu'il n'aduienne que Satan chassé avec sa papauté, se parfourant par vn autre ou ce mesme moyen, ne seme derechef son venin entre nous: mais qu'estans fermes en Iesus, continuans en sa sainte doctrine, croissions de iour en iour en toute benediction, produisans les vrayz fruiets des enfans de Dieu, taschans à l'heritage

186 EPISTRE A TOVS SEIGNEURS.

celestiel qui est sans fin, & nous gardons bien de mettre nostre cœur en la terre, aux choses de ce monde, qui passe & vient en ruine avec tout ce qui s'arreste à luy, & ain sy du tout fondez & arrestez en la parole de Dieu par vraye & viue foy bisognans par charité, ne doutons point que tout ain sy que la parole de Dieu demeure eternellement, que nous en icelle demeurerons & viurons eternellement.



A MES TRES CHERS FRERES

EN NOSTRE SEIGNEUR TOVS
les amateurs de la saincte Parolle, la grace,
paix & misericorde de nostre Pere plain de toute
bonté & misericorde par nostre Seigneur Iesus,
lequel est mort pour nous, & maintenant puyss-
ant sur tous regne en la dextre de Dieu son
pere, auquel faut que tout genou soit ployé.



DRES chiers freres, lesquelz i'ay-
me en nostre Seigneur de cueur
entier, en sorte qu'en gros souf-
pirs & gemissements desire vostre
bien; salut & proufit, priant no-
stre Seigneur vous accroïstre vo-
stre foy & donner vng cueur entier & parfaict, qui
ne regarde point les choses de ça bas mais de las-
sus, & non seulement ce que l'oueuil charnel voit
presentement & contemple, mais ce que l'esperit
& la foy cognoit auoir esté fait & sçait estre pro-
mis par nostre Seigneur, il a pleu à nostre Seigneur
vous laisser demander l'ayde du bras charnel pour
venir plus facilement & sans motion à l'aduance-
ment du saint Euangile: & ne seroit point chose
desplaisante à Dieu, quant du tout foy fiant en
luy, & non en autre, l'on vseroit de ses bonnes
creatures, ainſy qu'elles sont ordonnées: c'est de-

fandre les bons & punir les mauuays, comme souvent il plaist au bon Pere nous ayder. Mais, ainſy que puyſ comprendre, le Seigneur voulant faire vne œuvre trefgrande, veut luy ſeul auoir l'honneur & gloire, & faire en vous comme il a fait au bon & fidele Abraham, lequel, contre eſperance, a creu à eſperance ſans doubter rien ès ſainctes promeſſes de Dieu, lequel ie vous prie, mes trefchiers frayres, que ſuyuez & imitez, car vous verrez la gloire & puyſſance de Dieu. L'on vous fait rude mine, l'on vous menaſſe, l'on demande groſſe finance, & ce vous trouble. Ceux qui vous deuoyent donner ayde & confort vous preſſent plus que perſonne, & vous eſtes eſtonnés que voz amys veulent torner la robbe & eſtre voz ennemys. Brief, tous les ennemys vous aſſiegent & enuironnent comme le bon prophete Helifée, tellement que le ſeruiteur qui ne cognoit & ne voit l'ayde qui aſſiſte le prophete, tout eſpouanté & comme demy mort crie pour les ennemys. Mais pour l'honneur de Dieu, mes trefchiers amys & frayres, ne ſoyez ainſi perdans couraige, comme ce ſeruiteur. Mais comme le bon prophete dictes : « Noſtre Seigneur eſt noſtre ayde ; de qui auray ie peur ? Si toutes les armées viennent contre nous, nous n'aurons point peur, car noſtre Seigneur eſt avec nous. » — « Si Dieu, dit le ſainct Apoſtre, eſt pour nous, qui fera contre nous ? » Ne regardez point l'armée des Affyriens, mais l'armée de Dieu qui eſt contre les Affyriens & pour nous. Helas ! mes frayres, faites voſtre proufit de la crainte qui vous a prins & en

prenez couraige, pour entretenir la bonne alliance que nostre Seigneur a fait avec nous en donnant son filz, & dictes en vostre cueur: Si les hommes n'ont voulu ouyr nostre ambassade, mais luy ont tenu rudes termes, pourtant qu'ilz craignent que ne cheminons selon leur plaisir, hélas! que sera ce si le trespuyssant Roy & Prince du ciel & de la terre ne nous veut ouyr, ne voyr, ainsi qu'il a dit: « Qui aura honte de moy deuant les hommes, i'auray honte de luy deuant mon pere? » Quelle parolle sera & combien importable, quant il dira: « Allez, maudictz, partez vous de moi au feu eternal? » S'il se vient monstrier ennemy & faire la guerre à ceux qui ne tiennent sa sainte Parolle, que sera il des pources maudictz auxquelz il est couroucé? Ne seront ilz point constrainctz de dire aux montaignes & rochiers, qu'ils tumbent sur eux? Qui pouroit estimer comment seront pressés & du tout desespoirés ceux auxquelz il demandera les grosses sommes que toute creature ensemble ne sauroit payer, & n'y a que le seul Saulueur qui le puyffe & qui l'a fait?

Pourtant, mes frayres, si vous auez esté troublés. pour la façon des hommes, craignez plus Dieu & vous gardez plus de luy desplaire que aux hommes, d'autant qu'il est plus grand & plus puyssant: & vous humiliez à luy & de tout vostre cueur, luy suppliez qu'il luy plaïse auoir pitié de vous, & que pour l'infirmité de la chair, & pour les puyssances des tenebres vous ne layssiez à faire le bon plaisir de Dieu, à prendre purement sa sainte

doctrine, & que le bon Dieu, qui a les clefz de tout, il face l'ouerture à son saint Euangile, lequel fructifie en vous plus qu'il n'a fait, & que ne perdez couraige, mais que Dieu le vous augmente & ayant pitié de vostre petitesse, luy plaise ouster tous empeschemens.

Il est vray, mes amys, que si Dieu, selon sa iustice, veut ourer en vous & les autres, que tout abyssnera. Considerez les grosses idolatries qui ont regné iusques au present si trefeuidentes & en si gros nombre, que quant autre n'y auroit, tout deuroit fundre & abyssner. Pensez les horribles blasphemés qui ont esté faits & dictés, au lieu de la louange de Dieu, où les hommes se sont leués sur Dieu en soy attribuant l'honneur de Dieu, l'office de Iesu-Christ, aneantissans toute la sagesse, puyssance & bonté de Dieu tant qu'il estoit en eux, faisans comme si Iesus fut insouffisant & imparfait sauueur & maistre : comme l'homme de perdition, l'Antechrist, a fait & fait faire pour estre adoré & honoré comme Dieu, ainsy que le saint Esperit l'auoit predict.

le layssé le demeurant, qui est vne mer de toute iniquité & meschanceté, qui tout est party de la maudicte infidelité & separation faite de Dieu, & esloignement de sa sainte Parolle, comme toutes rebellions des enfans aux peres & delaissemens d'yceux, voyre soubz vmbre de sainteté, où le commendement de Dieu a esté aneanti pour les inuentions humaines : tant de debas, noyées, haynes, rancunes, frappemens & tueries, les pua-

tes paillardises en tous y ayans leur regne, principalement aux droictz membres de l'Antechrist que l'on appelle de l'Eglise. Et quant n'y auroit autre que leur meschanceté, leurs adulteres, defloratures, rauyssemens & autres innombrables cas, que i'ay horreur de les ouyr racompter à leurs familiers, mille mondes deuroient abyssmer. Les larrecins & les tromperies ne faut racompter, veu que apertement ceux qui condamnent les faisans tort à autrui, faussans la sainte Escripiture, ont presumé d'enseigner que charité bien ordonnée commence à soy mesme, laquelle, comme nostre Seigneur monstre, est songneuse du prochain & ne demande ce qui est à soy, mais au prochain, pour son bien. Pour quoy mille deleuges & mille feux & souffres du ciel iustement deuroient tumber sur la terre. Mais nostre Pere si tresplain de misericorde il dissimule, affin que nous retournons à luy, car il est tardif à ire & prompt à misericorde. Pour quoy, mes frayres, vous regarderez au tresbon Pere & à faire sa sainte volonté, & ne regarderez de plaire aux hommes pour desplaire à Dieu, mais du tout de vostre cueur prendrez en main ce qui plait à nostre Seigneur, puy que sans foy l'on ne peut plaire à Dieu & que la foy est par l'ouye de la Parolle de Dieu : comme vrayes berbris de Iesus vous ouyrez sa sainte voix, sa sainte Parolle, quelque repugnance, deffense ou contradiction qu'on vous face. Car trop mieux vaut obeyr à Dieu que aux hommes, & plus est à craindre nostre Seigneur que les hommes. Ne regardez le nombre ne

la multitude des ennemys qui sont entour de vous, mais regardez nostre Seigneur qui est plus fort que tout: en luy vous fiez, en luy soit vostre espoirance.

L'alliance qu'il a faite avec les fideles iamais ne sera cassée, ne irritée. Ce qu'il a promis il tiendra. Il ne demande point le vostre, mais vous veut donner vng heritaige, vng royaume, & vous faire bourgoys d'une cité si noble, que vous serez si bien maintenus & aurez tant de libertés, franchises & tant de biens, que iamais oureille n'ouyt, oueil ne vit, ne cueur d'homme ne pensa. Ainsy passe tout. Helas! mes frayres, vous avez tant prins de payne pour une alliance d'un iour, car mille ans n'est que d'un iour, & pour estre maintenus es biens corporelz & qui ne durent rien. Pourquoi ne prenez vous couraige pour l'alliance eternelle, pour pouvoir iouyr des biens espirituelz qui iamais n'ont fin, affin que par le iuste, saint, puyssant & bon roy, le meschant tyran ne vous puyssé nuyre ne greuer en rien? Car nostre Seigneur a dit des siens, qui les touchera, il touchera la petite de son oueil.

Tachez, mes frayres, aux vrayz biens, & ne vous arrestez aux choses friuoles. Ayez gens qui puyssent maintenir ce qu'ilz disent, tellement que ceux encore qui veulent empescher le bien des ames soyent conuaincus non seulement par la Parole de nostre Seigneur, mais aussy par rayson, laquelle de nul ne peut estre reiectée: c'est quant l'on offre le droict, que si l'on a mal dit, qu'on soit puny, & si l'on ne peut monstrier qu'on aye
fallu

fallu en rien, qu'on layffe viure & qu'on permette ce qui n'est point mal. Personne n'aye honte de Iesus, ne de son Euangile, de l'aduancer, de l'ouyr, d'en parler sans auoir esgard à personne, mais au seul Dieu en toute modestie, sans iniures ne contentions, receuant les infirmes en toute douceur, en esprit de lenité & benignité, en constance & perseuerance amyable & attractiue, par laquelle Dieu soit honoré en nous & nostre prochain edifié en bien. Qu'on regarde le sainct seruiteur de Dieu, Pierre, comment par nulz commendemens luy & Iehan ne cessent là où ilz peuuent porter le nom de Iesus, mais en toute douceur & benignité, tellement que ceux qui n'ont peu porter Iesus preschant, ains l'ont lyuré à la mort, sont constrainctz à les souffrir. Ainsy faut, mes frayres, proceder au commencement de la saincte Parolle, affin qu'elle croisse comme elle a creu au commencement de la saincte Eglise.

Pour quoy, gardant toute modestie & benignité, douceur & amitié, procedez perseuerans en saintes prieres & oraysons, demandans l'ayde de nostre Seigneur, viuans purement, non en gormandises ne yurongneries, mais en toute sobriété, aydans aux indigens en vraye charité, commettant tout au pere de misericorde, lequel de sa grace vous fortifie, vous enuoyant l'ayde de Iessus, par laquelle fortz & robustes cheminez en toute verité, sainteté & neteté de cuer & d'esperit, croysans en tous dons espirituelz, foy, charité, benignité, patience & bonté, tellement que de vous tout le

194 AVX AMATEURS DE LA PAROLLE.

monde soyt edifié : & comme auez esté sur le branle de n'estre rien au monde, ainsy soyez vrayement miroir à tous de bien cheminer & saintement viure, & que apres vous tous viennent au saint Euangile : de quoy priez nostre Seigneur de cueur qu'il partout auance sa gloire & confunde toute chose repugnante à sa sainte doctrine. Amen! La grace & benediction de Iesus nostre Sauueur soit sur vous tous! Amen.

Le tout vostre en nostre
Seigneur Iesus

GVILLAVME FAREL.

De Murat, ce 26^{eme} de Juillet 1532.



CÔNFESSION DE LA FOY,
LAQVELLE TOVS BOVRGEOIS ET
habitans de Geneue & subietz du pays doibuent
iurer de garder & tenir.



A Parolle de Dieu. Premiere-
ment, nous protestons, que
pour la reigle de nostre foy &
religion, nous voullons suyure
la seule Escriture, sans y me-
sler aucune chose qui ayt esté
controuuée du sens des hommes, sans la Parolle
de Dieu; & ne pretendons pour nostre gouverne-
ment spirituel, receuoir aucune doctrine, que celle
qui nous est enseignée par icelle parolle, sans y
adiouster ne diminuer, ainsi que nostre Seigneur
le commande.

II. *Vng seul Dieu.* Suyuant doncques l'institution
qui est contenuë aux saintes Escritures, nous reco-
gnissons qu'il y a vng seul Dieu, lequel nous deb-
uons adorer, & auquel nous debuons seruir, au-
quel nous devons mettre toute nostre fiance &
esperance: ayant celle assurance, qu'en luy seul
est contenuë toute sapience, puissance, iustice,
bonté & misericorde. Et comme il est Esprit, qu'il
le fault seruir en esprit & en verité. Et pourtant

reputons vne abomination, de mettre nostre fiance ny esperance en creature aulcune, de adorer aultre que luy : soit anges ou aultres creatures quelconques, & de recongnoistre aultre Seigneur de nos ames que luy seul, soient saincts ou sainctes, ou hommes viuans sur la terre ; pareillement de constituer le seruice qui luy doibt estre rendu, en ceremonies exterieures & obseruations charnelles, comme s'il se delectoit en telles choses ; de faire ymage pour représenter sa diuinité, ne aussi aultre ymage pour adorer.

III. *Loy de Dieu, seule pour toutes.* Pourtant qu'il est le seul Seigneur & Maistre, qui a la domination sur nos consciences, & aussi que sa voullunté est la seule reigle de toute iustice, nous confessons, que toute nostre vie doibt estre reiglée aux commandemens de sa sainte loy, en laquelle est contenuë toute perfection de iustice, & que nous ne debuons auoir aultre reigle de bien viure & iustement, ne inuenter aultres bonnes œuures pour complaire à luy, que celles qui y sont contenuës, ainsi qu'il s'ensuyt..... (suit le Décalogue.)

IV. *L'homme en sa nature.* Nous recognoissons l'homme en sa nature estre du tout aueugle en tenebres d'entendement, & plain de corruption & peruersité de cuer, tellement que de soy mesmes il n'a aucune puissance de pouoir comprendre la vraie cognoissance de Dieu, comme il appartient, ne de s'adonner à bienfaire. Mais au contraire, s'il est delaiissé de Dieu en sa propre nature, il ne peut synon demourer en ignorance, & estre abandonné

à toute iniquité. Par quoy il a befoing d'estre illuminé de Dieu, pour venir à la droicte cognoissance de son salut; & aussi d'estre en son affection redressé & reformé à l'obeyssance de la iustice de Dieu.

V. *L'homme en soy damné.* Puisque l'homme est naturellement (ainsi comme dit a esté) despouru & desnüé en soy de toute lumiere de Dieu & de toute iustice : nous recognoiſſons qu'en soy mesmes il ne peut attendre que l'ire & la malediction de Dieu, & pourtant qu'il doit chercher autre part qu'en soy le moyen de son salut.

VI. *Salut en Iesus.* Nous confessons doncques que Iesu-Christ est celui qui nous a esté donné du Pere, afin qu'en lui nous recourions tout ce qui nous default en nous mesmes. Or tout ce que Iesu-Christ a faict & souffert pour nostre redemption, nous le tenons veritable sans aucun doubte, ainsi qu'il est contenu au Symbole, qui est recité en l'Eglise; c'est assavoir..... (suit le Symbole des Apostres.)

VII. *Iustice en Iesus.* Pourtant nous recognoiſſons les choses qui s'ensuyuent nous estre données de Dieu en Iesu-Christ : Premièrement, que estant de nostre nature ennemys de Dieu, subiects à son ire & iugement, nous sommes reconciliez avec luy & remis en sa grace par l'intercession de Iesu-Christ, d'autant que en sa iustice & innocence nous auons remission de nos iniquitez, & que par l'effusion de son sang nous sommes purgez & nettoiez de toutes nos macules.

VIII. *Regeneration en Iesus.* Secondement, que par son Esprit nous sommes regenerez en nouuelle nature spirituelle. C'est à dire que les concupiscences mauuaises de nostre chair par sa grace sont mortifiées, afin de ne plus regner en nous. Et au contraire nostre volonté est renduë conforme à celle de Dieu pour suiure sa voye & chercher ce qui luy est agreable. Et pourtant que par luy nous sommes deliurez de la seruitude de peché, sous la puissance duquel nous sommes de nous mesmes tenus captifs; & que par icelle deliurance nous sommes faicts capables & ydoines à faire bonnes œuvres & non aultrement.

IX. *Remission des pechez tousiours necessaire aux fideles.* Finablement que ceste regeneration est tellement faicte en nous, que iusques à ce que nous sommes despouilliez de ce corps mortel, il y demeure tousiours en nous beaucoup d'imperfection & d'infirmitez: tellement que nous sommes tousiours pauvres & miserables pecheurs deuant la face de Dieu. Et combien que nous debuions de iour en iour croistre & profiter en la iustice de Dieu, toutesfois il n'y a iamais plenitude ne perfection, cependant que nous conuerfons ici. Par quoy nous auons tousiours besoing de la misericorde de Dieu pour obtenir remission de nos fautes & offenses. Et ainsy debuons nous tousiours chercher nostre iustice en Iesu-Christ, & non point en nous, & en lui nous reposer & assurer, ne rien attribuant à nos œuvres.

X. *Tout nostre bien en la grace de Dieu.* Et afin

que toute gloire & louenge soit renduë à Dieu (comme elle est deue), & que nous puissions auoir vraye paix & repos en nos consciences, nous entendons & confessons, que nous receuons tous les benefices de Dieu cy dessus recitez par sa seule clemence & misericorde, sans aulcune consideration de nostre dignité, ou merite de nos œuvres, auxquelles n'est deue aucune retribution que de confusion eternelle. Neantmoins, que nostre Seigneur par sa bonté nous ayant receu en la communion de son fils Iesus, a les œuvres que nous faisons en foy plaisantes & agreables: non point qu'elles le meritent, mais pourtant que ne nous imputant point l'imperfection qui y est, il ne recognoist en icelles, synon ce qui procede de son esprit.

XI. *Foy.* Nous confessons que l'entrée que nous auons à si grans thresors & si grandes richesses de la bonté de Dieu, qui est esbandue sur nous, c'est par la foy: quant en certaine confiance & certitude de cueur, nous croyons aux promesses de l'Euangile & receuons Iesu-Christ tel qu'il nous est présenté du Pere, & qu'il nous est descript par la Parolle de Dieu.

XII. *Inuocation de Dieu seul, & intercession de Christ.* Comme nous auons declairé ne auoir la confiance & esperance de nostre salut & tout bien en aultre que en Dieu par Iesu-Christ, aussi nous confessons que nous le debuons inuoyer en toutes nos necessités au nom de Iesu-Christ, qui est nostre mediateur & aduocat, par lequel auons accès à

luy. Pareillement debuons recognoistre que tous biens viennent de luy seul, & luy en rendre action de graces. Au contraire nous reiectons l'intercession des Saints, comme vne superstition inuentée des hommes contre l'Escripture, vu mesmes que elle ne procede que de deffiance que l'intercession de Iesu-Christ ne soit suffisante.

XIII. *Oraison intelligible.* Dauantaige, puisque oraison n'est synon hypocrisie & faintise, si elle ne procede de l'affection interieure du cueur, nous entendons que toutes oraisons se doibuent faire en certaine intelligence. Et pour ceste cause nous apprenons l'Oraison de nostre Seigneur, pour bien entendre ce que luy debuons demander..... (suit l'Oraison dominicale.)

XIV. *Sacremens.* Nous entendons que les sacremens, que nostre Seigneur a ordonnez en son Eglise, nous doibuent estre comme exercices de foy, tant pour la fortifier & confermer aux promesses de Dieu, que pour la tesmoigner enuers les hommes. Et seulement en y a deux en l'Eglise chrestienne, qui soient constituez de l'auctorité de Dieu: le Baptisme & la Cene de nostre Seigneur: pourtant ce qui est tenu au royaume du'pape, de sept Sacremens, nous le condempnons comme fable & mensonge.

XV. *Baptisme.* Le Baptisme est vng signe exterieur, par lequel nostre Seigneur testifie qu'il nous veut recepuoir pour ses enfans, comme membres de son fils Iesus. Et pourtant en iceluy nous est representée la purgation de nos pechés que nous
auons

auons au sang de Iesu-Christ, la mortification de nostre chair, que nous auons par sa mort, pour viure en luy par son esprit. Or puisque nos enfans appartiennent à vne telle alliance de nostre Seigneur, nous sommes certains que à bon droit le signe exterieur leur est communiqué.

XVI. *La Sainte Cene.* La Cene de nostre Seigneur est vng signe par lequel sous le pain & le vin il nous represente la vraie communication spirituelle que nous auons en son corps & son sang. Et reconnoissons que selon son ordonnance elle doit estre distribuée en la compagnie des fideles, afin que tous ceulx qui veulent auoir Iesus pour leur vie en soient participans. Or, d'autant que la messe du Pape a esté vne ordonnance maudicte & diabolique, pour renuerfer le mystere de sainte Cene, nous declairons qu'elle nous est en execration, comme vne idolatrie condamnée de Dieu; tant en ce qu'elle est estimée vng sacrifice pour la redemption des ames, que pource que le pain est en icelle tenu & adoré comme Dieu. Outre les aultres blasphemes & superstitions execrables, qui y sont contenues, & l'abus de la Parolle de Dieu, qui y est prinse en vain sans aucun fruit ne edification.

XVII. *Traditions humaines.* Les ordonnances qui sont necessaires à la police interieure de l'Eglise, & appartiennent seulement à entretenir paix, honnesteté & bon ordre en l'assemblée des chrestiens, nous ne les tenons point pour traditions humaines, d'autant qu'elles sont comprises sous ce com-

mandement general de saint Paul, où il veult que tout se face entre nous decentement & par bon ordre ; mais toutes loix & constitutions faictes pour lier les consciences, pour obliger les fideles à choses qui ne sont commandées de Dieu, pour establir aultre seruice de Dieu que celuy qu'il demande, & tendantes à rompre la liberté chrestienne, nous les condamnons comme peruerfes doctrines de Sathan, veu que nostre Seigneur declare qu'il est honoré en vain par doctrines qui sont du commandement des hommes. Et en telle estime auons nous les pellerinages, moyneries, differences de viandes, deffences de mariages, confesses, & aultres semblables.

XVIII. *Eglise.* Combien qu'il n'y ayt qu'une seule Eglise de Iesu-Christ, toutesfois nous recognoissons que la necessité requiert les compagnies des fideles estre distribuées en diuers lieux. Desquelles assemblées vne chacune est appelée Eglise. Mais daultant que toutes compagnies ne s'assemblent au nom de nostre Seigneur, mais plustost pour le blasphemer & polluer par leurs sacrileges, nous entendons que la droicte marque, pour bien discerner l'Eglise de Iesu-Christ, est quant son saint Euangile y est purement & fidelement presché, annoncé, escouté & gardé ; quant ses Sacrements sont droictement administrez, encores qu'il y ayt quelques imperfections & fautes, comme tousiours il y en aura entre les hommes. Au contraire là où l'Euangile n'est declairé ouy & receu, là nous ne recognoissons point forme d'Eglise. Et

pourtant les Eglises gouvernées par les ordonnances du pape sont plustost synagogues du diable que Eglises chrestiennes.

XIX. *Excommunication.* Toutesfois pource qu'il y a tousiours des contempneurs de Dieu & de sa sacrée Parolle, lesquels ne tiennent compte de administration ne exhortation, ne reprehension, ains ont mestier d'vng plus grant chastiment, nous tenons la discipline d'excommunication estre vne chose sainte & salutaire entre les fideles, comme veritablement elle a esté instituée de nostre Seigneur pour bonne raison. C'est affin que les meschans par leur conuersation damnable ne corrompent les bons, & ne deshonnorent nostre Seigneur, & aussi que ayant honte ils se retournent à penitence. Et pourtant nous entendons qu'il est expedient selon l'ordonnance de Dieu, que tous manifestes idolatres, blasphemateurs, meurtriers, larrons, paillars, faulx tesmoins, seditieux, noiseuls, detraicteurs, bateurs, yurogues, dissipateurs de biens, apres auoir esté deuement admonestez, s'ils ne viennent à amendement, soient separez de la communion des fideles, iusques à ce qu'on y aura cogneu repentance.

XX. *Ministres de la Parolle.* Nous ne reputons point aultres pasteurs de l'Eglise que les fideles pasteurs de la Parolle de Dieu, & repaissans les brebis de Iesu-Christ par icelle en instructions, admonitions, consolations, exhortations, reprehensions, d'aulture part resistans à toutes faulses doctrines & tromperies du diable, sans mesler parmy la

pure doctrine des Escriptions, leurs songes ne folles imaginations. Et ne leur attribuons aultre puissance ne auctorité, synon de conduire, regir & gouverner le peuple de Dieu à eulx commis, par icelle Parolle; en laquelle ils ont puissance de commander, deffendre, promettre & menasser, & sans laquelle ils ne peuvent & ne doibuent rien attenter. Or comme nous receuons les vrayz ministres de la Parolle de Dieu comme messaigiers & ambassadeurs de Dieu, lesquels il fault escouter comme luy mesmes, & reputons leur ministere estre vne commission de Dieu necessaire en l'Eglise; aussy d'aultre part nous tenons, que tous seducteurs, faulx prophetes, qui delaisant la pureté de l'Evangile declinent à leurs propres inuentions, ne doibuent nullement estre soufferts ne soutenus, quelque tiltre de pasteurs qu'ils pretendent; mais plustost, comme loups rauissans, doibuent estre chassez & deboutez du peuple de Dieu.

XXI. *Magistrats.* Nous auons la supereminence & domination, tant des roys & princes, que aultres magistrats & superieurs, pour vne chose sainte & bonne ordonnance de Dieu. Et comme eulx, en faisant leur office, ils seruent à Dieu, & suyuent vne vocation chrestienne, soit en deffendant les affligez & innocens, soit en corrigeant & punissant la malice des peruers; aussy de nostre part, que nous leur deuons porter honneur & reuerence, rendre obeyssance & subiection, executer leurs commandemens, porter les charges à nous par eulx imposées, entant qu'il nous est possible sans

offenser Dieu. En somme, qu'il nous les faut reputer comme vicaires & lieutenans de Dieu, auxquels on ne puisse nullement resister; synon en resistans à Dieu mesmes. Et leur office, comme vne sainte commission de Dieu, laquelle il leur a donné, affin de nous gouverner & regir. Parquoi nous entendons que tous chrestiens sont tenus de prier Dieu pour la prosperité des superieurs & seigneurs des païs où ils vivent, obeyr aux statuts & ordonnances qui ne contreuiennent aux commandemens de Dieu, procurer le bien, la tranquillité & vtilité publique, se efforçant de entretenir l'honneur des superieurs & tranquillité du peuple, sans rien machiner ne procurer qui soit pour esmouuoir troubles ne dissentions. Et au contraire nous declairons, que tous ceulx qui se portent infidelement enuers leurs superieurs, & ne ont droicte affection au bien publicq du pays, où ils conuersent, en cela ils demonstrent leur infidelité enuers Dieu.



SOMMAIRE: C'EST VNE BRIEVE

DECLARATION D'AVCVNS LIEVX

fort necessaires à vn chacun Chrestien, pour
mettre sa confiance en Dieu, & à ayder son
prochain.

*A tous ceux qui ayment nostre Seigneur, & ont desir
de cognoistre la verité. G. Farel, S.*

EN ce temps, auquel il plaist à nostre Seigneur
reueler sa sainte clairté & lumiere, sur ceux
qui estoient és profondes tenebres, plus grandes
que celles qu'on attouchoit & tastoit en Egypte.
Plusieurs sont qui ne peuuent croire auoir esté en
telles tenebres: neantmoins tous confessent bien,
qu'il y a fort à dire sus l'estat de ceux qui doiuent
estre le miroir des autres, & qu'ilz n'ont fait leur
office deuement. Mais de cognoistre la principalle
cause de l'erreur, ilz ne peuuent: à cause de la
grosse cecité, trouble & barbouillement, duquel
le monde a esté enuironné & enueloppé, ne pou-
uans entendre ne croire qu'il ait esté possible que
tout ait esté si fort changé & gasté: tellement qu'il
n'y soit rien demouré pur, ainsi qu'il doit estre:
& qu'il ne pourroit estre qu'en si long temps il n'y
eust quelcun contredifant & ayant cognoissance
de verité: veu que tant de miracles ont esté faitz,
tant de grans temples ont esté eleuez, tant de re-
ligions fondées, où innumerables ont vescu, les-

quelz on a estimez plus que saints. Car ceux qui ont esté reputez les plus gens de bien, ont toujours taché de les auancer & honorer.

Entendez, tous ceux qui aymez verité : & ne vous fondez en voz entendemens, sagesse, raison & prudence : mais en Dieu, duquel le propos est immuable. Et ce qu'il dit ne peut estre autrement. Il faut que tout ce qu'il a predit par ses seruiteurs aduienne. Regardez l'Escripture, & vous trouuerez que tout deuoit aduenir ainsi qu'il a esté, & telle seduction deuoit venir, & que tout deuoit estre gasté & destruit plus qu'on ne pourroit croire. Or voyez vous d'où il vient, que vous ne pouvez croire que si grande tromperie ait obtenu & regné. Et en regardant la sainte Escripture, plus en cognoistrez par la reuelation de Dieu. Mais donnez vous garde en la lisant, que ne la tiriez à vostre sens, la faisant seruir à voz affections en foullant la pasture des brebis, la parolle de Dieu qui est contenue en l'Escripture, & marchant sus aux piedz, ou que par icelle vous traitiez cruellement voz freres, troublant tout, frappant de voz cornes : mais en vsez à ce qu'elle est ordonnée pour donner honneur & gloire au seul Dieu, sans s'arrester à aucune creature, ne mettre le salut en autre qu'en Dieu, sans estimer autre chose que luy. Faites que tout vous serue à charité, à garder amitié, paix & concorde avec tous, tant qu'il est en vous. Apprenez la benignité & douceur du Sauueur, & non point la cruauté & rage des Pharisiens. Taschez à la destruction des vices & pechez, & au salut des pecheurs

2 Thef. 1.
Dan. 8.

en toute douceur. Administrez les corrections ameres en toute charité, ce qui deplait au poure pecheur, puisant & prenant tousiours de la sainte Escriture. Car es maladies fort dangereuses & mortelles, ne faut aller à la volée : mais vser de bons & propres remedes. Ainsi en l'affaire du salut, en ce qui touche l'ame, ne faut proposer que choses trescertaines, lesquelles on prend de l'Escriture sainte tant seulement. Laquelle contient le conseil & volonté de Dieu. Nul ne s'espargne à aider son prochain. Nul aussi ne reiette l'admonition & conseil d'autrui : mais que tout soit prouué & qu'on tienne ce qui est bon, & qu'on reiette ce qui est mauuais. Non point ainsi qu'il nous semble : mais comme la sainte Escriture monstre, qu'on doit receuoir ou reietter. Pourtant cognoissant que ie suis debteur & tenu à tous, de ce que nostre Seigneur a mis en moy, pour le bien, profit & salut d'un chacun : ne voulant nuire à personne : mais desirant que tout le monde donne honneur & gloire au seul Dieu : à tous offre & presente, ce que nostre Seigneur m'a donné, priant vn chacun, pour l'amour d'iceluy qui nous a tant ayez qu'il a donné son seul Filz trescher pour nous, qu'en toute bonté, diligence par vne ardente affection de cognoistre verité, en laquelle gist l'honneur de Dieu, on examine tout ce qui est contenu icy selon la Loy de Dieu, selon le iugement de l'Escriture. Priant le Pere tout plein de misericorde, qu'il vueille & soit son bon plaisir plus clairement monstrier sa science & cognoissance au poure monde, chassant

chassant toutes tenebres d'erreur par le soleil de iustice nostre Seigneur Iesus, vraye lumiere & verité, illuminant les pources aueugles & ignorans par son saint Esprit: tellement que de toutes pars du monde tous viennent adorer nostre Pere en son saint Tabernacle: en son propiciatoire, en nostre sauueur & redempteur Iesus, auquel & par lequel il soit seruy, adoré & honoré selon la sainte volonté: par le seul mouuement du saint Esprit, Amen.

Sommaire.

De Dieu. CHAP. I.



DIEU, est vne simple Essence spirituelle, indiuisible, & incomprehensible, & duquel nul entendement créé, peut rien comprendre, ny entendre en le considerant simplement & en foy. Et ce que nous confessons & croyons estre vn seul Dieu en trois personnes, le Pere, le Filz, & le saint Esprit en vunité d'Essence & de nature, confessans la Trinité des personnes en vraye distinction personnelle & parfaite vnion d'Essence & de substance, sans confondre les personnes, ne diuiser l'Essence: nous l'entendons & croyons par la Foy que nous auons, à ce que Dieu nous a reuelé par les saintes Escritures, qui de ce nous rendent tes-

O.

- moignage, & non point par chose que nostre esprit puisse concevoir. Mais le considerant en ce qu'il a fait, en quoy il se manifeste, on le cognoit estre bonté, puissance, & sagesse infinie : sans commencement & sans fin, verité immuable. Ce que bien on entend par la creation du monde : auquel rien n'y a inutile, & qui ne porte profit. Et combien qu'il soit fait de rien, & y ait grande contrariété : neantmoins par la puissance de Dieu est conserué, ainsi que par sa grande sagesse, tout a esté si bien ordonné. Cecy nous monstre la sainte Escriture, & comment nostre Dieu est si bon, qu'il nous a formez à sa semblance, nous donnant la
- Gen. 1.* seigneurie sus toutes creatures. Laquelle perdue, par desobeissance & presumption, nous a esté rendue par la grande bonté de Dieu, lequel a tant
- Jean 3.* aymé le monde, qu'il a donné son seul Filz, qui par la vertu & la puissance du Pere (estant en luy) a destruit nostre mort, par merueilleuse sagesse :
- Rom. 8.* destruisant le peché, par le corps semblable à peché, donnant & restaurant pleine vie, par son obeissance, à ceux qui estoient mortz par desobeissance. Afin que le propos & ordonnance immuable de
- Ephes. 1.* Dieu fust accompli : & que ceux, qui auant le commencement du monde auoyent esté ordonnez à vie, en eussent iouissance & possession. Laquelle chose entendue & écrite au cœur, engendre telle
- Rom. 8.* confiance en la grande bonté de Dieu, que par icelle viuans, sommes asseurez que rien ne nous peut separer de son amour. Car on vit à luy en le sentant & cognoissant : pourtant que c'est la vie

eternelle, cognoistre le seul vray Dieu & celuy qu'il a enuoyé Iesus Christ.

Iean 17.

De l'homme. CHAP. II.

L'HOMME est meschant, ne pouuant rien, fol & temeraire, ambitieux, plein de fausseté & d'hypocrisie: inconstant, variable, ne pensant que mal & peché, auquel il est nay & conçu: en tout & par tout cherche soy mesme, n'estimant que soy & son profit: voulant tousiours magnifier ses œuvres, puissances & vertus: plein d'ingratitude & desobeissance, d'ignorance & de desffiance de Dieu: plus est aspre & songneux de garder ses inuentions, loix & ordonnances, que celles de Dieu. Il ne peut porter d'estre humilié, deshonoré & mesprisé: mais se veut esleuer sus Dieu, sus sa sainte Parole, Loy & commandement. Et d'autant qu'il a plus d'apparence de iustice & sainteté, d'autant il est plus meschant & plus inique, & a plus d'iniquité & souillure en soy. Et pourtant est il maudit, malheureux & menteur: &, comme racine pourrie & mauuais arbre, ne peut porter que mauuais fruitz: car tout est corrompu en luy. Pourtant que mort, par la desobeissance du premier homme, de laquelle il est tout gasté, ne peut fructifier qu'à la mort & damnation: ayant toutes cogitations mauuaises: pource que toute la production des pensées de son cœur, est tant seulement à mal en tout temps: car il est chair, & ce qui vient de son cœur est mal, & toute affection de chair.

Psal. 14. 51.

Rom. 7.

Psal. 50.

Psal. 116.

Rom. 3.

Matth. 7.

Gen. 6. 8.

De Iesus Christ. CHAP. III.

- Iean 1.* **I**ESVS CHRIST, vray filz de Dieu, le bras, puissance, parole & sapience du Pere, estant vn avec luy en essence, vray Dieu & eternellement engendré du Pere, & vray homme en ce qu'il a prins nostre chair & nature en temps, fait semblable à nous en tout, excepté peché. Auquel comme homme, Dieu a esleu son saint Temple, son habitation, son tabernacle, le Sainct des sainctz, le Propiciatoire, ou sont tous les thresors de sapience & sagesse, & ou toute la diuinité habite : non pas comme en l'ombre & figure : mais comme au corps & verité, auquel est consommée & parfaitement accomplie toute l'œuvre de Dieu. Car par luy sont restaurées & parfaites toutes choses, tant au ciel qu'en la terre : pourtant que pleine vie, pleine puissance, vertu, sagesse, grace & iustice, sont en luy. Lequel fait obeissant au Pere, nay de mere, voire Vierge, sans semence d'homme, fait subiet à la Loy, n'a point demandé sa gloire, ne sa volonté : mais celle du Pere, ne parlant & ne faisant rien de soy mesme : mais tout par son Pere, lequel estoit en luy, reconciliant le monde à soy mesme.
- Gal. 4.* Tant s'est humilié & abaissé, qu'il est mort pour nous, luy iuste & innocent, pour les iniustes & iniques : offrant son corps & son sang pour la purification de noz ames : lesquelles par ceste mort & sacrifice, & par ce beau don de son Filz, le Pere veut qu'elles soyent certaines de leur salut & vie,
- 2 Cor. 5.*
- 1 Pier. 3.*
- Hebr. 7. 9. 10.*

& que pleinement elles soyent purgées & lauées de leurs iniquitez. Et que le Pere, pour l'amour de foy-mesme, & non pas pour l'amour de nous, ne de nos œuvres, merites & iustices (qui ne sont qu'abominations) il nous sauue, il nous viuifie, nous prenant pour ses filz & heritiers avec Iesus Christ: duquel sont faitz membres tous ceux qui ont vraye foy en luy, & qui sont participans de son Esprit, qui les viuifie, vnir, ente, & conioint au corps d'iceluy: & pourtant vniz & incorporez au corps de Iesus. Par la vertu diuine qui habite au chef Christ vray Dieu & vray homme, toute puissance contraire est destruite: par la vie parfaite & immortelle, nostre mort abolie: par la sainteté, iustice, pureté, & innocence infinie qui est en luy, toute nostre mauuaistié, iniquité & ordure, est abysmée. Et par ceste grande puissance nous sommes reparez en plus noble estat que iamais ne fusmes deuant le peché d'Adam, au paradis: non point qui est terrien, mais celestiel: à vne vie, non pas corporelle, corruptible, & qu'on peut perdre: mais spirituelle, sans corruption, & qu'on ne perdra iamais.

Qui cognoit & entend cecy par vraye & viue Foy, il a veritablement la vie eternelle, & plus ne s'arreste aux creatures, ne aux choses vaines, ayant cognoissance du Pere par le Filz: auquel il cognoit & entend la grande bonté de Dieu, & son infinie misericorde.

Rom. 8.

2 Cor. 11



*De la Loy & sa vertu. CHAP. IIII.**Rom. 3.*

LA Loy de Dieu, vraye reiglè de bien viure, contenant & monstrant toute iustice & perfection, qui doit estre en l'homme, luy enseignant quelle saincteté, iustice & pureté il doit auoir, & ce qu'il doit faire ou fuïr pour estre la vraye image de Dieu claire & reluisante en toute bonté & bien. Et en ce que tous sont tant loing de faire ce qu'elle commande, & d'eüiter ce qu'elle defend. Elle monstre aux hommes leurs fautes : & combien ilz sont loing du chemin auquel ilz doiuent cheminer, declairant par menaces les grans maux qui doiuent aduenir aux transgresseurs, & l'ire & l'indignation de Dieu sur les pources pecheurs, & leur condamnation, engendrant horreur & crainte seruile. Et pource qu'elle trouue tous hommes charnelz, desnuez & destituez de l'Esprit de Dieu, elle esmeut le peché & la concupiscence : car le peché qui est en l'homme, prend sa vertu & s'esueille par la Loy, & ainsi par occasion elle multiplie & augmente le peché. Et de là vient que tous ceux qui sont souz la Loy, sont en malediction, pourtant qu'ilz ne peuuent parfaire ce que la Loy demande. Car elle n'est pas accomplie par les œuvres, pour l'infirmité de la chair, qui ne peut iamais faire la Loy : mais en tout & par tout défaut. Parquoy nulle œuvre faicte d'homme icy viuant en ce corps, ne satisfait, & n'est droictement selon la Loy. Dont vient que la Loy ne mene rien à per-

*Leuit. 26.**Deu. 24.**Rom. 4.**Rom. 7.**Sal. 3.*

fection, que & par icelle personne n'est sauué, mais par la seule Foy. A cause de quoy elle, comme vn pedagogue, qui ne veut qu'on s'arreste à foy, a donné à entendre qu'on doit chercher Iesus Christ: car il est la fin de la Loy, iustificiant tous ceux qui croient en luy. Autre moyen n'y a pour euitier l'ire & indignation de Dieu, qui nous est monstrée par la Loy, laquelle (comme a esté dit) est la vertu & l'aguillon de peché, de quoy sommes deliurez par Iesus Christ, quand nous entendons & croyons qu'il a porté la malediction pour nous.

Rom. 10.

De l'Euangile. CHAP. V.

L'EVANGILE, est la vraye puissance de Dieu. En salut à tout croyant, la consolation des affligez, la deliurance des captifz, la vie des mortz & perduz, ioye de cœur surmontant tout sentiment.

Rom. 1.

Luc 4.

Qui ne s'esioyroit en oyant son ennemy (lequel il ne pouuoit fuyr, en la pleine puissance duquel il estoit) estre vaincu & destruit? la mort & damnation ineuitable, luy estre tournée en vie & salut eternal? Enfer, au royaume des cieux? l'horreur de la compagnie des diables, en la bourgeoisie des cieux & adoption des enfans de Dieu? Ce qui nous est annoncé par la mort de Iesus, qui par sa vertu, laquelle est du Pere, qui est en luy, nous a sauuez, nous ostant la crainte seruile des menaces de la Loy: pourtant qu'il n'y a point de damnation à ceux qui sont en Iesus. Car estans deliurez

Rom. 8.

de la seruitude de péché & de mort (en laquelle ilz estoient detenez par la Loy) seruent & yiuent à Dieu, duquel ilz sont faitz enfans par Foy qu'ilz ont: croyans parfaitement tout leur estre remis par Iesus, qui a puissamment triomphé de noz ennemis. Et pourtant sa victoire est à nous, & par luy tout est nostre, ainsi qu'il nous est annoncé par ses bonnes nouuelles qui sont l'Euangile, qu'il nous a tout restauré & donné, & encore d'auantage plus que n'auions perdu.

Iean 1.

Colos. 2.

Rom. 8.

Et pourtant ayans pleine Foy, nous nous armons de sa iustice, contre nostre péché: de sa vie, contre nostre mort: de son innocence, contre nostre iniquité. Et par luy obtenons toutes les promesses de Dieu, & si grand bien que iamais œil ne voit, n'aureille n'ouyt, ne cœur ne pensa, combien est grand ce que Dieu nous a promis & apresté.

Esa. 64.

1 Cor. 2.

Du péché. CHAP. VI.

Rom. 7.

1 Cor. 2.

PÉCHE, est nature corrompue & deprauée, uiuant à soy, aymant soy-mesme, repugnant à la Loy de Dieu, & la hayant: aymant les choses charnelles, mesprisant les spirituelles, n'entendant rien de Dieu, pleine de toute ignorance, fructifiant à mort.

Car péché est source si maudite & si mauuaise, qu'elle ne peut que mal. Et d'autant que la droite voye & le bien luy est plus clairement manifesté, d'autant plus il la reiette & la vitupere. Et s'il ne meurt

meurt & est destruit par la mort de Iesus, il dit le bien estre mal, & le mal estre bien : la lumiere estre tenebres, & les tenebres estre lumiere : blasphemant le saint Esprit : attribuant à Dieu iniustice, & à soy innocence : & s'esleuant contre Dieu & son Esprit, le condamnant pour regner : car il veut auoir bruit & honneur. Et ledit peché est en aucuns comme endormy, & comme mort, ne se declairant point, comme quand le temps de produire ses fruitz n'est encore venu, & qu'il n'a les moyens, instrumens, & puissances assez propres, comme es enfans, & semblables. En aucuns, il se couure de l'apparence de sainteté & de bonté, par hypocrisie, en grosse seduction. Es autres, il se monstre tout ouuertement comme vne rage. Et tout cecy est vne mesme source & racine d'une nature peruerse & corrompue, qui se manifeste en diuerses sortes, selon qu'elle peut produire ses fruitz : & ne peut cesser, mesme en ceux qui ont receu l'esprit de Iesus, qu'il n'empesche le bien, & induise à mal : & ce, tant que l'homme est viuant icy, iusques à la mort. Parquoy, personne viuante icy estant sur terre, ne se peut dire estre sans peché, mais doit batailler contre iceluy, & demandant pardon, doit prier qu'il soit remis.

De iustice. CHAP. VII.

IUSTICE, est la vraye image de Dieu luyfante & claire, qui le represente & luy ressemble en bonté, sainteté, droiture, pureté & innocence : & sert à
O. i.

Dieu en pleine obeissance & accomplissement du vouloir & ordonnance d'iceluy, sans aucune corruption ne souilleure de peché, ny d'aucune iniquité. Et telle iustice seulement est en Iesus, qui à bon droit doit estre appelé Iuste, & ne faut que aucun viuant espere ne presume auoir vne telle iustice. Mais la iustice chrestienne, laquelle nous auons de Dieu. & enuers Dieu, nous est donnée par la regeneration, quand le Pere nous tirant à son Filz par son Esprit, lequel il nous donne, il nous tient & repute iustes en Iesus & par Iesus, nous remettant & pardonnant nōz pechez pour l'amour d'iceluy. Car en receuant le saint Esprit, nous sommes regenerés & faitz nouvelles creatures, & sommes coniointz & vnīs à Iesus, puis que sommes participans de Iesus, lequel le Pere nous donne par son saint Esprit, & fait que nous soyons en luy, & luy en nous : & ainsi tout ce qui est à Iesus nous est donné & communiqué : assauoir sa sainteté, pureté, & innocence, iustice, salut, & vie. Car Iesus n'est receu sans les biens qu'il a, veu qu'il n'est iamais sans sa iustice, sainteté, pureté, vie, innocence, salut & verité. Et quiconque a l'Esprit de Iesus, il est possesseur de Iesus, & de tout ce qui est en iceluy : & est vestu de Iesus & fait membre du corps d'iceluy : & à cause de la iustice de Iesus, & de sa pureté, innocence & sainteté, le Pere nous tient pour iustes, purs, saintz & innocens : & combien qu'il y ait des pechez en nous, qui nous desplaisent, & desquelz desirons estre deliurez, neantmoins à cause que nous som-

mes vestus de Iesus & de sa iustice, ilz sont cachez, & ne nous sont imputez ne comtés : & pour l'amour de Iesus nous sont pleinement remis & pardonnez. Et en cecy est declairé la grande vertu de l'Euangile, & de l'ouye de la parole de Dieu : puis que la Foy est par l'ouye de la Parole, & qu'en croyant nous receuons le saint Esprit, & receuans le saint Esprit, nous sommes en Iesus & l'auons, & sa iustice & sainteté : & par luy sommes agreables au Pere, & obrenons remission de nos pechez, & sommes tenuz iustes : & ainsi Dieu, iuste il iustifie & tient pour iustes ceux qui sont en Iesus, qui est le Filz bien aymé, sur lequel & auquel Dieu est appaisé, & a son bon plaisir, tant en luy comme au Chef, comme en vertu & pour l'amour de luy, en tous ceux qui sont en luy, comme membres du corps d'iceluy. Et ce bon Pere, pour nous attirer à Iesus, il a ordonné la predication de l'Euangile de sa sainte Parole : par laquelle (comme a esté dit) les croyans en icelle reçoient le saint Esprit, & sont faitz nouvelles creatures en Christ, regenerer & faitz enfans de Dieu : non point par semence corruptible, mais par la semence incorruptible par la parole de Dieu, qui demeure eternellement : afin que renouellez & regenerer, vivent en Iesus, mourans & renonçans à eux mesmes, abandonnant tout pour adherer à Dieu, en l'aymant seulement, & ayant le cœur à sa sainte Parole : & tirez hors des choses terriennes, ont le desir aux choses celestielles. Et par la vertu du saint Esprit, par lequel ilz ont cognoissance de verité, ilz portent fruitz de

*Math. 3.**Esa. 40.**1 Pier. 1.*

vie & de l'Esprit, sachans prendre & eslire le bien, & condamner & reietter le mal: donnans à Dieu toute gloire & honneur: luy attribuans tout bien, salut & vie: reietans toute autre aide & confiance qu'en luy, & tout ce que la pure parole de Dieu ne contient.

Touchant de la iustice civile, selon laquelle l'homme est dit & tenu civilement iuste: combien qu'elle soit vn don de Dieu, & qu'elle serue icy grandement pour la paix & bien des hommes, laquelle n'est à mepriser ny à reietter, toutesfois n'en veux de present parler: car Dieu la donne comme vn don, non point appartenant aux seulz enfans du Regne, mais qui est communiquée aux reprouuez, & qui par icelle n'auront vie. Et encore moins par la iustice des Pharisiens: car toute iustice que les hommes veulent establir, tant s'en faut que par icelle on ait salut, que mesme elle nous retire de la iustice de Dieu, & rend tous subietz à peché: & au lieu d'estre en estime & approuvée devant Dieu, comme elle est icy des hommes, elle est abominable & reiettee.

De la chair, vieil homme. CHAP. VIII.

CHAIR, est le vieil homme: c'est à dire, nature deprauée & totalement corrompue, pleine d'ignorance & de deffiance de Dieu: en laquelle l'homme est conçu & nay: & tellement icelle a corrompu tout, qu'elle n'a rien laissé en aucun, ainsi conçu, pur ny entier, pour iuger, vouloir,

ny faire, ainſi qu'on doit ſelon Dieu & ſa Parole : mais abuſant de tout, ſe cherchant, ayment ſoy meſme, ſervant à ſoy, ne fait rien que pour ſoy, & tel eſt tout homme, qui de ſoymeſme eſt ſerf & captif de peché, & tout ce qu'il deſire, veut, entend, fait, cognoit, iuge, & fait, tout eſt deſir de la chair, volonté, ſageſſe, prudence, iugement & œuvre charnelle.

Et l'affection de la chair, & l'affection de peché, ſont vne meſme choſe. Et pourtant ne fructifient qu'à la mort : car leur fruit n'eſt que haine, meurtre, enuie, paillardie, larcin, hereſie, idolatrie, blaſpheme, peruerſes penſées & cogitations : brief, contrariété & repugnance à tout bien.

Gal. 5.

Et maintenant la chair vient tout clairement contre la parole de Dieu, l'accuſant d'iniuſtice, d'autant qu'il ne fait pas ſelon le vouloir, eſtime & iugement d'icelle, diſant : Il n'y a point de Dieu, il n'y a point de iuſtice en haut : Dieu n'a point d'eſgard ne de cure des choſes de çà bas, & ſemblables blaſphemes contre noſtre Seigneur & ſa Parole, leſquelz ſortent & viennent de la chair. Et par autre maniere ſoy contrefaiſant par ſimulation feinte : & ſemblant auoir le zele de Dieu & deſir de ſon honneur : comme voulant exaucer & magnifier ſon ſainct Nom : & qu'il ſoit ſeruy plus ſainctement & en plus grande reuerence. Parquoy, elle controuue nouuelles manieres de faire, hors de la parole de Dieu, nouuelles ſectes, reigles & inſtitutions : ſimulant, feignant, & mentant en tout ce qu'elle fait, & ainſi controuué, que ce ſoit ſain-

Pſal. 1 & 27.

reté & l'amour de Dieu. Et pourtant ne faut estre legier à suyure ce qui nous semble estre de Dieu, tant en ce qui vient de nostre cœur, comme d'autrui : mais faut esprouuer diligemment quel esprit c'est. Car ainsi que l'ange des tenebres se transfigure en Ange de lumiere : aussi sont ses ministres : & sus tout, la prudence de la chair.

1 Jean 4.

2 Cor. 11.

Math. 16.

1 Roys 15.

Il faut donc prouuer par la sainte Parole de Dieu : & diligemment examiner toutes motions, tous propos & institutions, pour sauoir quel esprit c'est qui les suggere, met en auant, s'il est de Dieu, ou de la chair. Qu'on regarde la bonne intention de Pierre, pour laquelle il a esté nommé Sathan, celle aussi du Roy Saul, & des Roys qui ont voulu faire le seruice de Dieu aux hautx lieux, & par les bois, comme auoyent fait les Patriarches parauant, comment ilz sont repriz de l'Ecriture. Car tout a esté prudence de chair : laquelle, comment qu'il soit, veut auoir la seigneurie & domination, & veut gouverner, ordonner & disposer à son plaisir, & auoir l'honneur de tout, & estre louée, mettant tout souz ses piedz, & mesprisant tout ce qu'elle n'a controuué & dressé.

De l'Esprit & nouuel homme. CHAP. IX.

Gal. 5.

L'ESPRIT, est le mouuement & affection que Dieu baille à l'homme, le renouellant, luy donnant sa grace, & le iustificiant par Iesus.

Cestuy a continuelle bataille contre la chair, & iamais n'a paix iusques à ce que la chair soit

morte. Il est simple & pur, ayant cognoissance de Dieu, des choses profondes de Dieu, des célestielles, auxquelles il pousse l'homme, afin qu'il soit imitateur de la bonté de Dieu, fructifiant à vie, toute douceur, amitié, benignté, compassion, chasteté, patience, paix, ioye, charité, & beneficence : ferme esperance en celuy qui a tout fait : auquel il a toute confiance & foy : faisant que l'homme ne soit point temeraire, ne presomptueux : mais humble & obeissant à la parole de Dieu, lequel, veritable, point ne se change : mais ce qu'il a dit, il le fera : ce qu'il a promis, il le tiendra. Et pourtant adresse l'homme, afin qu'il ne sente autrement de Dieu, qu'il ne s'arreste à autre qu'à Dieu : ne prenant autre maniere de viure, que celle que Dieu a expressement commandée, ne s'arrestant qu'en la pure Parole de Dieu : combien que tout soit changé & mué, & que les infideles florissent, grans signes & miracles soyent faitz : & que tous disent autrement que le pur commandement de Dieu ne porte, qu'il ne bouge : mais qu'il demeure ferme en la Parole, laquelle demeure eternellement : face le monde comment qu'il vueille, il donne cest honneur à Dieu qu'il est veritable, & que tout ce qui n'est prouué par sa sainte Parole, n'est que vanité & mensonge.

Il vaut beaucoup mieux sauoir cecy par experience, que par liure. Neantmoins il est escrit pour les esleuz : afin qu'ilz desirent, & affectueusement prient que l'Esprit leur soit donné, à ce qu'ilz soyent faitz nouueaux hommes, & qu'ilz

Psal. 36.

Matt. 24.

Esa. 40.

1 Pier. 1.

ayent cognoissance des choses de Dieu par son Esprit, & qu'ilz tuent & destruisent toutes les affections de la chair & du vieil homme, tendans seulement à l'honneur & gloire d'iceluy qui peut & fait tout, qui est nostre bon Pere, Dieu eternal, auquel ayons pleine fiance, & l'aymions de tout nostre cœur. Et pour l'amour de luy en tout bien edifions & secourions à nostre prochain, & gardions bien de contreuenir à cest Esprit & de l'esteindre.

D'incredulité, infidelité & mescreance. CHAP. X.

Psal. 130.

INCREDVLITE, infidelité & mescreance, est moins sentir & croire, ou autrement qu'il ne conuient, de l'infinie bonté, misericorde, sagesse & puissance de Dieu. Laquelle du tout en tout ne se peut fier en Dieu : mais incertaine, cherche autre moyen pour auoir aide & secours, pleine d'inconstance, craint ou il n'y a point de matiere de peur : se fie ou n'y a point de sùreté, sans aucun certain propos ny arrest : mais muable comme la Lune : & subiette à toute tromperie & deception. Car là ou n'est la lumiere de Foy, la clairté de la parole de Dieu : là regnent les princes des tenebres, là sont les trebuschemens & tombemens en la fosse. Pour le bon chemin, on prend le mauuais : pour la volonté de Dieu, le songe des hommes : pour les choses qui sont agreables à Dieu & ses saintes ordonnances, on suit ce qu'il a en abomination, & la doctrine diabolique. Car tout ce qui vient de ceste

ceste incredulité, & tout ce que fait celuy qui n'a la Foy, ne peut estre que peché, quelque couleur qu'il ait de sainteté & de bonne œuvre.

Rom. 14.

De Foy. CHAP. XI.

FOY, est grand & singulier don de Dieu, par laquelle sommes faitz enfans de Dieu: & est sentement, experience & cognoissance vraye de Dieu nostre Pere, qu'il est bon, parfait, puissant & sage: & que pour l'amour de soy mesme il nous a elleuz pour ses enfans, sauuez & rachetez par nostre Sauueur Iesus.

Iean 1.

Et ainsi en rien ne doute des saintes promesses de Dieu, ne de ce qu'il a parlé par les siens, pleins du saint Esprit: mais roborée & confirmée par la Parole d'iceluy, qui ne peut mentir: contre tout iugement, contre toute experience, contre tout entendement humain, iuge & tient fermement ce que Dieu a dit, & assurée par la verité immuable & illuminée par la vraye clairté, ne craint rien. Et sans aucune doute se tient ferme. Et celuy auquel elle croit, elle le tient embrassé par ses saintes promesses, estant puissamment armée contre tous ennemis, desquelz elle rapporte victoire: car rien ne luy est impossible. Tout ce qu'elle demande elle l'obtient, & ne peut faillir, pourtant qu'elle est & va par la Parole de Dieu. Et tout ce qui n'est en ceste Foy (c'est à dire, selon la cognoissance de la Parole & fiance en icelle) ce est peché. La Foy ne peut tirer à autre qu'à DIEU, & ne se peut tenir

Marc. 10. & 11.

Rom. 14.

qu'en Dieu, & ne peut recevoir que ce qui est de Dieu. Tout ne luy est rien que Dieu : rien ne luy plaist que Dieu & sa voix. Et pourtant qu'en luy seul elle s'arreste, ne peut estre confondue : mais parfaitement obtient ce qu'elle croit & espere. Parquoy, cependant que sommes en ce monde empeschez par infidelité, ne pouuans marcher si droictement comme il appartient, grandement deuons demander & prier que la Foy nous soit augmentée.

Du merite. CHAP. XII.

MERITE, attribué aux hommes, est voix pleine d'arrogance, pleinement repugnante à Dieu, & à toute l'Ecriture, controuuée par l'esprit d'orgueil & d'erreur, pour mettre à neant la grace de nostre Seigneur. Car la maudite doctrine des merites, dit : Que l'homme se tournant à Dieu merite & dessert de sortir de peché : & de venir à confession & en auoir remission, & de paruenir à l'estat de grace : auquel faisant bonnes œuvres, il satisfait pour ses pechez, & gagne & acquiert le Royaume des cieux & Paradis. Lesquelz blasphemmes sont si trefeuident, que plus ne peuuent estre. Que peut meriter vn seruiteur inutile, qui ne sert à rien, qui ne profite rien ? Iesus nous commande (luy qui est la verité) que nous disions (voire s'il estoit possible qu'eussions tout fait ce qui nous est commandé) que nous sommes seruiteurs inutiles. Qui est celuy qui fit iamais tout ce que Dieu luy

a commandé? C'est estre sans peché, iuste, saint
comme luy, parfait & misericordieux comme Dieu,
sans auoir aucune concupiscence ne mauuaise af-
fection. Si nous sommes tous mauuais, & toutes
nos iustices sont abominables, comme vn drap-
peau souillé ou est ce merite? Si nous
n'auons puissance mesme de penser quelque chose
de nous: mais tout vient de Dieu, & de nous ne
pouuons que mal, serfz & venduz souz peché, ne
pouuons faire le bien que nous voulons, mais faisons
le mal que nous ne voulons: d'ou vient cest or-
gueil de vouloir dire, le gagneray le Royaume des
cieux par mes œuures? O orgueil, veux tu monter
là sus, & dire: le seray fait semblable au treshau-
tain? N'entens tu pas que la iustification est faite
sans desserte par la grace de Dieu, par la redemp-
tion de Iesus? Et que nous sommes sauuez par
grace, non pas de nous, c'est le don de Dieu: non
point par les œuures, afin que personne ne se glo-
rifie. Si donc nous sommes iustifiez & sauuez par
grace, ce n'est point par les œuures, autrement
grace ne seroit plus grace. Car à celuy qui œuvre,
le loyer ne luy est point deu selon grace: mais se-
lon debte, & comme chose deue & meritée. Mais
à celuy qui croit, la Foy luy est reputée à iustice,
sans les œuures.

*Esa. 64.**1 Cor. 3.**Rom. 7.**Esa. 14.**Rom. 3.**Eph. 2.**Rom. 4.**De grace. CHAP. XIII.*

GRACE, est l'amiable, bening, fauorable &
misericordieux regard de nostre tresbon Pere:

lequel, pour l'amour de soy-mesme, afin que son propos soit ferme de viuifier & sauuer ceux qu'il a ordonné à vie, sans aucun esgard de celuy à qui il fait mercy, ne de ses œuures, ne d'ou il est party ou nay, ne de toutes autres choses, luy pardonne toutes ses fautes & pechez, le dessiurant par son trescher Filz: lequel il donne au chetif, prisonnier du diable, de peché, d'enfer & de damnation: à cause de sa meschante, & damnée conception & natiuité qui est en peché, par laquelle il est fait & nay enfant d'ire. Et peché & rebellion contre la Loy de Dieu habite en luy, & a seigneurie en luy. Le bon Dieu & Pere de misericorde le prent pour son enfant adoptif, pour son heritier, & coheritier de Iesus Christ: lui donnant l'arre du saint Esprit, par lequel il le renouuelle par Foy, escriuant sa sainte Loy de vie & d'esprit, au cœur de ce pource pecheur: l'attirant à l'amour de luy, qui est le vray bien, & à suyure & aymer sa sainte volonté: en renonçant & detestant la sienne propre, & tout ce qui est de luy: le prenant souz sa protection & garde: le fortifiant en toutes tentations: le releuant de tous ses trebuschemens & fautes, qui luy aduiennent par l'infirmité de la chair: ne permettant iamais peché ne la mort auoir victoire en luy: mais par viuue & vraye Foy, fait qu'il vient obtenir les vrayz & incorruptibles biens, surmontant tous ses ennemis, & triomphant d'eux.

*Psal. 50.**Ephes. 2.**Rom. 7.**Ephes. 1.**Hier. 31.**Heb. 8. 10.*

De la resurrection. CHAP. XLII.

LE pere plein de toute misericorde, qui a tout fait pour l'amour de soy mesme, portant & souffrant en grande patience & tollerance les enfans d'ire, ordonnez à la mort: pour monstrier ses tresgrandes richesses de bonté, misericorde & douceur, sus les enfans de misericorde: lesquelz il a éleuz & ordonnez à la vie, auant le commencement du monde a ordonné que tous ressuscitent en leurs propres corps, pour la grande confusion & horreur espouuantable des reprouuez & infideles: & pour la merueilleuse ioye, gloire, triomphe & lieffe des fideles qu'il a éleuz. Car ainsi que les infideles sont tousiours contreuenus à la Loy de Dieu, voulans abbatre & destruire ce que Dieu a fait & ordonné: ilz doiuent recevoir leur loyer avec le prince d'iniquité. Et faut que la mort (à laquelle ilz ont seruy & fructifié) soit manifestée en leurs corps: non point mort corporelle, mais eternelle. Ainsi le Pere veritable & fidele, selon sa promesse, declairera la vie qu'il donne aux siens, les faisant semblables à son Filz. Car ainsi qu'il est ressus cité de mort à vie immortelle & incorruptible: ainsi tous ses membres, qui par vraye Foy sont vniz à luy, ressus citeront en incorruption & immortalité, en grande gloire. Car comme la mort n'a peu surmonter Iesus, qu'il ne soit ressus cité: aussi elle ne peut faire que tous ses membres, vrais fideles, ne viennent en leurs propres corps en immortalité.

*Prou. 16.**Rom. 9.**Eph. 2.**1 Cor. 15*

Pourtant, tous vrais Chrestiens, sachans que de nous, & de tout ce qui sort & vient de nous-mesmes, nous serions aussi malheureux que les reprouvez, & que par la grace de nostre Pere, & non point de nous, sommes separez des perduz & miserables, & que sommes nombrez entre les filz : nous ne craignons point de mettre ce corps pour l'honneur de nostre Pere : de mettre ceste vie corruptible pour son saint Euangile. Car, pour vray, il nous rendra trop plus nobles, trop plus excellens, & telle vie qu'on ne sauroit estimer.

O vrais champions & propugnateurs de la parole de Dieu, ayez bon courage : la victoire vous est preste, le triomphe ordonné avec le grand Capitaine Iesus. Ne tournez le dos en ceste bataille tresvertueuse. Entrez hardiment dedans, pour l'honneur de ce tant bon Pere, ce grand Roy, qui nous regarde : voire duquel est la bataille, & qui bataille en nous, nous menant & conduisant par son Esprit, tandis que nous allons bien. Donnez à luy seul la gloire : ne vous arrestez point aux choses visibles & presentes : mais aux inuisibles & qui nous sont promises.

O iour de lieffe, de triomphe, de tout bien & de toute consolation, heur & ioye : quand ce grand Sauueur, qui en son propre corps, auquel il a tant souffert & enduré, tant craché, battu, flagellé, si tant cruellement traité, qu'il estoit sans figure, & sa face estoit comme toute cachée : appellant les siens, qui ont esté participans de son Esprit, ou il a habité par iceluy, à venir en gloire, se monstrant

en son corps glorieux aux siens: faisant que leurs corps, qu'ilz auoyent laissé en partant de ce monde, soyent derechef vniz avec les ames en vraye vie immortelle, en gloire eternelle, faitz semblables à Iesus, pour regner eternellement, en tout bien, en toute ioye, plus qu'on ne peut dire, ny penser.

Du iour du Iugement. CHAP. XLIII.

LA pleine reuelation de la gloire des éleuz, de leur salut & vie, & la consommation de tout, apres quoy toute creature souspire: sera en l'aduenement triomphant & tresuictorieux de nostre Sauueur & Redempteur: quand tous ses ennemis seront mis souz ses piedz, & que tout luy sera fait subiet: lors les éleuz viendront au deuant de nostre Seigneur en l'air, & là sera veuë la tresgrande puissance de nostre Seigneur Iesus: qui lors en tous ses membres sera glorifié: & sera en ceste grande reuelation abolie & destruite toute corruption, mort & peché: & comme en son corps, auquel il est monté au ciel, il est glorifié, tellement que ny mort, ny autre poureté, qu'il a prinse pour nous, n'ont plus de lieu en luy: aussi n'auront plus és membres, qui sont les éleuz: lesquelz venans au Pere, n'auront plus rien qui soit defaillant à leur perfection.

1 Th. 4.

Quelle angoisse & destresse à ceux qui l'ont persecuté, le hayssant à mort, ne le pouuant porter, enragez d'enuie & de malueillance, le mettant à mort par mauuaise volonté & de faict: en

commençant au premier iuste Abel, en continuant
 és autres, & en la propre personne de Iesus, & fi-
 nissant au dernier iuste & élu? Car tout ce qui
 est fait aux éleuz, est fait au corps de Iesus: car
 ilz sont son corps, chair de sa chair, & os de ses
 os. Qui pourroit dire ceste angoisse? Mais laissons
 ce pensement aux meurtriers, espendans le sang
 des fideles: sinon qu'en ce aurons occasion de
 rendre graces à nostre bon Pere, qui nous a segre-
 gez & separez du milieu d'iceux, pour estre des
 siens, non pour noz œuvres ne merites: mais par
 sa grace & bonté infinie. Alors les éleuz, escriz
 & nombrez au liure de vie, auant que le monde
 fust, les vrais enfans de Dieu, par adoption &
 grace, separez des mauuais, & mis à la dextre en
 haut, en l'air, és nuées, au deuant du Seigneur,
 & en dignité, orront la voix pleine de douceur,
 de grace & de misericorde: Venez bienheureux,
 benis de Dieu mon Pere: auxquels, par moy, il a
 donné sa benediction, comme il auoit promis: re-
 ceuez pour heritage le Royaume, qui vous est ap-
 presté dès le commencement du monde.

*Eph. 5.**1 Th. 3.**Matt. 25.*

Icy vois-tu que ceux viennent à Iesus, & sont
 faitz heritiers de Dieu avec luy, qui ont la bene-
 diction du Pere: laquelle il auoit promise à Abra-
 ham, que par sa semence (qui est Iesus) ilz seroyent
 benis: auxquels le Royaume des cieux est appresté
 dès le commencement du monde. En quoy tu dois
 entendre iceux estre seulement des filz de nostre
 Seigneur, auxquels il donne sa benediction par
 Iesus: les vnissant à iceluy. Car de la plenitude de
 grace,

Jean 1.

grace, qui est en Iesus, tous reçoivent par Foy, par la vertu du saint Esprit, lequel les vnist & conjoint au Sauveur : & fait qu'ilz sont ses membres & vniz à luy, ordonnez à la vie dès le commencement du monde. Car avant que le monde fust créé, Dieu a prëueu & élu les siens. Pourtant, il ne dit pas : Venez circonciz & baptisez, ou nommez avec mes Apostres & disciples, ou nommez Iuifz ou Chrestiens, qui auez esté telz : mais à toute langue & nation il dit : Venez, vous à qui mon Pere a donné sa benediction, & préparé le Royaume, dès le commencement du monde. Car rien ne peut empescher l'election de Dieu, & son propos immuable : soit que celuy qu'il a ordonné à vie, soit nay & nourry au milieu de Turquie, ou qu'il meure dedans le ventre de sa mere. Puis qu'il est ordonné à vie, il est aymé de Dieu dedans le ventre de sa mere avec Iacob. Le propos de Dieu est ferme. Car l'election & grace de Dieu, & son Esprit (duquel il sanctifie les siens en Iesus) n'est lié à aucun temps, aucun lieu, aucunes personnes, aucunes manieres de faire : mais franchement sans aucun regard, ne des parens, ne des gens ou lieux, ne de la vie d'iceluy à qui il est donné, Dieu le donne. Et toutesfois c'est grande benediction d'estre nay entre les Chrestiens, d'auoir pere & mere fideles, qui ont la promesse & pour eux & pour leurs enfans, & qu'icelle soit scellée & confirmée par la reception du saint Baptême, & encore par la grace d'ouyr & de prendre le saint Euan-gile : & de participer à la sainte Cene de nostre Seigneur & continuer avec les fideles. En quoy

*Eph. 1.**Rom. 9.*

nostre Seigneur grandement declaire sa bonté envers nous, & par ses saintes ordonnances nous assure de sa grace, & nous la presente & donne: tellement que ceux qui les mesprisent & reiettent, ilz reiettent & mesprisent leur salut, & celuy qui a ordonné ces choses saintes, & qui en grande vertu besogne, quand elles sont receues comme il appartient. Mais celuy qui est touché en son cœur par l'Esprit de Dieu, & qui est priué de ce que nostre Seigneur a laissé à son Eglise, de quoy il vseroit de bon cœur: il n'est reietté pourtant, combien qu'il soit priué de choses grandes & desirables: mais le S. Esprit besogne en luy, selon sa bonne volonté. Car le S. Esprit distribue ses graces ainsi qu'il luy plaist. Et aucontraire, rien ne profite aux infideles & reprouuez, d'estre filz d'Abraham ou Isaac, selon la chair. Baille-leur toutes les sanctifications qu'on peut auoir corporellement, tant de baptêmes & purifications que l'homme puisse administrer, say qu'ilz soyent enseignez des plus saintz Prophetes & Apostres, voire de la bouche de Iesus, & qu'ilz retiennent & enseignent ce qu'ilz ont appris: qu'ilz facent toutes vertuz & miracles, ayent toute apparence de sainteté, tout n'y sert rien. Regarde Esau, pleurant sur son frere, le receuant amiablement, qui est nay d'une mesme ventrée. Regarde Iudas, grand Apostre, preschant ce qu'il auoit appris de Iesus, faisant tout plein de miracles: mais tout n'est rien. Et pourtant, ceux qui ont prophetizé & fait miracles, qui ne sont pas des eleuz, seront reiettez: en quoy le monde est grandement abusé, n'ayant co-

Gene. 33.

Matt. 7.

gnôissance de l'ordonnance de Dieu inestimable, iugeant aucun estre saint à cause des miracles, & autres choses, auant le temps que nostre Seigneur vienne. Car pour les miracles, ne telles choses, on n'est point saint. le laisse les miracles controuuez: les miracles sont aussi faitz par les reprouuez. Et ceux que Dieu a ayez grandement (comme plusieurs Prophètes & Iean Baptiste) n'ont fait aucuns miracles.

Donnons donc toute la gloire à Dieu, & non aux creatures, ceremonies, sacemens, ou autre chose que l'homme puisse administrer: entant que la chose est exterieure & faite par l'homme: car chose qui soit n'a sa vertu ny de soy, ny de la vertu de l'homme qui la fait: mais toute la vertu & efficace est de Dieu, qui œuvre par son Esprit, voire par choses qui ne sont que folie à la prudence humaine. Dieu seul sauue & donne vie, ainsi qu'il a disposé: demandons que sa volonté soit accomplie ou en vie, ou en mort.

Mais cecy ne peuuent vouloir que les filz qui desirent la volonté de leur Pere estre faite: desirans d'estre avec leur Pere, en gemissant apres luy, en ce monde. Considere comment les éleuz (quand l'occasion vient, & que nostre Seigneur œuvre en eux) se monstrent estre des enfans de Dieu. Est-ce en hypocrisie, papelardise, barboterie, distinctions des iours, des viandes, d'habillemens, ou de lieux? En cecy ne se declare l'Esprit de Dieu, lequel tire le cœur de l'éleu: & fait qu'il ayme & honnore Dieu; mettant sa fiance en luy: mais il se declare par vraye charité enuers le prochain: auquel il

Mat. 25.

fert & aide, pour l'honneur de Dieu, en telle affection, comme s'il le faisoit à Dieu : lequel, en soy-mesme, n'a nul mestier de nous, ne de noz biens, ne de boire, ne de manger, ne de maison, ne de robbe : mais veut estre seruy en nostre prochain : tellement que ce que nous luy faisons, nous le faisons à Dieu. Et pourtant dira-il à ce iour du jugement : le ay eu faim, & vous m'avez donné à manger : soif, & m'avez donné à boire. l'ay esté sans logis, & m'avez receu avec vous : nud, & m'avez vestu : malade, & m'avez visité : en prison, & estes venuz à moy. Par cecy donnant à entendre, qu'en toutes les necessitez & indigences, que voyons en nostre frere, luy deuons secourir. Car ceux qui ont indigence, lesquels il nous enuoye pour leur aider (c'est auxquelz nous pouuons bienfaire) pour vray nous leur deuons aider & secourir. Et tous, à qui nous pouuons bienfaire, sont vrayement noz prochains. Et si en vraye & viue Foy en Iesus, nous assistons à nostre prochain, nous signons & scellons que nous sommes des enfans de Dieu, & que nous auons vie en Iesus, puis que nous faisons les ceuures de vie : & si secourant au corps mortel, & donnant la viande & nourriture temporelle, le Seigneur l'a tant agreable, comme s'il estoit fait à luy mesme : que deuons-nous penser de ceux qui donnent le pain du ciël, la Parole du saint Euangile, pour la nourriture de l'ame ? qui donnent à boire de l'eau de vie, proposant Iesus à ceux qui desirent leur salut ? qui vestent ceux qui sont tous nudz du vray vestement de iustice, qui est Iesus ? afin que leur iniustice, qui les

a du tout despouillez de tout bien, soit couuerte par la iustice de Iesus : qui logent en l'Eglise de Iesus ; & au Royaume de la Foy, ceux qui par incredulité estoient hors de la maison de Dieu, qui non seulement visitent les malades & les consolent : mais leur apportent la vraye santé, par la vraye medecine de la Parole, comme le souverain Medecin a ordonné, qui par le saint ministration de sa doctrine guerist & donne vraye santé. Et ceux, qui tellement visitent les pures prisonniers de Satan, que par la clef de la parole de l'Evangile, ilz ouvrent toutes les prisons, ou les pecheurs estoient detenuz, pour estre en la liberté que Iesus nous a aquis par son sang : qu'en dira le Seigneur Iesus, qui veut qu'en toute diligencé vn chacun tasche à gagner son frere, qui a peché, en l'admonestant & corrigeant ? Certainement ce sont les fruits que nostre Seigneur demande. Mais qui n'aura pitié de la poureté qui est au corps, il n'aura aussi pitié de l'ame : car qui n'a pitié de ce qu'il voit, il n'aura pitié de ce qu'il ne voit : & celuy qui aura pitié de l'ame, certainement il aura pitié du corps.

Cognoy & appren par cecy, quel est l'esprit d'erreur, comment il tient & possede du tout ceux qui ont des enfans en necessité & poureté : quand cela qu'ilz leur doyvent donner, le donnent aux Pardons, Questeurs, Prestres, Messes, Reliques. Et qui aussi voyent les pures, qui ne peuvent travailler, mourans de faim, de soif, & froidure, & les laissent, ou bien peu leur donnent : & font grosses fondations, obitz, temples, chapelles, autelz, images, conuentz, cloistres, nourrissans oy-

feux, sains & en bon poinct : ceux qui peuuent bien gagner leur vie : comme sont ces besaciers, & autres porceaux. Plusieurs sont aussi, qui ont à leur porte voyfin malade, & tant de gens desolez (ausquelz peuuent donner consolation & aide) & les laissent, courent çà & là, de lieu en lieu à leurs voyages que ils ont promis à leurs fantasies, laissant ce que Dieu commande. Entendez, Dieu ne demande rien de tout cela : mais ce qu'il a commandé. Vous rendrez compte des biens qu'y despendez, & de tout. Car rien n'est à vous, Dieu les a miz en voz mains pour accomplir sa volonté, non pour la vostre. Car nostre Seigneur ne dit pas : l'estoye en la montagne, ou en Ierusalem, à Rome, ou à saint laques, & vous estes venus à moy : mais, malade & en prison. Despendez ce que Dieu vous a donné pour secourir à voz poures enfans, à consoler, & aider les malades, prisonniers & indigens : là ferez vous les œuvres que Dieu demande. Ce est la volonté d'iceluy, qui seul donne plenièr remission de peine & de coulpe, & pardonne tout pour l'amour de soy-mesme, par nostre Seigneur Iesus. S'il est ainsi, que celuy qui peut aider à son prochain estant en nécessité, s'il ne le fait il est coupable devant Dieu : & du bien qu'il a de Dieu, il est attenu d'en aider à vn qu'il n'a iamais veu, duquel il n'espère rien, puis qu'il le voit en nécessité : nonobstant que ce qu'il donne, luy peut seruir en autre part, il doit faire son dommage temporel, pour aider à l'indigent : que doit faire vn qui a charge du peuple ? & mesme (comme ont vne grosse partie) qui a gros reuenu, là ou le po-

ure peuple est tant chargé, que plus ne peut, & toutefois prenant le bien & substance des pources, & ce qu'à grand travail est venu, ilz ne font nul deuoir en aucune sorte de donner la pasture aux pources brebis de Iesus, & ne travaillent en sorte qui soit à les endoctriner en la parole de Dieu, ny de les assembler, pour demourer en la sainte bergerie de Iesus : mais les laissent aller sans pasture, affamées, amorties & toutes perdues : & ainsi sans aucun soin de ceux qui leur sont commiz, n'ayant aucune pitié des pources ames, les laissent perir : ne fera-il point plus à reprendre deuant Dieu, & n'aura-il point plus grief iugement, que ceux qui ne donnent à manger à ceux qui ont faim ? & encore ainsi que celui qui empesche qu'on ne donne à manger au pource, ou qui luy oste ce qu'il doit manger, est plus coupable que celui qui ne luy donne : semblablement ceux qui empeschent qu'on ne donne à manger la droite viande de l'Euangile, & qui taschent à desrober aux brebis la nourriture qui leur est donnée & ordonnée de Iesus, pourront-ils subsister deuant Iesus, fermans le Royaume des cieux deuant les hommes : n'y entrans point, & ne permetrans que les autres y entrent ? Par la condamnation donnée sur ceux qui n'ont secouru aux necessitez corporelles, qu'on entende quelle condamnation sera à ceux qui n'ont secouru aux necessitez del'ame : & de ce que tant plus on donne, tant & plus on en a, & en est on plus abondant : veu que nostre Seigneur veut, que pour aider à l'ame du prochain, en maintenant la doctrine de verité, qu'on y mette & expose sa vie, en secou-

Matt. 23.

rant à la neceſſité du prochain, le tirant à Dieu, l'inſtruifant: nous ne perdons rien de noſtre ſauoir, ny bien d'eſprit, dequoy nous luy en communiquons: mais il nous accroïſt, & en toutes ſortes en auons, ſelon Dieu, profit. Ce que Dieu a ainſi ordonné, afin que l'on ſ'y employaſt grandement. Mais Satan au contraire: ou il met de ſa poyſon à la pure doctrine de Jeſus, ou il l'empêche du tout, pour auoir avec ſoy pluſieurs en ſon torment. Il laiſſe la tendance des iniques, laquelle ilz liront, ſ'ilz veulent, ſe faiſans plus de graces qu'aux autres, auxquelz ilz defendent la ſaincte Eſcriture. Sachant toutefois (ſ'ilz ne font penitence) que le doux Jeſus, qui maintenant les attend à miſericorde, fera horrible vengeance de l'iniure qu'ilz luy font, en contemnant ſa ſaincte Parole, & mettant à mort ſes ſeruiteurs qui la portent & annoncent. Et pluſtoſt qu'ilz ne penſent, deſcendront avec les diables en paine & torment eternal: & les iuſtes, qu'ilz traitent ainſi mal, iront, en deſpit d'eux, avec leur Roy Jeſus, apres ces brieues miſeres & tribulations, poſſeder la gloire & Royaume eternal.

Cecy auons eſcrit, afin que tout honneur & gloire ſoit donnée au ſeul Dieu, & à nul autre. Priant tous ceux qui le liront, qu'ilz ne ſoyent temeraires à ſoudain iuger: mais demandans la grace du Pere plein de miſericorde, & ſon ſainct Eſprit, prennent leur conſeil ſur l'Eſcriture, en l'examinant ſogneuſement. Et autant qu'ilz le trouueront eſtre approuué par icelle, autant le tiennent & approuuent ſelon la reigle de Foy, ſans auoir regard au temps, ſoit long ou brief, à la multitude

rude ou grand nombre, n'au petit nombre, n'a l'espece de saincteté, à l'opinion de la science: mais d'un pur œil & simple cœur, prouent ce qu'on propose, & ce, selon la parole de Dieu. Car mieux vaut avec le seul Helie tenir la verité, & adorer un seul Dieu, qu'avec innombrables idolâtres venir contre son saint commandement: combien que plusieurs de grosse estimation si long temps ayent ainsi vescu. Car rien ne peut abbatre la Loy de Dieu ne sa parole. Il n'y a aucune prescription contre icelle. Car par icelle tout le monde sera iugé de nostre Seigneur Iesus & des siens. Duquel le saint Royaume soit auancé & espandu par tout le monde: afin que toute la terre adore un seul Dieu & Pere, le craignant, aymant & honorant, par nostre Seigneur Iesus, qui nous conduise & gouerne par son saint Esprit.



A TOVS CVEVRS AFFAMEZ
DU DESIR DE LA PREDICATION
du saint Euangile, & du vray vsage des Sacre-
mens. S.

NOSTRE Seigneur Iesus, qui nous
admoneste d'auoir fiance en luy,
pource qu'il a vaincu le monde,
vous doint, mes trefchers freres
à tous vne vraye & parfaicte Foy:
à fin qu'en croyant parfaicte-
ment, vous puissiez obtenir tous voz bons & saintz
desirs, & que rien ne vous empesche de les auoir,
& ne face que chose aucune qui est de Dieu &
selon Dieu, vous soit impossible, mais que puis-
siez tout en iceluy, qui est la force des croyans,
& par lequel ilz peuuent tout.

Si iamais i'ay eu regret d'aucun peuple, voyant
la poureté d'iceluy, & si quelque peuple a tou-
siours esté deuant mes yeux, certainement vous
estes iceluy. Car il ne faut dire combien de fois
ie pense à vous & de vous, non pas l'année ne le
mois, mais chacune heure, & de iour & de nuict:
& m'auient en cecy comme à la mere qui a eu
beaucoup de peine apres son enfant. Car tant plus
il luy a cousté, plus elle le aime, & n'a aucun re-
pos en son cueur, quand elle est loing de son en-

fant, craignant que mal ne luy auienne : & singulierement s'il est en lieu dangereux. Et n'y a personne qui puisse declairer vne telle affection, que celuy qui l'a sentie.

le pense & repense d'une part à la tresardente affection que i'ay veu en vous apres l'Euangile, & de quel desir vous l'avez cherché & demandé : & considere d'autre costé ce vous est auenu, en raschant de l'auoir. De moy, ie ne dy rien de ce que i'ay faict, ny de quel cueur, sinon que ie puis vous asseurer, que iamais ie n'eu chose plus à cueur que vostre edification, & n'ay point eu plus d'angoisse, que de vostre oppression. Et quand ie pense à l'opportunité, qui a esté, que nostre Seigneur auoit donnée, ie ne suis ne mort ne vif, & ne say que ie doy dire. Brief, ie n'ay autre chose, sinon que de me humilier deuant Dieu, & donner louange à son souuerain Nom, qui voit, congnoist, & entend tout. Et en me humiliant, ie confesse que Dieu est iuste, droit & entier, qui enuoye la pluye sur vne ville quand il luy plaist, là ou l'autre n'en a pas vne seule goutte. Car ie say & congnoy des gens qui eussent trop plus aimé la mort, que l'Euangile : ne voulans ouyr, ny entendre, & toutesfois estans contrains d'assister aux predications, combien qu'ilz ayent ouy maugré eux, ce-nonobstant, auoir ouy, ilz ont receu la parolle : en oyant ilz ont esté touchez, tellement qu'ilz ont surmonté les premiers en Foy, & charité, estant ebahiz comment on les auoit souffertz & endurez, & qu'on ne les auoit faict mourir, comme ilz di-

soyent l'auoir bien defferuy, en contreuenant à vne si saincte & si bonne doctrine. le ne reciteray point de ceux qu'on a visité en maladie, ou autrement, qui volontiers eussent fermé leurs portes, si honte ne les eust empeschez: à qui Dieu a faict telle grace, que apres auoir ouy, soubdainement ilz ont esté changez: & en remerciant Dieu, ilz ont instamment prié, qu'on print la peine de les visiter souuent, & de leur parler de ce doux Sauueur Iesus.

Mais au contraire, vous mes freres, combien de fois auez vous supplié à voz Seigneurs, d'auoir la parolle? En toute humilité vous auez donné de telles supplications, que voz Seigneurs disoyent, qu'elles estoyent bonnes & saintes, & dignes d'estre receues: adioutans cela, mais que le cueur fust selon les requestes. Des promesses qui vous ont esté faictes, si elles eussent esté accomplies, vous seriez fort bien. Et combien de fois en auez-vous instamment, & au nom de Iesus, requis le maistre Escheuin: que, comme chef de la ville, il vous octroyast la parolle? Et luy qui, comme saluez, auoit grand desir que l'Euangile fust presché, quelles remontrances a-il faictes aux autres Seigneurs? quelles requestes, & combien de fois les a-il priez en vostre nom? Combien auez vous couru de ca & de là? & toutesfois il a pleu à Dieu de permettre tant à Sathan, que i'en ay horreur: & ne pense point que pour l'iniquité de laquelle l'on a vîé contre la parolle de Dieu enuers vous, il n'en auienne vne trefgrosse punition, & telle

vengeance, que tout le monde en sera estonné. O pources Herodes, qui auez peur que le vray Roi ne regne, & que vous ne perdiez le Royaume, lequel si vous ne l'auiez vſurpé iniuſtement, toutesſois vous le conduiſez trefmal : & ſingulierement en empeschant la ſaincte parolle de Ieſus. O que vous ſentirez vn iugement trop plus grief, que iamais Herode n'a ſenty, vous qui auez eſté baptiſez, & qui confeſſez que Ieſus Chriſt eſt le Roy des Roys, & le Seigneur des Seigneurs, & que luy, qui eſt vray Dieu & vray homme, qui a ſouffert pour noſtre ſalut, venant icy en chair, iugera les viſz & les mortz : comment oſez vous empeschier que l'Euan-gile, & les ſainctes ordonnances de ce grand Roy (à qui tous doyuent ſeruir) n'ayent lieu par tout ? Que peut-on dire autre choſe, ſinon que tout ce que vous craignez, & plus encore, vous auiendra, ſi en brieſ ne vous retournez, & ſi ne vous ſubmettez humblement à ce ſouuerain Roy ?

Prov. 10.

Voyant donc, mes freres, voſtre affection & trauail, & le grand empeschement qu'auiez eu de toutes partz, & conſiderant la trefgrande grace de Dieu, qui a eſté donnée à pluſieurs autres peuples & Seigneurs, ie n'ay peu faire autre choſe, fors que de vous ſupplier au nom de noſtre Seigneur Ieſus, que vous vous miſſiez tous en prieres & oraisons, & que vous donnaffiez louange à Dieu, en confeſſant voz pechez eſtre cauſe que la ſaincte parolle de Dieu ne vous eſt annoncée. Et ainſi, eſtant aupres de vous, & par les machinations de Sathan eſtant empesché de vous ſeruir en noſtre

Seigneur, sinon qu'à bien peu, au pris du grand nombre que vous estes : i'ay tasché de vous inciter à prier nostre Seigneur, & pour mieux vous emouvoir à la sainte priere, & à requerir l'aide de Dieu en la nécessité & poureté, en laquelle vous estes, qui est fort grande & fort pitoyable : i'ay voulu mettre par escrit vne requeste adressée au Seigneur, lequel est plus amiable, & plus equitable, que tous ceux qui onc furent. Car iamais il n'a refusé d'octroyer la demande & requeste iuste & raisonnable, qui luy a esté faicte en Foy. Parquoy i'ay ce faict estant bien asseuré, que si en vraye & viue Foy vous luy presentiez vostre requeste, pour son honneur & gloire, & pour l'exaltation de sa parole, & pour vostre salut, qu'elle vous seroit accordée & passée : non point en vertu de la requeste, ne de chose qui soit en vous : mais par la grande bonté & grace de ce tresbon Seigneur, à qui vous devez donner & adresser vostre requeste, par le moyen de nostre bon Sauueur Iesus, qui est cause que nous impetrons tout ce que le Pere nous octroye & donne. Et ne faut icy estre honteux à demander, ne craindre aussi de falcher vn tel Seigneur : ne penser (quelque chose qui soit en nous, ne que nous voyons, ny oyons) qu'il nous veuille esconduire, ne reietter nostre demande, que nous luy presentons par Iesus, en vraye Foy. Mais mesme quand la chose nous semble du tout desesperée, & qu'il y a moins d'ordre d'auoir ce que nous demandons, que lors par vraye Foy nous nous fortifions, & nous asseurons, que la demande est

passée & donnée: & à ce nous faut arrester contre toutiugement quel'homme puisse icy auoir: comme nous voyons qu'il est auenu au fidele Abraham. Car quand a-il eu la promesse accomplie de auoir lignée? n'a-ce pas esté quand tout espoir estoit de-failly tant à luy qu'à sa femme: & quand il s'arrestoit sur Ismael, comme s'il eust esté celuy qui luy auoit esté promis? Et quand a esté confermée la-dicte promesse, voire par le serment, sinon quand ledict Abraham auoit tiré le couteau pour sacrifier son filz Isaac, & qu'il estoit comme en la mort?

*Gen. 18.**Gen. 22.*

Certainement, treschers amis, nostre Seigneur veut exercer vostre Foy & la mienne: & veut qu'en icelle nous luy presentations noz requestes, en priant & requerant que son saint nom soit sanctifié entre vous, & qu'il y regne: & puis qu'il a commandé que son saint Euangile soit presché, & qu'il veut qu'on croye de cueur en oyant, & qu'on confesse de bouche en bouche en receuant ces saintz Sacremens, & faisant comme il a ordonné, que par sa grace il face qu'en cela sa sainte volonté soit faicte: & qu'il vous conserue icy, & vous pardonne tous vos pechez. Et combien que vous & moy voyons quasi tout le contraire de ceste demande, & que Sathan se eleue plus que iamais, toutesfois il nous faut perseverer apres nostre requeste, & ne cesser aucunement: mais tousiours en priant, croire parfaictement que Dieu la nous accorde: & qu'il le monstrera pour magnifier son saint nom.

Il est vray que de ma part ie n'ay point cessé

de prier & requerir, que nostre Seigneur vous don-
 nast des fideles pasteurs : & combien que i'aye
 prediēt les choses qui vous sont auenues, comme
 vous le pouuez voir à l'œil & toucher au doigt :
 toutesfois ie me confie à la bonté de Dieu, & à sa
 grande grace & misericorde. Il est vray, comme
 i'ay diēt à ceux qui pensoyent parler bien sage-
 ment, & auoir vn conseil tant sage pour conduire
 Dieu & les hommes, pour euitier tant de maux, &
 faire tant de biens : comme tant de fois ie l'ay diēt,
 il estoit necessaire en l'œuure de Dieu, regarder
 Dieu seulement, & ce qu'il commande : & ne fal-
 loit aucunement regarder l'effort de Sathan, ne
 ses grans rempartz, ne sa puissance, ne le craindre
 aucunement : mais puis que nostre Seigneur ouuroit
 la porte, pour donner l'assaut à Sathan, & qu'il y
 auoit moyen selon Dieu, qu'on deuoit regarder
 la puissance de Dieu, & que, selon Dieu, ceux qui
 auoyent charge du peuple fissent comme peres, à
 fin que ceux du peuple, qui leur estoyent commis
 comme leurs enfans, & qui desiroyent d'ouyr
 l'Euangile, eussent la parolle de Dieu comme ilz
 la demandoient, pour leur vraye viande. Car Dieu
 n'a iamais delaiſſé les Seigneurs qui ont eu charge
 du peuple, en tant qu'ilz ont faict leur office :
 mais leur a assisté merueilleusement. Et dauantage
 ay dit, que s'il y auoit personne qui deust crain-
 dre, ie le deuoye faire, pourtant que tout le dan-
 gier estoit sur moy. Car ainsi que par la parolle
 de Dieu ie suis asseuré, tant que ie la porte pu-
 rement, de n'estre vaincu par raison, & que i'ay
 promesse

promesse de Dieu d'auoir bouche & sagesse, à qui tous aduersaires ne pourront resister : aussi i'ay les aduertissemens, & certaine parolles d'estre persecuté, voire tellement que ceux qui me mettront à mort, penseront faire vn seruice à Dieu. Comme plusieurs le m'ont reongneu, en demandant mercy à Dieu de leur ignorance & du mauuais vouloir qu'ils auoyent autrefois contre moy, rascians à me mettre à mort, pour faire vne oeuvre, comme ilz pensoient, sainte & bonne. Il est bien vray, qu'un cheueul de ma teste ne tombera point sans le vouloir du bon Pere : comme ie l'ay bien experimenté es dangiers, desquelz aucun homme n'eust peu eschapper, sans l'aide singuliere de Dieu. Mais en faisant ma charge ordonnée de Dieu, ie suis subiect à la mort violente, & à battures, & n'ay en mon office autre reuence, que l'inuocation de Dieu. le laisse plusieurs autres propos, & les exemples amenez qui n'ont eu leur lieu, quand il estoit necessaire : mais quelque chose qui ait esté faicte, ne laissée à faire, si ay-ie ma confiance en Dieu, qu'il aura pitié de vous, & que si vous retirez voz cueurs de la terre, & que ne mettiez vostre fiance es hommes, mais que vous ayez tout vostre cueur, & esperance en Dieu, & que sans cesse vous demandiez son aide & assistance : quand il y auroit cent mille fois plus de contrariété & de resistance, & moins d'espoir selon la chair, neantmoins ie suis assuré que Dieu vous ouyra, & vous donnera vostre demande.

Et pourtant qu'en regardant aucun liuret, i'ay

Q.i.

Matt. 19. 24

Ieh. 16.

trouué la priere laquelle (comme i'ay dit parauant) i'auoye écrite, & me suis miz à la lire, & en ay esté esmeu, à ceste cause il m'a semblé bon de la reuoir & la vous renuoyer : esperant aussi que vous, à qui la chose touche, n'en ferez point moins touchez que moy, si la memoire vous est rafreschie, non seulement des choses qui sont aduenues en vn lieu, quand les portes furent fermées à plain iour aux seruiteurs de Dieu, pour auoir ouy prescher l'Euangile, en considerant en quel estat estoit le poure peuple, qui couroit de cà & de là : entre lesquelz en y auoit plusieurs frappez de peste, qui pour lors estoit fort grieue en la ville : comme les courses de la guerre estoient tout à l'enuiron, tellement qu'on n'oyoit autre chose que tueries, pillages & meurtres, & comme bien pouez sauoir, vous estiez recommandez aux deux parties, tant à ceux qui couroyent d'un costé, que de l'autre. Dieu face mercy à ceux qui contre tout deuoir en telle maniere taschoient à vostre perdition, & leur doint cognoissance & amendement. Comme vous estes tenus de prier pour tous, priez pour eux : & vous vengez de Sathan en taschant de retirer de sa tyrannie, tant que vous pourrez, tous, amis & ennemis. Or bien auez entendu, comment ceux qui venoyent de propos deliberé pour vous ruiner & gaster, quand ilz vous voyoyent ou allans ou retournans du sermon, le cuer leur estoit changé, tellement qu'ilz ne vous pouoyent faire mal, ne mesme le dire : mais vsoyent de bonnes parolles enuers vous, comme s'ilz eussent esté

de voz bons amiz. Et si vous y voulez penser, vous trouuerez que vous auez eu trop plus de fâcherie de voz domestiques, & de voz plus prochains, & qui selon le deuoir estoient tenuz de vous aider & assister à vne si saincte œuure, comme est d'ouyr l'Euangile : que vous n'auiez eu de ceux qui estoient incitez, ie ne say s'ilz estoient louez, pour vous dommager : & qui souuentes fois en mettoient d'autres par terre.

Icy, mes freres, hautement leuez voz voix & cris à nostre Seigneur, & dites : Seigneur, par ta bonté as tu ainsi empesché ceux qui tant ouuertement espendoyent le sang humain, & qui ne demandoient sinon rencoñtrier pour battre & tuer. Ne toucheras tu point le cueur de ceux que tu nous as donnez pour peres, à fin qu'ilz fâcent leur deuoir enuers nous, comme nous desirons & taschons leur porter tout honneur, & leur rendre tout deuoir & toute obeissance, & prions pour leur salut, bien & conseruation, & qu'ilz n'empeschent nostre bien & salut, mais qu'ilz le procurent avec le leur, en receuant l'Euangile de ton filz Iesus ? Et en voz requestes reduisant en memoire les baniffemens, emprisonnemens, tormens, & tout ce qui a esté faict à ceux qui desiroient de suyure l'Euangile, non pour autre cause que pour l'Euangile : leuez vos mains au ciel, & criez hautement de cueur, & si trefaffectueusement, & de si grande foy, que vostre oraison perce tous les cieux, & qu'elle vienne aux oreilles du bon Pere eternel, pour les traux que son poure peuple a souffert &

enduré, en courant comme pources brebis affamées, loing de leurs maisons, & en grand danger. Et comme par auant les vns estoient chassez, les autres tormentez par extortions, nostre Seigneur a voulu plus esprouuer les siens & leur faire voir choses fort horribles selon la chair, & grandement dommageables à ceux qui les font. Et combien que plusieurs fois ceux qui se vindrent ruer sur vous, en eussent peu tormenter plus gros nombre & moy avec vous : car vous sauez que sans aucune crainte en parlant de nostre Seigneur, & exhortant tous à perseuerer en l'Euangile, quel chemin ie faisoie : neantmoins iamais ilz ne vous ont rien fait, sinon en la iournée qu'il a pleu à Dieu leur permettre de venir contre vous en grosse fureur, & comme sembloit, en propos de perdre & tuer tout ce que ilz trouueroient : & fut en la iournée de Pasques, qui leur sembloit bien propre à faire ce qu'ilz auoyent proposé.

Et en ce iour là, apres qu'une partie de vous auoit esté à la sainte Cene de nostre Seigneur Iesus, & auoit ouy la douce voix d'iceluy, qui vous inuitoit par mon saint ministere à prendre la viande qu'il vous donnoit pour vostre salut : c'est, son precieux corps, qu'il a donné à la mort pour vous, & son precieux sang, qu'il a espandu pour la remission des pechez, à fin que voz ames eussent en ce bon Sauueur pleine assurance de leur salut, pour cheminer comme ce bon redempteur commande en toute pureté de vie. Comme en auiez esté admonestez, à celle fin

que deument vinsiez à ceste sainte table, desirans le vray salut, & de changer vostre vie, en vous recongnoissant tous pecheurs, & demandans mercy à Dieu, & pourtant que le Pere a ordonné de sauver les siens, & de leur pardonner pour l'amour de Iesus, & qu'il a mis nostre salut en iceluy, qu'en Iesus vous le cherchassiez, & le prinsiez, en detestant peché, & desirant estre participans de la iustice, pureté, & innocence de Iesus. Ce qui nous est donné, quand nous participons à luy pour cheminer en vne vie nouvelle, & es œuvres que Dieu a ordonnées, que nous cheminions en icelles. Comme de cecy en sentent le fruit ceux qui deument viennent à la sainte table de Iesus. Comme vous l'avez ouy, & par la grace de Dieu aussi l'avez expérimenté. Car ie me confie, que ceux qui ont ouy, ont encore imprimé en leur cueur, ce qui leur a esté dit, en l'administration de ceste sainte Cene, tant avant le rompement du pain d'action de graces, qu'après : ainsi qu'il a pleu à Dieu de leur parler par moy.

Après donc avoir ouy ceste voix tant salutaire de Iesus, à peine aucuns auoyent pris leur refection, & des autres estoient à table, & pleust à Dieu qu'ilz eussent lors demeuré sans manger, voicy la trompette pleine de frayeur, & gensdarmes à grans cris, tant d'eux, que de leurs cheuaux, & de l'autre costé aduenturiers. Or personne ne s'en doutoit, & n'y auoit que ceux de la ville, qui sceussent la venue des gensdarmes, ne qui sceussent rien de toute l'entreprise qui estoit faicte.

Les pources gens estoient là surpris, comme agneaux entre les loups, vn petit nombre entre grosse multitude, sans aucun baston, entre ceux qui estoient armez de routes pieces, & à voir la chose, il sembloit que tout deust estre tué & meurtry : ce qui estoit facile selon le iugement de l'homme. Car tous les ennemis estoient comme enragez, comme bien il appert en ce qui a esté faict au bon ancien homme Adam, qui estoit en la rue, sans aucun baston, comme estoient ceux de la ville : peut estre qu'aucun de la ville donna à entendre qu'il estoit de la partie de l'Euangile, comme l'on faisoit des autres, en criant contre eux & disant, Ceux icy sont des chiens heretiques. Surquoy vint vn aduenturier contre ce vieil homme, & lui dist, Marche. Et le pource homme respondit simplement, Que me demandez vous ? Incontinent fut lasché vne hacquebute contre le ventre de ce bon ancien qui se sentant blessé, piteusement dist, Ha ! mon Dieu, ayde moy. Surquoy l'aduenturier tourna le bois de son hacquebute, & en luy disant, Ha ! meschant, tu inuoques ton Dieu, il luy donna vn coup qui le ietta à terre. Et incontinent vn gendarme fist passer son cheual sur l'homme mort, qui auoit esté repris de s'estre recommandé à Dieu, comme il auoit ouy en la sainte Cene. En quoy l'on voit selon ce que porte la Pasque des assaillans, & de ceux qui les incitoient à gaigner paradis en tuant les gens, qui ne adorent point le Pape, ne ce qu'il faict, qu'il ne falloit parler de Dieu, fors qu'en le blasphemant, mais il estoit

bien loisible de parler de tous les ennemis d'enfer. Il faut qu'en telle sorte se portent ceux qui seruent à l'Antechrist, ne pouans porter le bien, taschans à destruire tout ce qui est de Dieu, là ou Iesus & les siens par tous moyens trauaillent à conseruer toute bonne chose, & à reduire à bien tout ce qui va mal, en rendant bien pour mal, se portans enuers tous en toute douceur & benignité. Mais les moynes & leur suite, qui ont trauaillé à susciter ceste persecution, n'ont pas encore faict, & n'est encore la fin de leurs maux : & quelque chose qui soit aduenue à ces pources miserables, reietans la grace de Dieu, tout n'est rien au pris de ce qui leur est appresté. Dieu leur veuille ouurir les yeux & leur toucher les cueurs : & singulierement à ceux qui pechent par ignorance, & qui pensent bien faire, qu'ilz ne soyent abyfmez avec les autres.

Quand est du bon homme qui auoit esté chassé de la ville avec sa femme, combien qu'il y eust au commencement de l'ignorance, si auoit il bon cueur à la parole, & auoit bien profité, comme il l'a declairé à la fin. Car ainsi que tous comme esgarez couroyent l'un de çà & l'autre de là, & que mesme il estoit ainsi arresté de tout perdre, & que grosses defences auoyent esté faictes aux bateliers de ne passer personne, plusieurs se ietterent dedans la Moselle, & passerent outre comme par grand miracle. Or ce bon homme estant entré dedans la riuere, vne bonne femme, & la chambriere d'icelle le suyuoient, & en allant par la riuée, il re-

garda les femmes, & en eut pitié, craignant qu'elles ne demeurassent en l'eau, & leur dist qu'elles prissent le bord de sa robe, & qu'elles lesuyussent, ce qu'elles firent : & ainsi qu'ilz marchoyent, aucuns estans à la rive, commencerent à crier, Aux chiens, aux chiens, selon la charité qu'on leur auoit appris en ce iour là : les autres iettoient des pierres, tellement que ce bon homme & lesdictes femmes estoient contrains de se cacher, & mettre la teste dedans l'eau : & quand ilz retiroient la teste de l'eau, incontinent on leur iettoit derechef des pierres. Or des cris & inuocations du saint nom de Iesus, & comment tous recommandoyent leur esprit à nostre Seigneur, en peuuent rendre tesmoignage ceux qui les ont ouy. Et combien que quasi tous criaissent parauant, comme contre des chiens, toutesfois par l'inuocation du nom de Dieu, le cœur fut changé à plusieurs, & en reprenant ceux qui iettoient les pierres contre ces bons personnages, ilz leur eussent volontiers aidé à les sauuer. Mais entre les autres, deux garnemens ne cessèrent de ietter des pierres, iusques à tant qu'ilz rendirent l'esprit avec grosses recommandations de leur ame faictes à nostre Seigneur.

Et icy, mes freres, priez au Seigneur, qu'il ait souuenance de la mort que ses seruiteurs ont endurée, pour courir apres la predication de l'Euan-gile : ne faisans à nul mal, mais de vie & de parole, voire iusques à la fin, edifiens & tirans tous à nostre Seigneur. Et si la grande bonté & benig-nité

gnité de nostre bon Pere a esgard à ses seruiteurs, & à ce qui leur est faict, & qu'en reduisant cela en memoire, nous le pouons prier, & espérer qu'il nous donnera noz saintes requestes, combien plus sans comparaison deuons nous reduire en memoire la mort qui tant iniustement est aduenue au seul innocent & pur, Iesus nostre Sauueur? laquelle il a volontairement endurée pour nostre salut, à fin qu'icelle nous fust annoncée, preschée, & mise deuant noz yeux, & que nous en sentiussions le fruit en noz ames, par le saint baptesme, & par la sainte Cene, qui nous tirent du tout, & nous menent à la mort du Seigneur, pour en auoir le fruit, & en sentir la vertu. Reduisez en memoire tout ce que Iesus a faict & dit, tous ses tormens & angoisses, & icy vous iettez à terre & criez de tout ce qui est en vous, iettez tout vostre cuer en Dieu, tout sens, puissance, vertu, & entendement, de trespardente affection criez sans cesse: Ha! Seigneur Dieu & Pere, la grande multitude de noz pechez, de nous, & de noz peres, te pressera elle tant, que tu n'ayes pitié de nous, & que tu vses de telle rigueur sur nous, que nous soyons delaissez comme poures brebis esgarées & sans pasteur? Seigneur, o Seigneur, ayes souuenance de la mort & passion de ton trescher filz, qui estant esgal à toy, d'une mesme puissance, autorité, essence & diuinité, pour nostre salut a pris nostre chair, & a esté faict vray homme, comme il estoit vray Dieu, prenant ce qu'il n'estoit point, & ne laissant point ce qu'il estoit eternellement. Et en ceste chair t'a

R.

voulu servir & faire plus de bien, que nous ne pourrions faire de mal, & payer plus, que nous ne saurions deuoir, & en luy tu nous as asseurez de nous donner tout ce que nous te demanderions. O Seigneur, pour l'honneur & gloire de ton saint nom, pour l'exaltation du regne de Iesus ton filz, & pour nostre salut, nous te prions regarde de ton haut ciel sur nous en pitié, & nous faictz la grace d'ouyr, entendre, & retenir ta sainte parolle. Donne nous, non point des sages de ce monde, ne des gens qui s'enquestent des choses en quoy ne gist point le salut, & qui cherchent de parler en hautesse de parolles, cherchans eux memes, mais il te plaist nous donner des vrayz seruiteurs de ta gloire, qui s'arrestent du tout à la folie de la predication de la croix de l'Euangile, qui proposent Iesus & iceluy crucifié, lequel seul ilz sçachent, & nous le proposent, à fin que du tout nous nous arrestions à luy, & que tout le demeurant nous le tenions & reiettions comme fiente. Que nous & ceux que tu nous enuoyes, ne nous tenions qu'au seul Sauueur, par vraye & viue foy besoignante par charité.

Mettez ceste mort de Iesus en voz prieres, & priez au Pere qu'il y ait esgard, & non point à noz demerites : qu'il face que ce bon Sauueur regne comme il en est digne, & qu'il soit seruy, prisé & honoré par tout pour son tresgrand merite, & pource qu'il a desseruy, au bien & salut de tous, & qu'il confonde Sathan & tout son regne, ne permettant plus que ses abus & trompe-

ries, ne la tyrannie ait lieu sur la terre pour noz pechez & demerites, en nostre ruine, de nous, & des autres : & en gros gemissemens & soupirs, dites à Dieu, O Pere, ta fureur est elle ainsi enflammée, que tu aymes mieux que ton saint nom soit blasphemé, & que tout soit peruertý, & que tes pources creatures soient confondues, & voient à perdition, en nous punissant comme nous l'auons defferuy, que si en nous pardonnant nos pechez, & en changeant noz miserables cueurs, tu estois loué & magnifié, & que tout fust faict comme tu nous as commandé, & que tes creatures, qui entant qu'elles sont de toy sont bonnes & ordonnées en bien, fussent seruantes à ta gloire selon ton ordonnance, & que nous eussions salut en obtenant de toy grace & misericorde, comme Iesus en est digne & comme il l'a defferuy ? Il est vray, Seigneur, que par nostre grosse ignorance, & grande tromperie de l'Antechrist, & menez de noz propres affections, nous auons delaiissé Iesus, sa foy, & sa doctrine, & auons cherché autre moyen, & en auons tout plein controuué, outre ceux que les autres nous ont proposez & mis en teste, & puis qu'il n'y a autre moyen que Iesus, par ton iuste iugement tu as retiré ta clarté, & pource que nous n'auons la foy & fiance en Iesus, tu nous as osté tout le bien qui se doit ensuyure de la foy : tellement que nous sommes venus à ces abysses tant horribles. Helas, Seigneur, nous sentons noz maux, & par ta grace nous auons quelque estincelle de foy, & croyons qu'il n'y a de salut en

autre, qu'en ton filz Iesus. Aide, o bon Dieu, & secoure à nostre infidelité, augmente nous la foy, & nous deliure de ceste damnable captiuité de péché & d'erreur. Faiz nous participans de la iustice de Iesus, & de sa verité, à fin que nous soyons affranchis, non point charnellement: car telle liberté ne franchise ne nous mene, & ne la demandons point, mais nous demandons la liberté & franchise d'esprit, de l'ame, du cœur, & d'entendement, à fin que tout ce qui est en nous, soit du tout à Iesus.

Vous esueillerez vous point à prier, o mes chers freres, & ne vous mettez vous point à crier? ne laisserez vous point le boire, & le manger, pour vous ietter deuant Dieu en humble priere? Ne serez vous point esmeuz à cela, puis qu'avez tant de commandemens, tant de promesses, & tant d'exemples en la sainte Escriture? Pardonnez de bon cœur à tous, en priant singulierement pour voz ennemis: mettez deuant voz yeux, tout ce que Iesus a faict & dit pour nostre salut, & en ayant pleine fiance à luy, priez le Pere de misericorde. Et vous entre les autres, qui avez veu plus pleinement comment tout a esté faict & demené, & les detresses & angoisses dequoy i'ay esté enfermé, & comme Dieu le fait, en demandant la deliurance de ceux qui estoient autour de moy, i'ay prié souuent à nostre Seigneur, que si pour les pechez, il en vouloit faire vengeance, & les frapper, que tout vint sur ma teste, & qu'en paix & sans dommage les autres fussent deliurez, à fin

que son saint nom, & sa parolle ne fussent blasphemez. Vous sauez les exhortations, & les propos qui ont esté tenus, en declairant, comment il n'y a si iuste sur la terre, qui n'ait gagné d'estre en tel danger, comme nous estions, & d'y demeurer, voire encore d'abyfmer iusques en enfer, si Dieu vsoit de sa iustice seulement: & que tous plus que nous ne pouons entendre auons defferruy d'estre du tout destruietz: & vous mettoye tout deuant les yeux (comme la chose estoit vraye) & du lieu & des gens, qu'il n'y auoit nul ordre d'eschapper, & que tout s'adressoit à nous. Et ceux qui mieux le veoyent trembloient comme la fueille, & mesme vous troubloyent grandement. Et si aucuns eussent creu le conseil de telz epouantez, ilz eussent esté perdus. Mais combien que ie vous proposasse tout deuant les yeux, & que ie vous fissé toucher la mort au doigt: toutesfois comme vous sauez, en la vertu de la parolle, & apres la sainte priere, vous vous en alliez tous consolez & ayans bon courage en nostre Seigneur, voire les femmes mesmes prenoient grand cueur en se fiant en Dieu, & nostre Seigneur de sa grace a declairé, selon que par moy il vous auoit predict, qu'il est veritable, & qu'il a soing des siens, & sans aucun dommage nous fusmes tous deliurez.

Ceci ne vous sera il point cause de prier? N'auuez vous point recours aux saintes prieres? & ne demanderez vous point vne deliurance plus excelente & vn plus grand bien, que celuy qui vous a esté donné? Regardez au nom de nostre Seigneur

Iesus de corriger vostre vie, & ayez tout peché en horreur & detestation. Fuyez auarice, toute tromperie & deception, & au lieu de prendre & d'attirer à vous iniustement le bien d'autrui, aidez de vostre propre bien & secourez en bonne foy & charité à vostre prochain. N'ayez vostre cœur ne voz thresors en la terre, mais au ciel. Et vous arrestez aux heritages, qui sont au ciel, & non point aux choses de la terre qui sont tant vaines & tant incertaines. Fuyez toute paillardise, ayez voz consciences nettes & pures, voz pensées soyent saintes, & loing de toute vilenie & souilleure, comme il appartient à ceux qui ont Dieu en leurs cœurs, qui voit les pensées, & ne peut porter aucune ordure ne puantise de peché: mais il se retire de ceux qui demeurent en leur fange, & qui sont contaminez de cœur & de pensée. Voz parolles aussi soyent honnestes & pleines de edification, rien ne sorte de vostre bouche, qui ne soit en l'honneur de Dieu, en edification de tous ceux qui vous oyent parler. Entendez que voz bouches ne sont point à vous, mais à celuy qui vous a rachetez par son precieux sang. Parquoy nous luy deuons tous, & sommes tenus de faire tout seruir à luy: ame, corps, pensées, parolles, faictz & dictz. Or donc gardez vous bien, que chose qui soit en vous ne serue à autre qu'à Iesus seul. Parquoy ne soyez subiectz à gourmandise, ny à yronnerie, ny à paillardise: mais en toute sobriété, attempance, & chasteré seruez à Dieu.

Et non seulement taschez de viure purement,

mais aussi travaillez au nom de nostre Seigneur, de retirer les autres de tout mal, & par exemple, & par saintes admonitions. Que vostre vie parle & enseigne comment il faut viure. Vostre charité soit ardente enuers tous : ne portez hayne à autre chose, qu'à peché, & à l'auteur de peché, qui est Sathan l'ennemy de tout bien : & faictes difference entre la bonne creature de Dieu, qui a esté créée à bien, & pour servir en bien, & entre le peché & le vice, qui a corrompu, & qui corrompt la creature de Dieu. Et ayons vraye charité à la creature de Dieu, priez Dieu pour icelle, qu'elle soit deliurée de peché, & en toutes manieres selon Dieu, travaillez à la gagner à nostre Seigneur, & à la retirer de peché. Requerrez à Dieu qu'il destruisse peché & l'auteur d'iceluy. Gardez vous de prendre vos ebatz en medisant des pource pecheurs, en vous moquant d'eux, & ne recitez point leurs pechez par moquerie, ne par hayne, ne par aucune mauuaise affection que vous ayez contre les personnes qui pechent : mais s'il vous auient d'en parler, faictes que ce soit avec vne grande compassion du mal des pecheurs, en detestation de peché, & avec vn grand desir que tous en soyent retirez. Car, mes freres, qui sommes nous ? dont sommes nous ? qu'auons nous de nousmesmes, que tout ne soit pareil en nous & es autres ? il n'y a que la seule grace & misericorde de Dieu enuers nous, lequel au lieu de nous laisser en la mort eternelle, & de nous laisser pourrir en nos pechez, & de tomber de mal en pis, comme

nous l'auons gagné, il nous a retirez pour auoir la vie eternelle, & pour sortir de nos pechez, & cheminer de bien en mieux, & le tout il a faict de sa seule grace. Nostre conception a esté en peché, & nous estions enfans d'ire naturellement, ne pouans dire, ne penser que tout mal, comme les autres. Parquoy ne nous eleuons point en pensant estre quelque chose de nous, comme de nous, mais nous humilions, & regardons d'ou nous auons esté pris, & remercions Dieu, en luy donnant tout honneur & gloire, recongnoissans que tout le bien est de luy, & vient de luy, & autre chose que mal ne vient de nous, ny de tout ce que nous pouons penser, dire, ne faire de nousmesmes. Ayans donc pitié des pources pecheurs, prions Dieu pour eux.

Et singulierement enuers voz superieurs & Seigneurs, que Dieu vous a donnez, gardez vous de verser de parolles, ne de faictz qui soyent hors de charité, & qui contreuient à l'honneur & obeissance, que selon Dieu vous leur deuez. Au lieu de mal parler d'iceux, & de les auoir en mepris, ny en faict, ny en parole, priez Dieu pour eux en tres-grande charité & affection, que Dieu leur touche les cœurs : & que vous aussi leur obeissans, & leur faisans le deuoir, comme bons & loyaux à voz superieurs, les ayez pour vrais peres, en priant tousiours Dieu qu'ilz fassent leur office saintement & purement, comme il appartient : & grandement vous gardez d'estre desobeissans ne rebelles, ny d'auoir aucune mauuaise pensée : mais benissez ceux qui vous maudissent : priez pour ceux qui
vous

vous perfecutent: rendez le bien pour le mal, estans amis à tous, ne hayſſez que peché & iniquité: & vostre amitié & obeissance soit tousiours selon la parolle de Dieu, sans contreuenir à ce que Dieu vous commande: c'est en euitant toute idolatrie, & en ensuyuant & tenant la doctrine de la Foy, & l'Euangile de nostre Seigneur Iesus. Et pour rien qui vous soit commandé, ne pour aucunes defences, ne vous detournez de Iesus, ne de sa parolle: mais du tout vous y arrestez: voire quand vostre vie, & les vostres, & tout ce que vous auez y deuroit estre fondu & perdu, gardez bien que cela ne vous empesche de suyure Iesus. Car vous ne pouez rien employer mieux, ny à plus grand profit, que cela que vous perdez pour l'Euangile: dequoy nostre Seigneur nous fait la promesse, tant pour ceste vie, que pour l'autre.

Or si pour aucune chose qui vous auiene en voz corps, ou en voz biens, ny de vous, ny des vostres, vous ne deuez aucunement vous detourner de la parolle de nostre Seigneur, mais fermement vous arrester à la verité de l'Euangile: o combien plus deuez vous prendre garde que Sathan par ses cauteles, ne par soy, ne par les siens, ne seduise & ne corrompe voz entendemens, pour vous retirer de la parolle de Dieu. Et pourtant fuyez tous heretiques & semeurs de peruerſe doctrine, & confidez bien à quelle fin tirent tant d'abuseurs, desquelz, par le iuste iugement de Dieu, aujourd'huy la terre est toute pleine: lesquelz iettent leur venin en grosse finesse & cautele. Parquoy demourez

R. i.

fermes en la Foy de nostre Seigneur Iesus, & ainsi qu'il est vray Dieu, aussi fermement croyez qu'il est vray homme, & qu'il a pris vn vray corps naturel, de chair, de sang, & oz, de la propre substance, & du corps de la vierge Marie, & qu'en iceluy il nous a rachetez par son seul sacrifice qu'il a faict: par lequel tous les pechez des croyans sont pardonnez: & ne demandez autre satisfaction enuers Dieu le Pere, que la seule mort & passion de Iesus. Et ne pensez que Iesus, qui a satisfait pour les péchez, nous ait lasché la bride à mal faire, ne qu'il soit venu pour nous oster toute crainte de pecher: mais au contraire, il est venu, à fin que nous ayans le peché en detestation & horreur, & desirans d'en estre deliurez, nous courions à luy, & estans purgez, nous ne pechions plus: mais que nous ayons vn saint desir de viure en toute pureté. Et à cause du debat qui est entre la chair & l'esprit, dequoy il vient que nous ne faisons ce que nous voulons, mais sommes encore en grande infirmité, que nous gemissions, demandans la pleine deliurance. Parquoy, au nom de nostre Seigneur, ayez tousiours en detestation tout peché, & mettez toute vostre fiance en Iesus.

Gardez vous de tous refueurs pleins de babil, & de parolles enueloppées & obscures, lesquelz semblent parler hautement & fort spirituellement, pour mener, comme il semblé aux simples gens, à vne grande perfection, & à vn estat des Anges, & plus que des Anges. Mais toutesfois il n'y a quantité de ruffiens & paillardz plus orde & plus

sale, ne rien plus brutal, & plus abyfmant en tout mal & mechanceté, que cela à quoy tafchent ces malheureux, & ce par telle & fi grande cautele, que les plus addonez aux chofes de Dieu en font deceuz, en ce qu'ilz pensent ouyr grans myfteres, pour viure & faire plus excellemment que la faincte Loy de Dieu ne porte. Certainement, mes freres, tout gift en la vraye & viue Foy befoignante par charité: toute œuvre & perfection de vie gift en l'obferuation des commandemens de Dieu, qui ne font point aboliz par l'Euangile, qu'on ne les doye faire: & n'y a autre chofe deftruite de la Loy (entant que touche l'amour de Dieu & du prochain) que la malediction & condamnation, qui eft fur ceux qui ne l'accompliffent parfaitement: & ainfi le contient la doctrine de verité. N'oyez donc point telz abufeurs, mais gardez vous foigneufement d'eux & de tous ceux qui portent autre doctrine que celle du fainct Euangile, que vous auez ouye, comme fauez que purement la vous ay propofée & prefchée, par la grace de nostre Seigneur, qui vous affifte, conferué & garde en fa grace & verité: & face qu'en la vertu du fainct Efprit vous batailliez vaillamment, à fin que vous receuiez la couronne, qui eft promise à tous ceux qui bataillent fidelement: & laquelle vous receurez quand aurez depouillé ce corps mortel, avec lequel, tant que nous fommes icy, nous fommes enuironnez & chargez de tant de pouretez & de pechez, que c'eft vne chofe fort miserable. Mais par l'Efprit de Iefus en mortifiant noz mauuaifes

affections, & estans renouvellez de iour en iour, nous paruiendrons au but de nostre course, & aurons la couronne qui est apprestée à tous ceux qui par vraye & viue Foy perseuerent au saint Euan-gile.

Vous prendrez cecy comme vne souuenance de celuy qui en nostre Seigneur desire vostre bien & salut. Et apres la lecture de la sainte Escriture pourrez lire cecy, & l'ouyr, pour estre incitez à prier, & pour auoir matiere de plus penser aux pechez, ausquelz vous auez esté soubz le Pape, qui certainement passent tout ce qu'on pourroit dire, à fin qu'entre vous les reduisant en memoire, vous en criez mercy. Et d'autant plus que vous y auez esté enueloppez, soit par faict, ou par consentement, tant plus recourez à la misericorde de Dieu, demandans sa lumiere & la clarté de sa parolle. Et avec vous ceux qui es autres lieux desirent la parolle, pourront aussi aucunement par cecy estre esmeuz : & mesme tous ceux qui du tout ne sont corrompuz & peruertiz, & qui n'ont pleinement deliberé de faire la guerre à nostre Seigneur, tous autant qu'il y en a, qui ont estez baptisez au nom du Pere, & du Filz, & du saint Esprit, en lisant cecy ou en l'oyant, ilz pourront estre esmeuz à desirer que par tout soit preschée & receue la vraye & pure doctrine, qui doit estre tenue de ceux qui ont receu le saint baptisme, & la vraye Foy, qui est selon ce saint baptisme. Car, tant comme ie puis desia congnoistre, tous commencent à estre faschez, & auoir quelque congnoissance des abo-

minations de ce miserable, appelé treffainct pere de Rome, & de ses filz tant aimez, les euesques & autres prelatz, & de ses souffleurs, prescheurs de bulles, indulgences, pardons, & questions theologiques, avec les questeurs : tellement qu'il n'y a personne qui ne voye bien qu'il y a tant & plus d'abuz & de tromperies. l'espere que la vertu du saint baptesme se monstrera, & que les poures ames, avec vn regret de la vie tant pourement passée, soupireront apres le bon Pere, non pas de Rome, au nom duquel on n'a pas esté baptisé : mais apres le Pere celestiel, qui est sans commencement & sans fin : & qu'elles prendront goust à ouyr, & à s'enquister du bon vouloir du vray Pere saint, qui veut que tous par Foy voyent son Filz bien aimé, & qu'en l'oyant ilz croyent en luy, & ayent la vie eternelle : & que plus ne s'arrestent aux enfans du Pape, qui parlent comme enfans de ce miserable ennemy de Dieu, pour estre en tout honneur, plaisir, & aise, aux depens du poure monde, appouriffans tous tant qu'ilz peuuent, pour deuenir riches : mais que du tout s'arrestent au vray Filz de Dieu, vray Dieu & vray homme, Iesus, qui a voulu estre meprisé, angoissé, mal aise, & en toute poureté, pour nous faire participans de l'honneur des enfans de Dieu, des ioyes eternelles, des richesses infinies. Et puis que tous estans baptisez confessent que Iesus est mort pour nous, & pour noz pechez, ilz apprendront à plourer leurs pechez, qui ont esté cause que Iesus ait tant souffert, & les auront plus en detestation, & pren-

dront courage de bien seruir celuy qui a tant fait pour eux, & seront marriz qu'ilz n'ont cheminé autrement. Et en considerant que Iesus est monté au ciel, d'ou il a enuoyé son saint Esprit à ses Apostres, ilz demanderont l'aide & l'assistance du saint Esprit, pour cheminer selon le deuoir du saint baptesme, en ayant & sentant de iour en iour l'efficace & la vertu d'iceluy, pour mourir avec Iesus, & estre planté en la mort avec luy, pour reffusciter à vne nouuelle vie, qui est selon Dieu : en telle sorte qu'estans vestuz de Iesus, ilz ne soyent trouuez nudz, & honteux deuant le Pere : & encore, qui pis est, qu'ilz ne soyent trouuez vestuz de la vilaine robbe de peché, mais l'ayans depouillée par la mort du Seigneur Iesus, ilz soyent vestuz de la vraye innocence & pureté d'iceluy : tellement que tous se tiennent, croient, obeissent, & seruent à luy, estans tous en vne Foy, vne Loy, vn Euan-gile, vn corps, vn esprit, soubz vn Dieu, vn Seigneur, vn baptesme : pour paruenir tous à la vie qui est sans fin : en laquelle iceluy Iesus nostre bon Seigneur, nous a precedez, regnant à la dextre du Pere : & d'ou nous l'attendons, pour venir iuger les vifz & les mortz : pour recueillir les siens, avec lesquelz il luy plaist nous assembler, nous gardant d'estre du nombre des mechans reiettez : mais faisant que sans fin, nous soyons viuans avec luy, pour le louer avec le Pere & le saint Esprit, avec qui il regne eternellement.

Ceux qui aiment nostre Seigneur, & qui desirent vostre bien, ont souuenance de vous en leurs pri-

res, & vous recommandent à Dieu, qui benigne-
ment vous veuille visiter.

De Neufchastel, le onzième de ianvier, mil cinq
cens quarante cinq.

Vostre frere,
GVILLAVME FAREL.



AVX EGLISES DE NOSTRE SEI-
GNEVR, ET A TOVS CHRESTIENS,
pour auoir aide & confort en la necessité &
famine de la Parole de Dieu.



VOVS tous vrais amateurs de
l'honneur & de la gloire de
Dieu, & vous qui le craignez
& qui l'aimez : au nom du
Seigneur Iesus, nous vous
prions, aidez-nous par vos
prieres enuers Dieu : en lui sup-
pliant qu'il nous face grace & merci. Et singulier-
ement, o vous Eglises chrestiennes, qui auez esté
visitées en grande grace & douceur de nostre Sei-
gneur, par sa sainte Parole, par la sainte predi-
cation de l'Euangile qui vous est presché, & qui
l'auez purement avec le droit vsage des saints
Sacremens, priez pour nous, nous vous en supplions
au nom de Dieu. Et comme vous auez commencé
au nom de nostre Seigneur Iesus, aussi perseuerez,
o vous saintes assemblees, & tous fideles, qui en
vos prieres parauant nous recommandiez à nostre
Seigneur : dequoy tant que pouuons nous vous
mercions & en rendons graces à nostre bon Dieu
& Pere, qui vous a esmeus à prier pour nous :
vous donnant telle charité & affection enuers nous,
de deman-

de demander & procurer nostre salut, le supplians aussi de nostre part, qu'il ait souuenance de vostre bonne affection, & du bon & chrestien cueur que vous auez enuers nous. Certainement vos prieres n'ont esté sans fruct : mais par la grace de Dieu nous auons senti & sentons en aucuns de nos Seigneurs l'œuvre de Dieu, & singulierement en monsieur le maistre Escheuin, lequel nostre Seigneur nous conserue, & lui augmente la foy, le cueur, & lui donne vertu de poursuiure sainctement vne si sainte & si digne œuvre. Et avec ce nous auons pour aucun temps receu fort grande consolation de la Parole, laquelle nous a falu cercher hors de la ville, & assez loin : mais Satan a tant trauaillé d'un costé & d'autre, que le lieu nous a esté osté, & ceste consolation a peu duré : combien que grandement remercions Dieu, de ce que nous auons ouy : & ne voudrions pour rien du monde que n'eussions ouy & entendu ce qu'il a pleu à Dieu nous faire puyr & entendre.

Mais nous sommes en tresgrande angoisse, pourtant que lors que nous commencions à gouter le pain de la Parole, & que nous y prenions faueur, il nous a esté osté, comme tant de fois parauant nous est auenu : car quand il y auoit grande aparence que la Parole deust auoir son cours entre nous, ceux qui auoyent commencé à prescher, failloyent & changeoyent propos au second sermon, ou au milieu, ou à la fin du temps qu'ils nous ont presché, & ne perseueroyent point en verité : ou il falloit qu'ils nous abandonnassent,

tellement que nous sommes tousiours demeurez comme pources brebis sans pasteurs : tousiours grandement desirans , & toutesfois ne pouuans auoir la pasture & nourriture de nos pources ames. Parquoy nous soupirons & gemissons, & non seulement nous qui sommes viuans auons eu ce desir apres la Parole, mais ceux aussi qui sont passez de ce monde, ou par peste, qui tresprieusement nous a pressé, & de laquelle tant de bons cueurs ont esté frappez, qui en si gros regrets, en tant douloureuses lamentations, en cris, en larmes & pleurs, dont les pierres en deuroient fendre, se sont lamentez, qu'ils n'ont ouy la Parole auant leur trespas, & de ce qu'il leur falloit passer de ce monde sans voir ici l'Eglise dressée, conduite & gouuernée par la Parole de Dieu : & ce pour estre consolez en leurs necessitez & maladies par vrais pasteurs, & pour auoir purement les saints Sacrements. Or leur regret estoit plus grand à eux & à nous aussi, veu que tant de fois il a semblé que tout estoit prest pour dresser vne sainte assemblee. Car l'affection tresgrande estoit à tout le peuple, qui desiroit la Parole, & le ministre estoit à la main, & grandes promesses nous estoient faites. Helas ! qu'elles nous ont esté bien cher vendues : car à la mal-heure nous nous y sommes arrestez, quand on disoit, Attendez vn peu, pour tout certain vous aurez la Parole en paix, sans aucun trouble. Attendez vn iour ou deux : car la chose estoit de certaine apparence. Mais nous deuions regarder le commandement de Dieu, & le bien

La peste à Metz
en Lorraine.

qu'il nous presentoit, puis que tout estoit tant & si bien prest.

Helas! tout est allé comme en fumee, sinon, o trefchers freres, que par vos saintes prieres Dieu de sa grace a fait que le cueur ne nous est point failli, car par sa grace nous sommes autant prests d'ymettre & employer nos corps, femmes, enfans, biens, & tout ce que Dieu nous a donné, que iamais nous fusmes, voire encore plus : car nous sommes transis de desir, & languissons comme ceux qui ne pensent que iamais le iour viene, ne qu'ils puissent assez tost voir ce que tresardamment ils souhaitent. Nous ne demandons que voir ce saint iour tant desiré, auquel puissions (comme vne sainte & fidele Eglise) ouyr la Parole de nostre Dieu. Et prions le Seigneur qu'il nous face la grace de l'auoir sans aucunesclandre, nous la donnant en toute edification, & par vrai moyen droitement chrestien & irreprehensible. Et combien que nous ayons plusieurs fois ci-deuant grandement supplié nos Seigneurs gouuerneurs de la ville : encore perseuerons nous au nom de Dieu, à les supplier en toute humilité, voire en pleurs & en cris, en les requerant qu'ils ayent pitié de nous, & qu'ils prennent nos corps & biens, & dutout en facent à leur bon plaisir : & leur promettons en verité qu'en tout & par tout nous voulons plus faire & plus obeir que iamais : seulement qu'ils ayent pitié de nous pour l'honneur de Dieu : & pour l'amour de la douloureuse mort & passion de nostre Sauueur Iesus, qu'ils nous ottroyent &

permettent la pure Parole de Dieu. Nous offrons encores pleges, & tout ce qui nous est possible de faire, pour respondre que nous sommes prests de faire, tout deuoir enuers la Seigneurie, & enuers tous, moyennant que nous ayons la Parole de Dieu. Et quelque chose qui auienne, quelque fascherie qu'on nous donne, nous passons tout, & prenons en patience : & nous semble que tout ce qui nous peut auenir est fort leger, seulement que nous ayons la Parole de nostre Sauueur Iesus : laquelle s'il la falloit acheter, nous vendrions tout ce que nous auons pour l'auoir. Or puis que c'est vne grace & don singulier de Dieu, & que tout est en vain si elle ne vient de Dieu, qui seul la donne : grandement vous supplions au nom de Dieu, tous seruiteurs de Dieu, tous fideles Chrestiens, priez, priez Dieu instamment pour nous : & que vos prieres & cris avec les nostres viennent & montent au ciel : que tout en soit rempli, afin que nous ne demeurions desolez. Requerez & suppliez l'Eternel, qu'il change le cueur à nos Seigneurs : & qu'iceux comme nourriffiers ordonnez de Dieu, ayans pitié du peuple qu'ils ont en charge (ainsi que leur auons prié & touché en nos requestes) non seulement ils permettent que la Parole soit preschee : mais qu'ils la facent prescher, & qu'ils s'employent à l'ouyr, & y facent tous venir : & cependant que nous sommes despourueus de pasteurs, & qu'il y en a qui preschent contre verité : qu'ils facent que tels rendent raison de ce qu'ils disent, afin que rien ne soit fait ne dit sinon selon la Parole

du Seigneur, & que par icelle tous ceux qui enseignent de présent, & qui ci apres le feront, satisfacent aux adiuteurs : tellement que Dieu en soit honoré, & sa Parole auancee, toutes Eglises edifiees : & vous, nos treschers freres, en ayez ioye & consolation, en voyant le fruiçt de vos prieres, ausquelles au nom de Dieu perseuererez : & nous perseuerons aussi à le prier pour vous & pour tous. Le seigneur Dieu vous conserue & garde, vous augmentant en toutes benedictions & graces. Amen.



FORME D'ORAIISON POVR DE-
MANDER A DIEV LA SAINCTE
predication de l'Euangile & le vray & droit
vsage des Sacremens.

Iean 7. 37. & 6.
35. 14. 13.



DIEV Eternel & Pere de toute
misericorde, tu as dit par la
bouche sacree de ton Fils, que
ceux qui ont soif viennent à toi,
& qu'ils boyent : & que tu
donnes l'eau de vie, & que tu
es le pain de vie qui est des-

I/a. 58. 9.

cendu du ciel : & nous as promis, que tout ce que
nous demanderons en ton nom, que nous l'aurons :
& dis qu'auant qu'on t'inuoque que tu respondras :
& quand on crierà, que tu diras, Me voici. Nous
crions, o Seigneur, de la faim : nostre pource ame,
qui a esté si long temps en chemin tant miserable,
par les déserts & par les desolations de l'Ante-
christ, reuiet en la maison de cognoissance, & a
grand faim de toi.

Ouvre-nous la porte de ta misericorde, o
Sauueur, & ne t'arreste tant avec ceux qui sont
avec toi, & qui te sont agreables, que tu ne regar-
des aussi à nous, qui par nos iniquitez sommes de-
hors, donne-nous du pain de ta parole. Et com-
bien que nous soyons enuers toi pires que chiens,
tant s'en faut que nous soyons pour estre tenus de

tes enfans, s'il n'y a autre esgard qu'à nous, & à ce qui vient de nous : mais, Seigneur, qui fais luire ton soleil sur les bons & sur les mauuais, & enuoyes la pluye sur les iustes & iniustes : ces pources chiens n'auront-ils point quelque miette de pain, qui chet de la table des enfans ? Aide-nous, enuoye-nous ceste viande celestielle, ce pain de ta parole. Ne feras-tu point la vengeance de nostre ennemi, qui nous fait tant de tort ? Tu as dit que tu exauceras le cri de l'oppressé, de la vefue, de l'orphelin, & de l'estranger. Ne vois-tu point, o Père, comment les pources vefues sont multipliees, comment les pupilles sont en gros nombre : de qui les maris & peres ont esté tuez & meurtris pour ta parole, & tous leurs biens ont esté ravis ? Ne crient-ils point à toi, o Seigneur, de la pourceté qu'ils endurent ? Et avec tel rauissement, quelles finesses & cautelles ont trouuees les prestres & les moines, pour attirer tous les biens des vefues, des pupilles & de tous ? Combien ont-ils destruit de gens & mis à grosse pourceté ? Et si pour les rauiffemens des biens, toi iuste luge, fais vengeance, non seulement des rauiffeurs, mais aussi de ceux qui n'aident aux indigens, & qui ne donnent du leur : tu feras bien plus grosse vengeance du sang espandu iniquement. O Seigneur, si iamais il a esté espandu horriblement, n'est-ce pas en nostre temps ? car il a esté fait en telle fureur & rage, que Satan n'a peu pis faire. Car comme au temps de ta natiuité, pour te mettre à mort, il a tué les petis enfans qui n'auoyent

*Mat. 5. 45.**Luc 18. 7.**Psal. 146. 7. 8. 9.**Exo. 20. 21. 22.**Matt. 2. 16.*

aucune cognoiffance : combien, Seigneur Iefus, en y a-il eu de tuez, qui ne fauoyent & n'entendoyent rien de ta parole? Mais la fureur estoit telle, que de dire Christ simplement, ou parler fans iurer le corps & le ventre, on estoit Lutherien & heretique. Et que dirons-nous? Ton vrai ennemi l'Antechrist, craignant d'estre trop descouuert par tels meurtres tant euidens, a repris ceux qui faisoient ainsi, demandant qu'on seruist au diable plustost qu'au Dieu viuant. Tu fais, Seigneur, en quelle cruauté tes seruiteurs ont esté demenez : car d'autant que ton Esprit plus puiffamment par iceux parloit, tant plus on a esté enragé contr'eux.

Pja. 79. 11.

Le cri du sang de tes seruiteurs, Seigneur Iefus, n'est-il point paruenue à tes oreilles? Et nous, Seigneur, qui ne voyons que sang par toute la terre, que corps iettez par les caues, & que feu & fumee par tout l'air, meurtres de tes seruiteurs : pour toute vengeance ne demandons autre chose, sinon que ta parole ait lieu, & que Satan soit confondu. Exauce nostre requeste, o benin Sauueur, car que sont les biens & les corps au prix des ames? hélas ! Seigneur, qui les as rachetees, quelle desolation ! quelle tuerie ! quel meurtre est aux pources ames, d'estre priuees d'icelle Parole ! Venge, o Iuge equitable, venge ton Eglise, qui a esté comme vefue si long temps & qui crie à toi, venge-la, o iuste Iuge, car tu vois comment elle crie, & comment par grande destresse de cueur elle leue sa voix à toi, ayant toutes ses entrailles rongees & amerement tranchees : estant toute destruite & gaste,

stee, & en extreme tristesse pour la grande multitude des ames qui sont conduites & menees en la voye de perdition, par la poison de la superstition diabolique du Pape & des siens! Ne feras-tu point la vengeance de telles abominations? ne la consoleras-tu point par ta douce parole? Helas! Seigneur, ce qui reste des pources ames qui souspirent apres toi, & demandent ton aide, ne les garderas-tu point? Ne secourras-tu point ce que tu as tant cherement racheté? Regarde, o Seigneur, comment les pources ames souspirent apres toi, combien qu'elles ne te cognoissent que bien petitement: toutesfois le desir qu'elles ont, est d'auoir salut, & d'ensuyure le droit chemin: besongne-y, Seigneur, œuure par ta iustice contre l'iniquité de Satan: & par ta grande misericorde besongne sur les pources ames. Ne ferme point tes entrailles, toi qui as eu pitié du pource troupeau esgaré, quand tu estois ici en chair, voyant les pources gens qui estoient comme brebis sans pasteurs. Et puis que tu commandes qu'on prie le Seigneur de la moisson qu'il enuoye des ouriers en icelle, nous t'en prions, nous t'en requerons que tu le faces: o Seigneur Iesus, enuoye, enuoye des bons & fideles ouriers, chasse les loups, destruis l'iniquité & toute la doctrine de mort. O vrai auteur de iustice, qui es nostre vie, duquel vient la doctrine qui viuifie & sauue: ceste moisson n'est-elle point grande, o Seigneur Iesus? n'est-elle point à toi? Ha, doux Iesus, n'vseras-tu point de ta douceur & de ta grande benignité? Oublieras-tu d'auoir pitié de

Mat. 9. 36.

S. i.

ton peuple? Nous te prions, o nostre Sauueur, o nostre Redempteur, enuoye-nous des ouuriers fideles, & donne grace à ceux qu'il t'a pleu de nous enuoyer, d'acomplir ce que tu as commandé: c'est de prescher ton Euangile, & de nous enseigner purement tout ce que tu commandes.

1. Cor. 12.
Eph. 4. 12.
2. Pier. 1. 21.
Iean 16. 13.
Act. 2. 3. 4.

O S. Esprit, vrai viuificateur des pources ames, qui distribues tes dons & graces selon ton bon plaisir, en l'edification du corps de Iesus: toi qui as parlé par les Prophetes, qui n'ont point parlé par volonté ni affection humaine, mais en ta vertu: toi qui menes en toute cognoissance de verité: qui as rempli les saincts Apostres de telle vertu, que là où ils auoyent abandonné leur Maistre tous espouuantez, s'estans teus, & desistans de prescher depuis la prise de Iesus iusques à ce que tu es descendu dessus eux, & lors en te receuant tu leur as tellement eschauffé les cœurs, & tellement as ouuert leurs bouches, qu'en grande ferueur & ardeur, & en hardiesse & pleine assurance ils ont parlé de Iesus, & ont presché sa resurrection, voire à toutes nations qui estoient lors en Ierusalem, parlant à tous par langues que tous entendoient: ha Seigneur Dieu, regarde en quelle poureté nous sommes, & nous & ceux qui sont en tant de lieux, tant qu'il en y a qui ont eu quelque cognoissance de Iesus: car s'ils ne sont aidez & secourus de ta grace, ils sont plus prests la plupart de renoncer Iesus & l'Euangile, que le confesser. Chasse, o Esprit de verité, tout ce qui est de l'esprit d'erreur & de mensonge. Chasse tous hereti-

ques d'entre nous & d'entre tous les autres. Glo-
 rifie le Seigneur Iesus, car sa gloire est la tienne, *Jean 17. 1. 16.*
 & celle du Pere. Repren, o Seigneur, reprend le *8. 6. 45.*
 monde de peché, de iugement & de iustice : tou- *Isa. 54. 13.*
 che les cœurs de tous, afin qu'ils soyent enseigne- *2 Theff. 2. 8.*
 de Dieu, pour entendre la parole de verité, en
 l'oyant, la receuant & la gardant par foy. Mon-
 stre ta vertu sur tous ceux qui te resistent, ne souf-
 fre plus que ta doctrine soit outragée, en te blas-
 phemant & iniuriant. Destruy l'Antechrist & sa
 meschante & maudite doctrine. Et par ta clarté
 & lumiere pure & sainte, par laquelle tu purifies,
 sanctifies & par fais les ames, chasse toutes les te-
 nebres d'erreur & de superstition, toute feintise,
 hypocrisie & tromperie cauteleuse, en descourrant
 les faussetez de Satan & des siens, & nous con-
 serue en toute verité, nous & nos pasteurs, lesquels
 il te plaîse donner & enuoyer tels que tu as re-
 uelé qu'ils doyuent estre : autrement nous sommes
 perdus & gastez par la deception, tromperie &
 tyrannie de ceux qui sont menez par les esprits
 d'erreur : qui seduits, seduissent les autres.

Ha, bon Sauueur, combien que nostre foy soit
 fort legere pour aller à toi, si venons-nous à toi,
 pour te demander ceste eau pour en boire. Aug-
 mente nous la foy, & nous la conserme, nous
 donnant ta parole & tes saints Sacremens pure-
 ment. Donne-nous, Seigneur, ceste eau de vie
 qui oste la soif, car nous auons puisé trop de l'eau
 de nos peres, ne sachans que nous voulions, ne que
 nous faisions : & tant plus auons beu d'eau infecte

*Luce. 2. 13.**Matt. 16. 6.*

Il entend parler
de la ville, de
Meta.

des vieilles cisternes, plus auons eu de soif. Donnons le pain de vie qui est descendu du ciel: donne le nous par ta sainte parole & doctrine celestielle, & par tes pures ordonnances. O Seigneur, que nous soyons nourris de toi, pour viure eternellement. Helas! le son & le leuain des Pharisiens, la doctrine diabolique de toute hypocrisie & tromperie, nous a tant enflez, que nous en sommes creuez, & toutes les entrailles de nos ames en sont corrompues. Car la doctrine peruerse a tout perdu, empoisonné & gâté en nous. Seigneur Iesus, vrai Sauueur, vrai Redempteur, aye pitié de nous. Commande & fai que ta parole nous soit preschee, & que tes saints Sacremens nous soyent purement administrez, comme tu l'as ordonné & commandé. Tu as oui la Cananee, o Seigneur, donne-nous des miettes qui tombent de la table de tes enfans. Seigneur, les autres à qui tu as fait la grace que ta parole leur a esté donnee, ont tant de predications, tant de lieux, tant de ministres & pasteurs, qui continuellement leur enseignent, & leur administrent tes pures ordonnances & saints Sacremens: & nous n'auons, o Seigneur, vn seul pasteur, vn seul lieu, vne seule predication le iour, en vne si grande ville, où tu as tant de peuple: & ne pouons receuoir purement tes saints Sacremens, si pour l'amour de tes enfans, que tu as es Eglises, à qui tu t'es manifesté, & à qui tu as donné purement ta parole, tant es benin, que tu as présenté tes benedictions & graces aux iniques, & qui ne croyent

en l'Euangile: & meſme tu fais que tes ſeruiteurs les contraignent à ouyr ta parole, en ſorte qu'ils ſont ſouuent gagez à toi, & croyent, où ils eſtoient incredules.

Bon Seigneur n'auras tu point pitié de nous ? N'entendras-tu point noſtre deſir, priere & clameur ? Regarde à ton honneur & gloire, regarde à tes ſainctes promeſſes, o Dieu, o noſtre Dieu. Quel profit y aura-il, ſi nous demeurons ainſi : & ſi (comme il eſt auenu à pluſieurs par faute d'ouyr & d'eſtre auertis, tant en ſanté qu'en maladie) nous perdons ce peu de cœur que nous auons à toi & à ta parole, & ſi nous retournons à ce que nous deteſtons, aſſauoir à la doctrine de l'Antechriſt, en adorant les creatures, & mettant noſtre fiance & eſperance aux choſes damnables, en t'offenſant plus que parauant ? Seigneur, nous aurastu donné tel commencement & entree en ta cognoiſſance, pour nous laiſſer & abandonner ? Non, non, Seigneur, ainſi ne ſoit : mais aye pitié de nous, ouurant les yeux de ta miſericorde ſur nous : que tes entrailles ſoyent eſmeuës à pitié, à miſericorde & compaſſion ſur nous, o Pere de toute bonté. Helas, que nous ayons ta parole, que nous la receuions par ton S. Eſprit, & que tout en nous ſoit rengé, conduit, fait & gardé ſelon ta ſaincte volonté, qui eſt reuelee & manifeſtee es ſainctes Eſcritures, eſquelles ta ſaincte parole eſt contenue. Fai qu'avecques grand fruit nous oyons ta parole, & la gardions : & que ſelon icelle nous ayons purement tes purs & ſaincts

Sacremens. Et afin que nous puissions bien enseigner nos enfans en ta sainte doctrine, en ta crainte, en la vraye & viue foy, fai que droite instruction leur soit donnee, comme en la primitive Eglise: & que les pasteurs n'ayent seulement le soin des grans tant en general comme en particulier: mais qu'ils l'ayent aussi des petis, & qu'ils les instruisent en pure doctrine de la foy, & de tout ce qui appartient à la foy: & que toutes choses soyent dressees comme il appartient. Qu'en ton Eglise soit correction, admonition, reception & reiection: que ta parole y ait toutes ses proprietes, & que le vrai usage des clefs soit gardé: que les escholes & saints exercices pour conseruer ta doctrine, soyent saintement dressez & entretenus: que les pources soyent, selon le deuoir, soulagez & secourus. Seigneur, qu'on cognoisse que tu y as besongné, & que tout l'honneur & la gloire te soit rendue, de nous auoir tirez de si horrible malediction, à vne si grande & excellente benediction: fai-nous ceste grace, & la poursui & entretien iusques à la fin, & à nous & aux nostres. Bon Dieu, touche & illumine les cœurs de nos superieurs, pour entendre à ceste benediction: & au lieu de resister, qu'ils soyent les plus ardens, & qu'ils y trauaillent. Tu as promis d'ainsi aider à ton Eglise par les Rois, Princes & Seigneurs: donne leur pleine cognoissance, & droit & entier iugement pour cognoistre ce que tu veux, o Pere: & avec la cognoissance donne leur la grace d'executer en rondeur de verité, & à ton honneur & gloire, tout ce

qui est de leur office, selon ta parole : tellement que nous & eux puissions heureusement passer de ceste cité terrienne, à la cité eternelle. Seigneur, comme il t'a pleu de changer le cœur de S. Paul, qui estoit si aspre & si enflambé contre ta parole, aye pitié des pources prestres, moines, & de tous qui par ignorance contreuient à ta parole : & qui taschent de destruire ton Eglise & la doctrine de la foy, ne sachans qu'ils font. Et comme tu fais que ce qu'ils font n'est point pour maintenir, comme ils pensent, ton Eglise, ni la foy Chrestienne, mais pour maintenir l'assemblee damnable de confusion, qui est la mere d'erreur, pour entretenir la grande paillarde avec sa doctrine diabolique, & les songes & inuentions des hommes : Seigneur, fai leur merci, en leur pardonnant : donne leur la grace de pouuoir suiure & pour-suiure, garder & tenir ta saincte doctrine, & leur fai la grace de viure au corps de Iesus, qui est son Eglise, laquelle, o Seigneur, par ta verité, puissance & vertu redifie, restaure & remets en estat deu, & la conserue & garde par toute la terre : afin que par tout tu sois loué, serui & adoré en esprit & verité : & que de Saran, ni de l'Antechrist qu'il a elleué par ses cauteles, tromperies, faux signes & miracles, en toute deception, & de ce fils de perdition ne soit plus rien ici : c'est qu'il n'ait plus de lieu, mais que du tout il soit exterminé, & comme il s'est assis en ton temple, s'es-leuant sur toi, se faisant adorer comme toi, ainsi en toute confusion & ignominie il soit entierement

*Act. 9. 6.**2 Thess. 2. 4.*

abatu : & qu'il n'ait ni en ton temple, ni en autre lieu, domination ne puissance quelconque : mais toute douleur, angoisse & destresse. Donne le royaume, o Pere eternal, à Iesus ton Fils, & que de nul autre il ne soit mention, ni d'autre doctrine, pour faire, dire ne penser autrement, qu'ainsi que Iesus a ordonné & commandé : tellement, Seigneur, que tous viuans qui sont dessus la terre obeissent à l'Euangile par pure foy, & s'employent à tout bien par feruente & ardente charité, & perseuerent en grande constance & fermeté, o Seigneur Dieu & Pere, pour l'amour de Iesus ton Fils, remplissant tous de ton bon Esprit, afin que toute louange, gloire, action de graces te soit donnee eternellement. Amen.



LE GLAIVE DE LA PAROLLE

VERITABLE, TIRE CONTRE LE

Bouclier de defense : duquel vn Cordelier Libertin s'est voulu seruir, pour approuuer ses fausses & damnables opinions.

EPISTRE.



A grace, paix, salut, & misericorde de Dieu nostre tresbon & misericordieux Pere, par Iesus Christ son seul Filz nostre Seigneur, en la vertu du saint Esprit, vous soit donnée, & de iour en iour accroïsse en vous : afin que sainctement & purement cheminiez en vraye & viue foy besongnante par charité, perseverans iusques à la fin.

Treschers freres, il a pleu à ce bon Pere commander qu'au milieu de ces horribles tenebres de l'Antechrist, sa vraye lumiere soit sortie : faisant que la pure doctrine de la foy ait esté preschée. C'est, comment par la seule foy qui est en Iesus, nous sommes iustifiez, & noz pechez ne nous sont point imputez ne contez deuant Dieu : mais à cause du merite de la mort & passion de Iesus, auquel nous croyons, le Pere nous tient quittes de

La doctrine de
la foy.

T.

tout ce que nous estions redevables devant son iuste iugement : & nous aduoue & tient pour ses enfans & heritiers, à cause de Iesus Christ son Filz, lequel nous receuons par foy, ainsi que il nous est présenté & donné du Pere, par la pure predication du saint Euangile, & par la pure administration des saintz Sacrementz. Et avec ceste sainte doctrine de la foy, nous a esté aussi declairé quelles sont les œuvres, esquelles il faut que nous cheminions, ainsi que Dieu l'a commandé. Et combien que ceste tant sainte doctrine ait commencé d'estre semée en vn bout de la terre, bien loing de vous : neantmoins il a pleu à ce tresbening Pere, vous faire la grace qu'elle soit paruenue iusques à vous : tellement que l'avez receue en ioye de cœur, & avec efficace & vertu produisante vrayz fruitz, plaisans & agreables à Dieu. Et comme par vne singuliere grace & miracle de Dieu ceste sainte doctrine est paruenue à vous, ainsi a esté aussi conseruée : comme i'ay bonne esperance qu'elle le sera iusques à la fin. Et non obstant que Satan ennemy de la gloire de Iesus, & du salut de tous, ait tasché par la tant cruelle tyrannie de l'Antechrist de vous en retirer du tout : toutesfois Dieu vous a conseruez & gardez, vous touchant le cœur pour l'inuoquer, & pour demander son ayde : faisant aussi qu'en lisant la sainte Escriture, fussiez par icelle confermez & fortifiez : incitant aussi de bons personages pour vous exhorter à perseuerer, comme puez & deuez reduire en memoire, pour en remercier ce bon Dieu, qui tant

benignement a besongné enuers vous. Or Satan n'a pensé estre assez de vous auoir assailly d'un costé, s'il ne vous liuroit d'autre costé vn plus fort & plus dangereux assaut: ce qu'il a fait, vous enuoyant de ses ministres, qui, ainsi qu'il se transfigure en Ange de lumiere, aussi iceux se sont transfigurez en ministres de Christ. Or si contre les autres assautz il est grandement besoing d'inuoquer Dieu en ayde, & diligemment regarder la pureté de la sainte Escriture, & d'estre soingneusement admonestez & exhortez: il est icy tresgrandement necessaire. Et faut sur tout aduiser, que les vrayz fondemens de la verité ne soyent abbatuz ny ébranlez, par la cautelle de telz garnemens, qui ne taschent que deceuoir nostre simplicité, & nous retirer de Christ & de sa Parolle. Parquoy au nom du Seigneur Iesus, ie vous prie mes treschers, que demouriez fermes, & que par aucune apparence de personne qui vienne, ne par chose qu'on songe ny ameine, ne laissiez la pure verité de Dieu.

2 Cor. 11.

Vous sauez comment le Pere tout-puissant, tout bon, sage, & parfait a créé le ciel & la terre, & tout ce qui est contenu en iceux: & n'a rien créé que tout n'ait esté créé bon & vtile. Et singulierement il a créé l'homme en singuliere bonté, iustice, & innocence entre toutes les creatures, qui sont souz le ciel, le faisant & formant à son image & semblance, & luy donnant la seigneurie sur les choses qui sont icy bas: afin qu'il recogneust celuy qui l'auoit ainsi créé & magnifié, en luy obeyssant & gardant le saint commandement qu'il luy auoit

Gen. 1.

Eccl. 17.

Gen 3.

donné. Mais par l'enuie du diable vieux serpent, la femme que Dieu auoit donnée à l'homme, & prinse & formée d'iceluy, a esté tellement seduite, qu'elle a transgressé le commandement de Dieu, & l'a fait transgresser à son mary : qui par sa transgression & desobeissance s'est ruyné soy mesme, & toute sa posterité & race, perdant iustice, innocence, & tout bien & salut. Car par ceste desobeissance au lieu d'aymer, cognoistre, seruir, honorer & ouyr Dieu, estant ioyeux de s'approcher de luy & entendre sa parolle, il a conceu vne hayne & mescognoissance de Dieu telle & si grande, qu'il ne craind rien plus que d'ouyr la voix de Dieu, de se trouuer deuant la face de son Createur. Car pour son peché qu'il a commis, il se sent & cognoit estre nud, il s'enfuyt de deuant Dieu, se cache, & ne peut porter sa voix ny attendre sa venue : mais tasche de s'esslongner de Dieu : il accuse sa femme, comme voulant iecter la coulpe sur Dieu, qui luy auoit donné la femme. Et tel qu'est Adam & sa femme, telz sont à cause de ceste desobeissance, tous les enfans qui viennent d'iceux. Et n'y a moyen pour sortir de ceste malheur & iniquité, mort & damnation, fors que par l'obeissance, iustice, & sainteté de Iesus Christ, qui pour nostre salut est descendu du ciel, & a prins nostre chair au ventre de la vierge Marie, fait vray homme, comme il estoit vray Dieu, pour satisfaire en son corps pour nous, portant noz pechez & iniquitez en la croix. Or en estant en Iesus Christ, vniz & conioinctz en luy par son

sainct Esprit : participans de luy, nous sommes par la vertu du sang precieux de ce bon Sauueur, purgez & lauez de noz pechez, de toute nostre iniquité & peché en quoy nous auons esté conceuz & naiz : & sommes faictz participans de la iustice, innocence, & pureté de Iesus : tellement que tout ce que Iesus a fait, nous est conté & tenu comme si nous-mesmes l'auions fait : ainsi que ce bening Sauueur se mettant pleige & respondant pour nous, il paye & satisfait pour nous, en ce qu'il a esté frappé pour noz pechez, comme si luy-mesme les auoit commis & faictz : & ce que nous tenons d'Adam, est osté de nous, & ne vient plus en estime deuant Dieu. Car la grace & don que nous auons en Iesus, & par Iesus, est trop plus grande & vertueuse pour nous sauuer, que n'est le peché & transgression d'Adam pour nous damner. Et plus a de vertu l'obeissance de Iesus en salut & vie, que la desobeissance d'Adam en mort & damnation. Et comme en verité la corruption & damnation d'Adam besongnoit en nous en mort, ainsi la purété & salut de Iesus besongne en nous en vie. Parquoy l'Euangile nous proposant Iesus, nous enhorte à laisser & abandonner le vieil homme, & despouiller le vieil Adam avec toutes ses affections, & recourir à Iesus, & le receuoir pour estre vestus d'iceluy, & estre plantez en luy, voire mesme pour estre nourriz de luy, & en luy seul nous arrester, & prendre tout de luy. Et en cecy n'est requise l'imitation seule de Iesus, mais la vraye possession des biens de Iesus, sans lesquels

Apoca. 1.

La comparaison
de Iesus Christ
& d'Adam.

*Rom. 5.**Eph. 4.*

nous sommes tous pources, perduz & damnez. Ayans donc despouillé ce qui est du vieil homme, & vestu le nouveau, & taschant de iour en iour de plus en plus despouiller tout ce qui reste du vieil homme, & d'estre plus renouuellez en Iesus, & d'estre vestuz d'iceluy : ne faut penser qu'un tel bien que nous auons par foy, & que la grace du saint Esprit que nous auons receue, nous face oisifz : & que celui qui a tout créé, & a commandé que ses creatures besongnent, & ayent leur œuvre & operation comme leur a esté ordonné : qu'en nous creant en Iesus, nous renouellant & faisant nouvelles creatures, qu'il ordonne & veuille que nous soyons inutiles, & que deuions demourer sans rien faire comme choses mortes, sans vie & sans esprit. Cicy ne faut penser. Car combien que nous soyons mortz à peché, toutesfois nous viuons à iustice. Et pourtant par ce bien & ceste grace qu'auons receue, il faut cheminer és œuvres que Dieu a commandées, & fuir celles qu'il a defendues, ainsi que sa sainte loy porte : & garder bien de tirer ny à la dextre ny à la senestre : mais faut tenir le droit chemin, qui nous est proposé en la sainte loy de Dieu. Et ne faut que aucun soit si presomptueux, qu'il pense du tout estre despouillé du vieil homme, tellement qu'il n'ait plus en luy aucun peché, ny aucune affection de peché, & qu'il iuge de soy d'estre tant parfait & consommé en toute iustice & sainteté, qu'il n'y ait rien à dire, & qu'il ne soit besoing que le peché de plus en plus soit dechassé & destruit, & que la iustice &

saincteté n'ait besoing d'estre accreue & augmentée. Car non obstant que la iustice de Iesus soit parfaicte & consommée, & que par foy elle nous soit communiquée, autrement iamais ne pourrions subsister deuant le iugement de Dieu : neantmoins la foy par laquelle nous apprehendons & receuons ceste iustice & Iesus avec ses biens, n'est iamais en ce monde en telle perfection, qu'elle n'ait besoing d'accroissement. Et pourtant les fruietz de ceste foy sont selon la grandeur d'icelle : & selon l'imperfection de la foy, le peché est & besongne en l'homme. A cause dequoy tous auons mestier de crier, & ardamment demander avec les Apostres, & avec le pere du demoniaque : Seigneur, augmente nous la foy : nous croyons, Seigneur, ayde à nostre incredulité. Et tous qui sommes en ceste vie deuons confesser que nous sommes tous en general & chacun particulierement pecheurs, & deuons vn chacun demander mercy à Dieu continuellement de' noz propres pechez. Et afin que nous ne nous seduisions point, pensans faire tout bien, & ne pouuoir faillir, il nous faut regarder non point nostre iugement, ne ce qui est en nous, qui n'est encore du tout changé ne parfaict : mais il faut regarder à la loy de Dieu sainte, pure, & parfaicte, & demander l'ayde de nostre bon Pere, pour l'ensuyure. Et gardons bien de nous flatter, comme s'il nous estoit loysible de viure selon ce que nostre iugement porte. Comme de se conformer à la maniere de ceux avec qui nous viuons : ie ne dy point seulement de sentir & ingier comme ilz

*Luc 17.**Marc 9.**1. Io. 1.*

Il ne faut pas
viure avec les
viuans.

font en leur cœur : mais aussi de ce qu'ilz font exterieurement pour service de Dieu, que de ce nous nous gardions. Et ne pensions point, que les choses externes, que Dieu a defendues soyent indifferentes, & que n'en deuions faire aucune estime, mais faire comme les autres : comme de s'encliner deuant les images, moyennant que le cœur n'y soit point : parler comme les autres, combien que les parolles soyent au deshonneur du nom de Dieu : monstrier qu'on garde la feste du Diable exterieurement, comme les autres, pourueu que le cœur n'y soit point. Et ainsi des transgressions externes & visibles des autres commandemens de Dieu : qui comme de cœur il demande vraye obeissance ; ainsi veut-il que ceste obeissance se monstre par œuvre, en faisant ce qu'il commande, voire quand tout le monde se mettroit au contraire, nous deuons faire ce que Dieu a commandé. Comme si tout le monde me vouloit empescher de prendre le saint baptesme, ou de presenter mes enfans pour estre baptisez, ie ne doy regarder la defense humaine : mais obeir à Dieu, & ouuertement confesser que ie suis à Iesus, en receuant ouuertement, s'il m'est possible, ceste sainte ordonnance. Aussi pour rien qui soit, ie ne doy laisser d'ouyr la Parolle de Dieu, ny de receuoir la sainte Cene de nostre Seigneur, ne de prier en la sainte assemblée de Iesus. Comme ie suis tenu de cecy faire, voire clairement, & ne craindre les hommes : aussi doy-ie fuir ce que Dieu a defendu. Car comme ie doy confesser ouuertement Iesus & son Euangile :

aussi

aussi doy-ie ouuertement renoncer l'Antechrist & sa doctrine diabolique. Et d'autant que ie ne le fay si ouuertement & promptement, ny en telle perseuerance & constance, que ie doy: ie me doy recognoître poure pécheur deuant Dieu, & crier mercy, & demander son ayde, pour pouoir aller plus droitement ainsi qu'il commande. Et n'y a eu personne des enfans de Dieu, combien qu'il ait trauaillé à suyure les sainctz commandemens de Dieu, d'ame, de cœur, d'esprit, & de corps, & du tout s'y employer, & qui ait tasché en toute sorte de fuir tout ce qui est contraire, & n'ait voulu ne faire, ne dire, ne penser contre la loy de Dieu: qui toutesfois en regardant la grandeur de Dieu, & sa bonté & misericorde, de laquelle il vse enuers nous, & combien nous sommes tenuz & obligez à luy seruir, & considerant la perfection que la loy demande, qui surmonte les cieux, & sentant l'imperfection que le poure homme a en soy, quelque don & grace qu'il ait receue, par laquelle tant s'en faut qu'il soit exempt de seruir & d'obeir à Dieu, que plus il est redeuable: que cecy considerant, en ceste vie n'ait soupiré & gemy pour ses fautes, & qu'il ne se soit tousiours recogneu poure pecheur, & au nom du Sauueur & Redempteur Iesus n'ait demandé mercy au Pere. Et à telz, Iesus est Sauueur: tous telz sont les lassez & trauaillez, que Iesus appelle pour venir à soy, & leur promettre soulagement, & le donne aussi. Car non seulement ceux cy qui de tout leur cœur taschent à seruir à Dieu, & s'y employent, deman-

Math. 11.

dans mercy au Pere au nom de Iesus, de ce qu'ilz defaillent, l'obtiennent: mais aussi tous ceux qui au parauant ont tresmal vescu, & qui estans des-plaisans de leur vie, en la confiance qu'ilz ont en Iesus crient mercy, ilz sont exaucez. Comme au contraire tous qui se plaisent en leur vie, & qui n'ont regret de rien, & pensent n'auoir besoing de la grace & misericorde de Dieu: quelz qu'ilz soyent, sont tous en estat de perdition & detestables deuant Dieu.

Je croy, mes freres, que par la grace de Dieu vous auez tellement profité en sa parolle, tant par la lecture de la sainte Escriture, comme par l'ouye de l'Euangile, & singulierement par ce que le saint Esprit vous monstre & fait entendre par les moyens qu'il a ordonné: que vous croyez qu'il est ainsi, & y perseuererez, aydant Dieu. Et n'y a personne qui ait autrement escrit ne tenu, qui soit digne d'aucune reputation. Les Papistes ont bien dit, qu'il y auoit de si parfaits & tant excellens en sainteté, que non seulement ilz en auoyent assez pour eux, pour gagner paradis: mais aussi qu'ilz en auoyent à reuendre tant & plus, pour les autres. Mais vous, par la grace de Dieu, ne cognoissez autre parfait, que Iesus, auquel seul vous vous arrestez & tenez par foy: en quoy ce bon Pere eternal vous doit grace de perseuerer, & à tous les siens. Amen.



TESTAMENT DE GVILLAVME

F A R E L.

PARCE que le deuoir de tous Chrestiens est non seulement d'edifier durant leur vie par bons exemples, & nourrir paix avec leurs prochains : mais aussi mettre peine qu'apres leur mort, la mesme paix & concorde soit entretenue & nourrie, & ainsi laisser bons exemples, dont chacun soit edifié : à ceste fin Guillaume Farel Ministre de la parole de Dieu se sentant abatu de maladie quant au corps, & ne sçachant quand il plaira à Dieu de le retirer de ce monde, apres auoir inuoqué le nom de ce bon Dieu, le priant qu'il lui plust l'adresser par son esprit en vraie prudence & droiture, a fait telle declaration de sa derniere volonté, comme s'ensuit.

Premierement, apres auoir reconnu la misericorde que Dieu lui a faite non seulement pour ce qu'il l'a mis au monde & entretenu comme sa creature, mais sur tout de ce qu'il l'a racheté par le sang de son Fils, de la malediction sous laquelle le genre humain est enclos : & puis en le retirant des horribles tenebres de la Papauté, l'appellant à la cognoissance de son Eglise : il se confesse estre

plus redeuable à ce bon Dieu, qu'il ne peut exprimer: & toutesfois qu'il a esté vn pource pecheur qui ne s'est gueres bien acquitté de son deuoir d'honorer vn si bon Pere: mais en plusieurs sortes s'est rendu indigne de tant de biens qu'il auoit receu de luy. Parquoi il n'a autre refuge qu'à ceste bonté infinie, qui est tousiours presté à receuoir les pecheurs à mercy. Au reste ayant confiance que ce Pere des misericordes lui sera propice, au nom du Seigneur Iesus, il se remet entre ses mains & le supplie qu'il recoiue son ame: & comme il l'a eue iusques ici en sa protection, qu'il en soit fidele gardien iusques à ce qu'elle soit reiointe à son corps au iour de là resurrection. Et afin que ce bon Dieu l'accepte & l'aduoue pour l'un des siens, il proteste de se tenir tant à la vie qu'à la mort en l'union du corps de Iesus Christ, par la foi qu'ont tous les fideles en l'Euangile. Et d'autant que Dieu non seulement lui a fait la grace en le retirant des abismes de la papauté, de le faire membre de son Eglise, & l'unir à son troupeau: mais aussi de se seruir de lui à porter sa parole, & l'ordonner Pasteur de son Eglise, il proteste que la doctrine qu'il a enseignée aux autres, il la tient pour la pure verité de Dieu & le fondement de son salut. Et ayant pleine assurance que Dieu l'aduouera pour tel, il se propose & dispose à comparoistre deuant le throne de sa maiesté, desirant que tous ceux qui ont esté enseignés par son moyen aient ce tesmoignage que fidelement & en bonne & pure conscience, il leur a annoncé ce qu'il auoit

receu d'enhaut, & que ceste confession par laquelle il ratifie la foi qu'il a tenue serue aux suruiuans commē d'une signature de son ministere & de sa charge qu'il lui a commise. Au reste sçachant bien qu'il s'en est beaucoup falu qu'il se soit acquitté pleinement pour satisfaire à vne si sainte vocation, & si digne, il demande pardon à Dieu de ce qu'il n'a pas respondu à son office, en tout & par tout : esperant qu'au nom de Iesus Christ, Dieu ne laissera point d'auoir le seruice qu'il lui a rendu pour agreable, suppleant aux fautes & infirmitiez infinies qui sont interuenues. Quant à son corps, il demande & ordonne qu'il soit enterré au cimetiere de l'église de Neufchastel iusqu'à ce que Dieu au dernier iour, en le retirant de la pourriture de la terre, le ressuscite en la gloire du ciel. Touchant le peu de biens que Dieu lui a laissé de reste, afin que nul n'en prenne occasion de querelle ni debat, il declare en premier lieu, puis que Dieu lui a donné ses deux freres, à sçauoir Gauthier & Claude Farel, qu'en les nommant ses heritiers, selon qu'il veut obseruer l'ordre de nature, il les prie & exhorte au nom de Dieu de se contenter du nom & titre d'heritiers, ayant declaration de l'amour fraternel, qu'il leur porte, & qu'ils ne desirent ni conuoient point de s'augmenter, ni auoir profit de tant de peu de bien que Dieu a mis en sa disposition, attendu mesme qu'il n'a point succédé aux biens paternels de leur maison commune : mais leur a laissé ce qui lui pouoit appartenir, comme à present il leur quitte & cede,

les instituant par esgale portion ses heritiers de ce qui leur est escheu de droit en la succession de leur pere & mere. Cependant le plus grand heritage & le plus riche qu'il leur puisse laisser, est de leur commander paix & concorde entr'eux : & s'ils desirerent d'estre tenus de lui pour freres, il les requiert & adiure entant que besoin est, au nom de Dieu, d'euitier toutes querelles & differens, ne donnans point lieu à Satan pour estre diuisez l'un d'avec l'autre & n'ouurans la bouche aux detractions pour blasphemer contre l'Euangile.

Quant à ses liures, il veut & ordonne, que la quatrieme partie soit à la Bibliotecque commune des freres de la Classe, & que les trois autres parties soient aux enfans massés de son frere Gauthier, & à Monsieur Gaspard Carmel, en le comprenant avec lesdits enfans pour vne teste.

Du reste qui sera trouué & qui lui peut appartenir tant en argent qu'en meubles, il en donne & legue la troisieme partie aux pources, & sur tout aux domestiques de la foi, & ce à l'aduis & distribution des freres de la Classe, auxquels il en donne toute charge, voire d'en disposer là où ils aduiseront estre bon. Et le reste, il le laisse à ses deux heritiers ci dessus nommez, avec la charge de payer & acquitter ses debtes s'il s'en trouue. Sur tout il veut & ordonne que ce testament soit tenu pour bon & valide, desheritant & debouttant de tous ses biens ceux qui le voudroient rescinder ou y contreuenir en sorte que ce soit. Et que son dit testament vaille & doive valoir par

droit de testament nuncupatif, ou par droit de testament à cause de mort, ou s'il ne vaut selon les canoniques statuts, qu'il vaille ou doive valoir selon les bons vsages & coustumes dudit comté de Neuschastel, ou par les meilleures formes : en reuoquant tous autres que par ci-deuant pourroient auoir esté faits tant par-escrit qu'en presence de gens. Fait le mercredi quinzieme iour du mois de mars, l'an mil cinq cens cinquante-trois, en la presence des scientifiques, doctes & sçauans Monsieur Iean Calvin Ministre de Geneue, Monsieur Christophle Fabri Ministre de Neuschastel, Monsieur Eurard Pichon Ministre de Dombresson, Monsieur Philippe Sarazin Docteur en medecine, les nobles & prudens Guillaume Cryde, & Adrian de Briquenaux à present residant à Geneue, & plusieurs autres tefmoins à ce requis & specialement à ce appelez.



CINQ LETTRES DE GVIL- LAUME FAREL.

1. A la Classe de Neuchâtel.

L'année 1561 sembloit ouvrir à la Réforme en France une ère de prospérité; aussi vit-on arriver à Genève & à Neuchâtel un grand nombre de députés, qui venoient demander avec instance des ministres, pour annoncer l'Evangile dans des Eglises privées de pasteurs. Il en vint, entr'autres, de Gap, de Vienne & de Macon, demandant Farel & Fabri. Farel partit pour Genève, afin d'y consulter Calvin. C'étoit le dimanche 1. novembre; il étoit alors dans sa 73. année. Entre Neuchâtel & Serrières, il rencontra deux frères députés, qui lui remettent une lettre de Calvin, dans laquelle celui-ci lui annonce que les Maconnais le désirent. Farel s'entretient avec eux, & entre à l'auberge de Serrières pour écrire, au pied de la lettre de Calvin, quelques mots à la Classe, lui demandant de consentir à ce qu'il suive le conseil que lui donneront les frères de Genève; puis, remettant la lettre au député Rychèle, il continue sa route pour cette ville.

Voici cette lettre, écrite au revers de celle de Calvin, & datée de Serrières :

S. Habui obuium optimum fratrem cum eo quem mittit ecclesia summe flagitans fratrem sibi dari. Contrulimus paucis de iis quæ fufius audietis. Precibus valde est opus, ne quas nobis concedidit Deus ecclesias desolemus. Sorculus quam fit nobis necessarius nostis. Hoc fratre quo modo carere possumus? Nec minus curandum est ne in Deum & ecclesias tales ac tantas peccemus, si progressum Euangelii & qui palam est fructum remoremur, ita si mordicus nostra retineamus. Mature hic omnia sunt dispicienda vt secundum Deum fiant omnia. Quod ad me attinet, admiror ea quæ Deus proponit per hos, cum omnes dissuadeant transi-
tum per Cameracum ob ducem tam infensum vt dicunt

dicunt mihi & montium asperitatem & rigorem hiemis qui apud nos durior est, hic ecclesiæ nomine offert ut via commodiore licet longior sit possim ad nostros tandem deduci ubi aliquandiu apud eos hæserim, multum me mouet cum persuasione fratris Caluini consilium. Sed hic nihil præter vestrum consensum volo agere. Si vobis probatur ut consilio fratrum qui Genevæ docent agam, indicate & præfectum salutatam horum consciium facite, ob eos quos oportet ne leuitatis arguamur, sed pateat nos in sancto perseverare proposito, de sequendo Geneuensium consilio, cum norint quid Gallicis ecclesiis expediat. Valete fratres. Christus Iesus suo vos plene Spiritu dirigat, vos feruet & ecclesias omnes, vestris & ecclesiarum precibus adunari opto. Ex diuerforio Sarrano. Calen. nouembr. 1561.

Vester Farellus.

II. A Christophe Fabri.

Arrivé à Genève, Farel écrit à son collègue Fabri le mercredi 4 novembre, pour lui exprimer combien il regrette que la Classe n'ait pu se réunir plus tôt, & pour lui annoncer qu'il attendra le député de Macon jusqu'au vendredi, ou au plus tard, jusqu'au samedi. Voici cette lettre à Fabri:

S. Expectamus, sed non admodum grata mora, quid vos sentiat, & utinam congregatio accelerata fuisset ac consensus vester fuisset ut nostros viderem, nam cum Nicolao nostro, qui nunc soluit, iuissem ac potuissem interesse Synodo vicinæ quæ in prouincia habebitur. Sed quod visum est Domino fiat. Cupio adiutum Matisconensem, ut

V.

si fieri possit hic sit Veneris, aut ad summum Sabbati; mora fratribus hic est valde grauis, sed mihi quam grauissima. Ideo maturet oro. Valde mihi displicet quod tandem huc inclinare omnes videam, vt meo consilio permittant quid agendum sit. Vellem enim simplicius dici Hoc age. Deus quod optimum est efficiat. Via nihil viribus detraxit, sed aucta sentio omnia, vnde spero Deum sua clementia effecturum vt in gloriam sui nominis successus sequatur. Iube nostros bono esse animo & Deum precari. Spero omnia quæ oportet me rescire per Matisconensem intellecturum. Iube omnes saluos esse. Quæ mittebantur per literas Pergii perferri hætenus non potuerunt. Hic perfert. Accipies tua & reliqua reddes vxori quæ semper purius pergat. Vale. Genève 4 nouembris 1561.

Tuus Farellus.

Christi seruo Christophoro Fabro patri & collegæ in munere euangelico valde charo. Neocomi.

III. *À la Classe de Neuchâtel.*

Farel demeure à Genève jusqu'au dimanche 8; mais, à midi, le Maconnais n'étant pas encore arrivé de Neuchâtel, Farel n'attend plus; il part, probablement avec Eynard Pichon, ancien pasteur de Dombresson, qui s'en alloit à Grenoble. A peine a-t-il quitté Genève que le messager maconnais y arrive, vers une heure après midi. Apprenant que Farel vient de partir, Rychèle envoie après lui, pour le faire revenir suivant le désir de la Classe; mais le vieillard, emporté par l'amour de la patrie, refuse de rebrousser chemin. Rychèle, désappointé, consulte Calvin &, d'après son conseil, marche toute la nuit pour l'atteindre, mais n'arrive qu'après son départ à l'auberge où il avoit logé. — Quant à Farel, il arriva à Gap le samedi 14, tard dans la soirée; & le lendemain, dimanche, il étoit déjà à l'œuvre, prêchant à une assemblée dont le temple ne contenoit que la moitié. La lettre suivante, du 13 décembre, raconte son activité; il l'a dictée successivement à deux secrétaires, dont le premier surtout a une fort mauvaise orthographe; Farel s'en excuse dans le post-scriptum écrit de sa main.

S. Quum Sabbato sub noctem appuliffemus, Die dominico a prandio, quanuis rogaffem vt mane id fieret, concionem habuimus frequentem in templo cui nemo præest, nyfi qui interdum Cappellanus missam cellebrat, qui clauēs dedit libere. Plures pene erant extra templum quam in templo, cūm locus eos cappare non posset. Syndici petierunt vt is, qui episcopi nomine præest, vt gubernator, cum suis curaret ne quis motus fieret. Quod effectum est. Lunæ prosequi sumus populo satis frequenti, & item die Martis. Sed a prandio vicebalius me vocauit, & id satis honorifice, misso primo Syndico & procuratore regio, per quos rogauit vt ad se venirem & ad eos qui illi assident. Quod feci. Et cepit editum regis mense Iulio emissum proponere & rogauit quo auctore, quo vocante, & quibus instantibus concionatus essem & id genus alia. Respondi ad singulla. Audita responsione quæ satis lenis fuit, prout ille reuerenter me conueniebat, secessi, vt ille cum assessoribus deliberarent: & tandem vbi reuocarent, rogauerunt vt tantisper supercederem a concionne, donec Senatum grannopolitanum & gubernatorem certiores fecissent. Respondi non esse mentem regis vt propter edictum predicatio euuangelii prohiberetur nec impedirentur ministri & pii quin agant & prediquando audiendo verbo quod decet pios. Idque satis textatum esse, cum ministros vocauit ad colloquium, qui pallam prediquant in aula, & in vrbibus plene omnibus aperte predicent. Ministri vt Luduni, & allibi passim, quanuis episcopi eos non admiserint.

Et tantum abest quin prohibeantur : quod potius magistratus incumbit : ne quis eos turbet. Et satis notum est, dum concio fit, magistratum cum fatalibus curare ne quis motus fiat, quod efectum fuit hic in prima contione. Rogavi vt mea & piorum conditio non esset deterior quam pastorum & piorum qui Luduni sunt & allibi. Plus satis pios fuisse in tenebris & extra viam abductos : non prohiberent lucem euuangelii illis proponi & viam veritatis ostendi. Multis actum est quibus moti sunt qui aderant. Et hoc adidi : me paratum esse in omnibus morem gerere. Sed in hoc non mouerentur, nec putarent me temere veri aliquid agere & studio contradicenti, si domino meo & ipsorum parerem, iubenti vt euuangelium anunciem, & quandiu vel duo fuerint qui me audiant, potius passurum mortem quam os contineam ne predicem. Reductus ab hiis qui me deduxerant & perexi de more. Die louis oblatu fuit puer batifandus, quod efectum est multorum ædificatione. Die Dominico bis contionatus sum sed frequentiori populo. Heri voce tubæ proclamata fuere multa quæ prius fuerant proclamata, prohibitos conuentus omnes & quod non nisi locis consuetis prædicetur, & restituerentur templa. Nos contionati sumus vt prius. Peracta contione, minister viceballiui cum literis illius me conuenit iussitque vt restituerem templum, cessarem a contione, & allia quædam. Petii exemplar literarum. Pii omnes fere adierunt vicebailium, fuscipientes causam. Queruntur de eo quod pergat ita vt omnia tendant ad

seditionem & tumultus mouendos, vbi omnia pacati fierent a nobis tum in contionibus, tum in aliis, & eum non debere ita moueri ob facellum quod omnibus est expositum, etiam ludionibus & histrionibus, & his qui negotiantur: eos esse obsequentissimos iussis regiis. Et protestati sunt si quid fieret contra voluntatem regis & edicta ipsius, ipsum esse autorem, petieruntque vt omnia quæ per ipsum acta fuerant ipsis in scriptis darentur, vt vice-gerentem certiozem redderent & alios quos oporteret: quibus ille annuit. Omnia missa fuere ad vice-gerentem gubernatoris Guisani in M. . . . Mot illisible.

qui non minus æquus fuit quam ipse vice-balliuus, & iterum rogatus eum se præstitit qui prius. Nos interea pergebamus, & ecclesia crescebat, accedebant & exteri. Tandem visum est supercedendum esse a facello, & dispositæ sunt ædes quæ olim fuere vxorum fratrum Gaucherii & Claudii amplæ satis & appositæ ad contiones audiendas, in quibus hodie puellam mei patruelis baptisauimus frequentiori populo. Existimo aduersarios nos passuros quiete pergere. Delecti sunt seniores duodecim, & in hoc sumus vt per singulas domos examinentur hi qui ad cœnam sunt admittendi. Nec puto hoc absolui posse toto hoc mense. Adiunctus est mihi Petrus Reinardus, qui diu egit Losannæ: is sub auroram breuem habet exhortationem cui frequentes adsunt quotidie, & dominicis diebus cathedram habet multa edificatione. Superest vt nos commendetis Domino & totam ecclesiam, & omnes qui suspirant ad verbum, quorum magnus

est numerus. Dominus pastores illis largiatur. Iubete omnes ecclesias precari pro nobis. Salutate Præfectum & Senatum & pios omnes. Pii vos salutant in Domino. Vapinci, 13 decembris 1561.

(P. S.) Boni consulite fratres quam charissimi si hæc variis manibus conscripta fuere, cœperam dictare per eum quem nancisci poteram, & cum sese appareret ad viam is qui Geneuam mittebatur volui, cum alius non adesset, opera ipsius uti, nam mox a prandio studendum erat, conciones quotidianæ nunquam intermissæ & visitatores multi ita me premunt, ut quod volebam per me non valuerim efficere. Valete.

Vester in Domino Farellus.

*Quam charissimis fratribus & symmytis decano & omnibus pastoribus
sancti curtus Neocomensis.*

IV. A la Classe de Neuchâtel.

Un peu plus tard, le 12 janvier 1562, Farel écrit encore à la Classe la lettre suivante (aussi dictée):

La grace du Seigneur vous soit donnée.

Mes tres chers freres, l'ay esté fort ioyeus d'entendre la veunue tant désirée de Monseigneur nostre Prince, & de Madame. Et de ce que toute la cour qu'ilz ont, est fort crestienne. Et de ce qu'on a propousé de pourueoyr à Cressi & au Landeron, de ministres: ce qu'on n'auoyt peu obtenir. Et aussi du Synode, qui est tant necessaire. Je desires fort que non seulement on prechat à ces deux lieux, mais que Monseigneur (comme prince chrestien) feist fere le proces des prebstres, qui tant

longuement ont (comme detestables ennemis de Dieu) batalhié contre la maieſté diuinne. Et quelque ſantance qu'a eſté balhiée contre eux & leur idollatrie, & quelque confeſſion qu'il ayt faiſt à part, & publicquement, en aprenant la doctrine de l'Euuangille, neanmoingz ilz n'ont iamays ceſſé de blaſfemer & renuerſer Ieſu Chriſt, ſa mort & paſſion, le ſainct Euuagille, & la foy creſtienne, plus que aucungz ſourciers & nigromentz, & toutz telz perſonages, deſquelz on faiſt punition exemplaire, ſellon tout droict. Et quant eſt enuers les hommes ſe ſont pourtés murdriers, & brigantz voire des ames, qui eſt plus que le corps, & des larrecins, il ne le fault dire, car ilz ſurpaſſent tout, veu qu'ilz ont deſfraubé ce que les pouures gentz n'auoyent pas, le faiſant emprunter des aultres, pour leur deſfrauber. Pourtant de ma part, comme i'en-ey demandé iuſtice tant de foys, ie vous prie toutz, que vous en demandiés iuſtice, comme inſtamment ie la demande. Et ie croys que noſtre Seigneur a donné tant de grace à Monſeigneur qui ne vous eſconduyra poinct, qu'il n'en face fere bonne iuſtice, car telz miſerables perſonaiges n'ont excuſe aucune, ne d'ignorance, ne de choſe aucune qui les puyſſe releuer. Quant au ſinode, ie vous prie que vous tachés enuers Monſeigneur que noſtre frere Calvin y ſoyt appellé : & pence que facilement l'obtiendrés : & par ce moyen pourés plus facilement obtenir tout ce qui ſera expediant pour le ſainct miniſtere, la diſcipline de l'Egliſe & tout ce qui fault, & que noſtre Seigneur face par

Calvin ne put y
aſſiſter.

sa grace. Quand à moy, si vous demandés que ie y foye present, deuant Dieu ie vous testifie, qu'il n'y a chose que ie desire tant, & n'y a presse qui m'eyt tant angoyté que celle que ie sens en recepuant les lettres enuoyées à vostre nom de toutz : & voyant l'estat de ceste Eyglise, s'il y a personne sur la terre que ie desire veoyr, c'est Monseigneur, nostre Prince, desirant tant luy fere la reuerance, & ce que i'ey désiré enuers toutz nous inciter à de plus en plus seruir à Iesu Christ. le ne parle de Madame, laquelle ay veu en telle presse, quand elle ouyt la prinse de Monsieur, lequel par la grace de Dieu elle veoid desliuré non seulement d'vne telle captiuité, mais d'vne plus grande sans compareyson, de la tiranie papalle, & estre à vne liberré que plus grande ne se peult demander. Et quant à vous, mes freres, vous saués combien i'estimes vostre aduis sans lequel en ce saint ministère n'ay rien faict, & ne veus fere. Et vous scaués en quelle extime i'ey heu & ey de present comme Dieu scait, l'Eyglise que Dieu m'a comise, & toutes celles du pays. Mais ie veoy la necessité de ceste Eyglise & cella qui depend d'ycelle que ie ne puy (si ie ne veus batalhier contre Dieu, & de tout contreuenir à ma consience & trahir l'Euuangille) l'abandonner & laiser qu'il n'y soyt pourueu voyre d'home, autre que moy, & plus puyssant en tout. le en ay script à nostre frere Calvin, desirant pour aucun temps iusques à ce que ie puyssse retourner, qu'il en enuoyat aucun, & crains fort que ne le puyssse obtenir. D'en-
tre vous

tre vous ie n'en voy point que ie puyſſe demander, veu que maistre Maturin¹ est enuoyé à Sens par vostre consentement, & suys esbaï comment auant que ie feusse de retour vous aués eslu mon frere maistre Christofle², pour Chasteau d'vn. le suys fort ayſe qu'aués esleu maistre laques Saurel³, mais ie ne ſay ſi le porrés reauoyr. le n'ey rien entendu de la Bonne Ville ne des autres fors de Saint-Aubin & de Boudri. le vous aués ſcript pour ceulx de Veynes & de Serres, qui demandoyent maistre George Laurent⁴. le n'en ey rien entendu, ie ſpere que vous y aués regardé & proueu. l'ey eſté fort esbaï, que puyſ que suys de par deça n'ay heu aucune letre, ne nouelles de vous, ſi non ce que maistre Maturin a eſcript. Mais il m'auient ainſi ce dequoy ie deſire le plus, ie n'en oys rien. Vous en pouués parler à maistre Noé⁵ & à aultres qui m'en deuiroyent aduertir. l'ey eſcript pluſieurs foys, mais ie n'ay point de reſponce. le vous ſupplie preſenter mes humbles recomandations à l'excellance de Monſeigneur & de Madame, & auſſi ſalluerés Monſieur le Gouverneur, & Meſſieurs les Quatre, tout le Conſeil, & toute l'Eygliſe. Vous recomandant à la grace du Seigneur

¹ Mathurin de la Broſſe, paſteur à Motiers-Travers, où il avoit ſuccédé à Gaſpard Carmel; homme diſtingué, doyen de la Claſſe en 1559. Il partit pour Sens à la fin de décembre 1561. — ² Chriſtophe Fabri, collègue de Farel à Neuchâtel, ne partit pas pour Chateaudun, mais ſe rendit à Vienne en Dauphiné, ſa ville natale, à la fin de février 1562. Il devint la même année paſteur à Lyon. C'eſt là que Farel lui adreſſa la lettre V. — ³ Jacques Sorel, paſteur de Boudry, partit pour Troyes. — ⁴ George Laurent, neveu d'Antoine Héraut, paſteur à Engollon juſqu'en janvier 1561, avoit été auparavant à Iſſoire, en Auvergne. — ⁵ Noël Torel ou Thorel, qui fut plus tard à Lignièrès (1563), étoit alors maître d'école à Neuchâtel.

qui vous benisse, conserue, & garde, & toutes les
Eyglishes, & fasse prosperer vostre saint ministere.
De Gap ce 12 de ianuiier.

Votre frere Farel.

A mes tres chais freres de la Ste assemblee de Neufchâtel, à Neufchâtel.

V. Farel à Christophe Fabri.

Salut en nostre Seigneur Iesus! Combien que
n'ay certainement entendu le trespas de nostre
tant cher & tant necessaire frere Calvin, neant-
moins aucun bruit qu'on a fait & l'estat ou le
laissay me presse grandement. O que ne suis ie
en son lieu retiré, & que luy tant vtile, tant ser-
uant, n'est en santé ici, longuement seruant aux
eglises de nostre Seigneur! Lequel soit benit &
loué que, de sa grace, là ou ie n'y auoie iamais
pensé, me l'a fait rencontrer, & contre ce qu'il
auoit deliberé, l'a fait arrester à Geneue & s'en
est seruy là, en autre part: estant pressé d'une part
& d'autre plus qu'on ne sauroit dire, & singulier-
ement par moy qui, au nom de Dieu, l'ay pressé
à fere & prendre les affaires qui estoient plus durs
que la mort. Et combien qu'il priaist aucune fois,
au nom de Dieu, d'auoir pitié de luy & le laisser
seruir autrement à Dieu, comme tousiours il s'y
est employé, neantmoins voiant que ce ie de-
mandoie estoit selon Dieu, en se faisant violence
il a plus fait & plus promptement que personne
aie fait, surpassant non point les autres seulement,
mais soy mesmes. O qu'il a couru heureusement

vne belle course! Le Seigneur face que nous tous courions selon les graces qu'il nous fait, comme il a fait.

le suis en crainte non petite pour ceste Eglise¹, oyant les propos qu'on tient, & s'il est vray, comme l'on dit, que celuy qui surpasse tous qui sont sur la terre en mal & meschanceté², est aupres du roy & de sa mere, qui (au contraire des seruiteurs de Dieu, lesquelz pour seruir à Dieu recourent à luy, en luy demandant secours, conseil, ayde & adresse), demandera non seulement vn diable & maling esprit, sans lequel il n'a iamais esté que mesme il n'en ait eu plusieurs, mais recourant au prince, il demandera iceluy & tous les mauuais esprits, pour auoir conseil, ayde & vertu à bien seruir Satan, à maintenir & entretenir toute malediction, & destruire ce qui est de Dieu. Et si nostre Pere ne regarde en nous en pitié & lasche la bride à Satan, qu'est ce qu'il ne fera?

Helas! nous voions comme, des le commencement, l'Antechrist a ouuré le mystere d'iniquité, & ou est venu tout le monde par vne iuste vengeance de Dieu, pourtant qu'on n'a eu la droicte charité de verité, mais qu'on a aymé iniquité & mensonge. Maintenant ou la verité ne fait que commencer, que fera il? O que ce meschant diable, qui pire que mille Balaam au poure roy³, pour le fere reuolter de l'Euangile, a trouué moyen de le lier en paillardise, qui perdant le sens, abusé

¹ L'Eglise de Lyon. — ² Le cardinal de Lorraine. — ³ Antoine de Bourbon, roi de Navarre.

par vaines promesses, est venu à vn comble de maledictions, que c'est chose tresespouantable, se ioignant & consentant à ceux que ce diable auoit endiables pour surpasser tous qui se sont dressez contre l'Euangile. Et on dit que le frere¹, qui a veu vne telle vengeance de Dieu contre ce pource paillard, apres auoir fait promesse de vouloir viure en l'Euangile de Iesus Christ, auoir donné la foy, auoir receu la sainte Cene de nostre Seigneur avec les fideles, a les yeux tellement bandez qu'il ne voit le conseil de Balaam en la maudicte paillarde avec laquelle, comme l'on dict, il commet adultere, faisant blasphemer le nom de Dieu, l'Euangile, & n'a aucune craincte du iugement aduenu sur les enfans d'Israël, sur mesme le grand seruiteur de Dieu, Dauid, en quel abysses il est tombé pour vne femme conuoitée & congneue. Mais qui considerera ce qui est aduenu au frere, il passe tout. Dieu aie pitié de tel personnage & lui ouure les yeux, qu'il congnoisse que c'est d'ainsi contreuenir à Iesus & viure contre le saint Euangile.

Et touchant d'icy², ie prie ce bon Dieu & Pere, qu'il ait pitié de tant qui sont autrement que ne porte la pure Parole de Dieu : les vns, sachans bien comment la papauté est toute detestable, & congnoissans que Iesus seul doit estre ouy & seruy, & neantmoins ils se souillent es abominations papales & de faict renoncent Iesus & l'Euangile : les autres tant mal viuans, prouocans l'ire

¹ Louis de Bourbon, prince de Condé. — ² Neuchâtel.

de Dieu, qui de sa grace aie pitié de tous, & au lieu de nous punir, en nous ostant ce qu'il nous a donné, nous mettant en la servitude cruelle des ennemis de l'Euangile, il face que deliurez de la main de noz ennemys, nous luy seruions en sainteté & iustice.

Le ne doute point que le Prince¹ ne parle avec vous, & n'est ià besoing que ie vous prie de le toucher en son salut. Pleur à Dieu, que tous en feissent ainsi leur deuoir. Le ne say si vous auez veu monsieur le maistre Vulpian², & auez entendu comment on procede ici tant contre Dieu, & pour empeschier tout qui est pour le bien de l'Eglise. Quand est de Monseigneur nostre Prince qui ne voit comme tout va (somme c'est de meller tout), ie vous prie, s'il y a moyen de fere qu'il y ait ordre meilleur, que vous y employez.

Le prie le Seigneur vous conseruer & tous. le ne sçay comment ay peu ceci escrire. Saluez maistre Pierre³, sa femme & filles en nostre Seigneur, la vostre & tout vostre mesnagé. Saluez tous les pasteurs en nostre Seigneur, sans oublier M. Dauid⁴. Tous ceux de la maison vous saluent, ma femme Marie. De Neufchastel, ce 6 de iuin 1564.

Vostre frere Farel.

A mon tres cher frere & meilleur amy M. Christophle Fabri à Lyon.

¹ Léonor d'Orléans, duc de Longueville & comte de Neuchâtel. Il étoit sur le point d'abjurer le protestantisme & l'abjura en effet l'année suivante. — ² Gentilhomme françois qui venoit souvent dans le comté de Neuchâtel pour les affaires du duc de Longueville, dont il étoit le maître d'hôtel. — ³ Pierre Viret, qui, après avoir rétabli sa santé par un séjour à Nîmes & à Montpellier, avoit accepté un appel de l'Eglise de Lyon (mai 1562). — ⁴ David Chailet, de Neuchâtel, collègue de Fabri à Lyon.



T A B L E.

Au Lecteur. p. V.

DV VRAY VSAGE DE LA CROIX DE
Iesus Christ, & de l'abus & de l'idolatrie commise
autour d'icelle: & de l'autorité de la parole de
Dieu, & des traditions humaines. p. XV.

Preface du traité sur l'Oraison dominicale.
p. 159.

Epistre à tous seigneurs, & peuples & pasteurs
à qui le Seigneur m'a donné accez, qui m'ont aidé
& assisté en l'œuvre de nostre Seigneur Iesus, &
euers lesquels Dieu s'est seruy de moy, en la pre-
dication de son saint Euangile. p. 162.

A mes tres chers freres en nostre Seigneur tous
les amateurs de la sainte Parolle. p. 187.

Confession de la foy, laquelle tous bourgeois
& habitans de Geneue & subietz du pays doibuent
iurer de garder & tenir. p. 195.

Sommaire: c'est vne brieue declaration d'au-
cuns lieux fort necessaires à vn chacun Chrestien,
pour mettre sa confiance en Dieu, & à ayder son
prochain. p. 206.

A tous cueurs affamez du desir de la predica-
tion du saint Euangile, & du vray vsage des Sa-
cremens. p. 242.

Aux Eglises de nostre Seigneur, & à tous Chrétiens, pour auoir aide & confort en la necessité & famine de la Parole de Dieu. p. 272.

Forme d'oraison pour demander à Dieu la sainte predication de l'Euangile & le vray & droit vsage des Sacremens. p. 278.

Le Glaue de la Parolle veritable, tiré contre le Bouclier de defense : duquel vn Cordelier Libertin s'est voulu seruir, pour approuuer ses fausses & damnables opinions. *Epistre.* p. 289.

Testament de Guillaume Farel. p. 299.

Cinq Lettres de Guillaume Farel. p. 304.





35066168

DV VRAY VSAGE
DE LA CROIX DE
Iesus-Christ

Par
GUYLLAUME FABRI
Suisvi de Diverses Lettres de même
nature



Paris chez les Libraires
chez la Compagnie des Libraires
chez la Compagnie des Libraires



